

春秋毛氏传

毛奇龄

文硕阁

wenshuoge.com

目录

关于我们	4
目录	6
卷一	11
卷二	17
卷三	22
卷四	29
卷五	37
卷六	45
卷七	52
卷八	59
卷九	71
卷十	79
卷十一	87
卷十二	96
卷十三	105
卷十四	109
卷十五	121
卷十六	130
卷十七	138
卷十八	149
卷十九	159
卷二十	172
卷二十一	182
卷二十二	193
卷二十三	203
卷二十四	216
卷二十五	226
卷二十六	234
卷二十七	241
卷二十八	251
卷二十九	261
卷三十	271
卷三十一	280
卷三十二	288
卷三十三	297
卷三十四	305

卷三十五		316
卷三十六		324

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

目录

钦定四库全书 经部五

春秋毛氏传 春秋类

卷一

总论

卷二

隐公元年

卷三

隐公元年二年

卷四

隐公三年至五年

卷五

隐公六年至十一年

卷六

桓公元年至四年

卷七

桓公五年至八年

卷八

桓公九年至十八年

卷九

庄公元年至八年

卷十

庄公九年至十六年

卷十一

庄公十七年至二十五年

卷十二

庄公二十六年至三十二年

卷十三

闵公元年二年

卷十四

僖公元年至十年

卷十五

僖公十一年至二十年

卷十六

僖公二十一年至二十七年

卷十七

僖公二十八年至三十三年

卷十八

文公元年至六年

卷十九

文公七年至十八年

卷二十

宣公元年至八年

卷二十一

宣公九年至十八年

卷二十二

成公元年至七年

卷二十三

成公八年至十八年

卷二十四

襄公元年至八年

卷二十五

襄公九年至十二年

卷二十六

襄公十三年至十七年

卷二十七

襄公十八年至二十四年

卷二十八

襄公二十五年至三十一年

卷二十九

昭公元年至九年

卷三十

昭公十年至十七年

卷三十一

昭公十八年至二十四年

卷三十二

昭公二十五年至三十二年

卷三十三

定公元年至七年

卷三十四

定公八年至十五年

卷三十五

哀公元年至七年

卷三十六

哀公八年至十四年

【臣】等谨案春秋毛氏传三十六卷

国朝毛奇龄撰自昔说春秋者但分义例至宋张大亨始分五礼元吴澄因之粗具梗槩而已奇龄是书分改元即位生子立君朝聘盟会侵伐迁灭昏觐享唁丧期祭祀蒐狩兴作甲兵田赋丰凶灾祥出国入国盜弑刑戮凡二十二门又总该以四例曰礼例曰事例曰文例曰义例然门例虽分而卷之先後依经为次无割裂分隶之嫌较他家体例为善其说以左传为主间及他家而最攻击者莫若胡安国传其论安国开卷春王正月已辞穷理屈可谓确当然左传元年春王周正月之文本以周礼正岁正日兼用夏正夏正亦属王制故变文称王周正月以别夏正而奇龄乃读春王为一句周正月为一句谓王字乃木王於春之王而非天王之王其

为乖谬殆更甚於安国又如郑康成中庸注策简也蔡邕独断曰策者简也其制长二尺短者半之春秋正义曰大事书於策者经之所书也小事书於简者传之所载也又云大事後虽有策其初亦记於简据此则经传简策并无定名故崔杼之事称南史氏执简而华督之事称名在诸侯之策其文互见奇龄乃以简书策书为经传之分亦为武断然其书一反胡传之深文而衡以事理多不失平允之意其义例皆有徵据而典礼尤所该洽自吴澄纂言以後说春秋者罕有伦比非其说诗说书好逞臆见者比至於喧呼叫呶则其结习所成千篇一律置之不议不论可矣乾隆四十五年十二月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

卷一

钦定四库全书

春秋毛氏传卷一

翰林院检讨毛奇龄撰

春秋者鲁史之名也古凡史官记事必先立年时月日而後书事于其下谓之记年【晋後出书有竹书记年即此名】故每岁所书四时必备然而祇名春秋者春可以该夏秋可以该冬也旧谓春以善善秋以恶恶春秋者善善恶恶之书则毛诗春秋匪懈孝经春秋祭祀以时思之中庸春秋修其祖庙未闻有善恶于其间也盖古来恒称如是矣若贾逵谓春取阳中秋取陰中则周正春皆是冬秋皆是夏非陰阳中也贺道养谓春贵阳始秋重陰初则期合周正而又曲为之说究何必然

第春秋立名不始夫子在夫子未修前早有是名传称韩宣子来聘观易象春秋此在昭二年夫子未修以前之文而坊记谓鲁春秋记晋丧曰杀其君之子奚齐及其君卓其文在僖九年夫子且未尝生也故公羊道听涂说亦云有未修时春秋见庄七年传而鲁史至西狩获麟後尚有二年共二十六条皆曰此鲁春秋文也故孟子曰诗亡然後春秋作此夫子春秋也鲁之春秋此鲁春秋也

或又谓春秋是周时史书不止鲁史者孔疏于杜氏序云据周世法则每国有史记当同名春秋又公羊引闵因叙云孔子使子夏等十四人求周史记得百二十国宝书以为春秋则直以春秋一名为周史与列国诸史所共有之名不始夫子并不始鲁史也若先仲氏又云春秋为六经之一三代以前早有之至三代以後则祇传夫子一书而前此春秋之书亡焉尝讯其说谓古凡称六艺即六经也即易书诗礼乐与春秋也【古皆以六经为六艺惟周礼保氏职始以五礼六乐五射五御六书九数为六艺他皆不然】其以此六艺为教谓之六教礼记经解所谓诗教书教礼教乐教易教与春秋教者此夫子之言也夫子言古王之教本如是也其以此六艺为学谓之六学班氏艺文志云易学如天当无时不学而诗书礼乐与春秋共五学则如天之有五行必三年通一艺自十五入大学後至三十而五学始立故西汉刘歆辑内府古文春秋名六艺略而汉志谓古之王者左史记言右史记事事为春秋言为尚书帝王靡不同之则明在周鲁以前而疏公羊者亦云春秋者国史所记人君动作之事左史所记为春秋右史所记为尚书故晋语司马侯荐羊舌肸曰肸习于春秋而楚语申叔时论教太子之法曰当教之以春秋此正以六学为六教在三代以来原有是书与尚书并传而秦火以後但见此而不见彼遂以夫子之春秋当六经之数而不知前此之为春秋在春秋晋楚间犹见之也故先仲氏曰古之六经则古之春秋也而其书亡焉今之六经则夫子之春秋也然而乐经亡焉

乃徐仲山日记又曰曩时春秋记事而已夫子之春秋则但志其名而不记其事按周礼内史读四方之书事谓书四方之事而读於王前此记事也若外史掌四方之志则志解作志又解

作□谓标□其名而列作题目以告于四方故又曰外史掌书名达于四方其所为记即春秋之传也所为志即春秋经也是以左传序云史官掌邦国四方之事则记也纬书钩命诀曰欲观我褒贬诸侯之志在春秋【後儒但见何休公羊传序有吾志在春秋语遂将志字误解作言志之志】崇人伦之行在孝经则志也特志简而记烦简则书之於简谓之简书简者简也以竹为之但写一行字者烦则书之於策谓之策书聘礼所云百名书於策谓百字以上皆书之虽犹是竹牒木版所为而单策为简联简为策策者册也以编合竹简合两□为一册故襄二十五年崔杼弑齐君南史氏执简以往此简也书志者也文十五年宋司马华孙来盟公与之宴辞曰臣之先臣督得罪殇公名在诸侯之策此策也书记者也

然且简策之例必具三事一读本国一上之王朝一告之四方邦国诸侯故国语鲁臧文仲祀爰居展禽陈国之祀典以折之文仲曰信吾过也季子之言不可不法也使书之以为三策三策者一读一上一告也

是以夫子修春秋第修简书而左丘明作传则取策书而修之隐七年传诸侯凡策告谓之礼经十一年传诸侯不告不书於策明言简策之例史所最严故宣十年崔氏出奔简书例称族策书例称名宣十七年叔肸卒简书例称公弟策书例称公子襄二十六年甯殖逐卫侯简书例称出奔策书例称出君成十三年晋侯伐秦简书例祇称伐秦策书例始称秦师败绩其简策书例历有明据乃注疏乖反谓经是策书传是简书则南史执简甯殖书策皆不通矣此所当考正者

诚以春秋记事原有门部而作志者则因门为题就事立志谓之籤题不谓之纲领盖纲领必槩括其事而取其要领以为文籤题则但志其门名而必藉按策以见其事不相侔也【宋人以纲目拟春秋非是】大抵春秋门部见於旧史官记事法式有二十二门

改元【十二公元年】

即位【十二公即位】

生子【桓六年子同生】

立君【隐四年卫人立晋】

朝聘【朝 来朝 聘 来聘 归 茀 锡命】

盟会【会 盟 来盟 涖盟 不盟 逃盟 遇 胥命 平 成】

侵伐【侵 伐 克 入 围 袭 取 戍 救 帅 师 乞 师 取 师 弃 师 战 次 追 降 败 败 绩 溃 获 师 还 归 俘 献 捷】

迁灭【迁灭殲墮亡】

昏媾【纳币逆女逆妇求妇归送致女来媵妇至媾】

享唁【享唁】

丧葬【崩薨卒葬会葬归丧奔丧赠赙含襚求金锡命】祭祀【烝尝禘郊社望雩
作主有事大事朝庙告朔视朔绎从祀献万】

蒐狩【蒐狩观焚观社大閱】

兴作【立宫筑台作门观丹楹刻桷屋坏毁台新廨筑城城郭浚渠
筑囿】甲兵【治甲兵作丘甲作三军舍中军】

田赋【税亩用田赋求车假田取田归田】

丰凶【有年饥告籩无麦苗无麦禾】

灾祥【日食螟螽蜚雨雪雷电震雹星陨大水无水灾火蜚多麋眚不雨沙鹿崩
山崩旱地震星孛六鵠退飞陨霜杀菽陨霜不杀草鸛鹄来巢获麟】

出国【如孙出奔出大去】

入国【至入纳归来归复归来来奔逃归】

盜弑【盜杀盜弑杀】

刑戮【杀刺戕放执归用释畀肆眚】

凡此门部先定之为记事之则而志名者则又另立一籤题以为门部之标识至于事之始末
详略皆所不问如同一朝晋而成十八年公如晋朝晋君新立也哀元年公如晋则我以新立
朝晋君也同一会齐而庄十三年公会齐侯盟于柯为平乘丘之败二十三年公会齐侯盟于
扈为申结婚姻之好同一伐邾而隐七年公伐邾为释宋怨僖二十二年公伐邾为讨鄆杀同
一迁许而成十五年许迁于叶则许自请迁者昭九年许迁于夷则系楚逼迁之者向使无策
书则此春秋者不过一门部名目曰朝耳会盟耳侵伐而迁灭之耳何曾有一事可究竟言之
而谓此名目中有微词凡书国书爵书名书氏皆有义例岂非梦梦然而不考经文则不能读
传不深核简书则不能检校策书之事凡释春秋必当以经文为主而以传佐之先仲氏尝曰
春秋诸侯大夫死法不一而经文祇以一卒字尽之僖二十四年晋侯夷吾卒以杀死昭八年
陈侯溺卒以缢死桓五年陈侯鲍卒以狂死定十四年吴子光卒以战伤死定三年邾子穿卒

以火烂而死庄三十二年叔牙卒酖而死昭四年叔孙豹卒饿死二十五年叔孙舍卒自咒死二十九年叔诣卒无疾病死此其中义例必有不在一卒字中者而乃第书一卒字而其义已备此其故非深识经文者不能解也

乃宋儒无学袭唐儒啖助赵匡之说重訾左氏传为秦後伪书且摘不更庶长诸秦官为辞此真不读春秋不识左传为策书旧本而妄为是言予既已辨之详矣【见论语稽求篇】特左氏所据策书犹是鲁史之未备者往往与简书互有阙落如哀十四年西狩获麟後鲁史简书凡二十六条而策书所阙落者有十五条则其旧史之未备从可知也是以旧史有阙而左氏以己意补之即与经悖如以郑大夫尹氏为隐公之妻以隐妻子氏为桓公之母以救邢之曹师为曹伯以宋公子地本景公之弟为元公之孙以执曹伯畀宋人为分曹田与宋人以宋公杀世子痤事为宋华合比奔卫事以晋先蔑士会迎公子于秦之师为拒秦于葭阴之师诸凡以死赠为生赠以媵异姓为媵同姓以六月日食为闰月日食以立武公之宫为立武成之庙其间参错违背不可胜数至于曹羈奔陈郭赤归曹曹杀其大夫薛弑其君比齐侯伐宋宋公伐郑卫公孟彊伐曹盗杀陈夏区夫宋向巢伐曹又伐郑宋人执滕子又执小邾子经文俨然并无一传至定哀之间即本国事实仲孙伐邾三家取田亦了无始末可据而列国史策则但得晋楚二史以为传本一如孟子所云晋之乘楚之檇机鲁之春秋者故文宣以後夫子所责惟晋楚而左氏特取晋事而铺张之祁奚举贤魏绛戮仆作人求善表章无贖以至晋悼之恶三出而制于楚者反称三驾而楚不能与争甚至借仲尼之言以褒晋大夫宣孟忠良不絶于口究之定哀以後纯记赵简子之事为赵史而世顾未之察也

特其书则犹是鲁史与晋楚诸史较之公羊谷梁道听涂说徒事变乱者乎不同故当时左氏以其传授之曾申申授之吴起以及虞卿荀况辈皆有论着汉志所称虞氏春秋虞氏微传皆推明左氏之学即传至西汉犹有贾谊为左传训诂以授京兆尹张敞中大夫刘公子等原不止刘歆获内府秘书始责让太常博士以发其义也乃不幸其书出壁中时孔安国已献之内府而未立学官遂致公谷之徒各持门户以相抵牾然究之日月一出而燭火自熄彼墨守废疾皆不攻自下不事痼坏而其弊已不起矣故春秋五家汉志未尝并列祇以公谷邹夹为四家而邹氏无师夹氏未有书原可同置之不论不议之列但公谷为周秦间人其时去古未远虽荒唐之言亦尚有与周礼相借证处特世尚宋学而前儒篇帙散不复理即汉後论着其显相指名者原有二十三家春秋见之汉志而其後各立学官经杜氏何氏范氏训定之後犹有苏寛刘炫戴宏闵因辈各为扬扞而惜其书俱蔑没无一传者惟唐儒陆淳作微旨纂例释疑联载啖助赵匡诸说其书犹存然率踳駁不足据若宋元诸经解则所见凡数十家亦又何一可置辨者而胡安国传则解经之中畔经尤甚然反兢兢乎辨之以为胡氏传出而孔子道熄甚至有明三百年设科立学但知有胡氏一传而不知孔子之有经则辨胡氏抑所以救孔子也嗟乎言至此亦可畏矣但春秋义例无一一是处大抵此白彼墨前三後四必不能画一而前人相传科指又极其龌龊如所云二类【天灾人事】三体【正例变例非例】五情【一微而显二志而晦三婉而成章四尽而不污五惩恶而劝善】五始【一元年二春三王四正月五即位】六辅【公辅天子卿辅公大夫辅卿士辅大夫京师辅君诸夏辅京师】七缺【一夫道缺二妻道缺三父道缺四子道缺五君道缺六臣道缺七周公礼缺】九旨【一故宋二新周三新王四所见异词五所闻异词六所传闻异词七内其国八内诸夏九外夷狄】

诸所流衍皆猥劣不足道若孔疏所云称凡五十其别四十有九释例四十部无凡者十五则专指左氏所据典礼与杜氏所释之数为言并非通例其余年月日与国氏人名天王天子种种陋义则前此注春秋者已痛辟之以为一爻可错诸卦一字不能成一义晋唐以後早已不屑置喙者惟三传引例犹尚有参变余论见诸疏义而胡氏则概以武断施之拘曲揉直仍袭从前年月日国氏人名诸陋义而深文其间翫经传正旨而剿令就我使明明大文一经鍛链便成冤狱究之一罟百漏五戈十盾至词穷理绌遇有事同而文不合者则曰见闻不妨各致有事不同而文同者则又曰美刺不嫌同词于是周章蔑略了无定準而春秋亡矣予尝平情谛观窃彙十二公二百四十二年一千八百余条经文而统以四例概之

一曰礼例谓春秋二十二门皆典礼也晋韩宣子观鲁春秋曰周礼尽在鲁矣言春秋一书以礼为例故左传于隐七年书名例云诸侯策告谓之礼经而杜注与孔疏皆云发凡起例悉本周制所谓礼经即春秋例也故孔疏又云合典法者即在褒例违礼度者即在贬例凡所褒贬皆据礼以断并不在字句之间故曰礼例今试观春秋二十二门有一非典礼所固有者乎母论改元即位朝聘盟会以至征伐丧祭蒐狩兴作丰凶灾祥无非吉凶军宾嘉五礼成数即公行告至讨贼征乱及司寇刑辟刺放赦宥有何一非周礼中事而春秋一千八百余条栉比皆是是非礼乎故读春秋者但据礼以定笔削而夫子所为褒所为贬概可见也此非书人书字所得濶也此一例也二曰事例则以二十二门一千八百余条无非事也周礼内史职曰读四方之书事左氏传序史官掌邦国四方之事又云大事书之于策小则书之简牘故公羊疏云春秋记人君动作之事而汉史亦云右史记事事为春秋是以孟子论春秋特开一例曰其事则齐桓晋文谓就事而计其寡多较其大小轻重而是非可验今齐晋之事皆重大事也庄僖之间其所记亦惟齐晋之事为较多也重与大则责备严多则前後氏仰而未易以轻定故郑伯克段齐郑入郕事关名教则虽属一节而实繫重大终隐桓庄三世专记纪国之存亡凡二十一条则虽细而必不可忽终春秋二百四十二年杂记宋郑陈三国东西奔命之节无一刻之闲则虽举动琐琐亦必备核之而不敢略他如郭亡梁亡事有阙漏尹氏子氏事有讹谬围成围郕事有混同去乐去龠事有蒙昧则概从而检较之又其余也此又一例也

三曰文例则史文之法也孟子曰其文则史大凡史官记事从列国来者谓之赴告从本国登者谓之记注而合而成为策书则谓之文第文有文法左传说定四年称备物典策以赐伯禽注谓典策即史官记事之法是史官记事另有法式名为文法亦名为书法而统以文字概之杜氏序所云文之所害则刊而正之是也但旧亦以文为例而此云文例则以无例为一例如旧谓书国书爵书人书氏书时书日皆例也而今皆无之以为史之例可书国可不书国可书人书爵书日并可不可书人书爵书日何则例固然也又以有例为一例如郑伯伐卫本讨滑之乱而郑庄不忍诛滑但伐卫而返则史祇书伐卫而不书讨乱齐人伐卫本奉惠王命而齐桓身不亲军但遣师而还则史祇书伐卫而不书奉命至于宣公奔齐丧而史书公如齐所以讳国王使来徵聘而史书仲孙蔑如京师所以讳王此皆从文起例而予夺自明并非齐人郑伯书公书蔑之所可优劣以为文例如是文之以无例为有例又如是也

乃四曰义例则直通贯乎礼与事与文之间天下有礼与事与文而无义者乎董仲舒云为人君父者不可不通春秋之义杜氏序云文约则义微诚以事与礼与文莫不有义义者意也亦

旨也即予夺进退褒讥美刺之微旨也是以礼有违合事有善恶文有隐显而褒讥美刺皆得以直行其间孟子曰其义则丘窃取之矣盖取此例矣

若夫春秋始鲁隐并无义例或者曰以平王东迁而王室卑也夫平王东迁在鲁孝二十七年又一年而鲁惠立是鲁惠之立正当平迁洛之际且在位四十六年正与平之五十一年相表里乃舍惠不始而反始之平王四十九年垂尽之隐公无是理也若曰春秋本据乱而作则乱不自隐始也以为王室乱耶则戎狄弑王当始孝公以为本国乱耶则伯御弑君当始懿公以为列国乱耶则晋人连弑其君当始惠公乃舍懿孝惠三公不始而始之隐公隐亦不受也至于公羊以隐公让位为贤曰春秋善善长当从善始谷梁以隐成父之恶为恶曰春秋恶恶之书当从恶始则又谁得而定之故先仲氏曰春秋鲁史也或隐以前亡其书则不修隐以後有其书则修之或隐以前有其书而不必修则不修隐以後有其书而当修则修之此非明白了义乎若夫夫子作春秋之年则司马迁谓孔子厄陈蔡时作在哀六年左氏说谓孔子自卫反鲁遂作春秋则在哀十一年而公羊说则谓孔子西狩获麟得端门之命乃作春秋则又在哀十四年总是揣摸之言不足据者若其云受端门之命则见戴宏解疑论此後世纬学大不足信然两汉儒者多言之【董仲舒对策有孔子作春秋是素王之文语郑康成六艺论云孔子西狩获麟自号素王为後世受命之君制明王之法】夫获麟作书本属不幸而反以为夫子受命之符瑞无稽之言吾不取焉

春秋毛氏传卷一

卷二

钦定四库全书

春秋毛氏传卷二

翰林院检讨毛奇龄撰

隐公【公姬姓侯爵名息姑鲁惠公弗皇之子伯禽七世孙也据鲁世家自伯禽至隐凡十三君以兄弟相及者五人故止七世七者世次十三者传位之次也周书諡法隐拂不成曰隐】

此二字亦鲁史文也公本侯爵而称公惟史文有之他即不然故尚书费誓史文称公曰嗟而作书序者便称鲁侯则此称公者非史官旧标字乎

元年

史凡记事必以年领时以时领月而每公所记则又必从首年至终年以为一公之终始此是史例则此元年者本是隐公之元年例所必书无庸疑也乃何休说公羊传谓天子改元诸侯无改元之例其所称元当是黜周王鲁尊鲁为王者之义则不特悖礼叛教春秋必诛且亦不识周制矣周制国君皆改元者他无可考史记齐世家称齐献公元年尽逐齐胡公子而左传于襄十九年有云郑简公元年士子孔卒则齐郑皆改元矣第改元则必行朝庙即位之礼而隐复不书即位此有异耳其说见後

春王正月

此以时领月也礼也史凡书事必书在时月之下下苟无事则此时月可不书而四时首月虽无事而犹书之者谨时之例此所以为春秋也特书时旧法年有四时时三月而时之所领则必在三月之首故春必正月夏必四月秋必七月冬必十月而有时不在首月如所称春王二月【隐三年】春王三月【隐七年】者则不合矣然必二三月有事而正月无事故但书旁月而不书首月若空书时月并无一事则必在首月而不在旁月乃亦有时书次月如所称夏五月【庄二十二年】者则又不合矣吾故曰春秋须识例其必书时月虽无事而亦书者此例也此终古不易者也其既书时月而或书此月或书彼月则非例也通也阙缪也【阙缪见夏五月疏】通则无例阙与缪则并无义也不然天下岂有以空空岁月而可以寓褒讥加美刺者以此推之则凡书人书国书名书字其诸以通例而强作义例者亦可返矣

然而王何也公羊传云王文王也谓文始受命王之首也然而文未改正也故范氏谷梁注曰周王则改正之王者也谓周之先王改此朔者非武王即成王也然而改正耳即改朔亦朔一月耳曰王二月王三月何也故杜氏序云王即平王盖时王必颁朔隐之时则颁朔者平王也王有时不颁朔则不书王桓年多无王可验也然而刘炫已辨之谓昭二十二年後王室大乱

天王出奔狄泉矣越五年而後反国此时谁颁朔而五年之间皆得书王何为也故何休又曰王者谓夏殷周三代之王也王正月则周王也周十一月也王二月则殷王也殷十二月也王三月则夏王也夏十三月也而服?亦云孔子作春秋其于春则每月书王以统三正谓夫三春之书王将以禹汤文武立三正统也然此孔疏已辨之谓夫子以周室臣民反尊夏殷之旧主每月书王以敬奉前代则何意乎於是有人袭公羊邪说以为春秋黜周王鲁体王改元则此王字当暗指鲁公王者公也天王者王也是世有二正土有二王乱臣贼子自春秋始而谓春秋为之乎然则王之必不可以为王者之王断可知也

然则何王乎曰世亦不知有春王耳亦不知王之当属春不当属正月耳左传曰春王周正月其云春王则王属春也云周正月则正月不属王也左氏亦唯恐经文难明後世豎儒必有以王为周王者故书王周以倒之又必有以正为王正者故加周正以别之而世读其书而不之察也夫春何以王也王者兴也谓春兴也春何以兴古者五德相禅谓之五王五王者木火土金水也五王递为王而四时以春夏秋冬配之春木夏火秋金冬水各以时王而土则通王于四时之间故家语孔子答季康子曰古之王者易代而改号取法五行五行更王又曰五行用事先起于木是故王者则之而首以木王而汉律历志亦云庖牺氏继天而王【易大传庖牺氏之王天下也字书引书亦云庖牺王天下庖牺本帝而称王正指时德木王为言】其德在木为兴王之首至于共工无道火德不继而神农继之则共工霸而不王【其後秦不继周木而汉以火德继之亦霸而不王王如字不读旺】是庖牺春王神农夏王少昊秋王颛顼冬王由是而递转以至于周不读月令乎春帝太皞即伏羲也夏帝炎帝即神农也秋帝少昊即金天也冬帝颛顼即轩辕也春秋编年与月令表里月令称帝而不称王春秋称王而不称帝而总之以兴字概之人不识春王亦不识春帝乎春帝自伏羲以至于周惟帝尝与周皆以木王则皆以春王惟以木王则夏殷之春不得称王以夏殷非木德也惟以春王则夏秋冬诸月不得称王以夏秋冬非王时也然则春之得称王与王之必属春有断然者况春秋尊王之书也春者出也尚书大传曰万物出地之时也又春者寅也律历志云斗柄指寅方之候也今周以冬十一月为岁首此时万物未出而斗柄指子然犹称春者曰此岂春哉王在则然也盖春王也然而正月何谓也曰即三正也何谓三正曰天开于子十一月也以十一月为正朔则为天正地辟于丑十二月也以十二月为正朔则为地正人生于寅十三月也以十三月为正朔则为人正第三正角立说各不同有云三代改正者尚书大传春秋元命苞乐纬稽耀嘉皆云夏以十三月为正殷以十二月为正周以十一月为正此三代改正也有云二代始改正者孔安国谓改正祇殷周二代故注尚书云汤承尧舜禅位之後始革命创制改正易服是改正始于商成汤也有云三代以前皆改正者三正纪云正朔三而改此该庖牺以後三代以前统言之故郑注尚书孔疏礼记皆云舜以十一月为正尧以十二月为正高辛氏以十三月为正推之而高阳少昊黄帝神农女娲伏羲皆三正递禅故宋志云高阳氏以十一月为正而魏高堂隆作正朔议亦以轩辕高辛夏后与汉皆以十三月为正此三代以前皆改正也虽诸说不同而三代改正则无可疑者且改正必改月改月必改时亦无可拟议者乃胡氏不知何据逞其武断谓以夏时冠周月致有明以来数百年尽为所惑夫子月称正冬月称春经传显然即或他书所记三正杂出毛诗周礼多用夏正【毛诗如四月维夏六月栖栖维暮之春七月流火等皆用夏正惟十月之交一之日鬻发十月改岁等仍用周正此士人行文与史官记事不同若周礼则原欲以一代之制该百王之法故多用夏正如凌人正岁斩冰遂人正岁简稼器太宰

中春命蚕妇司裘季秋献功裘大司乐冬日至于圜丘夏日至于方泽等】而尚书春秋史官记事并无差舛至春秋则谨之尤谨者而反云夏时吾不解也

然何以知改朔必改月也按左传昭十七年夏六月日食昭子曰当夏四月谓之孟夏夫以夏六月而当四月之孟夏是改月也其冬有星孛于大辰梓慎曰火出于夏为三月于商为四月于周为五月是明言夏殷周之尽改月也故哀十三年十二月蝨而家语载季康子之问曰今周十二月夏之十月也而犹有蝨何也杂记孟献子曰正月日至可以有事于上帝七月日至可以有事于祖夫正月之至即十一月冬至也七月日至即五月之夏至也此皆孟献季康叔孙昭子梓慎诸人所自言者故夏令曰九月除道十月成梁此夏正也孟子曰十一月徒杠成十二月舆梁成此周正也

又何以知改朔改月必改时也孟子秋阳以暴之赵岐注曰周之秋即夏之夏盛阳也汉章帝以旱下议而陈宠奏事有云十一月天以为正周以为春十二月地以为正殷以为春三月人以为正夏以为春故汉书武成篇惟一月壬辰据律历志在冬十一月而书序一月戊午师渡孟津据三统历为周正月之二十七日皆冬也而史称武王伐纣孟春兴师书泰誓亦云惟十有三年春改时故也

故凡改朔者必改时月而胡氏曰前乎周者以丑为正其书始即位曰惟元祀十有二月乙丑则月不易也後乎周者以亥为正其书始建国曰元年冬十月则时不易也夫商亦改月商亦改时前所引左传梓慎与汉书陈宠之言已详且悉矣不必赘矣即其所云十有二月言之实有大谬不然者夫此十有二月非建丑正月也汉律历志引书序及古伊训篇文明云惟太甲元年十有二月朔伊尹祀于先王诞资有牧方明而班固随解之曰言虽有成汤太丁外丙之服以冬至越蒞祀先王于方明以配上帝【孟康注方明者神明之象也以木为之方四尺画六采五色以象五帝】盖是年值月朔冬至故云则是十二月者乃夏之十一月正冬至郊社之时况周制踰年改元商制踰月即改元前王十一月崩则新王改元在十二月元祀之十二月不必谓元祀正月也若秦之改朔则三正递禅并无亥正霸而不王原不足道而即本纪冬十月数语亦汉史所纪非秦本文故文穎顔师古辈明云此系史家异文为太初时所追改而读古不深仍为藉口尝考始皇本纪三十一年十二月更名腊月曰嘉平此十二月定为夏正之丑月而既閱原记载茅盈内纪谓始皇三十一年九月庚子有歌謡曰神仙得者茅初成驾龙上升入太清帝若学之腊嘉平因改此名则明是夏之九月为秦十二月此则史文之显然者【又二十九年始皇东游至海上之罘刻石文曰时在中春阳和方起则以秦之中春二月为夏之十一月正冬至一阳初起之候若在春二月则不得云方起矣】故後魏明帝改正建丑乃改春二月为夏四月则虽在秦後亦尚有改时月者虽唐後改月偶有异同然大概可睹也

若夫春秋之改时月可指数者庄七年秋大水无麦苗夫秋当有麦苗乎二十八年冬大无麦禾夫冬则禾且获矣尚有麦乎桓八年冬十月雨雪此八月雪也若十月则小雪矣而何以书也隐九年三月震电此正月雷也若三月则啓蛰久矣而何足怪也故庄三十一年冬不雨僖二年冬十月不雨此非冬也秋也若果冬则雨毕矣十月则毕之毕矣桓十四年春正月无冰

成元年春二月无冰此非春也冬也若果春则冰泮矣二月则泮之泮矣是以定元年十月陨霜杀菽刘向以为周十月今八月也不然则霜非时菽亦非时也成十年六月晋侯欲麦使甸人献麦杜氏以为周六月今四月也不然则献者失时欲者亦不及时也乃若庄二十五年夏六月日食鼓于社左氏曰惟正月之朔谓惟正阳之月始用鼓指四月也若六月则不用鼓也昭十七年六月日食太史曰日过分而未至也谓过分者过春分也未至者未夏至也亦四月也若六月则至亦过也故僖五年传春王正月日南至天下无寅月而冬至者矣昭二十年传二月日南至夫二月将春分矣分也而犹至无是理矣故凡书秋雩皆夏雩也雩所以雩旱也徐仲山曰周以巳月雩则夏月也庄三十二年夏公如齐观社此四月实二月也陈晦伯曰周以卯月社则二月也第国君改元则必告庙朝正行即位之礼周制遭丧即位踰年改元其遭丧而遽即位者国家不可一日无君也然必踰年改元者一年不可有二君也故尚书成王之崩在四月乙丑越七日癸酉而康王遽已即位而史记世表鲁真公二十八年宣王即位至二十九年而王始改元是改元即位本非一时然遭丧即位仍反丧服至踰年改元之际又特行正位之礼杜氏所云改元正位百官以序者然後史官书即位于改元之下其或朝正告朔而不行此礼则史官不书故春秋不书即位者四皆不另行即位礼者此不书以摄位也【惠公元妃孟子以无子卒继室声子生隐公未立宋武公有女仲子生有文在手曰为鲁夫人惠公娶而生桓公爱欲立之惠公薨隐公乃成父之志奉桓为储君而已居摄故不行即位礼史记鲁人共立息姑摄政】庄闵僖三君亦不书以三君皆各遭弑逆之变仓卒即位不忍另行也此皆就实事而史记之行则书不行即不书并无有取舍笔削于其间而其义反昭然者如隐被弑而桓即位则桓何心东门襄仲连杀诸嗣而宣居然行即位之礼而不之忤则亦未尝非幸祸也此礼也而义存焉必谓史有笔削焉缪矣乃说者谓书与不书皆史官得而主之隐之不书所以彰隐贤桓之得书所以着桓恶此固为不知史例若胡氏又自造一例曰上不稟命于天子内不承国于先君大夫扳已立而即立之则不书即位隐之不书是仲尼削之也则春秋二百四十余年凡列国立君或争或篡或出或入何尝一稟命天子此在妇孺犹知之者至不承先君则桓不承隐宣不承文定不承昭而三君偏得书即位何也据曰隐之不书仲尼削之则桓之得书将必仲尼褒之矣夫乱贼可褒乎乃自知难通于桓即位传则曰美恶不嫌同词于宣即位传则曰一美一恶不嫌相同夫美恶可同是善恶混也乱莫大乎善恶混乃以夫子作春秋而使善恶混则或褒或贬何所分辨万一桓宣之徒起而争之即使游夏再生家喻户晓恐不能明也吾不意胡氏之学将掩圣经而一开卷间即词穷理屈如此

三月公及邾仪父盟于蔑【邾公谷作邾娄蔑作昧蔑昧转音主凡经有四例说见前】周制以盟会为典例大抵天子十二载一巡狩则盟诸侯於方岳之下而诸侯有事朝王或会或同则又彼此相盟以着讲信修睦之意故曲礼涖牲曰盟诸侯相见於郤地曰会而周礼玉府职共盟会之物戎右职掌辟盟之役至秋官司盟职则直置典盟一官掌盟载之法是盟会大典盛世最重而胡氏凡遇盟会则概置讥贬以为刑牲歃血要质鬼神非礼所贵则不知古者玉敦盛血珠盘盛耳坛墮主日月方明祀山川凡赞牛截耳与诅神告祖俱是旧典至後世蔑略始有束牲不歃载书不告之事而学古不深反訾非礼则不惟不读春秋并不识三礼矣特春秋世衰天子无巡狩之事诸侯无会同之典而徒事要盟所谓大国制其言小国尸其事者则未免於行礼之中寓失礼之意且要有是非约有成毁特盟参盟有始终同异凡经所书皆不过直书其事以俟其义之自见如此一盟则近郊附庸并讲信睦比之搂伐自为较胜故盟会

征伐俱属典礼而征伐独有参变者以春秋无义战邦政旧典荡无复存故盟会侵伐总是典礼而事有是非春秋务谨严义例所分不敢苟也

邾者附庸之国仪父则邾君字也王制天子之元士视附庸则天子上士以名字通原可称名并称字者况附庸四命较元士又多一命则虽未受王命【杜注邾附庸国未受王命】而早为附庸其得通上国自在可名可字之间此亦是例而胡氏又自为制云中国之附庸例称字邾仪父萧叔是也夷狄之附庸例称名邠犁来介葛卢是也吾不知称名称字其分中国夷狄者出自何书乃同一附庸同一邾子之後而忽分仪父犁来为中国夷狄学者注经可自造族姓自定封国自判华夏肆然无忌惮一至於此岂不可怪按邾子顓頊之後曹姓周武王克商求其苗裔得六终之孙名侠者封为附庸国使居邾地而因以名邾仪父者邾侠之十二世孙也若邠亦邾侠之後其时有夷父顔者建功於周因别封其子友为附庸国而居邠故世本云邾顔居邾昭徙邠其後邾与小邾俱称邾子明见经文若叔孙婼曰邾又夷也则以邾地近戎故云是邾与邠皆中国附庸必分夷狄则邾当为夷乃反曰仪父中国例称字仪父已矣其如例何

及者与也言公与仪父也春秋鲁史凡记事必首鲁公此无论他国为政本国为政皆当先本公而後他氏例固然也自公羊有及者汲汲之解谷梁有及者内为志会者外为志之解而胡氏亦遂谓我所欲者曰及外所主者曰会以附于公谷之说则请就春秋本经推之文十七年公及齐侯盟于谷夫谷之盟齐以文公不亲盟故来讨而胁公出盟此非我所欲也曰公及何也襄三年公及晋侯盟于长檣是时公如晋而晋侯出都与公盟而後公得入此出入之权全在于晋并非我之所敢主曰及何也若成二年公及诸侯盟于蜀是时楚公子婴齐为政传明言之故胡氏亦自曰公及楚人则知主盟者楚也夫明知楚人主盟而犹曰及者我为主则不知彼所主者盟我所主者又是何事且?其例明云及者我为主会者彼为主不可混也乃有既书会而又书及者定四年公会刘子诸国于召陵又云公及诸侯盟于臯鼬则一会一及当复谁主且夫公及之诸侯犹是公会之诸侯也刘文公以伐楚而会诸侯今以既侵楚而重为之盟皆刘文公为政也未有一十七国奉一王官主盟而我得毫犁有预于其间者乃胡氏复坚执己说曰定公为季孙所立心不自安故求与诸侯盟何不自揣量而洵口悖诞如是

春秋毛氏传卷二

卷三

钦定四库全书

春秋毛氏传卷三

翰林院检讨毛奇龄撰

夏五月郑伯克段于鄢

列国各以事来告即书之此则郑告其事而史官旧书之者然而文在其中焉按传郑武公娶武姜【申国女】生庄公及段而姜恶公而爱段【姜以寐寤生庄公故惊而恶之】请立段不许及庄公立姜为段请制【大邑】公难之又请京【亦大邑】公重违姜意许之祭伯请除段公不许【祭伯曰无使滋蔓恐难除矣公曰多行不义将自毙】段乃收西鄙北鄙及廩延皆为己邑公子吕请除段公又不许【公子吕曰请除之厚将得衆矣公曰不义不昵厚将崩耳】段遂完城郭缮甲兵具卒乘将袭郑夫人将启之公闻其期命公子吕帅车二百乘以伐京京叛段乃入鄢公伐鄢胜之叔出奔共【时公置姜氏城颖誓不相见既而悔之乃用颖封人语出姜氏于隧而母子如初】其事如此是称兵袭国显然叛逆春秋但据事直书而叛逆之罪其义自见其或责公失教者此说经余情夫子未尝有是也【失教见左传】君能教臣兄能教弟此在圣贤犹难之春秋责贤不责愚庄公愚人岂容责此若云养成其恶而利其毙则未免深文既与之京即欲早为之所势必夺京而与以他邑段肯受乎如欲早除则彼乱未形而我骤除之养恶尚有罪不待养而遽以恶除罪当何等如云利其毙则误以庄公自言有将自毙厚将崩语故云不知此第言其理耳若果利之则既发之後尚不令毙而谓欲毙之未发之前非通论也且凡为此说者非谓春秋贬恶如是也段固不赦伯亦可议此不过如逢蒙杀羿羿亦有罪之语偶为旁及而胡氏竟纵释叔段专治公罪夫孟子曰孔子成春秋而乱臣贼子惧未尝曰使乱君贼父惧也从来罪当重典不容侧贷杀人者死必不更求被杀者以可杀之罪况春秋何书夫子修春秋何意本欲诛叛逆讨不臣不弟而开卷定律便使君父与叛逆彼此交责已非正义又况纵乱贼而专诛君父彼称乱者已洋洋掉尾而愚君愚父反俯首而就戮没天理何存国法何在是虽使新莽着书操卓笔削亦必不能颠倒错乱至此极也

况其所为爱书者仍未确也据曰诛乱当以国彰国讨也则宣九年陈杀其大夫泄冶泄冶何罪而国讨之又曰当以人为衆所共击也则庄十年齐人取子纠杀之夫以争国之弟杀无罪之兄齐人何尤而衆共击之若云命将出师当称帅师则哀三年齐国夏与卫石曼姑帅师围戚彼则竟称帅师矣然固拒父之师也卫辄以拒父而书帅师则此讨弟叛而不书帅师此正相反以相明者如曰不书为贬则彼卫辄书帅师当为褒矣若其称郑伯而以为罪伯引晋侯杀世子申生为据则又全不知例者春秋之例凡君于子弟直杀之而不称兵则皆书君如晋侯杀其世子申生宋公杀其世子痤天王杀其弟佖夫是也其必书君者以君实杀之不得谓

国人杀之且衆共杀之也此直杀之而未尝称兵者也若伯之克段则称兵而不杀之者凡称兵之例国君自帅师则称君卿大夫帅师称卿大夫君与卿大夫皆在军而不辨其孰帅师则称国卿大夫帅师而不记其卿大夫为何名何氏则称人【左氏疏以兵衆称君君以师从也兵少称卿大夫卿大夫以旅从也兵衆而卿大夫帅之称国将卑而师衆也兵少而卿大夫帅之则称人将卑而师又少也】此核之全经之例而无不同者今书郑伯则伯亲帅师也伯亲帅师故称伯则称伯者事也然而君亲帅师当称君则称伯者又例也至其称于鄢则师出必以地如後书戎伐凡伯于楚丘宋皇瑗取郑师于雍丘郑师伐宋战于宋公会诸侯伐楚次于陞类凡师之所在必明记其在于何所以为行师之表识此亦是例况诛逆讨叛所在尤重彼直杀而不称兵如卫杀州吁亦书曰卫人杀州吁于濮况称兵乎若其书克则所谓以事例而兼文例者人误以为伯杀弟耳【公羊克之者杀之也谷梁克者能也能杀也】且误以为杀弟于鄢而不缓追之而使之逸耳【谷梁谓伯不能缓追逸贼失亲亲之道】而不知段已奔共奔共而且得安然久处于共郑之人称为共叔段者是也且郑伯亦思之故于隐十一年郑伯入许有曰寡人有弟不能和协而使餽其口于四方盖思之也夫以段之恶段之不弟称兵袭国已不啻春秋无将之诛是何难立为櫟絶如祭伯公子吕所云除之又除之者而乃伐之而胜之而故使逸之奔之此在郑伯为失刑而在叔段则为幸免然而春秋反予之者以为尺布可缝兄弟难容【二语见汉书】世安有置母于隧加君以矢之逆贼而独于兄弟间善全如此不惟不杀且任其奔齐又任其奔莒止一胜而无余事此可念也故特书曰克此固春秋二百四十余年所未有之例而于此一开之者也【春秋一书无再书克者】所谓事也文也亦义也

秋七月天王使宰咺来归惠公仲子之赗【赗芳凤切一本无来字】天王周平王也临诸侯曰天王君天下曰天子皆尊称也宰咺者天子之士咺其名也周礼天官之职自太宰小宰以至宰夫皆称宰此即所谓天子之宰通于四海者大抵书例太宰为卿不称名字故僖九年有宰周公之称若小宰为大夫当称字宰夫则下大夫士也于例当称名故桓四年有宰渠伯纠之称此宰是宰夫故称名公羊所谓宰者士也上士以名通是也若其所使赗则宰夫职曰凡邦之吊事掌其器币财用郑注吊事天子吊诸侯之事币者所用赙也则既掌吊事宜充吊使而胡氏谓宰是冢宰位六卿之长不宜使赗误矣

第其所云惠公仲子者惠公隐公父也仲子者桓公之母也而谷梁独谓惠公之母夫桓公之母明系宋武公次女而惠公娶之故桓母名仲子若惠母则何所据乎乃公羊谓桓母仲子死于前年而左氏谓死于二年此时尚未死而豫为致赗故讥之则天王虽不道定无有以诸侯夫人未死而先遣吊者此由左氏误认元年尹氏卒为隐母二年子氏薨为桓母遂云然耳但左公皆谓惠公仲子本宜两赗而一使一赗于礼不合故左氏谓惠公缓仲子豫公羊谓惠公仲子兼而胡氏则专指仲子而不及惠公此皆不足置辨者惠公者隐之父仲子者桓之母即惠之继娶也惠公不知薨于何时其距公改元已有七月则其吊之缓固不待言若在仲子则必同惠先後亡者春秋诸侯有继娶即继适也惟适故子虽未立亦得以其丧赴告天子是虽三礼无可考而春秋则往往行之故此一吊赗必惠公仲子同有赴告者在也夫既有赴告则天子下吊于礼无过盖仲子继娶原非侄娣曰为鲁夫人则固夫人也以夫人而告之必赗之郑康成云礼天子于诸侯一则含之赗之小君亦如之是天子于诸侯夫人原自有赗非过礼

也特春秋本义不尚诡诈但直书其事而美恶自见夫礼尚往来况君臣相与其责在下岂有天子下交而诸侯反无报者如此隐十一年中适遭王丧而隐不使卿吊并不亲会葬至求赙而後应之以视天王之来赙何如也此则春秋之微意也义也

赙者赠丧之物既夕礼谓公赙玄纁束帛两马是也故公羊曰车马曰赙

九月及宋人盟于宿

据传惠公末年败宋师于黄故公立而宋来成焉此不过大夫来盟旧例及者公及也宋人不书君宋大夫也而公谷谓我但称及彼但称人则不惟公不与盟即彼此相盟皆属微者吾不知其所为微者是何等官职大夫与士并无实据而即以公不亲盟思之庄二十二年及高奚盟于防而公谷又云及者公及也则我但称及而公已与之不必微者始与之公谷举例已自矛盾至文二年及晋处父盟则公亲如晋而後与盟此明明公盟而但书及何也乃胡氏既遵其说而复于盟宿之例谓书地以国则必国君与盟者宿者国名也书盟于宿以宿君与盟故也此据僖十九年会陈人蔡人郑人盟于齐因修齐好则必齐亦与盟耳然孔疏谓僖廿七年公会诸侯盟于宋时宋方被围宋公未尝与会也宣十四年公孙归父会楚子于宋时宋仍被围宋公虽欲会而有不能也是屡会其国而国君皆不与会虽特发一例而按之无可验者乃复曰国君书盟春秋恶之夫既舍鲁公而入宿君吾不知其所恶之者恶鲁君耶抑恶宿君也

冬十有二月祭伯来

祭伯者王卿士也祭其国伯其爵也其曰来则不奉王使而自来于鲁初不知其所来者为何事然而仅曰来则来之耳不必有事也所谓以王臣而私交于诸侯虽事也而意非之所谓义也乃公曰来奔谷曰来朝夫春秋书事必以其实来奔来朝则未有舍其实而但书一来字可成史者若云贬之贬不在此也况尔奔我朝同一臆度而来朝之说则尤臆度中之最无理者夫王臣有事书法谨严如所云来聘来赙来锡命来会葬来求车求金无不据事直书并不敢有隐讳于其间况诸侯相朝尤极郑重几有王臣朝诸侯而史官不明明一书之者此不问有王命无王命而但书其事而其义自彰非如介葛卢来白狄来之可以夷狄附庸蹴弃之而蔑畧之也乃胡氏妄遵谷说而复谓来朝于鲁出左氏文诬经之中又复诬传东海沉冤何时得雪悲夫

公子益师卒

公子者先公之子益师其名也公族卿佐卒必书礼也其或不书与书而或日或不日皆史有详畧文有完阙未尝有义例於其间也故此不书日在旧解云春秋不以日月为例此是了义而三传偏纷纷焉予尝推其例祇取庄三十二年公子牙卒书日【癸巳】与文十五年公孙敖卒书日【甲戌】两事概之左以为公不与小斂即不日则叔牙以酖死公孙敖客死于齐公皆不与小斂矣然亦日矣公羊以为世远故不日则敖在文世已属所闻叔牙在庄世则传

闻者也【公羊九旨较近远曰所见异词所闻异词所传闻异词】未尝近也何以皆日也谷梁以为恶故不日则牙与敖可云善类乎而日之乎乃胡氏亦知难通又自立一例以为恩数有厚薄夫公族丧葬自有典礼非国君用情得以厚薄即有厚薄亦必覩其厚薄之间于典礼有违有合不得但以日不日漫为起例且据云厚薄则必以厚者书日不厚者不书日矣吾即以牙敖二事观之夫叔牙以妄言而杀其身然叛乱不彰原未尝有族灭之例故季友早许其立後然必请而後得立若敖死于齐鲁不为理致齐人以棺置堂阜而後得以闻于鲁然犹必不令归必不使殡致其子期年犹毁朝夕立朝以待命而後许其殡孟氏之寝则其厚与薄何如也而公然卒之日之何也【杜注有不视小敛故不书日所以示厚薄也恩数厚薄实出此语然此言与敛不与敛有厚薄不言日不日有厚薄也胡氏既辟左氏与敛之文而又袭杜氏厚薄之语此皆鹵莽蔑畧漫不理睬处若孔疏亦有恩厚语则又依杜注大不足据】故曰书卒例也不书日亦例也以例固可以不书也

二年

春公会戎於潜

春而不王何也例凡书月则书王不书月则不书王以书月则其所书者皆冬月而非春月故书王曰此春王之月也此不特寅月为春即子月丑月而无非春也何也王故也若无月则何王也

戎者徐戎也费誓淮夷徐戎并兴注徐戎在鲁东故书序徐夷并兴【淮夷但称夷故知戎止徐戎也】东郊不开旧注谓氐羌别种则氐羌在西方此本曲礼西方曰戎一语而误注之实非也然此是内夷杂处中国【汉後无内夷者皆秦始逐居塞外故也】故得与中国通往来之礼而胡氏以今之外夷当之谓严内外之旨几见春秋戎狄处阨脱者况鲁世受戎患即伯禽开国未能诛夷矧此会修惠公之好则先公世盟有不得不修者故此亦据事直书无他义也特盟会亦礼例而戎则非例若潜是鲁地则当是戎来而我会之旧注公往会而顺夷俗亦非是

夏五月莒人入向

莒与向皆国名而近鲁地者莒人者莒之师也春秋之例凡卿大夫帅师而不记其名与氏则称人【见隐元年郑伯克段传】入者以兵深造其国邑之名然有二义有入而取其地者有入而不取其地者取其地与灭同闵二年狄入卫哀八年春宋公入曹是也不取其地後十年宋人卫人入郑桓二年我入?是也此入向不知取地与否据传莒子娶于向向姜不安莒而归夏莒人入向以姜氏还是称兵夺妇而入其国邑未尝取地故公谷亦曰得而不居然僖二十六年公会莒兹?公甯庄子盟于向襄二十年仲孙速会莒人盟于向注向皆莒地则又似灭其国而取其地矣总是莒师入向莒与向各以事告则据事书之取不取可勿问耳

无骇帅师入极【骇谷梁作佗】

无骇鲁公族大夫之名史凡书公族大夫或仅书名而不书氏如後七年齐侯使其弟年来聘八年郑伯使宛来归祊其不称公子公孙者史文如此并无讳避与褒贬诸例遍考经文甚明此所书例与後四年翬帅师会宋公陈侯蔡人卫人伐郑庄三年溺帅师会齐师伐郑例同而说者必求其故以为无骇未赐族夫无骇果未赐族然氏之书不书全不在此【说见後翬帅师与无骇卒传】若入有二义【见前节】此入不过造其国邑左氏所谓费庠父胜之已耳而公谷曰灭何以见之

秋八月庚辰公及戎盟于唐

方春会潜时戎请盟勿许至是又请而许之传曰修戎好也唐鲁邑

盟会亦礼例而戎则非例故此与会潜虽礼也而总以事书之曰有是事焉尔他仿此

九月纪履緌来逆女【履左传作裂緌公谷作綌】

纪国名履緌者纪大夫名也来逆女者卿为君来逆女也释例天子娶则称逆后卿为君则称逆女若卿大夫自为娶则称逆某姬【如宣五年齐高固来逆叔姬传曰称叔姬卿自逆也叔姬女字】此称女下又称伯姬者此从来逆者言之曰纪所逆者女也下从归女者言之曰我所归者则伯姬也其不称纪使者以昏礼不称主人主人者壻也君自为壻则君虽使卿必当禀命于国母而国母妇人又难通命于他国则但书卿来而使在其中此例也公羊不识例并不识礼妄曰昏礼不称主人然则何称当称诸父兄师友则在昏礼记有云支子则称其宗弟则称其兄此就大夫以下非宗子者言之耳若国君则诸父兄弟皆其臣子岂可以臣子而反为国君所禀命者故国君必无父无父而有母则当得承国母之命卿自来逆而苟其并无国母则必自命卿逆之昏礼记云宗子无父母命之父母皆没则已躬命之而白虎通曰人君及宗子无父母自定娶者卑不主尊贱不主贵也祭统所谓国君娶夫人之辞曰请君之玉女与寡人共有敝邑事宗庙社稷此国君自娶之命也故公羊亦云成八年宋公使公孙寿来纳币此必无母者其言是也若有母而又必称诸父兄弟以为命则非也乃公谷胡氏又皆云书逆女者讥之也讥不亲迎也则又不然夫亲迎之不行亦已久矣孟子曰必亲迎乎以为此礼之细者而哀公问孔子曰冕而亲迎不已重乎亦以为亲迎于礼不无太过则在春秋已前久不行其礼而前儒论春秋者亦谓当列国相争之际不惟都邑上下事理繁重必千里而越人国保无觊觎乘闲之生其间者而必以迂濶之情总小功之察横讥滥刺已不知务又况国家行礼前史既书夫子删存不必有意如谓一书逆女便自有不亲迎之讥行于其间则凡书月朔者必讥其不告朔书春王正月者必讥其不行夏时是怨史也履緌字子帛见下盟密文此称名盟密称字者此重逆女盟密则重其为鲁故也【为鲁故出左传言为鲁盟密也】

冬十月伯姬归于纪

伯姬鲁女字也礼女子许嫁笄而称字注曰即伯姬仲姬之类

纪子伯莒子盟于密【伯左传作帛】

莒与鲁有怨纪侯既昏于鲁使大夫盟莒以和解之则密虽莒地而履繻【履繻名见前】就盟主在履繻故先纪後莒亦据实直书之旧文也事也盖盟会於本国为礼于他国即为事若其义则为鲁结好虽属私情然讲信修睦之微意未尝不在也又何讥焉子伯即子帛履繻字伯帛音误

十有二月乙卯夫人子氏薨

夫人称薨与君齐也然而但称子氏又称夫人者左氏谓桓之母即仲子也公羊谓隐之母即声子也声子仲子皆死于惠公之世矣故谷梁谓子氏者隐之妻也是也若其止书薨不书葬者谷梁又曰卒而不书葬夫人之义从君者也本意谓隐後被弑不讨贼经不书葬故此夫人亦不书所以从君此在范氏注甚明而胡氏又谓先卒则不书葬则又自为例矣春秋十二公并无妻先公卒者故以为言设或有之势无赴告会葬虞祔卒哭诸礼咸备而可抑勿使书者此必隐公自谦于会葬之礼有未备故不书也谷梁胡氏俱非也【据谷梁说岂豫知公後不书葬而先不书耶抑亦书而删之耶臆说之不可通类如此】

郑人伐卫

据传隐元年郑共叔之乱其子公孙滑出奔卫卫人为之伐郑取廩延至是郑伐卫讨滑乱也其称人不知帅师者为谁也伐者声罪而致讨也此非有书法皆实录也然而讨滑乱不书而止书伐卫则事也而文在其中焉当叔段奔共共小国也则不知共有君而叔但寓焉者也则不知夺共而据有之也【郑称共叔段则似无共君者】则不知共故小国今并入于卫而为卫地也然而伯欲杀叔如振裾耳共有君耶则求叔于共共敢抗乎无君耶移师而加共又谁拒之而伯不尔也叔既奔共叔之子亦奔卫然且死灰幸然邀卫师以取故邑及郑伯伐卫而後卫人始服之前儒所谓不书战者以卫已服之是也则在伯此时何难灭共而杀叔以殲其大憝然後乘卫服之际取滑殪之并櫟其子姓之在郑国者以绝其根株而乃一则舍共再则舍滑至十年之後会齐灭许犹倦怠叔弟之在他邑【见隐十一年】而且继世相嬗叔段之孙所称公父定叔者预雍纠之乱仍出奔卫犹复招而归之曰不可使共叔无後于郑【见庄十六年】是段滑父子相继称乱而公并恤之使其逆子逆孙仍得为公族大夫于本国故虽遇罪奔而犹得返其国复其爵也然则伯之恩亦厚矣伯于亲亲之谊亦既已至且尽矣故前书曰克之已也此书伐卫所伐在卫不在滑也此实鲁史书之夫子修之以示为人君父而遇人伦之不幸皆当亲亲是怀不杀不絶一如郑伯之于叔而不谓世之能成其美者少也夫不杀曰杀不絶其後而曰絶伯则已矣然而前不知劝後不知戒千秋万世徒知怨毒之有伯而不知友于亲爱之犹有兄名为主持名教而实为名教之大罪况胡氏诬妄圣经一意刻薄伯祇伐卫无可深文乃又谓郑无王命兴师修怨为王法所禁夫借强援以犯顺骤夺国邑恐非王命所及请者且诛叛讨逆王有成命仓卒制胜皆不为过伯禽征徐夷急遽兴师并无王命而妄以此责郑伯不亦异乎

春秋毛氏传卷三

卷四

钦定四库全书

春秋毛氏传卷四

翰林院检讨毛奇龄撰

三年

春王二月己巳日有食之

礼重天行凡灾祥眚戾云妖物变皆关典例故史官遇此则必以礼例书之然又属事者以无非入事所感虽灾本天行然亦事也春王二月者凡一时必冠三月正月苟无事不书则虽二月三月而亦得以春冠之以空书时月必限首月有事之书则非首月可限也此亦例也日食记灾也日月行天历二十九日有奇而月与日会祇其会时或同道同度而月下日上则二体沓复下行之月将必掩上日之光而以渐吞蚀亦若有物食之者故曰有食之谓食之者月也夫日阳而月阴以阴食阳则合朔交食虽有常度而不可不谓之灾故史必记之第记必以日日必在朔此不书朔者系史阙文而公谷遂发一例曰言日不言朔食晦日也朔日并不言食晦夜也朔日并言者食正朔也言朔不言日食既朔也其义其例似甚切当而可听而不知仍不然者杜氏注云释例以长历推经传明此日是二月之朔而汉魏言历家自太初以后凡三统乾象诸历无不以此鲁隐二年二月之己巳实系朔日徒以鲁史阙文偶失朔字而公谷无赖作此妄谈幸而日月干支无褒讥耳不然而明明朔日偏不书朔深文之徒几何不又以为己巳有罪此仲尼所特笔而削之者耶

三月庚戌天王崩

此平王也天子死曰崩诸侯曰薨皆尊之之称第春秋十二公其所值亦十二王然有书不书者例天子之丧王室必遍赴列国赴至则书不赴至即不书若葬则天子七月自有常期然亦有书不书者此不在乎赴不赴而在乎诸侯之会葬不会葬也夏商无成礼周初有成礼而无成书故仪礼有士礼而并无天子之礼天子丧制在周时已不可考矣今从春秋当日列国卿大夫所自言者考之大抵天子之崩赴至列国则列国各遣上卿奔丧共吊赙器币而国君不即亲往释例所谓封守至重不得越境而奔丧谓初丧也至送葬则天子于列国遣卿诸侯于天子亲往故元左氏传谓天子七月而葬同轨毕至所谓同轨则甸侯以外要荒以内所共车辙者皆在也昭三十年传游吉亦曰先王之制诸侯之丧士吊大夫送葬此列国吊送之等差也今晋之丧先君曾亲执紼矣是过礼也天子之丧当亲会葬而周灵王之葬先君简公因在楚使大夫印段往是不及礼也则是诸侯不奔丧而当会葬其言周制甚明今左氏无明文

祇言王崩于壬戌而赴者以庚戌告此但就本事记之非有误也且丧用远日即稍远亦无过也但杜氏注传谓天王丧葬诸侯例皆不往则已乖本传并游吉之语若胡氏谓诸侯为天子服斩衰礼当以所闻先後而奔丧不知所?何礼乃特引康王之诰太保率西方诸侯入应门左毕公率东方诸侯入应门右为证夫践阼之礼其所为诸侯壤奠悉用虚名与奔丧实至不同况天子新丧六服辽濶此时即赴告之使犹恐不能即出安能于一二日间便东方西方一时俱到故尚书正义谓成王始崩或有诸侯来朝京师者而适遇国丧遂因见新王非谓东西诸侯即能至也则此所引书明非诸侯来奔丧者而辨证及此不惟失据其于事理亦不通矣且又自为例云凡书崩书葬则赴告及鲁而鲁往会之者也桓襄匡简景是也若书崩不书葬则赴告虽及而鲁不往会崩葬皆不书者则王室不告而鲁亦不往其为例凿凿言之及考经文则桓王之崩在桓十五年并未书葬襄王之葬在文九年经文明云遣叔孙得臣如京师辛丑葬襄王并未亲往若景王之崩则经明云葬景王王室乱此时虽遣送尚恐未前况亲往也凡此皆经文之显然可考者而不一简点何鹵裂至此

夏四月辛卯尹氏卒【尹左传作君】

左氏以尹氏为君氏即隐公之母声子也隐以居摄不敢从正君之礼遂亦不敢备礼于其母故不书薨不书葬不赴告祔庙而称为君氏其尹字则传写脱误也夫子以母贵母亦以子贵隐既称公则公之为母自有常称未有创名为君氏者以惠为君耶则先君名君已非名例以隐为君耶则据言不敢从正君之礼而反称君且称君则何有于君母而不称夫人如以声子为君耶则俨然小君而又何靳乎书薨书葬与赴告祔庙况明明经文而改文释经例所最禁若公羊欲如字解经而不识本事乃曰此周之尹氏夫周之尹氏则鲁何得书曰讥世卿也夫春秋世卿其来已久此自周制安所用讥且未有书其卒以为讥者也且亦何得书此也乃又曰鲁隐奔平王之丧尹氏为王作丧主故其卒来赴而鲁史书之谷梁亦遂袭其说两传相同夫平王之崩甫见经文其崩在是年之春三月壬戌而夏四月辛卯即尹氏卒计王与尹氏其崩卒相距祇二十八日则此二十八日中毋论隐公不奔丧即奔自东鲁至成周此时尚未能达也即达亦尹氏随卒必不能为王作丧主也况春秋十二公并未闻有奔王丧会王葬者凡经传恒例公出必书岂有奔丧会葬诸大事而公出公入不一书者如以为常礼不书则在文九年葬周襄王遣叔孙得臣如京师而经特书之是遣送尚书况亲往也且隐不奔丧则在经与传尤明言之者经于春三月书天王崩夏四月书尹氏卒而于秋则复书武氏子来求赙亦惟周以天王之崩赴告于鲁而鲁漫然无一应不惟不亲往并不遣卿大夫往故来求赙向使公奔丧则赙之矣赙之不再求矣故杜氏注曰鲁不共奉王丧致令有求是公不奔丧考之凡经传与是经是传各各有据而公谷注经而悖经且造为伪事以实之无兄而盗嫂不入国而交大夫而胡氏又从而和之曰公羊有所承夫胡氏不过欲藉公羊奔丧之说以文已亲往之例而不知圣经具在在于经是承而谁承也

然则何尹氏曰此郑大夫尹氏也郑大夫尹氏则鲁何以书曰据左氏十一年传曰隐公之为公子也曾与郑战于狐壤而公被获焉郑人囚公于尹氏尹氏者郑大夫也公乃赂尹氏而祷于尹氏所主之神曰鍾巫遂与尹氏偕奔归而立鍾巫而祀之其後公以祭鍾巫出馆于寫氏而遂被弑此十一年公薨传也是此一尹氏而公之患难存亡系焉其德尹氏也则必以客卿

而引厠之内卿之列既厠内卿列则不问其为郑大夫为鲁大夫而必以内卿大夫之礼临其丧既以内卿大夫之礼临其丧则君亲视斂自必书卒况公以尹氏止以尹氏归以尹氏生而其後见弑一若与尹氏之死有相关者公不以祭鍾巫弑乎初因求尹氏而并求尹氏之神既与丑氏归而并祀尹氏之神于鲁虽感神乎实所以报尹氏也故鍾巫之祀虽为鲁立而仍存尹氏以为此尹氏之主必出宫而後祭之乃不幸尹氏既死独身出祭且不馆尹氏而馆之他氏以致仓皇之际罹此大害向使尹氏尚在则主祭有人未必亲出即或亲出而馆于其家纵有不测尹氏必仍有以卫之而惜乎其卒之也此固作春秋者所为溯往事而伤心者也故曰此郑大夫也此春秋之微意也事也亦义也【其後庄二十二年传成季酖叔牙于鍼巫氏鍼巫即鍾巫鍼鍾音之转也公既立鍾巫之祀遂以尹氏为鲁大夫而赐氏鍾巫故有此氏鍼季者尹氏之後也此不称鍾巫氏而仍称尹氏者着所自也】

秋武氏子来求赙

归赙礼也求赙非礼也事也曰有此事焉尔然而赙也而可以求之也乎况天子乎此其中有义焉若其不称使则其求赙者平王丧也平王尚未葬桓在初丧则未有王命而不称使宜也若夫武氏之称子则武氏名来而子行之故称子此与桓五年仍叔之子来聘正同公谷谓武氏亦未葬夫王朝大夫岂尽乏人而必使居丧未葬之子使之将命世无此理况武氏未葬子可将命则平王未葬子何不可以出命而曰桓王无命故不称使则此矛彼盾此白彼黑亦甚周章而况仍叔之子犹之乎武氏之子而在武氏曰父没而未葬在仍叔曰父老而子幼抑何随地蹉跎了无绳準如是也吾故曰春秋冤史也吾深有望乎世之平此冤也

八月庚辰宋公和卒

礼君薨来赴则史必书之第诸侯称薨大夫称卒若外君来赴而亦称薨嫌于内君故我公称薨外君称卒以别之此亦例也和者宋公之名凡书外君卒必书君名以实之至会葬之时彼国易名【易名为諡】然後书曰葬某公此时无諡而但书国爵则又与彼国之前後君无所分别故必书名者亦是史例左氏谓同盟故书名【谓同盟必通名告神故我君得知其名】则隐八年蔡侯考父卒桓五年陈侯鲍卒皆未同盟而皆书名为不通矣【不同盟而书名不可胜数此举其概耳後仿此】其或不书名史略之若谓不同盟者不书名或与大夫盟而不与君盟亦不书名则成十四年秦伯卒与君盟而不书名襄四年陈侯午卒与大夫盟而反书名又不通矣或曰外君书名固是史例若书卒则必彼赴有是称而我乃因之是我国书薨嫌于我君彼国书卒反不嫌于彼卿大夫不可为训若谓谦则不嫌则礼记杂记明云君薨赴于他国之君曰寡君不禄敢告于执事是谦必取下若果谦必不舍不禄而反称卒也【曲礼曰寿考曰卒短折曰不禄是不禄较卒为最下】至于或月或日则史文详略无关义例惟书名与卒则核之通经而有必然者乃胡氏又造为例曰诸侯曰薨大夫曰卒五等邦君何得书卒此夫子作春秋革旧史之称而不因其文以诸侯放恣不奉王命故于其薨时特书曰卒以贬黜之使不得为诸侯也夫鈇钺之诛不加于生前而第为此褫魂答墓之举既已非法况哀十四年夏简书书莒子狂卒此鲁史原文也史例原称卒而谓夫子特革之以诛此五等邦君不亦异乎

冬十有二月齐侯郑伯盟于石门

两国相盟以来告故书石门齐地名余见前

癸未葬宋穆公

礼诸侯之丧士吊大夫送则此书葬非谓彼国葬君也言我国有送葬者尔故此当书大夫送葬某公如宣十年公子归父如齐葬齐惠公昭三年叔弓如滕葬滕成公类而此及後文多不书大夫者略之也穆者宋公之諡其书諡者以薨後易名则讳名礼也其概称公者从我大夫送者之辞也乃胡氏又自造为例分作两等一是鲁史旧文或怠于礼或弱其君则原不会葬而据实不书此史文也是一是夫子削笔或讨其贼而不书如宋殇齐昭告乱书弑矣而经不书葬是讨贼也或讳其辱而不书如晋景公告丧书卒矣而经不书葬是讳辱也或治其罪而不书如鲁宋盟会未尝不同而三世不书是治其罪也或避其号而不书如吴楚之君书卒者十亦有亲送于西门之外者矣而经不书葬是避其号也此削笔也彼史文不必言矣尝就夫子所削者思之据讨贼不葬以宋殇齐昭为言则宋殇被弑可云讨贼若齐昭公卒已立子舍而舍方被弑其於昭公无与也昭未见弑何得云为昭讨贼况春秋被弑多书葬者襄七年郑伯髡见弑于子驷而书葬三十年蔡世子弑其君景公而书葬然则夫子削之者止一宋殇而其不削者且不乏也吾不意夫子之笔削其漫不省核如是也若讳辱不书则诚有之左氏明言公如晋晋止公送葬而耻而不书但书如晋然此是史文非削笔也且其事与襄二十八年楚子昭卒公如楚楚亦止公送葬而耻而不书但书如楚正同此两事一例而胡氏以如晋一事属之讳辱如楚一事又属之避号是自乱其例也乃若宋之三世不书吴楚之十卒不书则如梦如咈更有百不能解者宋之书卒而不书葬者止桓襄二公未尝有三世也且桓公襄公并无所获罪于鲁亦未尝得罪天下何烦开一例必专治其罪而重为削之若其云十卒则吴在襄世始见春秋楚在成前并鲜赴告故吴之书卒祇乘与夷昧而楚则宣之旅襄之审昭之麇与居哀之轸共七卒而无十卒若襄之昭则公亲送葬例在讳辱不当在避号也且犹是五等邦君耳而例当书公则不问晋侯秦伯邾子许男而统以公字概之今既于赴告之时已书曰楚子某卒吴子某卒则于会葬时亦何难行我史例子也而公之而乃曰避号吾不知其所谓避号者恐其称王而避之乎抑亦吴楚国号理当黜絶概不使入春秋经也凡此皆梦咈之语每欲为审处而未敢决也况敢曰此夫子之削笔也

四年

春王二月莒人伐邾取牟娄

彼以伐取告则此书之然而罪在其中焉邾国名夏禹之後牟娄邾邑也其後昭五年莒牟夷以牟娄来降则不特莒长有此邑且莒之公族即有以此邑为氏者矣其坚持如此

戊申卫州吁弑其君完【州谷梁作祝後同】

此春秋书弑君之始也完者卫桓公名其书名者正与列国君薨书名例同此必非彼国来赴原有君名与同盟告神我知其名者据此则益信君薨书名之但纪实而非有他也州吁者桓公之弟庄公之子也其不书公孙但书国号者亦正与齐无知弑其君诸儿例同胡氏谓不以公子之道待州吁教以义方故不书公子而书国则公孙无知乃僖公母弟公子夷仲年之子襄公之从弟而不书公孙将责僖公以不能教从子乎抑责襄公不教从弟乎抑责夷仲年乎从父从兄无教子之责夷仲年失教又无国君之分则其所引为人君父而不通春秋之义者又隔一层矣其书国则里克弑君亦得书晋况公子也【据传卫庄公娶齐女曰庄姜美而无子其娣戴嬀生桓公公子州吁嬖人之子也有宠而好兵公勿禁庄姜恶之则庄公原有失教之过然此时焉能以州吁之恶追治庄罪况称国不称公子此皆陋儒恶例无一通合者世人不学偏为其所惑何也】

夏公及宋公遇于清

曲礼诸侯未及期而相见曰遇故杜氏云遇者草次之期各简其礼如道路相逢者然与周礼冬见曰遇之遇不同时鲁宋欲寻旧盟以未及会期而卫来告乱【即州吁弑君之乱】遂遇于清清者卫地名则是不得已而改盟为遇而胡氏又深文曰春秋书遇皆私为之约自比于不期而遇者直欲简其礼尔简略慢易无相见之礼故春秋恶之夫遇礼明载礼经则礼不恶遇鲁宋此遇明为卫乱则春秋不恶此遇乃初以刑敌烦文为非礼所贵既又以遇礼简略为失人君之礼则明属吹索况终隐之世盟会有九而止此一遇未必因司盟玉府器币告乏之故释春秋者不读春秋而凭空捏撰岂可训也

宋公陈侯蔡人卫人伐郑

此据其告辞而直书之者宋卫陈郑连年有征伐见於春秋皆始此役且皆发于宋而卫继之据传宋殇公之立以公子冯出奔郑郑人欲纳之故谋伐郑而卫则以郑庄曾伐卫故欲修怨以求宠於诸侯因与宋相约遂联陈蔡以伐郑是首事者宋公也【其秋复伐郑亦宋来乞师可验】首在宋从在列国则自当首宋而胡氏谓卫为主而宋为辅其先録宋公为春秋诛党与之法则州吁告宋其自言曰君为主敝邑以赋与陈蔡从为不通矣且宋陈书爵系君自帅师而蔡卫则诸大夫帅师者故称人所谓以赋从而不亲往是也则岂有主其事而不亲往者其书君书大夫书国书人例俱见前

秋翬帅师会宋公陈侯蔡人卫人伐郑

此亦据事直书者翬者公子翬也其不称公子者史原有徒名之例此与前二年无骇帅师入极庄三年溺会齐师伐卫例同【汉後史文多有徒名无氏者即韩愈淮西碑其命将出师亦皆徒名可验】若谓翬不俟公命故去氏则二年帅师与公子溺安得皆叛公命者若谓以翬後弑逆故去公子则此时弑逆未形岂可豫设一讨逆之例且庄二年公子庆父帅师伐於余丘僖三十三年公子遂帅师伐邾皆弑逆而皆书公子何也若谓凡书法氏族书即为褒去即为贬则文十四年齐公子商人弑其君舍以逆贼而书公子襄二十九年吴子使札来聘以让

国之贤而反去公子其可通乎凡此皆遍合经文而无一当者故曰春秋之亡亡于陋例非虚语也

九月卫人杀州吁于濮

冬十有二月卫人立晋

此因来告词而为之文者据传州吁不和于卫人石碏陰诱其因陈侯以覲天王使定其位於是乞陈执州吁还卫而卫人杀之是杀州吁者石碏也其时公子晋在邢而卫迎立之公羊亦曰此石碏所迎立者乃杀州吁称卫人立晋亦称卫人似非实录不知春秋讨贼人人皆得而诛之况卫杀州吁实卫人不伏使吁不自安于卫而後碏之谋以成则碏之诛吁碏之立晋实因卫人有同情而共起讨贼此秉彝之良所当急予之以风世者其不书右宰泄杀【时石碏使右宰丑泄杀之】而书卫人不书晋从邢入【凡从外入者皆书入书纳】而书立晋一似杀之在国立之亦在国者此乃所以为文也以为书法当如是也若州吁已立不称卫侯则弑立不久先君未葬【杀州吁明年葬卫桓公】此与齐无知弑襄公自立齐人杀无知而襄公未葬亦不称齐侯正同【史凡弑立未久如莽卓敦温类俱不称君可验】若谓未与盟会故不称君则一与盟会而即得以仓猝弑逆之贼永正君位荒唐极矣至于卫人立晋谓晋贤得衆卫人立晋为立贤曾是卫宣而贤也乎

胡氏又云立者不宜立也内不承国于先君即不宜立未有子而不受之父者则此时卫桓见弑虽舍晋不立亦未有能受命於卫桓者矣然则卫自此当不立君耶何坚持已说而百不通若此

五年

春公观鱼于棠【左传观作矢】

但书事而义已见焉棠邑名

夏四月葬卫桓公

秋卫师入郕【郕公羊传作盛】

郕国名左氏曰卫之乱也郕人侵卫故卫师入郕

九月考仲子之宫【左传与後文合作一节】

考者成也仲子者桓之母也礼庙祭一考一妣凡继室以子贵者为别立一庙祭之隐以桓为储君因祀仲子以君母之礼故为立宫经例太庙称庙羣公庙称宫

初献六羽

此新成仲子之庙而以祭而定羽舞之数者也羽者翟也文舞用翟树雉尾于竿而执而舞之故称羽若其又称佾者舞行之数每行若干人总谓之佾故天子用八则一行八人八其八为六十四诸侯用六则一行六人六其六为三十六降而大夫四士二皆同但鲁祀文王原用八佾而其後以周公之庙禘所自出则又用文王八佾于周公庙中因之羣公之庙又复因太庙而递行之然则诸侯用六其用八僭也诸侯用六则继室别宫当用四其用六亦僭也此礼也而又行焉若其称初献则仲子之宫初祭用此非如谷梁所谓始僭尸子所谓始降者而胡氏谓降用六羽明前此用八之僭则不知所谓前此者羣宫耶抑仲子宫耶若仲子宫则宫方落成前此未尝用乐也若谓羣宫则後此仍用八何云前此【昭二十五年昭公谓子家驹曰吾何僭哉答曰八佾以舞大武此天子之礼也又论语季氏祀桓公以八佾舞于庭】则即一初字而彼此误认遂一往鹮突况其他乎

邾人邾人伐宋

据传宋人取邾田邾告于郑曰请君释憾於宋敝邑为道郑人以王师会之则邾为主而郑从之所谓敝邑为道是也道者导也今所谓向导也盖谦言也故其序先後首邾次郑自是史例而胡氏又谓卫州吁告宋以伐郑事与此同而彼以宋为主者春秋絶党之法也此坚执前传首诛党与一语不知前传宋本欲伐郑而卫以伐告则主在宋此时郑未欲伐宋而邾以伐告则主在邾其例甚明故卫告宋曰君为主敝邑以从此告郑曰君释憾敝邑为道虽同一相告而其词不同

螟

灾之必书非幸灾也恐其伤我民也螟虫之食苗心者此时秋九月为夏时七月禾尚未登而虫食苗心不其伤乎

冬十有二月辛巳公子彊卒

彊鲁大夫臧僖伯名公观鱼时僖伯力谏不听故于其卒公曰叔父有憾于寡人寡人勿敢忘葬之加一等此不书葬者大夫无书葬例也余说见前

宋人伐郑围长葛

此报邾人之役也长葛郑邑围者师环其地也此书围长葛围而即还耳次年冬书取长葛然後又取其地本是两事而胡氏以今冬之围将直至明年之冬故曰城守不下至于经年而不解误矣郑此时被围已属冬末而次年之春即书郑人来输平非兵解而能之乎故杜氏于取长葛注云前年冬围不克而还今冬乘长葛无备而又取之此实录也

春秋毛氏传卷四

<经部,春秋类,春秋毛氏传>

卷五

钦定四库全书

春秋毛氏传卷五

翰林院检讨毛奇龄撰

六年

春郑人来输平【输左传作渝】

和而不盟曰平输者纳也据传公未立时与郑战狐壤而获公焉则公原有怨于郑者至是郑与宋构而前年郑伐宋宋告急于公而公不之应则似于郑怨有忘之者矣在我忘怨在彼纳好此春秋所予也输左氏作渝渝者变也非变其平乃是变讎怨而即于平也虽渝与输字形之误然其义亦同

夏五月辛酉公会齐侯盟于艾

艾鲁地名盟会见前

秋七月

说见前

冬宋人取长葛

长葛郑地而不书郑者前年有伐郑围长葛文则长葛郑地可知况春秋分邑皆有数其列国都邑皆见书策但举一邑名而即知为某国之邑故春秋凡书邑概不冠国于邑上可验也若贾服谓长葛不繫郑者刺不能抚有其地则凡盟于某战于某次于某败于某皆但书某地而不系何国岂皆不能抚有之耶

七年

春王三月叔姬归于纪

叔姬者伯姬之娣也隐二年伯姬归纪矣叔姬以幼娣而待年于国至是始归故书之且为庄

十二年纪叔姬归鄫张本若谓以叔姬为贤而书之则春秋无书贤之法卫之庄姜鲁之敬姜岂伊不贤而春秋削之

滕侯卒

滕国名不书名者史阙之也说见前

夏城中丘

中丘鲁邑据左氏以不时故书

齐侯使其弟年来聘

周制诸侯有聘问之礼使卿执玉帛以相存问故周礼玉人职云瑑圭璋璧琮八寸以頌聘而聘礼使者执圭以致命束帛加璧以致享皆以玉帛献享相结好者齐鲁本世好之国至是僖来聘且使其弟重典例也年者弟之名左氏称夷仲年似以夷仲字而年其名者其不称公子则史例如是予前已备言之而胡氏谓恶夷仲之子【即无知】後成篡弑遂责僖公宠夷仲之故而削其氏号夫以兄宠弟而削弟氏子篡弑而削父氏连坐之法春秋无有况无知之弑在庄八年此时篡弑未形而豫戮其父于三十八年之前不已急乎

秋公伐邾

据传宋及郑平惟惧前年受郑成而宋恶之故伐邾以媚宋以邾为宋怨故也【隐五年邾人郑人伐宋】故传曰为宋讨也夫邾为鲁隣且曾盟蔑以媚宋而致絶与国而坏旧好于义何居

冬天王使凡伯来聘

戎伐凡伯于楚丘以归

周制天子有聘诸侯之礼至是桓王始来聘而我之朝聘前此未闻斯已难矣乃复终事以还而使车在道忽受戎患王臣为我来未可坐视况鲁职方伯即不请王命亦可以兴师讨罪如伯禽征戎已事而乃了无所施而徒书其事于册其安之乎凡伯者周之卿士凡国伯爵也伐者以兵制人不必有钟鼓曰伐以归者胁之而归楚丘卫地名据传戎朝于周曾发币以享公卿而凡伯不以宾礼相待故戎怒伐之亦报复之举也然非法矣

八年

春宋公卫侯遇于垂

宋郑构兵已久而卫复佐宋以加於郑虽三国连构实则以一郑而敌宋卫之两大其在郑不无小绌前三年齐僖与郑庄曾盟石门齐原有袒郑之意至是稍不平因欲平宋卫于郑而宋卫先自为相遇之礼以商其可应与否然後至秋则赴齐僖之会而盟于瓦屋则此一遇史不过据事直书无所可否然而宋卫之不欲平先为诡秘以启齐之疑亦可见矣宜乎齐之一闻王命即渝此盟也垂卫地名

先仲氏曰宋殇之伐郑以公子冯也【宋殇公者宋宣公子也宣公舍子殇公不立而立穆公故穆公之死亦舍其子冯不立而仍立殇公】公子冯以先君之子不为先君所立而使居于郑谓让殇也非奔郑而与殇争国者也【三传皆云穆公使冯先出居郑以避殇】乃徒以居冯之故而伐郑不已郑甘之乎卫宣之伐郑以公孙滑也【公叔段奔共时其子滑奔卫挟卫伐郑取廩延故郑伐卫以报之】滑以叔段之子奔卫伐郑此与郑争国者也与郑争国而郑不讨贼卫反假贼怨而伐郑不已郑能已乎此皆善论春秋之言

三月郑伯使宛来归祊【祊公谷作邲後同】

庚寅我入祊

据传郑伯请释泰山之祀而祀周公乃以泰山之祊易许田详其说因成王营洛原赐周公朝宿之邑于成周以其邑近许故名许田而郑桓公以宣王母弟赐汤沐之邑于泰山之下使陪祀泰山以其邑名祊亦谓之祊田今诸侯不朝则朝宿之邑可废王不巡狩则汤沐之邑可废故郑欲相易而我许之因来归祊其云祀周公者以许有周公之庙不敢云废驾言请祀也然而其说不可训也夫子从鲁史文例先书彼归若意出自郑者继书我入若我不得已而姑受之者然且并不及许田一似郑之归祊与许田了无与者其後桓元年以许田归郑但书郑假亦若意出自郑者且亦并不及祊田一似许之归彼与祊田又无与者此乃所为文也所为鲁史成之而夫子修之者也若宛之书名入之书曰并无义例诸说皆谬至于许祊之易经未书复而鲁颂曰居常与许复周公之宇似後此僖公作閼宫时已经还许而经偶不书或亦史克作颂故为复文以示许田之当复皆未可知然则史文必有例赋颂且然况春秋乎

夏六月己亥蔡侯考父卒

辛亥宿男卒

说见前

秋七月庚午宋公齐侯卫侯盟于瓦屋

是年春宋卫先遇于垂正为齐侯欲平郑而先相会以谋之至是乃始请齐侯而共为此盟以平郑是齐侯为主宜首齐侯意在平郑宜书平宋卫于郑今书宋公先齐侯者以宋卫先盟齐侯遂不甘为主故齐使来告首称宋公而我史书之若不书平郑则以此时但盟而未平及既

平而冬复来告【左传齐侯使来告成三国】则已书在秋而不及再书此皆就告词登册而并无笔削于其间者若其义则三国之构於此暂息亦春秋所予而无如继此之宋之不共王也此後郑鲁齐三国共起讨宋又别是一事非此事也瓦屋周地名

八月葬蔡宣公

九月辛卯公及莒人盟于浮来【浮公谷作包】

前二年纪为娶鲁女专与莒盟以为鲁修好故此复盟莒以成纪之意左氏所云成纪好是也浮来纪地名

螟

冬十有二月无骇卒【骇谷梁作倭】

无骇鲁大夫见前史例君薨必书他国君薨则因其来赴而後书之若公族大夫则有卒有不卒其卒也有氏有不氏有月日不月日皆鲁史旧文而夫子存之并无笔削于其间者如此无骇卒不冠以氏与书翬书柔书溺例同但书某卒与下九年书挟卒例同乃从来谓不书公子以未赐氏故则翬柔溺挟岂皆未赐氏者乎且氏非尽人可赐也据周语曰帝嘉禹德赐姓曰姒而正义谓有大功德然後赐氏否即不赐则春秋公族亦无几人可赐氏者况明明弑逆公然有氏鲁之东门始於襄仲卫之公父肇自定叔此是谁赐而历历称之且鲁多公族臧孙叔仲公父子服未必皆出公赐也大抵先公之子则为公子公子之子则为公孙公孙之子则或从父字或从父諡或从官从邑而自立为氏故天子赐姓亦言天子而下惟诸侯有姓故云赐姓如鲁姬齐姜杞姒宋子惟诸侯百世不易而他皆更氏则诸侯之不更氏一如天子所赐者若必真有所赐则齐陈鲁卫有谁赐姓昭八年传谓胡公不淫因赐之姓则陈之姓妨史世家明云由舜居妨汭而早以为氏未闻入周始姓妨也若晋语谓伯夷炎帝之後赐姓曰姜则炎帝本姜姓何待伯夷始赐之至于诸侯赐氏则亦唯宗卿大夫始得有氏一如诸侯之赐之者故鲁桓三子称为三桓而公子公孙之後皆得以父字为氏父字仲庆则为仲孙父字叔牙则为叔孙父字季友则为季孙【字有二义一是加冠之字如臧氏展氏是也是一是长幼之字如仲孙叔孙是也】此皆遵旧例而自为更之若必赐而後有氏则赐氏必在身後何以仲孙叔孙在生前皆得称之乃自氏而又分之则谓之族如仲孙之为南宮叔孙之为公若季孙之为公父不一而足故孔疏谓合之为族而分之则为氏则殊不然姓分而为氏氏又分而为族未闻族反合而氏反分者高阳一氏而分十六族晋叔向曰肸之宗十一族惟羊舌氏在而已则由姓而氏由氏而族遍考历然今无骇不知为何公之子何公之孙而史偶不氏本是史例而左氏必以未赐氏为言遂记其赐氏一节以为左证夫无骇即未赐氏即果是既死之後然後赐氏然岂无自有之氏如所称臧孙辰卒季孙斯卒者而必待赐而後书则赐氏之典断在死後春秋书卒皆无骇矣左氏记事极可据而一当解经则十有五六误者况生千百世後而尚欲舍经而就我可乎

九年

春天王使南季来聘

南季天子大夫南氏而季字也天王下聘已见前七年矣隐十一年中天王下聘者二归贈者一而公于上交之礼亦曾有一於此乎

三月癸酉大雨震霍

周之三月夏之正月也斯时未启蛰而震且霍焉灾矣震者雷之能击物者谓劈历也

庚辰大雨雪

三月雨雪不为灾大即灾矣雨者下也与雨螽雨雹同

挟卒

挟者鲁大夫名其无氏者说见前

夏城郎

左氏曰书不时也

秋七月

冬公会齐侯于防【防公羊作邴】

据传宋公不王郑伯为王左卿士以王命讨宋告我与齐谓齐鲁皆方伯也如是则宜择日誓衆兴师讨罪而乃先与齐会以陰谋伐宋之举则直利其有且以舒怨非王师矣故经於此数节皆絶不及宋之不共与郑之奉命兴师一语而但为列国构怨之文以曲记其事此夫子之微意也防鲁地

十年

春王正月公会齐侯郑伯于中丘

前既与齐会矣此复与郑会然皆在鲁地则鲁为政矣中丘鲁地名

夏翬帅师会齐人郑人伐宋

此与下节正兴师讨罪之本事也乃三国之君皆不亲往而通使大夫帅师【凡大夫帅师而无名氏者即书人】斯已奇矣且郑受王命又复为王国卿士等之王臣自宜亲统六军身先二国而乃陰借王师阳奉齐鲁伐不前驱取不入献可称王乎则亦列国构怨之师而已矣首我文也殿郑亦文也不称王命亦文也若翬不称公子齐郑称人则史例如是于春秋书法并无与焉前我与齐郑合谋专为此举则此时命将出师全出自三君所谋其所云翬帅师者亦命之帅师已耳其不称公子者史例如是等之无骇帅师溺帅师已耳而说者必求其徒名之故以为先期夫先期者必二国未集而我先在军期未同耳今明明齐人郑人三国并行何为先期且先期亦不应削其氏也向以非公命而削其氏今三君同谋在前我公专胜在後则不得云非公命故别以先期责之则後之公败宋师齐郑未集真先期也经亦但书公而不及齐郑先期故也然而经之为文祇恶其牵伐责其利有而未尝以先期之故更称变名则翬可知矣余见前翬帅师传

六月壬戌公败宋师于营

辛未取郕辛巳取防

此公先期取胜也据传三国大夫于五月伐宋至六月三君复会于宋地尅期并入公于齐郑未集时窥宋无备乘间而败之继此则郑师取郕而归于我又继此则郑师入防而归于我则是我但取胜而取郕取防皆非我事然而郑师归之鲁史即书之者事也其但书我取而并不及郑师之归之者文也且我之败之者事也但书我败之而全不及二国一若此时无二国之师者文也亦义也营宋地名郕防宋二邑名

秋宋人卫人入郑

此报郑取郕防之役也前取郕防时祇六月甫及秋而宋即报之故乘郑师未还而即挟卫蔡以造国邑传所云郑师还郊犹在郊是也但仓卒袭人未能得志故又去而伐戴耳

宋人蔡人卫人伐戴郑伯伐取之

戴小国名宋卫三国皆大夫帅师无所适主入郑未遂去而伐戴此如秦三帅之袭郑不得去而伐晋正同然则郑之余勇其可撓乎伐取者伐三国之师而取其衆所谓覆而败之者【此见庄十一年公败宋师于郕传文】故左氏曰取三师焉【旧注谓威力兼备若网罗所掩一军皆禽不止献俘献馘故名为取服?谓设伏而败乘其无备为取则荀吴败狄乘其无备郑败燕师设伏而败皆不称取非也】此与哀九年宋皇瑗帅师取郑师于雍丘十三年郑罕達帅师取宋师于嵒例同自杜氏孔氏不即引例遂若无取师一证致公谷谓郑藉三国之兵以取戴夫三国以入郑来与郑为敌其不取郑亦幸矣而郑尚可藉其兵以取他人国此是何说母论三国必不许郑必不能即许之能之彼区区小国因我受大敌以波累于彼天良未絶不能救恤之而反收其地而不之却为此说者其残忍愒薄与禽兽无异而胡氏复重其罪谓郑伯狡诈能以奇胜故驻师于郊多方以误之四国已鬪起乘其弊一举而兼取之则不知郑师之

驻郊驻郑郊也郑以六月庚辰取防七月庚寅还郊其相距止十日而宋卫与蔡已乘虚而骤入于郑则其还国而却三国之师不啻旋踵是预知宋谋而急还急还而急入国以拒敌其在郊不过顷刻耳而曰多方误之已属诬妄况驻师观变当在戴郊今乃驻已郊以误三国吾不知其何以误之也若谓郑庄克叔段败王师困州吁而入许专以残逞则王师之败不见于经责以入许则必大为庄所笑吾入郕而不取郕入防而不取防入郕而不取郕入许而不取许而谓吾救戴而反取戴小人之心也若春秋三书取师皆宋郑相构郑取宋二宋取郑一其义何居此则不必深文耳

冬十月壬午齐人郑人入郕【郕公羊作盛】

据传蔡人卫人郕人不受王命【即前王命伐宋】故齐郑讨之入者以兵造国邑而不取其地之名说见前

十有一年

春滕侯薛侯来朝

周制诸侯有相朝之礼左氏云诸侯五年再相朝礼也周礼大行人职凡诸侯之邦交岁相问也殷相聘也世相朝也郑注父死子立为一世言一世止一朝也而前儒断之谓尚书周官天子六年五服一朝今诸侯五年再朝不无大数且再朝之说别无左证惟世相朝则有之或小国朝于大国或敌国相为宾或彼君新立而此朝新君或此君新立而新君朝彼皆是世相朝之法但考之春秋亦似有未合者如成四年邾子来朝此成立而朝新君者十八年邾子又来朝则邾宣公立而新君来朝者此世相朝也然而昭三年小邾子来朝此朝新君也至十七年而小邾子又来朝则犹是小邾穆公未尝新立而何以又朝然则相朝之礼但是周制不必凿凿也此则滕薛两国并来朝我而并记之孔疏云并记之者并相行礼如滕薛争长是也【行礼时薛欲先滕後滕以同姓先薛见左传】若同时来朝而各行礼则各记之如桓七年谷伯绥来朝邓侯吾离来朝是也薛任姓黄帝後奚仲封薛滕同姓见前

夏公会郑伯于时来【夏公谷作夏五月时来左传作邾公作祁黎】

据传公会郑伯于邾谋伐许也夫公欲伐许而亲造郑地则又鲁为政矣故入许之功虽在郑伯而仍以齐鲁先之虽史例先本国然亦据事直书无所避忌故也时来郑地名

秋七月壬午公及齐侯郑伯入许

入者以兵造国邑而不取其地之名据传郑师登城而入许【时公孙阙与颍考叔争登阙射考叔堕而瑕叔盈又执鍪弧旗以登郑师毕登遂入许三人皆郑大夫】许庄公奔卫是入许者郑也然而齐鲁交主之故齐以许归之公而公曰君谓许不共故从君讨之寡人何敢闻则齐亦在首谋者但其功在郑故终归之郑郑伯乃复令许叔守许而不取其地【许叔许庄公

之弟郑使许大夫百里奉许叔居许曰毋宁兹许公复奉其社稷言待庄公归也】则鲁史所记自宜次郑终齐而今仍首我而殿郑者以为搂伐之罪三国共之然首从不可泯也所谓但书事而义自见者此也

冬十有一月壬辰公薨

公实被弑而书薨讳之也讳则何以知被弑凡薨必以地如云薨于何所今但书薨而不书地欲使人推求而自得之所谓文也其不书葬者或葬礼不成或不赴他国与他国不来会葬则皆不书此则以被弑故葬礼不成左氏所谓不成丧是也此亦例也【说见前】据传公子翬请杀桓公以求太宰公曰为其少故也吾将授之矣使营菟裘吾将老焉【菟裘鲁邑谓将逊国於桓而终老其地】翬惧反谮公于桓公而请弑之先是公见获于郑而囚之尹氏尹氏者郑之大夫前三年经书尹氏卒者是也【公为公子时与郑战狐壤为郑所获而囚之尹氏】时尹氏有鍾巫神而公陰禱之至与尹氏归则立鍾巫祀每岁出祭乃以尹氏卒而馆之寫氏翬遂遣贼就寫氏弑公且讨贼寫氏而嫁祸焉是弑公者翬主弑者桓而为人受罪者寫氏也是翬实不臣桓实不弟而亦隱实不能君以致有是也是皆鲁史旧文夫子因仍之以垂鉴戒者若谓改弑为薨必非鲁史之笔则齐侯阳生郑伯髡顽皆被弑而皆以卒告彼齐郑史官未尝不讳国恶也【僖元年传曰讳国恶例也】此是史例不必鲁史始然也如谓不书葬为夫子所削则卫桓齐襄尚不见削而谓隱独削之乎如曰不讨贼故不书葬则经多不讨贼而仍书葬者说见葬宋穆公传

春秋毛氏传卷五

卷六

钦定四库全书

春秋毛氏传卷六

翰林院检讨毛奇龄撰

桓公【公名轨史世家又名允惠公子隐公弟也諡法辟土服远曰桓】

元年

遭丧即位踰年改元前已言之详矣此元年为桓改元之年自当在隐公被弑之次年而左氏疏又谓桓之於隐本无君臣之义计隐公之死桓公即合改元不必踰年始即位此与晋厉被弑悼公改元例同殊不知隐之居摄不比豕宰桓之待储实同树子如以豕宰摄例较之则豕宰摄事不摄位今隐既摄位何谓非公豕宰奉年不建年今隐自有年而桓实奉之谁谓隐非君而桓非臣若晋厉被弑悼即改元则并无其事晋厉以八年之春正月被弑实当成之十八年而悼公以是年二月即位至次年当襄公元年而後改元【左传二月即位国语正月即位皆在厉八年春未尝改元若史记年表则悼公改元正在襄公元年】诸书可考也不知孔氏何所据而疏义如此

春王正月公即位

遭丧即继位然必改元行即位礼常也惟遭弑逆则多有不行者庄闵僖是也今桓行即位礼所以饰弑隐之不由己也然已有弑之者矣且讨寯氏矣忍行之乎即位说见前【隐元年】

胡氏曰古者诸侯不再娶惠公元妃既卒继室以声子则是摄行内主之事矣仲子安得为夫人母非夫人则桓乃隐之庶弟安得为适子是隐之授桓实让之非摄之也乃惠以邪心而欲立桓而隐又探其邪心而成之以让桓夫妇之大伦从此乱矣其说虽近似而实不然者周制周礼已渺乎不可问矣吾即就春秋断之庄公取哀姜无子其娣叔姜生闵公此与惠公娶孟子无子其娣声子生隐公无以异也庄公别娶孟任为夫人而生子般与惠公更娶仲子为夫人而生桓公又无以异也庄公舍闵僖不立【叔姜生闵公又有成风生僖公最长】而欲立子般与惠公舍隐公不立而欲立桓公又无以异也然而季友奉庄公之命以死立般甚至杀兄奔国祸连数世在庄不为有邪心而在季友则不惟不探君邪然且成季之名鲁人称之史官褒之夫子又从而存之笔之至定哀之间他国君臣尚有称季氏未亡其先人有大功于鲁者而胡氏亦引唐陆淳之说谓季友恩义俱立变而得中若是者何也学者注经所贵平情况春秋一书全在比例岂有春秋本经前後见在而举其一遂忘其一者岂有同一事例而前极

贬之後又极褒之者夫周制已亡但当阙疑虽曰诸侯不再娶而公羊谓媵有贵贱贵即当立何休又谓嫡无子则立媵媵无子则立侄娣是立媵立嗣原有次第况舍媵更娶则贵有在媵上者故左氏于仲子曰为鲁夫人于孟任曰以夫人言许之夫母称夫人而尚谓其子不当立耶韩宣子见春秋曰周礼尽在鲁则周礼已亡春秋实可以论礼预定春秋例而以礼例当四例之首岂无谓也

三月公会郑伯于垂【左传合下爲一节】

郑伯以璧假许田

甫即位而修邻好礼也然而桓之为此则意在固其位也若其先与郑会者以隐曾与郑相好故尤急也至于许田之假以易祊也郑欲以泰山汤沐之邑名祊田者易我成周朝宿之邑之许田【以各近其国故见隐八年】在隐虽许之而未与也即彼已归祊我已受祊然而仍未与也其未与者或以许田重于祊或亦迟回之冀得以终止其事未可知也至是桓媚郑而急与之而郑遂加璧而受之史官不言易但云假之耳并不及祊田但云以璧假我许田耳此与前归祊入祊而不及许田正同所谓文也所谓春秋之微词也此或夫子之笔也垂卫地名

夏四月丁未公及郑伯盟于越

传曰盟于越结祊成也越亦卫地与垂近盟与会二礼【说见前】及者史例首本国也胡氏谓及者我为志会者彼为主前已详辨之【见隐元年】此垂越皆卫地去鲁远而去郑近则必公越齐至卫而郑应之其断非郑志可知乃胡氏又坚执其说殊不知此一盟一会本一时事会垂而假许盟越而成祊总此事也鲁卫齐郑相距颇远岂能于三四两月间两约期日两散两聚虽历夏秋实一时也几有一时一事而我志彼主分两例者误矣

秋大水

以灾故书说见前

冬十月

二年

春王正月戊申宋督弑其君与夷及其大夫孔父宋督宋太宰华督也徒名不书字史例然也【见前】与夷者宋殇公之名也大夫孔父者宋之司马孔氏而父名也其书名者史例则然无所为褒贬也此其例与庄十二年宋万弑其君捷及其大夫仇牧僖十年晋里克弑其君卓及其大夫荀息并同若谓书名为贬【见左氏注】则荀息仇牧皆书名矣且未有宋君称名于前而其臣可称字者故公羊以孔父为字是褒孔父则不惟孔父有字曰嘉【见左传】并不是字亦正以君名臣字于礼不通故不遵其说若谷梁谓孔氏父諡则可笑尤甚周制諡法

并无有以父为諡者且大夫卒三月既葬然後请諡此时君臣新死焉得有请諡赐諡之理况春秋二百四十余年并无以諡来赴者君赴尚不諡而谓独諡此大夫乎祇督将弑君先杀孔父而经先宋公而後孔父似书法有异而仍不然者君与臣同时被害即有先後亦必先君而後臣断无有先其臣而後及君者况当时情事原有不堪用兵而欲为弑公以召公子冯之举所碍者独孔父主兵柄耳盖殇公即位以来牵连齐鲁累岁伐郑无非为公子冯一人而为宋司马而董战鬪者匪他人即孔父也【宋殇公者宣公子也公子冯者穆公子也宣公舍殇公而立弟穆公故穆公亦舍子冯而立兄子殇公使冯出居郑以避之是冯居郑让殇未尝奔郑争国也而十年十一战皆在郑不惟民不堪冯亦不堪矣】督有意召冯不得不弑君欲弑君不得不先杀孔父是非杀孔父而後及公实欲弑宋公而先及孔父则其所谓及之者实顺推非逆数也故督为太宰乘民怨之故扬言殇公十年十一战民不堪命皆司马之罪先使民知其人可杀而後攻杀于其家夺其妻而弑公焉左氏谓孔父有罪佐君兴师不能正君德以及于难固为非是何则父既殉君则虽有罪而此时不及重在督则轻在父也若公羊谓贤乎孔父义形于色则又不然义不能匡君以正其家【先是华督见孔父之妻于路目逆而送之曰美而艳孔疏谓礼妇人之出必拥蔽其面乃令人见其色美以致杀身而妻从他人是不能治闺门也】则其所谓正色立朝者徒拥强兵以长君之恶谷梁所云孔父闲言孔父但能闲卫君也夫但能闲卫君则彼弑君者欲不先去其闲卫得乎

滕子来朝【朝新君也後?侯来朝同】

周制诸侯有相朝之礼【见隐十一年】此专以礼书而义无讥焉若滕本侯爵而今称子则是桓王所降黜者杜氏云东周虽微然犹为天下宗主既能命邾为诸侯岂不能降滕为滕子在前儒已辨之久矣而胡氏复谓时王不能黜诸侯此独因朝桓之故以诸侯而朝弑逆故仲尼特削降之则文十二年滕子来朝襄六年滕子来朝哀二年滕子来朝岂皆朝弑逆而皆降之况滕之称侯自隐十一年滕侯与薛侯来朝称侯後则处处称子如庄十六年诸侯滕子同盟于幽僖十九年宋人执滕子婴齐二十二年诸侯滕子伐郑宣九年滕子卒类是隐末桓初降侯称子延至十二公而未有改明明被时王所黜而以为仲尼恶桓特笔而削此侯爵何我仲尼之受冤至此极也嗟乎何受冤至此极也

三月公会齐侯陈侯郑伯于稷以成宋乱

夏四月取郕大鼎于宋戊申纳于太庙

成者平也正而安之也宋华督弑君则宋乱矣公会诸侯以平之未为不当而无如受其赂而还也郕大鼎者郕国所铸之大鼎也太庙周公庙也不言宋归我而曰我取之者此其中有文焉若曰我以平乱故取之岂受赂乎或曰成者成就之义则天下岂有人国乱而我合诸国以成就之者始以平往既以利还无非直书其事以俟其义之自见至于立华氏则经无明文杜氏亦以为督未死而先赐族世无是理先仲氏曰善解春秋者当以传解经必不当以经解传此其一焉稷宋地名

秋七月?侯来朝【杞公谷作纪】

蔡侯郑伯会于邓

据传始惧楚也楚熊绎之後而居丹阳至熊逵僭称武王徙居郢武王十九年即隐之元年也自是寢大而蔡与郑实逼楚因惧而谋之然何益矣邓蔡地名胡氏以邓为小国此本贾服说而又误者孔疏云邓是小国去蔡郑甚远不能遥会其地且蔡郑此会本为惧楚何当反求近楚小国而与之结援谬矣

九月入杞

据传杞侯前来朝以不敬故此入之夫既来朝虽不敬无伐之理此必有他故见僖二十七年传

公及戎盟于唐【左传合下作一节】

冬公至自唐

据传书公至告于庙也凡公行告于宗庙反行饮至舍爵策勲礼也但礼记曾子问诸侯适天子必告于祖奠于祔命祝史告于宗庙诸侯相见必告于祔命祝史告于五庙反必亲告至于祖【适天子】祔【诸侯相见】乃命祝史告至于前所告者【余庙】则是出入必告庙比之出告反面之义而告祔在祔其曰宗庙者该祝史言之也且出告不注者以出祔用币无饮至策勲之礼故略之也盖饮至者喜其至而饮于庙中也策勲者饮毕而书其所行之事于策也勲者事也功也此是礼例其有书不书者以行礼有详略或用币而不饮至或饮至而不策勲【如所行有讳避之事】或第命祝史而已不亲告则皆不书乃胡氏又自为例曰此常事不书其书者或志其去国之久或録其盟会之危或着其党恶附奸之罪则在春秋公行凡一百七十六其书至者八十二并无一合如此书至谓远与戎盟而书至者危之也则此戎徐戎也在鲁东郊费誓所谓东郊不开是也未尝远也况唐是鲁地以近郊之戎其君长亲来而会于我地何危之有

三年

春正月公会齐侯于嬴

春秋书时月而或书王或不书王者皆史有详略无关义例故有时无月而不书王者凡一百余条有时有月而不书王者凡一十五条此不书王者正有时有月而不书之例【说见前】而谷梁谓桓无王故削王字则宜在元年乃元年二年有王至三年而始削之何其讨贼之需迟也则又为说曰元年有王所以治桓也二年有王正与夷之卒也【宋督弑君与夷】则是有王反治罪得毋三年以後其无王者皆褒德者乎且治桓已耳华督弑君与鲁何涉而胡氏

亦曰二年书王正华督之罪得毋春秋二百四十余年凡有王者悉治罪之年乎况有王治罪无王又治罪是乱刑也无王是削而恶桓有王是笔而又恶桓是笔与削俱无所準也且春秋须比例文九年春有二月三月而无王成十三年春有三月而无王定十四年春有二月而无王以例言之与桓年正同然而三君于诸年并未尝有治罪贬削之事是属词比例又并无一相合者吾故曰此不关义例非无谓也

齐侯齐僖公也会于嬴者成昏于齐也【聘文姜】嬴齐地名

夏齐侯卫侯胥命于蒲

胥命者相命也谓申约言以相命而不歃血也蒲卫地

六月公会？侯于郕【杞公羊作纪郕公羊作盛】

二月我入杞故此会而成之传曰？求成也

秋七月壬辰朔日有食之既

既尽也

公子翬如齐逆女

此桓公娶文姜也古诸侯娶女亦必亲迎然此礼不行久矣但送女大国必以上卿则逆女大国亦即以上卿行之翬见前

九月齐侯送姜氏于讙

礼送女大国必命上卿未闻有公亲送者此齐僖爱女故然然失礼矣讙鲁地名杜氏云已去齐故不称女未至鲁故不称夫人

公会齐侯于讙

夫人姜氏至自齐

杜氏云告于庙也礼迎与至俱告庙而祇于至云告庙者犹公行不告而祇云告至例同第书至有二例一书卿以至宣元年公子遂如齐逆女三月遂以夫人妇姜至自齐是也一但书女至隐元年纪履繻来逆女冬十月伯姬归于纪是也推之天王之嫁娶皆然【桓九年纪季姜归于京师庄元年王姬归于齐类】而胡氏以不亲迎并不书卿至为不能防闲启文姜敝笱之兆夫鲁十二公惟桓庄为亲迎桓迎于境虽为齐侯然受之其父已亲御轮矣不随卿至已

亲导妇入寝门矣然而文姜哀姜淫失尤甚则夫敝笱之兆或别有在恐非亲迎卿至二礼所得而防闲之也况不书卿至则公亲受之正亲迎也

冬齐侯使其弟年来聘

周制女出嫁後随遣大夫加聘问之礼所以存谦敬序殷勤也在本国遣使谓之致女在他国使来则谓之聘此传曰致夫人也则致女之聘也年即夷仲年见前

有年

年者稔也熟也谷一熟曰年有年则熟者衆矣贾服谓桓恶而得年异之也书有言不宜有也则宣十六年书大有年宣恶不必过于桓而曰大不宜有误矣况君恶耳民亦何罪而必使无年此徒以妇孺之见测天意而胡氏遵之不可笑乎

四年

春正月公狩于郎

狩者冬猎之名周礼大司马仲冬教大閱遂以狩田则狩宜在冬而此书春正月者周之正月为夏之十一月正仲冬也狩田者以田既艺获则随地可狩故曰狩田此狩于郎与庄四年狩于禚昭八年蒐于红十一年蒐于比蒲例同但左传曰书时礼也而公羊以地远为讥考之郎邑在鲁郊实未尝远注者亦知难通变言郎邑本近而郎邑之属在郊外为远则明是遁词而疏左氏者反袭其说以为常地不书如西狩获麟是也非常地即书如天王狩于河阳是也盖狩有常地如郑有原圃秦有具囿类夫圃囿者游观之所不事较猎故春猎曰田谓取兽于田也夏猎曰苗谓为苗除害也秋猎曰蒐谓搜兽于藪泽间也冬猎曰狩谓閱毕围兽而大较以毕农事也此明属异地并无有场圃苑囿为四时常猎之所见之经传不得已而以召狩河阳西狩获麟证之夫召狩书地果是狩乎西狩不书地则何以云西西者国之西也西郊则地矣若云常地不书则春秋五蒐三在比蒲然又书何也乃胡氏并袭其说以贬桓夫弑逆之罪不以礼狩而减也罪在弑逆亦不以非礼狩而又加重也凡此皆深文之不必然者况我欲诛桓而桓不受诛则其罪反在所诛之者矣春秋笔削定无曲词何可使爰书不确任人平反至是

夏天王使宰渠伯纠来聘

此天王周桓王也天王下聘礼也然诸侯不朝而王反来聘过矣以桓之弑逆王不能讨而反来聘焉益过矣此春秋之笔所为直书其事而义自见者若其称官称名则与隐元年天王使宰咺归赍例同并无书法而说者又纷纷焉按周礼天官有大宰小宰宰夫皆称宰此宰夫之职本下大夫与上士相通例当称名宰者官渠者氏伯纠者名也若公羊注以渠为名伯纠为字云名字并见已杜撰矣谷梁注谓下大夫老以伯为老称故书字则与左氏云伯有父在以少年来使故书名一老一少极其可笑而胡氏又云宰是太宰伯是封爵当是以诸侯而入相

与既相而受封者则丁零盗苏武牛羊何从按之

此年与後七年俱无秋冬者经文阙漏并非笔削旧说所谓或史文先阙而夫子不增或夫子备文而传者遗脱此明白了义而胡氏又谓天王失刑桓恶不讨故削秋冬以见佚罚则定十四年亦有春夏秋而无冬矣此则何所刑讨乎况春秋编年专为记事徒以贬桓之故而竟削春秋两年两时之事恐无是理矣孔疏尝云日月有详略而无义例文以前六公书日者二百四十有九宣以後六公书日者四百三十有二计前後两截年数略同而日数加倍近详而远略断无贬远褒近之例先仲氏亦曰桓十二年冬十一月既书丙戌盟武父矣又书丙戌卫侯卒夫一日无再书者其再书者美文也文有盈美即当有阙佚美文之非褒犹之阙文之非贬也今遇阙时阙日而即谓贬桓则此有美日当褒桓矣桓不当褒将毋卫侯之卒可褒乎

春秋毛氏传卷六

<经部,春秋类,春秋毛氏传>

卷七

钦定四库全书

春秋毛氏传卷七

翰林院检讨毛奇龄撰

五年

春正月甲戌己丑陈侯鲍卒

陈侯以卒赴而史书名例已见前【隐三年】其曰赴以名与同盟而後书名俱非也侯固未尝同盟也但卒有两日大不可解据传云再赴也方公疾病时其弟陈佗杀太子免而自立故乱作而赴告不一即史记亦云三十八年正月甲戌己丑陈桓公鲍卒其弟佗之母蔡女也蔡人为佗杀五父及太子免而立佗是为厉公方桓公病而乱作国人分散故再赴是两赴两日彼此有据似乎不诬祇此後六年蔡人杀陈佗立桓公之子跃为厉公则厉公非佗即跃也蔡人杀佗则佗母非蔡女厉公跃实蔡所出也且五父即佗蔡人亦无有先杀五父及太子免者则史记较传稍为未确又後儒以长历推算则甲戌己丑相距十六日一在桓四年十二月二十一日一在五年正月六日而此并书正月者不知赴文本如是抑亦鲁史从简依後赴之月书前日月也凡此皆当备考之以存疑者若公羊谓陈侯病狂甲戌出亡至己丑日始得之然而不知其死在何日也故举两日而谷梁谓侯本避病非狂也戌出丑得不知死日故举两日以包之夫以诸侯之尊陈国之隘狂死何地至十六日而不知其屍之所在已怪极矣况避病而出别无侍养一如鬼蜮之独行踪迹无所此非道听涂说也直是瘕犬病发洵口吠嚙而之以传春秋欲春秋不亡得乎

夏齐侯郑伯如纪

据传齐侯郑伯朝于纪欲以袭纪而纪人知之此必以纪人来告故书按周制诸侯原有相朝之礼【见前】但尊不朝卑大不朝小齐郑尊大岂肯轻朝卑小以谋袭国况袭国使不知朝则已知之矣且史例列国相朝不书何独书此若云纪以朝告则直书朝纪耳安所避讳而书如若云如即是朝则後此十八年公与夫人遂如齐亦朝齐乎尔雅云如者往也齐欲谋纪则邀郑伯偕往以覘其动静盖为後年灭纪地也如此则齐恶亦甚矣至于我公书出并不及朝如如齐如晋如楚类则或有讳避他国不然此与本年冬州公如曹例同【如曹亦非朝曹见後】

天王使仍叔之子来聘【仍谷梁作任】

天子之大夫称字故仍氏而叔字其曰之子以父使来告而子行之也此与隐三年武氏子例同

葬陈桓公

城祝丘

秋蔡人卫人陈人从王伐郑

此王桓王郑者郑庄公也据传王夺郑伯政郑伯不朝王以诸侯之师伐郑而郑伯御之战于繻葛王师败绩郑祝聃射王中肩郑庄之恶於是乎不可贯矣然而陈蔡与卫君不亲往第以无何有之人帅寡少之师勉强从王以致覆败罪亦不小又况我鲁之袖手观望者乎其不书王师败绩者所以讳王辱而减国恶事也而文与义皆见焉若胡氏以王不讨鲁桓并不讨宋督愤怒兴师并为王罪故削去天字则王朝卿士跋扈不臣尚不能声罪一战而败而追责其不讨宋鲁为尔君者不亦难乎夫恶当重大不容旁贷君臣相杀彼我同责已为难堪况复舍其臣而专治君罪生平毁郑庄不直一钱今反袒之何也

大雩

雩者旱祭也其称大雩者重其祭名犹烝尝之称大尝大烝并非雩祭有大小也但大雩有二一是龙见之祭建巳之月东方苍龙七宿昏见于南则雩祭以祈膏雨恐夏旱也此限定四月之祭左氏所谓龙见而雩是也一是呼旱之祭时当旱暵则不论夏秋随时可祭谷梁注雩者舞而呼旱郑氏礼注雩者吁也吁嗟而求雨是也春秋恒礼不书则四月之雩未必书册凡书大雩皆是呼旱而左传谓为失时盖以周之秋即夏之夏而秋始于七八月但当夏之五六月而四月不在其内故凡书秋雩即为失时以秋无四月也然襄五年秋大雩传又称曰旱而不称失时或曰书月者为旱以其在八九月间去四月远则为旱如襄八年九月大雩传曰旱昭三年八月大雩传曰旱是也若祇言秋则近在五月去四月近即为失时则昭二十五年秋七月上辛大雩季辛又雩而传曰旱甚夫周之七月正夏之五月与四月近况业已两雩则必一正祭而一呼旱然而皆曰旱而不称失时何也况春秋贵比例秋雩之例总为旱祷而旧儒又分为四部一曰正祭失时一曰祷礼呼旱一曰旱不为灾一曰旱气所致其分正祭失时者祇此桓五年大雩为一部考经文书大雩凡二十有一单书秋大雩而不书月者有七自此年後成三年襄五年至定十二年止皆一例书某年秋大雩三字而失时一部只以此一年当之则彼六大雩将属何部况其所为祷礼旱不为灾又皆罣一漏百此白彼黑而并无一合者也孟子曰七八月之间旱周七八月夏五六月也秋在五六月去四月小满中气则芒种播谷正当旱时故秋雩之书专为旱祭此无可疑者胡氏不识春秋妄冠夏时其於岁候节月一概不通至此则又遵贾逵之说谓大雩者雩上帝之称诸侯但当雩境内山川耳鲁独雩上帝而用盛乐是僭礼也故春秋讥之则不知贾说本月令而误解之者月令以仲夏之月命有司祈祀山川百源大雩帝而用盛乐言先祈祀山川百源之神而後祈祀五方之帝以求雨郑注所谓先祭其本然後雩祭以为山川者出雨之本也是山川五帝一时并祭何曾有天子祭上帝诸侯

祭境内山川之别且帝即五帝谓之方神礼所称方明是也方明之神诸侯盟会即祭之何必天子若雩用盛乐不过巫师歌舞间用乐器如所云鞀鞀祝敌者未尝曰歌黄钟舞云门以祀天神也又况吕氏月令不可为据论者谓其杂秦制而即此一祭龙见正雩断在巳月而月令记在仲夏之後则已讹为午月矣春秋说雩在三传诸家尚无定词岂可以吕氏春秋强释鲁史况又误解乎故吾谓此所书雩断属旱祭诚非妄言即以此经观之书雩之後继书以螽螽者蝗属旱则生之可验也人以传证经吾以经证经若其书雩而不书旱书旱书不雨而反不书雩则有二说公羊曰言雩则旱见言旱则雩不见谓书雩而旱在其中但书旱则未必雩也此一说也谷梁说云得雨则书雩不得雨则书旱此又一说也

螽

螽蝗属为灾故书

冬州公如曹

州国名世本姜姓其称公者或其先尝为王三公之官如虢公荣公类曹姬姓文王子曹叔振铎之後也如往也与前如?例同

六年

春正月实来

实不知何人据传即州公之名也不书国爵者承前年冬州公如曹文也来者不知所事但来之耳此与隐元年祭伯来僖二十九年介葛卢来例同先仲氏曰挟卒非贬氏实来非削爵则书法不在是矣夏五不必补甲戌己丑不必删则笔削从可知矣

夏四月公会纪侯于郕【郕公羊作成】

据传纪来谄谋齐难也郕鲁地

秋八月壬午大閱

周礼大司马职四时于农隙必较閱以讲武事故中春教振旅中夏教茭舍中秋教治兵中冬教大閱即春蒐夏苗秋獮冬狩之礼鲁桓於积弱之余能修武备以御外侮岂不甚善无如其偶尝之也据传北戎伐齐齐侯使乞师于郑郑太子忽帅师救齐大败戎师获其二帅大良少良甲首三百以献于齐於是诸侯之大夫皆为齐戍而齐人馈饩使鲁大夫为班次鲁大夫班独後郑郑忽怒之故後十年有齐郑伐郎之师此时公觉其怒知其有事而预为教战宜也此事也而礼行其间且义亦无讥焉祇中夏教战名为茭舍不名为大閱周之八月即夏之六月而大閱之名于制不合故传特解之曰简车马也以明此所为閱但择车徒蒐廐马与平时较

猎不同即孔疏亦云昭十八年郑人简兵大蒐在于城内此所为简亦不必定在田野而胡氏又曰非时不知其所为非时者谓大閱在冬抑谓夏不宜教战也又云非礼谓以鼓王执路鼓诸侯执贲鼓以旗则王载太常诸侯载旗以杀则王下大绥诸侯下小绥其礼固亦不同也书大閱非礼矣夫以鼓见大司马振旅文以旗见大司马茆舍文以杀见王制一岁三田文皆是教战亦皆是四时较閱通礼春夏旗鼓秋冬戒令原属互田杀则下绥发则抗绥本是一义不知其所为非礼者谓鲁桓当时不执贲鼓不载旗不下小绥故非礼抑亦世固有此执鼓载旗下绥诸礼而大閱则尽废之故非礼也凡此皆反覆其文而不可解者大閱不书公与昭八年蒐于红十有一年大蒐于比蒲皆不书公例同

蔡人杀陈佗

前一年陈桓公卒时其异母弟佗杀太子免而自立太子弟公子跃者其母蔡女也至是年蔡人杀陈佗而立子跃是为厉公陈以杀佗告故史书之其不书爵者旧儒谓篡立踰年未通盟会非也弑立不久或先君未葬或既葬而改元未期皆不称君此与卫人杀州吁齐人杀无知例同但此本无传其事始末杂见之庄二十二年传中而公羊独曰淫乎蔡谷梁又曰淫猎乎蔡世遂引史世家文为公谷证按史世家于陈桓卒时谓桓之弟佗母蔡女也蔡人为佗杀五父及太子免而立佗是为厉公厉公娶蔡女与蔡人乱厉公如蔡淫蔡人乃以好女诱杀佗而立跃是为利公夫春秋陈桓之後即为厉公厉公者跃也厉公之後即为庄公庄公者跃弟林也并无所为利公者即周制諡法但有厉而并无利况陈佗见杀经不书爵焉得所为諡而厉之且经止云蔡人杀陈佗而史又增蔡人为佗杀五父于杀太子之前夫五父即佗也佗之字也传曰蔡人杀五父而立厉公即此杀佗经文也蔡人先为佗杀佗而尚能杀太子乎且犹是蔡人前既为佗杀太子今复为跃杀佗犹是蔡女而初以跃母而讹为佗母既又以佗母而更为佗妻明是由公谷淫蔡一语不得明白遂依样葫芦彼此猜臆以致一事分两事一杀分两杀一佗分两佗一厉公分两厉公一蔡女分三蔡女此史文之误实由公谷而反引为公谷证其能证乎然且蔡人杀佗明不书地而公谷曰杀于蔡向使佗果杀于蔡则陈人来告必告其地经文必书蔡人杀陈佗于蔡与卫人杀州吁于濮作同一例矣何氏范氏与公谷疏皆并不引史世家一字近有着春秋论者特主此立说以乱经学故并辨之

九月丁卯子同生

史例太子生必书子者桓公子即庄公也同者名也传曰公曰是其生也与吾同物言与公同日故名同史世家云桓公六年夫人生子与桓公同日是也特礼三月始命名丁卯者初生之日也而称名补书之也其不称世子太子祇称子者春秋凡适子与支庶而为储子者皆祇称子曰我子耳此与後子卒子般卒子野卒称例并同至若春秋生子唯此仅见者以初生时有接子之礼内则所谓国君世子接以太牢者行此礼即书不行此礼即不书而杜氏谓十二公惟子同是适夫人长子故书于策则文公子恶亦适夫人哀姜所出亦是长子不止子同也然而不书生何耶

冬纪侯来朝

前四年齐侯谋纪故本年春会纪侯于郕至是冬纪侯来朝无非为求援之故传曰请王命以求成于齐也小国孱弱乞救隣近思藉王命以保宗社有何可议所恨者桓不能为之请耳而胡氏又责其不讨桓夫国之不保而讨桓也乎

七年

春二月己亥焚咸丘

焚者火田也尔雅火田为狩则蒐狩之礼原有火田一法但农隙教战不止从禽今于四时习鬪诸礼概不之问而第火田以为乐此与观鱼观社何异故或书其事而礼见义亦见焉若谓焚林而田讥其尽物则尔雅注放火张罗但以烧草使禽得外犇而後罗其下风以取之未闻尽燔其林木也若谓周礼火弊献禽在於中春即夏时二月也今周之二月但为夏之冬十二月为非时则王制昆虫未蛰不以火田正谓十一二月中冬蛰後为火田之时其云中春火弊者谓二月启蛰火可以止耳弊者止也犹车弊为车止也然则季冬火田不必失时矣咸丘鲁地

夏谷伯绥来朝邓侯吾离来朝

谷邓国伯侯爵绥吾离名也二国皆远地属楚以南与衡岳相近僻小不恒至或书名或书字此与庄五年邠犁来来朝【即小邾子也邠犁来名】二十三年夏萧叔朝公例同【萧国叔字】

无秋冬说见前四年

八年

春正月己卯烝

烝时祭名四时之祭春祠夏禴秋尝冬烝烝者衆也言成物衆多可备荐享也周礼时祭用四仲月此春正月即夏时之冬十一月正冬仲月也此直书而无讥者或曰左氏曰闭蛰而烝闭蛰在亥月当是十月此十一月为失时则闭蛰中气虽在亥月与子月接其言闭蛰而烝者谓闭蛰即可烝耳况闭蛰後耶

天王使家父来聘

家父者天子大夫家氏父字也王国使上中大夫下聘诸侯则例称字此与隐九年天王使南季来聘庄元年王使荣叔来赐桓公命例同

夏五月丁丑烝

烝冬祭也夏五月则春三月矣此时当祠而复烝何也且前已烝矣何再烝也此礼也而又见焉

秋伐邾

冬十月雨雪

夏八月也可雨雪乎月令曰孟冬行秋令则霜雪不时

祭公来遂逆王后于纪

祭公天子之三公而食采于祭者穆王时有祭公谋父此其後也【又隐元年有祭伯庄二十三年有祭叔公与伯是爵叔则字矣此必以采为氏者观郑有祭仲可验】礼天子娶后不亲迎使公卿迎之公羊说天子亲迎此无据之语【或引诗亲迎于渭孔子对哀公冕而亲迎为证不知诗颂文王谓诸侯世子也孔子对哀公言鲁国之礼并不以天子为言】盖婚姻宾主彼此敌体天子与诸侯分位不敌故天子娶侯国之女必使同姓诸侯命迎与王姬下嫁于诸侯亦必使同姓诸侯送婚正同此祭公来鲁因以鲁主迎后之事故来受鲁命即往迎后其不称迎女者此受鲁命以往鲁不敢斥后为女也若其不称王使者正以使迎非王事鲁既命迎则王自不当再命且春秋逆女不一从无称君使者昏礼不称主人况国君无父岂可以命迎之使即自壻出此在前经已明言之【见隐二年】而胡氏又云王不书使责其使三公为非礼故祭公专命不报遂行如纪夫天子逆后一公一卿此如後世使臣正副之义故此使祭公襄十五年传官师从单靖公逆王后于齐皆三公也【此不书卿者举重而略轻也庄十五年传称官师者则以元士代卿行也】此正杜氏所谓使上卿逆后而公监之也盖天子逆后礼无明文然在春秋即并无天子不使三公之例乃曰祭公悻悻不报而行吾不知所云不报者谓当仍报王而往迎乎抑当还报鲁而不得遽迎以归乎夫亲受鲁命受毕即行祭公之谨也今乃以遂行为祭公罪则成十三年公如京师遂会诸侯以伐秦僖三十年公子遂如京师遂如晋有何非礼而悻悻若是【遂者继事之称见旧疏】

天子无敌体纪国虽小皆得下娶特是时齐将谋纪前六年纪侯会成谘谋齐难纪侯来朝欲因鲁请王命以求成于齐则其居心萦虑但思倚王室之尊以保宗社故此之上婚不知何缘然亦畏天时保之苦心也乃嗣此十五年王崩之後去纪姜归京师裁九年去王崩裁四年是时纪姜尚在王室也即鲁之伯姬叔姬亦尚在纪也而齐师迁纪天王不能讨宗鲁不敢问春秋之世何如矣史文记事多无连类见本末者而独于纪事前後缕缕如綫虽不必有意特存然义可见也

此王后桓王后也桓之八年当桓王之一十六年岂有天子立一十六年而始娶后者此必再娶可知也第公羊曰诸侯一娶九女又曰诸侯不再娶考之三礼并无其文惟白虎通王度记皆曰天子诸侯一娶九女亦曰天子诸侯不再娶此本袭公羊之说而加天子于其上者如是则此年逆后在三传诸家皆宜有初娶再娶之辨而自杜氏何氏范氏及孔氏诸疏皆顺文解

义依回蒙混并不敢道及一字及观襄十二年灵王求后于齐齐问晏桓子以答婚之词至十五年而刘夏随单靖公至齐逆后考其年则灵王十四年也十四年娶后与十六年娶后皆非初娶况史世家云周惠王崩子襄王立襄王母早死其後母曰惠后生叔带有宠于惠王而襄王畏之夫後母非再娶乎【左传襄王称惠后为先后适子称後母先后明非媵姁继室者】且襄王以翟师伐郑有德翟氏遂立翟女为王后夫后可再立即再娶也何也襄王曾娶姜任矣翟女非侄娣必非在宫而升立之者【周语无以翟女间姜任谓有侄娣在也】若诸侯再娶尤复多有庄元年齐襄娶王姬十一年齐小白又娶王姬皆非初娶如曰诸侯不再娶则王室虽卑岂有越祖制而甘媵侯国之理若昭二年晋平公娶齐女少姜是时晋平已一十八年矣其所娶者或异姓之媵【古诸侯娶女异姓为媵如晋将嫁女于吴齐侯使析厘女媵之类】或同姓侄娣而待年于国【同姓以侄娣从其幼者待年于国如叔姬归于纪类】皆未可知何也以当时曰非伉俪可疑也至三年齐请继室于晋晋平复娶之其答请继词有云寡君不能独任其社稷之事未有伉俪若惠顾敝邑抚有晋国赐之内主则明是再娶为夫人之语予尝疑隐公居摄一事谓惠公元妃孟子早卒重娶宋武公仲女为夫人此即是适故桓为适子而隐以长庶居摄此是典例乃胡氏痛诟谓以妾为妻以庶为嫡三纲沦九法斁人望絶责隐责惠责天王无所不至予间引庄公再娶孟任立子般事以解之以为桓公与子般隐公与闵僖两两相似而季友立子般而见褒隐公让桓公而见贬颇为不平既而念子般之事尚有未合【惠公元妃孟子死庄公夫人哀姜未死则桓为适子般尚非适也】惟是诸侯可再娶则再娶即适适则其子可为储千年之疑一旦顿释夫天子诸侯既无成礼其不再娶一语又未尝杂见于三礼之文所藉春秋一书周礼尽在而乃遍考之而必无其事则其言诞矣先仲氏曰善解经者当以传解经不当以经解传予谓善解经者当以经解经并不当以传解经夫传尚不可解经而况于儒说则吾得援春秋礼例而独断之曰天子诸侯皆再娶岂为过也

春秋毛氏传卷七

卷八

钦定四库全书

春秋毛氏传卷八

翰林院检讨毛奇龄撰

九年

春纪季姜归于京师

自鲁而言则称王后自纪而言则称季姜京师者王畿之名

夏四月

秋七月

冬曹伯使其世子射姑来朝

诸侯有相朝之礼曹伯欲朝鲁而病不能行因遣世子代朝之礼也传称享曹太子时献乐而叹正为父病故冬遣世子来朝而入春即曹伯病卒此皆无所美刺者公谷谓世子不当抗诸侯之礼此固不识周制而胡氏复谓世子固有摄君朝聘之事然诸侯朝天子则摄之诸侯自相朝即不然按周礼典命职诸侯之适子誓于天子【誓者受命也】而摄其君则下其君之礼一等未誓则以皮帛继子男谓诸侯世子已受天子命者则朝聘时但下君一位公之子与侯等侯之子与伯等伯之子与子男等未受命者则但以皮帛随子男之後此诸侯世子摄君朝聘天子之礼也若诸侯自相朝则不问已誓未誓【杜氏谓曹世子未誓无据】概降君一等各以其国上卿之礼待之故传曰宾之以上卿享曹太子盖诸国上卿无不下君一等者今曹伯之子下伯一等当如子男不得继子男之後故曰宾之以上卿此正诸侯世子摄君相朝之礼与摄君朝聘天子相分别处而胡氏又谓世子摄君但可行于天子而不可行于诸侯误矣先仲氏曰胡传有不可解者既云诸侯老疾使世子摄己事以见天子又云君疾而储副出啓窥伺之心危道也夫同一朝聘而在诸侯虞窃发在天子即不虞窃发何以解之射姑世子名

十年

春王正月庚申曹伯终生卒

夏五月葬曹桓公

秋公会卫侯于桃丘弗遇

前六年北戎伐齐诸侯救之郑公子忽有功焉齐人饷诸侯使鲁为班次而鲁据周制班独後郑郑人怒请师于齐齐人以卫师助之至是公知之思求成于卫以絶其援而卫不与会因之有三国战郎之役此书弗遇实录也桃丘卫地

冬十有二月丙午齐侯卫侯郑伯来战于郎

但言来战而不言败绩杜氏所谓第交绥而无胜负是也是役本郑志而齐僖为倡且徼他国以助之则齐为政矣鲁桓僖壻卫宣又从王伐郑而齐以谋纪之故独与郑密遂彼此牵伐而不可解其叵测如此

十有一年

春正月齐人卫人郑人盟于恶曹

此从战郎後复相盟以固结之其称人者使卿大夫盟而君不与焉传称齐卫郑宋盟于恶曹多一宋字反疑经阙不知宋郑雋构久矣前此未尝合而继此则我与宋又连谋伐郑此时焉得有宋耶况宋列郑後非次也此美文也

夏五月癸未郑伯寤生卒

秋七月葬郑庄公

九月宋人执郑祭仲突归于郑

郑忽出奔卫

祭仲者郑大夫也突与忽皆郑庄公子突者厉公名忽者昭公名也据传郑祭仲足为祭城封人有宠于庄公公使为卿既而为公娶邓曼【邓国曼姓】生昭公故祭仲立之宋雍氏【宋大夫】女於郑庄公曰雍姑【雍氏姑姓】生厉公雍氏宗有宠于宋庄公故诱祭仲而执之曰不立突将死亦执厉公而求赂焉祭仲乃与宋人盟以厉公归而立之昭公出奔卫此传文也详其事是昭公本长庶当立而雍姑之子乘宋郑雋构之後借衅争国祭仲不能死而立突逐忽则忽本无过而突与祭仲情罪显然乃春秋书法一似重可疑者则以忽之不称君也礼先君未葬则称子既葬则称君今庄公已葬成君矣忽宜称郑伯而书其名何也或曰从质也谓殷道尚质父前子名也【此公羊说】夫父骨未毁兄弟相篡夺而犹以此着亲亲之质此紆兄夺食者之教徐徐也或曰罪失国也【此谷梁说】夫失位与失国不同忽未尝丧郑国

也不幸有刳其位者亦复何罪纪大去其国而书纪侯而谓忽爵当削乎此必非春秋义也或曰恶其失强援也【此胡氏说】初公之未昏于齐也【鲁桓公】齐侯欲以文姜妻忽忽辞之曰齐大非吾耦也及其败戎师也齐侯又请以他女妻忽忽又辞之曰无事于齐尚不可今有事而受其室是以师昏也于是失大国之助而不能自立执小信而忘大利故同车刺之狡童斥之扶苏与蘼兮嘲讥之春秋所以着其恶以为世戒夫不取非耦不挟功伐不假强大为声援此豪杰之所为而反以此为罪状未之前闻夫风人美刺本属余情而春秋以大义断是非未有舍正经而讲势利者此真小人之言也予尝细绎经文反覆书法觉有确然不可易者据祭仲立忽原非正嫡邓曼为荆南蛮族因祭仲而始娶之其得以所生名世子者徒以长尔若突则尹姁所生本属贵族其初或未尝无宠而既以宋郑积怨之故逊居在宋其于正次之分不必显着故忽虽已称世子而实未尝受命于天王如周礼所称受誓者观隐三年传周郑质子之时有云郑公子忽为质于周七年传又云郑公子忽在王所故陈侯请妻之皆称郑公子而不称太子可验也【世子必受誓天子见周礼典命职虽此时列国或未必尽能请誓然亲质王国而又久居王所则其称谓有不可紊者说见曹世子来朝传若疑初称公子後传有间称太子者正义云似六年後始立之则在十年传尚称郑公子忽有功焉皆是无定誓而杂称之词若其为长庶宜立则夫子亦许之故此不称公子与後十五年传称世子正相应可见】若夫葬不称君则是时虽葬而实若有未葬者礼诸侯五月而葬大夫三月而葬今郑伯以夏五月卒而秋七月即书葬计其时裁三月耳三月不当葬则不得称君然而已葬矣则又不得称子君与子皆不得称则但书其名一如诸公子出入称名之例【如齐小白子纠类】而止于归国时一称世子以略示长次之意此正斟酌书法之尽善者故突亦称名同是公子并非斥削亦并非美恶同词之谓至祭仲之称则祭氏仲名杜有明注此与孔父仇牧君臣连称并同未有名君于後而字臣于前者自公羊道听误认作字遂有斥突贤仲之解夫仲足之名已见传文仲可以名足亦可以名此如吴季札之可称吴季亦可称吴札故此称祭仲而隐三年传即有郑使祭足帅师取温之麦语是祭仲祭足两得分称而公羊以称字之误盛美祭仲谓其能反经行权向非雍纠之变祭仲果肯反正乎此盲人瞎马也若夫突不冠郑杜氏曰文连祭仲非有贬也突固可贬然贬不在此也归于郑者为宋所纳之词成十八年传云复其位曰复归诸侯纳之曰归是也

柔会宋公陈侯蔡叔盟于折

柔鲁大夫名蔡叔蔡大夫名柔不氏者书法如此说见前折地阙

公会宋公于夫钟【钟公羊作童】

冬十有二月公会宋公于阚

此我与宋连作三会于折于夫钟于阚则宋伺鲁郑之隙而来会我者何以知之以郕阚知之阚系鲁地夫钟系郕地而郕近于鲁则必宋来可知也嗣此又连作三会于谷丘于龟于虚则我因郎战三国来伐而宋独不与故思藉宋援以报三国而急往会者何以知之以谷丘与虚与龟皆宋地则我往宋可知也至宋公辞平而公与郑合武父之会则鲁宋从此绝矣但战郎

之役鲁郑正敌而齐卫本与郑合今一反而鲁郑合好齐卫亦恶郑而翻亲于宋数月之间倏忽变幻真不可解子尝就经文推之鲁之与郑怨者为郑忽也【前六年忽恨鲁班仇後郑故请齐伐我】忽既奔卫则今之郑乃突之郑也【忽出突入见前】突之郑而何不可平况齐卫战郎本属怨国而忽又奔卫则舍三怨国而并为二怨其合郑而攻齐卫固其宜也祇齐宋讎郑世所不解予仍就经推之齐之德郑以忽之有功于齐也突则忽讎矣忽讎则齐亦讎之突本宋纳而宋但责赂于突则以好成怨矣此皆以事兼礼而义之可否自了然者故不憚详记始末以俟考据而胡氏不识事例妄谓夫子并存不削不憚词费无非恶盟会之故夫祇恶盟会则概从削例可矣乃不憚至再至三委曲?屑恐夫子神笔定不应?漫至此

十有二年

春正月

夏六月壬寅公会?侯莒子盟于曲池【?公谷作纪曲池公作欧蛇】传云盟曲池平?莒也曲池鲁地

秋七月丁亥公会宋公燕人盟于谷丘

谷丘宋地说见前

八月壬辰陈侯跃卒

公会宋公于虚【虚公羊作郟】

冬十有一月公会宋公于龟

虚龟皆宋地说见前

丙戌公会郑伯盟于武父

传云宋公辞平故与郑伯盟于武父此郑伯即厉公突也说见前

丙戌卫侯晋卒

重书丙戌美文

十有二月及郑师伐宋丁未战于宋

此我将伐齐卫而先借郑伐宋以掇其所与盖为下战四国地也公羊谓战于宋者鲁郑不和

而自战于其地则于下文鲁郑之合伐四国相乖反矣蠹蝇扑纱其不顾前後如此

十有三年

春二月公会纪侯郑伯己巳及齐侯宋公卫侯燕人战齐师宋师卫师燕师败绩

此正我报郎之役也郎以齐卫郑三国来战怨在郑也今反借郑以报怨则以郑忽出奔卫则郑忽之怨不在郑而反在卫前一年会夫钟传亦既已言之详矣但三国余燕为宋所牵【前十二年宋人燕人盟谷丘】而我与郑又余纪者纪鲁本婚姻之国而齐欲并纪故纪怨齐而来助之左氏谓宋与郑战公羊谓宋与鲁战此皆逐步认路不解全经因不识报郎所始至谷梁谓纪与齐战谓齐将灭纪战于纪地则全然曹错而唐赵匡遵之胡氏又从而附和之夫纪畏齐祸连姻王室此时桓王尚在桓王后正主宫政齐何敢连三国之师专战一纪以自取覆败此非齐战纪而纪战齐者特此时纪以弱小千筹万画【见前】始得暂倚王室以图苟存而骤思报复此实不量力之过故其後桓王上宾齐王姬继卒而齐即迁纪此则书其事以示鉴戒者若谓是战纪王之则茫然不读本经前後联络而妄自立说此春秋之所以亡也若其战不书地者则连前文言之在宋地耳春秋多连文书法此亦是例而谷梁谓必战于纪则不惟无据且即以经推之十二月战宋至二月而又战纪一月之间何能由宋卫及齐越齐南以共战此千里之纪此皆必不得之数也况前儒谓纪本是已春秋考异邮云时战在鲁之龙门而郑康成谓龙门城下原有已城谷梁氏讹已为纪虽其说後起总不可信然亦足以明谷梁之误矣至若诸国称爵则君亲帅师而卫惠公丁宣公之丧前年十一月卫侯晋卒此时春二月尚未葬也礼先君未葬当称子【如僖九年称宋子二十八年称陈子类】而此称卫侯以踰年正月必即位改元则此时已即位成君者矣故其书如此要之亲未葬而改繅以与他人金革之事则其义可知耳

三月葬卫宣公

夏大水

秋七月

冬十月

十有四年

春正月公会郑伯于曹

无冰

周春正月为夏冬十一月无冰可乎

夏五

无月字阙文

郑伯使其弟语来盟【语谷梁作御】

前年战四国後已与郑伯会曹矣今又使来盟修前好也语郑弟名公子例以名通胡氏谓书名者罪其有宠爱之私何据

秋八月壬申御廩灾

乙亥尝

此合两事为一书者史有书灾之例御廩灾当书此一事也尝者时祭恒礼不必书【春秋有恒礼不书一例然亦有书如己卯烝者虽不失时然以丁丑再烝而并书之非书例也】今以八月尝周之八月为夏之六月虽称秋祭实夏祭矣夏当禘而尝为失时失时当书此又一事也然而御廩者神仓也藏粢盛以供祭祀者今已卜秋祭在于乙亥而先三日而神仓忽灾何以供粢盛据周礼凡祭前期十日帅执事而卜日其必十日者谓可容散斋七日致斋三日之数今壬申至乙亥裁三日耳则此时已致斋矣粢盛有缺则是祭当废乃不意灾不成灾神仓之谷幸无有害则虽灾而仍可以祭此则志幸之又当书者所谓合两事为一事者也故凡此两事一书灾一书失时而合书之为志幸而谷梁谓灾虽不害然灾余之物不当供祭不易灾余而遽尝所以志不敬也夫祭谷所出别有王籍而君亲耕之祭谷所藏亦别有神仓而冢宰载帝籍所收而专藏之【王籍籍田也见周礼甸师职帝籍即王籍以其供上帝故又名帝籍月令冢宰载帝籍之收于神仓】舍是则并无他亩可以收祭谷亦并无他廩他仓可以藏祭米者而责其不易灾余且曰有兼甸之事吾不知所为易灾与兼甸者将发他仓之米以易此灾米而後祭乎抑甸师预知廩灾另设一他籍兼储作易灾之米以供此祭乎夫他米必不可祭而千亩百亩亦并不可以兼辟千百为王籍易灾之备【祭义天子为籍千亩诸侯百亩躬秉耒以事天地山川社稷先古并无另辟其地者且甸师收祭谷而致之地官之神仓亦并无二神仓】此皆无稽之谈杜撰而不可为据者也胡氏专袭谷梁既责灾余乃又曰门观灾而新作则书御廩灾而新作何以不书夫不成灾而欲其新作也乎然则不成灾而何以书灾曰重御廩也虽不灾然已灾之也故曰幸也

冬十有二月丁巳齐侯禄父卒

宋人以齐人蔡人卫人陈人伐郑【公羊蔡人在卫人下】

此报四国之战也前此战宋与四国之战皆在宋地故宋独报之若其专报郑者则以宋郑尤世怨也以者用也传曰凡师能左右之曰以此与僖二十六年公以楚师伐齐例同

十有五年

春二月天王使家父来求车

传曰诸侯不贡车服以车服为上所赐非下所贡也况可求乎此与隐三年求赙文九年求金例同家父见前

三月乙未天王崩

此桓王也

夏四月己巳葬齐僖公

五月郑伯突出奔蔡

据传祭仲专国郑伯患之使祭仲之壻雍纠以享郊杀之纠之妻仲女也谓母曰父与夫孰亲其母曰人尽夫也父一而已遂告祭仲祭仲杀雍纠厉公奔蔡是郑伯为祭仲所逐而但书出奔而不书见逐或曰讳之非讳也突篡兄国以徼祭仲而今突为仲所逐以逆报逆有何足讳且本国有讳例他国无有春秋逐君者屡见于经并无书见逐者盖国君无自出之理国君出奔则必有强臣偪促于其间故但书出奔而逐在其中惟鲁君见逐则不书出奔而但书曰逊以出奔即逐也昭十五年公逊于齐是也此所谓讳也若他国见逐则书出奔十六年卫侯朔出奔齐襄十四年卫侯出奔齐昭三年北燕伯欵出奔齐二十一年蔡侯朱出奔楚是也此见逐例也乃又有别见传文千载难明者襄二十年传卫甯殖既逐其君而既而悔之召悼子【殖之子】曰吾得罪于君名藏在诸侯之策曰孙林父甯殖逐其君【逐君在襄十四年】论者遂谓鲁史旧文本书臣出君之名而夫子改为出奔删没其臣名以转见君过一若君之无故而自出者所以杀臣恶而并责君谓君不能端本也此说开于杜氏而唐陆淳与胡氏并张大之夫春秋诛乱贼乱贼者乱臣贼子非谓乱君贼父也乱贼无将将即诛之今显然逐君而反杀臣罪而分其责是君臣同科矣夫君臣同科父子并戮乱道也未闻夫子修春秋而出乱道者且幸而列国传亡犹有左氏焉补其阙耳万一并是传而亦亡之则逐君之名不见于传而专责君之出亡君罪当独诛矣【出奔即见逐则虽亡臣名而臣恶自在若如杜陆说以自奔为名则君罪何归乎】按春秋史书有二一是简牘今之经文是也是一是策今之传是也盖简者牒也牒者方版也策者连合诸简牘而共编之故又名曰册言合两为一也简所容祇一行字耳故又作简省之简而牒则稍广于简可并容数行而使读之若策则所容者广故聘礼曰百名【字也】书于策不及百名书于简而郑氏注云字少则书简字多则书策故杜氏春秋序云大事书之于策小事简牘而已正言春秋经传事之多字者必书于策传文载事烦故策书之事之少字者可书简牘经文祇题目即简牘而书已尽其云大小者多少之谓北人称多少曰大小故也【宋史邵雍称程伯子大小聪明即此】是以经文书简如南史书崔杼弑君执简而往可验以其祇有目也传文书策如庄二十六年传所载虢人侵晋诸事但有传而并无经称为策书虽存而简牘散落可验以传策虽存而经简亡也则策书属传简牘属经明

明可据故正义有云经据策书传凭简牘此又言经之题目据传为文而传之记事又凭经立义所谓经传相需者非谓经是策而传是简也若然则甯殖所云逐君之名藏之诸侯之策者此传文非经文也传文在鲁史自书逐君而经文在鲁史则原书出奔夫子修春秋但修简目而谓夫子修策书谬矣盖当时列国本各有传夫子据传以为经而左氏凭经以作传其不必皆鲁史者以左氏为文必裒损而润饰之以是为左氏一书已耳若诸传以书名为贬引曲礼云诸侯失地名为据则不然此与卫侯朔北燕伯欵祭伯朱皆以例书名独卫献不书者阙焉耳不然纪侯去国谭子奔黄凡失地者皆不书名而谓此独书之乎

郑世子忽复归于卫

郑忽系长庶当立虽未成君而世子自在也成十八年例复其国曰复归余见前

许叔入于许

郑伯入许而不取其地使许叔居守之今即君其国矣其曰入者以叔原在许入之已耳叔非旧君且又非外至故不书复国而胡氏谓不告天王不赴方伯以粪除宗庙而乃因乱窃入非复国之义故书入以贬之夫使叔能告天王赴方伯以粪除宗庙而犹茕茕居许西偏以仰息于郑一十六年则其人丧良已极可不必复国矣此入字与昭二十二年以王猛入于王城例同

公会齐侯于艾【艾公谷作蒿】

此齐襄公也前僖公以四国战郎而我亦以纪郑败齐宋四国之衆构兵无已故襄公继世而我修好焉

邾人牟人葛人来朝

邾牟葛皆附庸国也诸侯之卿称名大夫降称人若附庸之君可字可名则附庸之卿当称人矣今称人必卿等耳杜氏谓三国皆世子不惟无据岂有相约齐一能如是者若公谷胡氏谓外之乱称人则诸侯朝桓不一纪侯?侯邓侯谷伯曹伯皆朝桓矣曾未尝外之而此独外之乎

秋九月郑伯突入于栎

据传郑伯因栎人杀檀伯【守栎大夫】而遂居栎栎者郑之别都非郑国也公羊误以入栎为入郑而云曷为不言忽之出奔此讹辞也而胡氏承讹遂云厉公复国削而不书但书入于栎则此时突果复国乎突已复国而後文复伐郑以纳突乎且胡氏于後文亦曰将纳厉公弗克而还而此已复国乎

春秋郑忽突争国其始末不全见于经然而其事可按者桓十一年郑庄公卒祭仲立突而逐

忽此一节也至十五年祭仲杀雍纠又逐突而入忽此又一节也至是年突自入居栎此又一节也此皆经所有也至十七年郑大夫高渠弥为忽所恶遂弑忽而立公子亶十八年齐襄公杀公子亶并轘裂高渠弥【为其弑忽也忽有功于齐故齐世报之】祭仲迎公子仪而立之【子亶子仪皆忽弟郑庄有八子而四见经传忽突亶仪是也】此二节则皆经所无者至庄十四年突始自栎入于郑弑子仪而据有其国直至二十一年郑伯突卒而後已此则经传皆可按者是郑庄卒後厉公立四年而见逐昭公立三年而见弑亶立一年子仪立一十四年而亶杀于齐仪复弑于突突乃复入立八年而传国于其子文公其中惟亶仪兴废经文所略而忽突之出入则前後了然其不详忽之见弑则以忽为鲁讎【鲁郑与四国连作战伐皆为忽故】故彼不来赴而此亦不书非有他也公羊道听涂说全不解忽不见经之故又不识其中有亶仪二子相继立君因疑忽必此时又出奔而突自入栎之後必长有郑国遂以入栎为入郑且有不书入郑不书郑忽出奔之疑而解之曰祭仲亡矣仲存则忽存仲亡则忽亡谓此时之突复入而忽复出者必祭仲先亡故也尝读史郑世家其载忽突事与本传同忽之见弑则祭仲与高渠弥共为之有云祭仲与渠弥不敢入厉公语至齐襄杀亶祭仲又迎公子婴【即子仪】于陈而立之至庄十二年始云郑祭仲死则祭仲历作弑逆明见史传此时并未尝亡也公羊前于执祭仲时误以仲书字为贤因盛称其反经行权之妙故此复自执其说以为与国存亡而不知其为逆贼也若突之入栎历忽亶仪三君一十八年而後从栎而入郑使此时已复国则庄四年齐郑之遇齐方讎突而肯与之谋灭纪之事乎则是突复国一误忽出奔二误祭仲亡三误总皆不详审经文以致有此

而胡氏则承其误而更有异者此入栎传既曰经于厉公复国削而不书则已复国矣于後文伐郑传则又袭传说谓将纳厉公勿克而还是矛盾也乃既云弗克纳则此时厉公未复国矣此後之郑伯非昭公即子亶子仪矣至庄四年齐侯陈侯郑伯遇于垂此郑伯子仪也宋苏辙谓是子仪此颇知春秋者而胡氏引其语又曰然而郑伯实厉公非子仪也是又矛盾也初以厉公复国一语横据胸中及读传而始惑之然而复国之见牢不可破宁使自矛盾而姜必树生其坚愎如此亦曾念垂之遇为灭纪也齐肯与突谋否乎

冬十有一月公会宋公卫侯陈侯于袤伐郑【公羊于宋公上有齐侯二字袭作侈】

据传将纳厉公弗克而还其书地者言先谋于其地而後伐此与定四年公会诸侯于召陵侵楚例同【传曰会召陵谋伐楚也】

春秋须详审经文备究其事之始末并当时行事之首从主辅而後可断以义否则鲜有不误者如此役则鲁宋为主而诸国附之何也以公与宋为忽讎而借纳突以伐之实非为突若诸国则因人成事者也公羊不识经不谙事实于此经文中妄加齐侯于宋公之上则全在梦寐中矣前此隐六年郑忽为齐败北戎有功于齐齐初早欲妻以女至是请再妻虽忽两见辞而齐之德忽如故故郑庄在时齐合郑伐鲁为忽伐也至郑庄卒而忽出奔卫则鲁反合郑而齐与郑讎【突忽不两立鲁讎忽故亲突齐亲忽故讎突】十三年四国之战是也即齐僖已死齐襄继世而齐之讎郑如故十四年齐复与宋卫陈蔡伐郑是也及忽归于郑而齐师并不及郑矣至十八年高渠弥弑忽而立子亶则然後帅师讨郑杀子亶而轘裂【即车裂】高渠弥

为忽复讎则是齐乃忽党其生则扞之卫之而死复报之如此而谓纳突伐忽可加齐侯二字于夫子之经之中妄矣妄矣予向谓儒者无识谓春秋絶忽恶忽辞婚于齐亡大援以致失国予于前忽出奔传既辨之矣然又有未尽者如此经前後及传与世家忽未尝失齐援也生则扞之卫之死复报之虽忽婚于齐其为援亦不过如是已也忽之失位在内变而不在外援此则非强大所如何者而自汉迄今必以辞婚为郑忽罪此可谓曾读春秋者乎

乃胡氏则更有误者前误解经此又误解传谷梁曰地而後伐疑辞也非其疑也此谷梁与公羊同是一误谓突已复国而鲁宋伐之故其书地者谓先会其地而後进师此不欲伐而疑之之辞也疑者疑伐突也【范注郑突欲篡国伐而正之义也不应疑故责之】胡氏引左氏纳突之说而又引谷梁是文谓疑伐忽则不惟不解左传即谷梁亦误解矣然且因误立说竟云忽不足以君一国日就微弱突虽篡逆而智足以结四邻之援连兵动衆则全不知襄之伐郑鲁宋讎忽非辅突也自十八年忽被弑後郑立二君而突穷居于栢者一十八年至傅瑕内应而後得入所谓结四邻之援者安在也夫突之结援则正指忽之失援然忽果失援也乎冤矣

十有六年

春正月公会宋公蔡侯卫侯于曹

前年冬伐郑弗克故此又谋伐之此时郑君昭公也

夏四月公会宋公卫侯陈侯蔡侯伐郑

春既谋伐则此遂伐之但此祇伐郑非纳突也蔡侯前列卫侯上此列陈卫下者班序谱云自隐至庄十四年四十三岁征伐盟会者凡十六国时无伯主无有成序理或然也余说见前

秋七月公至自伐郑

冬城向

兴作必书传又云书时则又以嘉其得时故书但周之冬为夏之秋下文有十有一月则此必十月周之十月为夏之八月八月兴土功不时矣国语火见而清风戒寒清风至而修城郭火见在亥月夏令云营室之中土功其始月令亦以建亥月为营室正中建亥夏十月非周十月也杜氏谓下文是十一月则此虽无月或亦在十一月中而是年长历有闰六月则节先于月十一月末即可接建亥之节是以九月建戌当十月建亥未为失时然趋事赴功必实实按月以为人时民事所准授而推移以行之谬矣推移者作历之法非授时法也

十有一月卫侯朔出奔齐

卫侯朔者卫宣公子惠公也据传宣公烝夷姜生急子【史记作汲】属诸右公子泄【公子

无左右但娶有左右媵右公子者右媵之子即宣公庶弟也属者使抚之也】为之娶于齐而美乃自取之生寿及朔属寿于左公子职夷姜缢宣姜与公子朔构急子公使诸齐使盗待诸莘将杀之寿子告急子使行急子不可寿乃饮急子酒载其旌以先【旌者急子所持之符识也】盗杀之急子至又杀之及惠公立二公子怨之乃立公子黔牟惠公奔齐

十有七年

春正月丙辰公会齐侯纪侯盟于黄

此以桓王崩後齐将谋纪而公往成之黄齐地说见前

二月丙午公会邾仪父盟于趯

隐曾与盟蔑今仪父复来修盟传曰寻蔑盟也趯鲁地

夏四月丙午及齐师战于奚

据传齐人侵鲁疆疆吏来告公使以所守之衆列陈而去书此者志齐背盟也奚鲁地

六月丁丑蔡侯封人卒

秋八月蔡季自陈归于蔡

蔡季桓侯弟也桓侯无子蔡人召其弟立之季名献舞即庄十年楚败蔡师以蔡侯献舞归者是也胡氏惑公羊之说谓季归不立别立献舞则此时召季何为经之书召季何意献舞何人此时立献舞何据无稽至此

癸巳葬蔡桓侯

称侯误文胡氏谓抑以垂训误矣例既葬无不称公称諡者胡氏又引唐人啖助邪说谓蔡季之贤故知请諡则春秋列国书葬书諡者无算焉能皆得贤弟而请之且贤弟已避位尚得豫新政而为请諡乎妄哉说见隐三年葬宋穆公传

及宋人卫人伐邾

宋卫伐邾报邾伐也【隐五年邾人郑人伐宋】公甫受邾朝甫会邾于趯而遽助人之兵何居

冬十月朔日有食之

朔不书甲乙皆史阙文左氏谓日御失之【天子掌历曰日官诸侯曰日御】理或然也

十有八年

春王正月公会齐侯于泺公与夫人姜氏遂如齐【公羊无与字】

公本与夫人同至齐然必公先与齐侯行会礼而後偕夫人至齐故曰遂遂者继事之词泺齐地

夏四月丙子公薨于齐丁酉公之丧至自齐

据传公与文姜如齐齐侯通焉公谪之以告【夫人告齐侯】夏四月丙子享公使公子彭生乘公【上车曰乘彭生多力拉公干杀之】公薨于车鲁人乃请诛彭生以灭耻辱齐人诛彭生史例内君见弑必讳为薨然内薨不地以薨而求其地也外薨必地则又以地而求其薨也书例之互见如此

秋七月

冬十有二月己丑葬我君桓公

春秋毛氏传卷八

<经部,春秋类,春秋毛氏传>

卷九

钦定四库全书

春秋毛氏传卷九

翰林院检讨毛奇龄撰

庄公【名同桓公子也諡法胜敌克乱曰庄】

元年

春王正月

不书即位者父弑而不忍行即位之礼宜也

三月夫人孙于齐

夫人庄公母也前一年桓丧归时夫人已随丧归鲁矣是时不书归者以丧归告庙夫人归不告庙也至是复奔齐讳之曰孙孙者避也言慙而避之云尔若公谷谓接练时录母之变详其说则误以姜未归鲁当小祥练祭而庄念母尚在齐故记曰孙齐一若此时新去齐者是以未归之夫人而驾言去齐世无是理况小祥练祭必期又一月丧服四制所云十三月而练者今自前年夏四月至此裁十二月耳何接练之有

夏单伯逆王姬【逆左传作送经误文】

王姬是桓王之女齐襄公娶为后者单伯者天子卿也天子上卿例书爵与公侯同王姬下嫁必以同姓诸侯主之时命鲁主婚故送姬至鲁而听齐就鲁迎之经文逆字是送字之误传文可据公谷不知是误谓王官焉得有逆王姬之事乃为说曰单伯者吾大夫之命于天子者也言鲁大夫贡于天子而天子命为鲁卿也则不知单是畿内采地而世以采为氏者其仕于王朝已非一世春秋所称单伯单子皆是也而谓鲁有单采乎有单氏大夫乎而胡氏遵之乎

秋筑王姬之馆于外

公在忧次不便行吉礼接宾于庙【齐来迎者当在庙】故筑馆于外若谷梁胡氏谓縗麻不可接弁冕则诸侯既葬丧服除矣尚縗麻乎若杜氏谓王命不敢违则天下诸侯岂少同姓可主婚者而负丧行事并忘大飢此非不敢违不欲违也他日无王命而自娶齐女而谓此时能

辞王命而不为主婚必不然矣此皆不足讳亦不足责者春秋所谓直书其事而义自见者如此

冬十月乙亥陈侯林卒

王使荣叔来锡桓公命

荣叔周大夫荣氏叔字锡命者死而赐以文如後之哀策昭七年传所谓追命卫襄者是也夫以桓之死而锡以文渎可知矣若王无天字此是阙文先儒皆谓非义所存胡氏惑啖助之说谓削天贬王为宠篡弑则当桓生时天王之宠桓者至再至三聘问之间历有辞命彼时皆有天今独无天乎且使不去天字即桓之篡弑可贯乎何贸贸至是

王姬归于齐

齐师迁纪邢鄆郚

齐将灭纪先迁其三邑之民而取其地邢鄆郚皆纪邑也此与後十年宋人迁宿闵二年齐人迁阳例同谷梁以纪邢鄆郚为四国名又以为迁纪于邢鄆郚皆非是

二年

春王二月葬陈庄公

夏公子庆父帅师伐於余丘

公子庆父者桓公之子庄之庶兄也以庶长称孟而时压于嫡故又称仲其後称仲孙而终称孟孙氏以是也公羊于二十七年传谓是庄母弟谬矣庄母弟惟季友耳胡氏谓鲁在春秋中见弑者三君其贼未有不得鲁兵柄者公子翬仲遂庆父皆是也然此皆六朝时事春秋藏兵于赋不立军阃其得失未必如此於余丘杜氏云国名公谷谓是邾娄之邑则史例书伐无称邑者【惟本国有伐我西鄙南鄙之称他国无有且鄙非邑也】第国名无三字此必是夷狄之国而比近鲁者与成三年晋郤克卫孙良夫伐麇咎如例同

秋七月齐王姬卒

内女书卒此书者以鲁曾主婚比之内女檀弓云齐告王姬之丧庄公为之服大功以由鲁嫁故为服姊妹之服是也

冬十有二月夫人姜氏会齐侯于禚【禚公羊作郚】

此姜氏即文姜也後仿此禚齐地

乙酉宋公冯卒

三年

春王正月溺会齐师伐卫

此伐卫为纳惠公也与後五年公复会齐侯伐卫皆是一事溺者鲁大夫名其不称氏者史有此例与隐三年翬帅师四年无骇帅师并同谷梁胡氏谓恶其会仇雠而伐同姓夫纳朔非义传皆莫知而尚问其余罪乎

夏四月葬宋庄公

五月葬桓王

桓王以桓十五年崩至是閱七年而始得葬义可知矣公谷疑改葬无据会葬例见隐三年

秋纪季以鄫入于齐

纪季者纪侯弟也史例诸侯之弟类以仲叔季称共仲许叔蔡季是也鄫者纪之邑也齐侯将灭纪已迁纪三邑矣至是纪季以鄫邑纳于齐愿入齐为附庸之国以姑存宗庙此亦大不得已之苦心也夫子存此与後书叔姬归于鄫其恤纪与恶齐义俱见焉入者纳也与他入国入邑例不同

冬公次于滑【滑公谷作郎】

公欲会郑伯【子仪】以谋存纪故特过郑郑伯辞以难【时突尚在栎】遂次郑近地而不能去鲁固懦矣然如邻之不相恤何传云凡师一宿为舍再宿为信过信为次滑小国名以近郑故次之若公谷作郎则鲁地矣郑能来乎【旧注滑郑地非是观後年郑伐滑秦灭滑可见】

四年

春王二月夫人姜氏享齐侯于祝丘

祝丘鲁地则姜氏已还鲁矣出入不书不告庙也两君相见有飧礼特夫人无是耳

三月纪伯姬卒

此隐二年归纪者记此见我之不能庇纪也

夏齐侯陈侯郑伯遇于垂

此齐郑谋灭纪也前桓五年齐僖谋纪时原与郑伯同如纪思以袭之经书齐侯郑伯如纪是也其因循至今者徒以纪与王室为婚姻耳今桓王已崩无所顾忌故前元年即已迁纪三邑至三年而纪季以鄆归齐我公特过郑久舍于滑正以齐郑有旧谋今必牵郑故公求郑伯一见以解纪之难乃一宿再宿三宿而郑不与见则其约于齐而恐以我贰情可知矣至是则复相会以终前如纪之案其不言会而言遇者以遇礼稍杀会之密而不欲彰也郑伯郑子仪也郑自桓十五年忽归国後突随入于栢而未有国也既而忽为高渠弥所弑而立子亹则齐襄杀子亹而戮高渠弥何也以齐党忽也故子亹既杀突仍不入而立子仪以突为忽讎即为齐讎子仪无德怨焉此时子仪正主国故齐与谋之胡氏谓是突不惟不识事实并不识情理矣突忽不两立齐宋不兼合宋突齐忽各有所为说见桓一十五年

纪侯大去其国

前齐迁纪三邑纪季以鄆入于齐而齐之逼纪如故则不得已而去之其不言灭而祇言去者以纪季存鄆犹奉宗祀观後十二年有纪叔姬归于鄆文则鄆尚苟存可知也若其称大去者先仲氏曰去而不反曰大去犹之归而不复曰大归言去之至也【胡氏以委弃之多与去国为大俱非是】至于称侯则春秋失地书名失国书爵亦是史例与後十年齐侯灭谭谭子奔莒僖五年楚人灭弦弦子奔黄例同公羊谓不书齐灭者为贤者讳齐襄复九世之讎春秋贤之何为复九世之讎以周夷王时纪侯潜齐哀公于王而烹之哀公者襄九世祖也此与史世家齐哀公时纪侯潜之周周烹哀公语合故郑氏亦云懿始受潜而烹齐哀是也但齐哀本不道齐风还诗所以刺哀公之荒淫周制不讎义杀此固义之所当杀者即使天王淫刑无所归咎比之讎有司之法更为不同且恩怨以时亲远则恩衰讎远则怨忘故周制复讎之义不过五世并无九世犹相讎者且夷蛮无共主故有讎国三代共主无讎国也【即春秋列国两雄对峙构怨有之然谓之敌国若齐纪则并非敌国之比】又且春秋一书自为终始从无连前代事实说春秋者予即以经文考之即一纪存亡而合隐桓庄三公凡六十一年书二十一条【隐二年纪履繻来逆女 伯姬归于纪 纪子伯莒子盟于密 七年叔姬归于纪 八年公及莒人盟于浮来 桓五年齐侯郑伯如纪 六年公会纪侯于郕 纪侯来朝 八年单伯来逆王后于纪 九年纪季姜归京师 十三年公会纪侯郑伯及齐侯宋公卫侯燕人战 十七年公会齐侯纪侯盟于黄 庄元年齐迁纪邢邢鄆 三年纪季以鄆入于齐 冬公次于滑 四年纪伯姬卒 纪侯大去其国 齐侯葬纪伯姬 十二年纪叔姬归于鄆 二十九年纪叔姬卒 三十年葬纪叔姬】皆历记其求庇王室求救宗国而卒不能

庇之救之之意其不憚殫屑绵邈有始有终如此则其恤纪恶齐伤王室之卑痛宗国之弱为何如者而谓贤齐襄而予之也乎况齐侯如纪在桓五年此时齐僖未亡则谋纪者齐僖之志谁谓齐襄能复讎者解春秋而不读经此何说也

六月乙丑齐侯葬纪伯姬

三月纪伯姬卒入夏而纪侯去国然伯姬犹未葬也至六月而齐侯始葬之则去国之惨即一妻之棺而不能顾他可知矣若其称齐侯者春秋书法君身称爵大夫称人并无以褒书爵【公羊说】与以贬书爵之例【胡氏说】此直书齐侯者向以为纪侯之去国无所逼逐如太王迁岐走马自行今而知齐侯之亲在纪也则非自去之逼逐之也故纪侯之去不可言去几见有国君而轻去国者伯姬之葬何可言葬先仲氏曰纪侯自有妻纪妻自有葬几见有齐侯而葬纪妻者皆文也而义自见焉

秋七月

冬公及齐人狩于禚【禚公谷作郚】

禚齐地也公至齐不与齐侯狩而与齐大夫狩虽齐侯以甥礼轻之然公则卑甚矣此展甥之诗所由讥与

五年

春王正月

夏夫人姜氏如齐师

师则在军中矣此时齐未行军得毋齐师尚在纪孔疏所谓疆理纪地之师者非耶

秋邠黎来来朝【邠公羊作倪黎左传作犁】

邠国黎来名邠与邾同姓即小邾子也附庸之君例可书名并书字者胡氏谓夷狄之附庸称名则春秋无此例且小邾非夷狄也说见隐元年邾仪父传

冬公会齐人宋人陈人蔡人伐卫

传云伐卫纳惠公也公以国君与诸国大夫纳有罪之君义何如矣

六年

春王正月【正公谷作三】

王人子突救卫

王人王官之微者也子突者名也周礼王之上士三命中士再命下士一命而昭十二年传注谓三命再命皆书名惟一命书人今书人则下士之一命者也然人则不名既书人又书名则或以救卫而嘉之谷梁所谓称名贵之者容有是乎【杜氏胡氏谓突字非是】但春秋书救皆是嘉予此则罪诸国而并伤王室之卑弱夫以王官出讨罪而但云救已可痼矣况不能救哉

夏六月卫侯朔入于卫

据传卫侯入放公子黔牟于周杀左公子泄右公子职乃即位是朔本卫君史例失位复入当书复归诸侯纳之当书归此第书入一似原非卫君而强入之者则卫侯之入与诸国之纳之皆有罪矣此与後九年齐小白入于齐例同

秋公至自伐卫

以告庙故书然自伐卫归则义亦见焉

冬齐人来归卫俘

俘例有二一俘其人民一俘其宝玉此则宝玉之俘左氏公羊皆谓之为归卫宝是也夫以逆王命而纳罪恶即无所利而为之其恶已难赏矣况利之

七年

春夫人姜氏会齐侯于防

防鲁地则齐侯来会矣故传曰齐志也

夏四月辛卯夜恒星不见夜中星陨如雨【陨公羊作霰凡陨字後同辛卯夜夜字谷梁作昔】

恒星经星也【即二十八宿】以经训常故曰恒星此祇称恒星而不称星则必衆星皆见而恒星独不见者若谓日光不掩故星不见则未有经星较大且不见而衆星反见者此非夜明掩星可知也【左氏谓不见者夜明也如雨与雨偕也】至夜中星陨则非恒星而衆星矣故但称星惟夜半以前恒星不见而衆星见故初祇不见恒星而此时则又见衆星之陨若谓恒星之不见以陨之故则未有星体不见而能见其陨者此非恒星之陨又可知也【谷梁谓恒星之陨】至于如雨则但拟衆星之陨比雨之下故曰如雨左氏谓与雨偕者亦谓与雨相同而杜氏误解谓星陨而又雨如与而通则星陨可纪夜半有雨何足记而如虽通字而此不然也【康熙己未冬在史馆时同至太常护月食食将复而浓云蔽之不知其复也既而各官散散时有雨然日记官但记有云蔽月而不及雨以不足记也】至若公羊道听谓恒星不见者

诸凡列星俱不见也夜中星陨如雨者夜中列星俱复位似雨之陨而不似雨之堕地也夫雨落不上天而谓星陨能复位斯已奇矣然且为之说曰未修时春秋曰雨星不及地尺而复夫子修之曰星陨如雨夫以星之去地咫尺反而复位此大变事而修之如此是另造春秋非修春秋也不知何所据而荒唐若是

秋大水无麦苗

秋即夏也夏方登麦而水漂之苗者五稼之苗毛诗曰食我场苗

冬夫人姜氏会齐侯于谷

谷齐地

八年

春王正月师次于郎以俟陈人蔡人

杜氏云期其伐邾而陈蔡不至故次于郎以待之与後文治兵围邾还师总是一事说公谷者谓陈蔡伐鲁次以待之则正义云陈蔡于鲁境絶路遥春秋以来未尝构怨且兵来而我御之但得称防不可言俟也此皆不全会经文而逐节作解说者盲人瞎马逐步认路非虚语也

甲午治兵【治公羊作祠】

治兵者教战也杜氏云将以围邾也则此本以事习战不必有时者然即以时论亦不失时而正义谓周礼中秋教治兵月令孟春不称兵则此之春正月正夏之冬十一月乃中冬非孟春也周礼中冬教大閱所以修战法则正与四仲蒐狩治兵相表里特用之非其所耳

夏师及齐师围邾邾降于齐师【邾公羊作成】

据经二国同讨邾而邾独降齐畏齐不畏鲁也据传仲庆父请伐齐师而公不敢伐亦畏齐非自克也夫以鲁之弱庄之庸劣当强齐之雠力不能报而反好大凌弱藉强雠以攻同姓罪恶已极然且究不能逞初则招与国而不之至既则降小弱而不之伏卒之因人成事功归他人僵手缩膊为天下笑则何如已之为愈矣正义谓第称师则公不自将然已在师中特不帅师耳不然仲庆父将何由请公伐耶邾国在齐鲁间文十二年有邾伯来奔则邾国而伯爵者史管蔡世家有邾叔武为文王子武王母弟则与鲁固兄弟国也

秋师还

以公不帅师故不书公至然亦有义焉此师也而亦还之乎盖讥之

冬十有一月癸未齐无知弑其君诸儿

诸儿齐襄公名也无知者襄公从弟公子夷仲年之子也据传齐僖之母弟夷仲年生公孙无知有宠于僖公而襄公绌之会齐大夫连称管至父戍葵丘瓜时而往及瓜而代【一周岁也】至期不命代无知约二人为乱时公猎贝丘见大豕从者曰公子彭生也公怒曰彭生敢见射之豕人立而啼公惧坠于车伤足丧屨及反索屨于徒人费【御臣名】不得鞭之见血出遇贼于门刼而束之【约费同入弑】费曰我奚御哉【言何尝是御人言公不以御恤之也】袒而示之背信之费请先入伏公而出鬪死于门中石之纷如【寺臣名】死于阶下遂入杀孟阳【亦寺人名】于牀【代公居状】曰非君也不类见公之足于户下遂弑之而立无知

春秋毛氏传卷九

卷十

钦定四库全书

春秋毛氏传卷十

翰林院检讨毛奇龄撰

九年

春齐人杀无知

据传初无知虐雍廩【齐大夫】至是雍廩杀之例见前

公及齐大夫盟于薳【薳公谷作暨】

杜氏云此齐大夫之迎子纠者【见下文】以非一人故不名薳鲁地

夏公伐齐纳纠齐小白入于齐【纳纠左传作纳子纠正义谓定本经文纠上有子字今本无子字阙文】

据传初襄公立政令不常鲍叔牙【公子傅】曰君使民慢乱将作矣奉公子小白【杜氏云僖公庶子】出奔莒及乱作管夷吾召忽【二人皆公子傅名】奉公子纠【杜氏云小白庶兄】来奔【谓奔鲁也】至是公伐齐纳子纠而小白先自莒入其一书纳一书入者入有二义天王入于成周许叔入于许此宜入者也卫侯朔入于卫齐小白入于齐此不宜入者也然春秋褒讥实不在此总不过由外入内之义纳则有诸侯之师为之纳之皆史书常法不立义例至于二公子宜立与否则同为支庶不问长次乘乱而入先则得之原无褒讥而胡氏谓子纠不当立小白宜有齐别无他据祇以子纠为弟小白为兄故立此说按史世家襄公次弟纠奔鲁次弟小白奔莒子纠者小白兄也故荀卿曰桓公杀兄以反国庄子桓公小白杀兄入嫂而管仲为臣古越絶书曰管仲臣於桓公兄公子纠即管仲大匡篇亦曰齐僖公生公子诸儿公子纠公子小白又曰鲍叔傅小白辞疾不出以小白幼而贱【贱者母贱幼者齿幼】不欲为傅故也则明明子纠是兄小白是弟而胡氏引据有云史称齐桓杀其弟以反国一语求之列代之史并无其文及考汉淮南王传知淮南厉王不法文帝令大将军薄昭以书责之有曰昔周公诛管蔡以安周齐桓杀其弟以返国其云弟者以文帝是兄故讳言兄而言弟韦昭本注所谓子纠本兄而称弟者不敢斥也胡氏不考所自徒以程子曾误读汉书早有桓兄纠弟之说而此又承程子之误不得原文混称曰史是以误读人书且误解人说之故而移误圣经甚至紊乱人之兄弟伦次诬妄立说于以误天下误後世此其所系匪浅鲜也若夫夫子许管

仲而不许召忽直是崇尚事功务求有用并不从纠桓兄弟以伦次长幼定是非而宋儒承误之徒必曰桓兄纠弟故管仲可相桓召忽必不可死纠于以定唐王珪魏徵事秦王而不死建成元吉之罪予尝曰夫人亦各事主耳事兄可死事弟不可死则凡为弟者惧矣此皆立说之最不通者况复误耶详见予论语稽求篇

秋七月丁酉葬齐襄公

八月庚申及齐师战于乾时我师败绩

不能纳纠而又不退师遂至大败据传公丧戎路乘他车以归戎右与御皆被获焉乾时齐地

齐人取子纠杀之

传云鲍叔帅师来言曰子纠亲也请君讨之管召讎也请受而甘心焉乃杀子纠于生窦召忽死之管仲请囚鲍叔受之及堂阜而税之遂用为相是杀之在鲁而曰齐人杀之者齐大夫至鲁而遂杀之也取者取之我也盖病夫我之为所取也

冬浚洙

洙水在鲁城北浚者深之所以防齐也

十年

春王正月公败齐师于长勺

此齐人伐我而我应之者其不书彼伐而第书败彼甚善我之能败彼也临难辟讎不废权譎况用兵乎此用曹刿之计初稽其陈列【齐人三鼓始与之战曰一鼓作气再而衰三而竭彼竭我盈故克之】後覘其伏莽【公将驰之刿视其辙乱其旗靡始逐之恐伏莽也】虽制奇而实用正焉胡氏谓善陈取胜非王者事则必强寇临疆国亡主虏一如靖康之拱手让敌兵刃不接然後为王者事乎以鲁之积弱强讎来侵加之齐桓管鲍銳师初出自非长勺乘丘操奇制胜则鲁鲜有能图存者故夹谷之会夫子必先请备兵具左右司马然後与会盖圣人未尝忘战也且未尝顷刻忘战胜也故曰我战则克又曰战陈无勇非孝也至矍相校射则首斥奔军之将在亡国大夫与孝弟好礼修身称道之上其重战胜如此宋儒不读书好侮圣言动辄以不战立说误本国误天下後世致崇祯癸未贼迫畿甸廷臣尚有请舞干羽者嗟乎盍亦就圣经一深思之

二月公侵宋

齐每挟宋师伐鲁此必长勺之役宋人与谋而我报之者观下齐宋共次郎可知也书例有钟

鼓曰伐无钟鼓曰侵见後二十九年传

三月宋人迁宿

杜氏云强迁之而取其地也宿见前

夏六月齐师宋师次于郎公败宋师于乘丘

此亦彼来伐而我败之者然长勺不书彼伐此书彼伐者以长勺祇齐师书败者而伐者见此齐宋两师但书宋败则齐伐不可见也然此亦以术胜者【齐师宋师次于郎公子偃曰宋师不整可败也宋败齐必还请击之公不许乃自雩门窃出蒙皋比而先犯之公从之大败宋师于乘丘齐师乃还】夫以我鲁积败之师当齐桓新銳之衆而连以术胜然则用兵之不可无术也如此乘丘鲁地

秋九月荆败蔡师于莘以蔡侯献舞归【舞公羊作武】

此春秋楚通中国之始也然甫通而即败我同姓之国无道可知矣此必非楚来告而蔡来告者莘者楚地献舞蔡哀侯名即前经所称蔡季者也【谷梁胡氏皆谓别一人误】归者获而去之春秋书归不一然皆书爵书名如宣十年以潞子婴儿归定四年以沈子嘉归六年以许男斯归哀八年以曹伯阳归类皆是惟僖廿六年以夔子归无名则以夷国来告偶失名或亦史文有阙逸耳而胡氏谓有罪则名无罪即不名则弱小受侮者皆罪人矣据传蔡哀侯娶于陈息侯亦娶焉息妫过蔡蔡侯曰我姨也止而见之弗宾息侯怒乞楚伐蔡则蔡侯本有罪然其书名不以此楚半姓高阳之後周初封熊绎于荆後迁楚僭称王春秋自是年後皆称荆至僖元年称楚是时楚君为楚文王此但书荆者以君不亲至也

冬十月齐师灭谭谭子奔莒

谭国名据传齐侯之出也过谭谭不礼焉及其入也谭又不贺遂灭谭齐桓之恶如此

十有一年

春王正月

夏五月戊寅公败宋师于郕

宋为乘丘之役故侵我公乘宋师未陈而薄之遂败其师郕鲁地

秋宋大水

以灾告而我吊之故书

冬王姬归于齐

此齐桓也齐桓逆共姬以我主婚故记之其不书来逆者以归见逆也此与後伯姬归于?例同

十有二年

春王三月纪叔姬归于鄫

杜氏云纪侯去国而死叔姬无所归因归于鄫以纪季居鄫守纪宗庙则鄫其家也故归之若曰此我归纪之叔姬也今归鄫乎伤哉

夏四月

秋八月甲午宋万弑其君捷及其大夫仇牧

传曰乘丘之役【前十年我败宋师于乘丘】公以金仆姑【矢名】射南宫长万【宋卿南宫氏长万名】公右颡孙生搏之【右者戎右颡孙其名也搏者获取也】宋人请之【乞还也】宋公靳之【戏而相愧曰靳】曰始吾敬子今子鲁囚也吾弗敬子矣病之【万以为患】至是秋乃弑闵公于蒙泽【宋地】遇仇牧【宋卿】于门批而杀之遇大宰督【即华督】于东宫之西又杀之立子游【公子名】羣公子奔萧公子御说【公子名】奔亳【萧亳皆宋邑】南宫牛【长万子】猛获【长万党名】帅师围亳其事如此则宋万见获与万之得归原在一时宋闵之靳万与万之弑闵则两时两地公羊道听涂说窃宋公靳之一语遂谓庄公获万归散舍诸宫中数月然後归宋宋复使为大夫与闵公博妇人在侧万诵鲁公之美闵公妬其言顾妇人曰此虏也更谓万曰尔非虏焉知鲁公之美万怒遂搏闵絶脰其说似可听然细按之实大谬不然者庄既获万请而得归此是恒事乃不言得归何由归在何日而曰散舍之宫中数月天下无俘虏而可散处于宫中至数月者况南宫长万素号多力其後奔陈能乘车犂母行二百六十里而一日至者此可散处宫中乎至蒙泽之弑传不言故史世家谓猎蒙泽而博争行万多力以局杀闵公乃又曰妇人在侧岂又散舍宫中耶此皆道听之可笑者也若夫仇牧华督同死君难而一书一不书者此皆因来告之文告牧则书不告督则不书此是书例而胡氏谓督身有罪【桓二年宋督弑殇公】夫子削之夫覆愆补过先圣所许唐尧卫武杂称晚盖【尧篡兄摯武弑共伯後皆称之】向使弑君之贼果能迁善则方汲引之不暇明明死君而反从削之则凡自新者废然返矣恐夫子书法必不出此

冬十月宋万出奔陈

据传萧叔大心【萧宋邑叔者守邑大夫之名也】及戴武宣穆庄之族【宋五公之子孙】以曹师伐之杀南宫牛于师杀子游于宋立桓公【即公子御说也】宋人请猛获于卫卫归

之亦请南宫万于陈并赂陈人乃使妇人饮之酒而以犀革裹之比及宋手足皆见宋人皆醢之是宋万奔陈即已见杀经不书者不以杀告也其不书葬宋闵公者以乱故我不会葬也此例甚明而胡氏有不讨贼则不书葬之说则此已讨贼而仍不书葬说不验矣乃又为遁词以坚持之曰天下之恶一也陈人不以万为贼而纳之又受宋人之赂而使妇人饮之酒是与贼为党非政刑也特书万出奔陈而闵不书葬以着陈人与贼为党而不能正天讨其法严矣殊不知贼者宋之贼也讨贼者宋人之事也宋追贼至陈遂请贼于陈不得已而又赂陈必得贼首与贼党而尽诛之然後已此可谓讨贼之尽善者矣乃又无所归咎而迁恶于陈曰陈不讨贼陈受贿陈获贼不以正而以诈饮妇人酒为陈罪案则试问此宋万者陈贼乎陈当讨乎其不葬者陈之君乎不书葬则陈之卿大夫士皆无所容于天地之间乎故不书乎然且以万之多力犀革裹之尚能裂犀革而使手足皆见乃恶其饮之酒不正天讨则试问此时欲正天讨将先拘其人而请诛之乎抑舍之如公羊所云散舍之宫中然後请王命而使就戮乎舍则不可拘则不能饮酒行诈又不得势必如艾子所称□儒遇虎斥去戈攫雅步以临之究至噬其軀而不之悟也噫可叹也已

传称萧叔大心杜氏注萧宋邑叔者萧大夫名则必大夫之守萧者但大心无注即正义亦不解按此传称萧叔大心以曹师伐之而定十年有宋乐大心出奔曹十一年宋乐大心自曹入于萧大心名既同而萧与曹又适合则似前後即此人而守萧而通曹者祇计此年至定十一年约一百八十余年年又不合此岂萧曹字偶同而误入此大心字与若萧本宋之公邑二经所书皆属之宋其在後十三年萧叔朝公宣十二年楚子灭萧则另是一萧当是附庸之国之近楚者昔人所称萧蓼荆楚皆以草名可见正义谓此年以讨贼者功宋封为附庸之国後为楚灭则宋焉能封人国既为楚灭则萧属楚地何得宋诸公子与乐大心又得以定十一年仍据以叛此则孔疏之难通者夫此年之萧叔与大心犹是传文若定十一年则经矣经何可贸贸如此

十有三年

春齐侯宋人陈人蔡人邾人会于北杏【齐侯谷梁作齐人】此齐桓主盟会之始也桓欲修霸业乘宋之乱而会诸侯以平之例凡盟会征伐君身书爵卿大夫有名者书名无名即书人其说历见前经久矣此会止齐侯一人而列国皆以大夫至一则桓初兴霸诸侯未经信从一则北杏齐地宋乱仓猝不能急至书爵书人皆是书例并无褒讥于其间即有褒讥亦并不在此国爵人名有无增减之际而胡氏又谓桓非受命之伯诸侯自相推戴以为盟主是无君矣故称人以贬之桓能会诸侯安中国免民左衽则称侯以与之则试问此会是诸国为政而迎桓以主其事乎抑桓召诸国乎桓不出齐疆坐徵诸国诸国方奔命不暇未知所向乃桓独受褒而诸国无端各予以罪是杀人市中从观者皆典刑而持刃之人翻受功赏何以服衆春秋直书其事功过并见平宋乱似功也然平宋而必使之服已过也召诸侯以伐诸侯过也不奉王命而召之又过也其功其过皆桓自受之无与他人若谓功在桓过在列国则孟子所云三王之罪人者当指列国诸侯矣予乡王甲庵名寅精于经学其着春秋自得篇谓春秋记过之书有贬无褒【孟子谓乱臣贼子惧宋邵雍谓孔子之刑书因历指列国大夫如管仲子产伯玉史鱼平仲舅犯皆不见于经以无罪也见则有罪矣先仲氏尝谓其说稍偏夫子不削孔父

未为贬祖别本春秋止于孔子卒岂为贬圣乎要其书则一家言也】齐桓每称人所以杀其罪晋文则称侯矣北杏之会罪专在桓故齐独侯而他则称人虽其立说亦终以人爵书例起见然正与胡氏所云功罪全反亦一快也

夏六月齐人灭遂

遂国名北杏之会以遂人不至遂灭之桓恶如此

秋七月

冬公会齐侯盟于柯

鲁自长勺乘丘之役见忌于齐故专为此盟据传庄公升坛曹子【史记作曹洙】手劒劫桓公要反侵地管子请桓反汶阳之田【向为齐所侵者今还之鲁】此虽战国荆聂之习从此而开然鲁则自是有立矣要非历能制胜不至此柯齐地

十有四年

春齐人陈人曹人伐宋

北杏之会所以平宋而宋人不伏故伐之其称人者君不亲帅师也胡氏自为例必谓称人是贬以汉儒将卑师少之说为谬此则又曰将卑师少矣其不一定又如此

夏单伯会伐宋

此齐桓假王命也诸侯伐宋齐请师于周故单伯来会取成于宋而还单伯周大夫见前

秋七月荆入蔡

据传蔡哀侯为莘故【前十年败于莘为楚虏归】绳息妫【绳者誉其美也】以语楚子楚子如息以食入享遂灭息以息妫归生堵敖及成王焉未言【不与楚王言语】楚子问之曰吾一妇人而事二夫纵弗死其又奚言楚子以蔡侯灭息遂伐蔡

冬单伯会齐侯宋公卫侯郑伯于鄆

以宋服故遂归功天子而作此会鄆卫地

十有五年

春齐侯宋公陈侯郑伯会于鄆

复会鄆者初推王官此尊伯主也传曰齐始霸也此与前年冬郑伯皆突也前年传郑厉公自栢侵郑及大陵获传瑕瑕请释已为内应遂反弑子仪而纳厉公厉公入杀瑕此前年夏事则入冬与春两作鄆会皆是突而非子仪可知也齐僖与襄皆党忽讎突故突在僖襄之世有伐无会此时齐桓不然耳说见桓十五年传

夏夫人姜氏如齐

杜氏云文姜也

秋宋人齐人邾人伐郕【郕公羊作儿】

郕即小邾也杜氏曰宋主兵伐之

郑人侵宋

郑突之初入郑与再入栢皆倚宋师为之援以突为宋雍氏出也自宋庄公卒後突居栢最久而宋不一顾至是乘宋师在郕而遂侵之所以啓齐楚之伐也孟子曰国必自伐然後人伐之以此

冬十月

十有六年

春王正月

夏宋人齐人卫人伐郑

报侵宋也杜氏曰齐楚争郑自此始矣

秋荆伐郑

郑伯自栢入缓于告楚故伐之

冬十有二月会齐侯宋公陈侯卫侯郑伯许男滑伯滕子同盟于幽【二月下公羊有公字许男下公谷有曹伯二字】

传曰同盟于幽志郑成也夏伐郑而郑服之故为此盟同盟者言衆共为之与文十四年同盟

于新城襄三年同盟于鸡泽例同其不书公者祇言会而公在其中与僖十九年会诸人盟于齐二十九年会诸人盟于翟泉例同若夫列国之次陈久在卫下自此以後陈皆在卫上者杜氏曰齐桓正其序故告文次第如此

邾子克卒

邾子名克即隐元年邾仪父也杜氏曰齐桓请王命为诸侯故称子谷梁曰进之夫夫子能笔削其能进附庸之国为五等爵乎

春秋毛氏传卷十

<经部,春秋类,春秋毛氏传>

卷十一

钦定四库全书

春秋毛氏传卷十一

翰林院检讨毛奇龄撰

十有七年

春齐人执郑詹【詹公羊作瞻】

郑詹郑大夫名僖七年传曰郑有叔詹是其人也前郑突初复国时适宋乱初平齐两会于鄆使宋郑联盟以服伯主此齐桓用心而自春徂秋盟未寒而郑忽侵宋此所以复来齐宋卫三国之伐也今伐犹未伏而郑使忽至则执之此实校之经而历可按者若传云为郑不朝则桓新立当朝突新复国又当朝今皆非其时矣至公谷云恶佞则何以知詹为佞人此则更无理者予故曰以传解经必不如以经解经即此是也

夏齐人殲于遂

前十三年齐人灭遂而分师以守其地传所称戍之是也至是遂之因氏颌【音遏】氏工娄氏须遂氏【皆遂公族名】飧齐戍醉而尽杀之殲者尽也夫灭人之国必俘其子弟迁其人民殄其宗祀夫然後疆理其地乃以既灭之遂距此四年犹使其族姓公然处此与戍者杂处虽齐桓恃强以为无恐然亦见遂人蓄怨迟久不忘故特记曰殲于遂一似此时尚有遂者虽曰遂未灭可也

秋郑詹自齐逃来

来者来鲁也齐又伐我以是也

冬多麋

麋多则害稼故以灾书京房易传曰废正作淫为火不明【言火政不修也】则国多麋

十有八年

春王三月日有食之

杜氏曰不书日者官失之说见前

夏公追戎于济西

戎者徐戎也不言来而祇言追者言追而来自见犹十年公败齐师于长勺不言来伐祇言败而伐自见同

秋有

短狐也居水中以气射人辄生瘡毛诗所谓为鬼为蜮者南越水毒产此物岭北即无矣鲁中国地岂宜有此故公羊曰以异书若左氏云为灾则 虽害人似未可称为灾者先仲氏曰此 字当是蟹字之误蟹食禾节害五稼伤民之生故曰灾其曰秋有者以周之秋为夏之夏毛诗螟螣螽蟃皆旱灾之物正在此时故特记秋字与後廿九年秋有蜚同若 则随时所见有即为异【如昭廿五年有鸛鹄来巢类】何必秋有也其说近之余见秋有蜚传

冬十月

十者九年

春王正月

夏四月

秋公子结媵陈人之妇于鄆遂及齐侯宋公盟

公子结鲁大夫也媵者送女之称鄆卫地是时陈侯娶卫女而鲁媵之故遣公子结送媵至卫适齐宋为会将谋伐鲁正在卫地结遂无公命而遽与盟然後送女此虽专事然聘礼大夫受命不受辞【外事不测不预为辞说】出境有可安社稷利国家者则专之可也故春秋无讥焉此与文八年公子遂盟雍不返命而即与雒戎盟于暴例同虽彼解戎患而此反来陈之伐且齐宋仍背盟无益国事【见後】然成败不计也女称妇陈侯称人者礼在涂称妇入国称夫人未入陈国则此例称妇彼以列国例称人正书例也

古有媵礼凡诸侯娶妻本国既有侄娣媵从而数或不具则列国各送庶女备侄娣之数亦名曰媵媵者送也但周制既亡而仪礼礼记皆战国後书【仪礼虽早出汉世屋壁然秦汉以前上至周初并无一人举其名引其文者书秦誓诗国风易孔子象传皆春秋时书尚人人能称之引之岂有周公之礼传八百年并无一名一字偶见诸书则概可知耳】且阙略未备全不可据今第就三传较之然亦有异同但当合观全经以定其是否如左传成九年传有云凡诸侯嫁女同姓媵之异姓则否则宣公嫡母哀姜生母敬嬴襄公嫡母齐姜生母定嬖皆异姓也又僖二十年西宫灾何休谓西宫者小寝内室楚女所居也成九年伯姬归宋齐来致媵襄二

十三年晋嫁女于吴齐使析归父致媵皆是异姓若必同姓为之则秦楚嫁女别无可媵故唐陆淳亦曰莒姓已邾姓曹同姓最少将孰媵乎若公羊云诸侯娶一国则二国往媵之以侄娣从诸侯一娶九女【本国一夫人二侄娣二国各一媵二侄娣合九女】诸侯不再娶则成九年伯姬归宋时卫晋既来媵矣齐又来媵是娶一国而三国来媵合十二女矣虽左氏讥曰非礼然以异姓讥【即前不媵异姓语】不以多女讥也若诸侯不再娶予前已极辨之【见桓八年】今知更娶不一不特嫡亡可再娶即嫡在亦可再娶卫庄公娶庄姜姜而无子又娶于陈曰厉妫生孝伯庄姜贤妇未尝以为非礼也故三传异同皆见礼意而吾一以全经断之叔姬归于纪则本国有媵也媵陈人之妇则同姓有媵也齐人来媵则异姓亦有媵也纪季姜归京师则天子可再娶也王姬归于齐则诸侯亦可再娶也若晋平之娶继姜则嫡亡可再娶也卫庄公之娶厉妫则苟嫡无子虽不亡亦可再娶也此周礼也

夫人姜氏如莒

冬齐人宋人陈人伐我西鄙

此齐桓也桓自兴伯以来长勺乘丘屡为我败因为柯之盟而郑詹逃齐不合来鲁遂借此合宋以谋伐鲁前公子结媵女时遽为参盟是也但结无公命不足取重而陈则反以稽媵在途为憾故盟未逾时而三国之师同集边邑是结虽无功然以为招寇则未也公羊褒结固非是若胡氏必欲使有司论刑恐不必然

二十年

春王二月夫人姜氏如莒

夏齐大灾【左传天火曰灾人火曰火】

秋九月

冬齐人伐我【戎谷梁作我】

二十有一年

春王正月

夏五月辛酉郑伯突卒

此郑伯是突则前四年与齐侯遇垂者明是子仪以突至十四年始复国也胡氏于此已无词乃又曰凡书郑伯俱是突突虽篡国始终书爵忽虽世储不得称子以为不能保国之戒则姜仍树生矣然且其说有难训者人君不幸而遭篡弑凶暴有几十九皆庸主耳但以不能保国

之故而公然褒篡绌弱以垂戒後世恐夫子之春秋必不若是凡此皆自可不置喙者以重关名教故哓哓不恤观者审之

秋七月戊戌夫人姜氏薨

冬十有二月葬郑厉公

二十有二年

春王正月肆大眚

此赦罪之礼易称赦过宥罪书称眚灾肆赦是也第赦必有时此时文姜未葬国无大庆兵荒不作民亦无大患何以须赦则书其事而义自见焉谷梁谓文姜罪大必假赦以贷其罪始可葬此调讪语而贾逵遂云文姜有罪借赦以说民使薄其罪则此时之所赦者岂姜为政乎

癸丑葬我小君文姜

陈人杀其公子御寇【御公谷作御】

此陈宣公也公子者宣公之子御寇其名也左传称太子经但称公子者以未誓王朝故也其见杀不知何事人者衆词也据左传是时陈完奔齐齐桓使为卿完字敬仲厉公之子与御寇为党故出奔完生时筮之谓必大于姜懿氏卜妻完亦曰将育于姜五世其昌八世莫与京今果为齐卿至五世而陈无字大于齐八世陈成子得政

夏五月

例以时领月则夏必四月此五月误文也说见前

秋七月丙申及齐高傒盟于防

齐桓自伐西鄙後又复修好故遣上卿来而与之盟之公羊曰高傒贵大夫也防鲁地

冬公如齐纳币

此昏礼纳币也昏礼有纳采问名纳徵告期四礼【见谷梁传此通礼也】而诸侯则止行聘纳币二礼即娶女焉成八经宋来聘来纳币九经伯姬归宋是也但纳币遣卿而公亲往为非礼丧婚不并行母丧未再期而遽行聘币更非礼此皆书事而义自见者祇国君十五生子见左传别文庄公二十二年始纳币二十四年始娶妇计之桓六年子同之生已三十七岁未有国君三十七岁始娶妇者据胡氏夫人姜氏入传谓庄公不胜其母越礼踰时俟讐人之

女荐舍于宗庙以成好合似庄之迟娶因文姜必欲娶襄公之女为妇而襄女尚少因故使踰时以至今日此皆未读春秋之言也春秋齐襄之弑在庄八年襄女之生当必在八年以前则此时已二十矣周礼女子二十而嫁指士庶人耳且犹曰自十五以至二十勿过此限不必赢二十始嫁若天子诸侯十五而娶女子十四而嫁明见诸书纵使襄女待年其在二十一年文姜未卒时正当女年十四之外不惟不娶而纳币行聘未尝一行何也且庄非迟娶也据三十二年公子牙卒传则公已娶党氏女名孟任者立为夫人而生子般矣【左传公筑台临党氏见孟任从之孟任不许公以夫人言而後许之割臂盟公生子般焉】今齐桓兴霸每甘心于鲁自长勺乘丘以至西鄙屡战不克而後一为柯盟再为防盟思以结好而庄方畏桓亦将以此纳欢焉因以党氏贱且私成昏盟故置孟任而再娶哀姜此实两耦匹嫡之最无礼者故此一书而大小失礼一并见焉其後哀姜淫佚庆父篡弑皆酿于此若文姜则于此事并无预也余见三十二年传

二十有三年

春公至自齐

纳币归必告至于庙礼也

祭叔来聘

祭叔者天子之内臣也不称使史例如此

夏公如齐观社

齐桓用强霸之术借祭社为名聚民于社以观戎器此与襄二十四年传楚子使薳啓疆如齐齐社蒐军实使客观之正同然则此系桓耀兵而请公往观公方修好则不得不往然非礼矣时曹刖切谏有云齐弃太公之法而观民于社言太公用兵法不若是耳

公至自齐

荆人来聘

荆人楚人也楚之通鲁自此始

公及齐侯遇于谷

萧叔朝公

萧附庸国叔其名也不言来朝而但言朝公者以公方在谷而就谷朝之为非礼也谷齐地见

前

秋丹桓宫楹

此为将娶哀姜至必朝庙故先饰以夸耀之然非礼矣谷梁传天子诸侯黝垩大夫苍士黻【黝黑柱垩白壁苍青色黻黄色】

冬十有一月曹伯射姑卒

十有二月甲寅公会齐侯盟于扈

自二十二年盟防後纳币观社遇谷盟扈齐鲁交好之密乃如此

二十有四年

春王三月刻桓宫桷

谷梁传天子之桷斲之砮之加密石焉诸侯之桷斲之砮之大夫斲之士斲本

葬曹庄公

夏公如齐逆女

秋公至自齐

昏礼亲逆必告迎告至礼也

八月丁丑夫人姜氏入

公亲逆当与姜氏同日入今异日者公羊以为有孟任在宫姜不肯入必与公要约许远孟任而後徐徐以至焉故丁丑日入不即朝庙至明日戊寅乃始谒宗庙而行宗觐之礼

戊寅大夫宗妇觐用币

礼小君至大夫宗妇皆执?以见此同姓大夫行宗觐礼也但其?大夫用羔雁宗妇用枣栗脰修而此通用币以夸耀之然非礼矣时御孙【鲁大夫】谏曰男?大者玉帛【公侯伯子男执玉诸侯世子附庸孤卿执帛】小者禽鸟【卿执羔大夫执雁士执雉】女?不过榛栗枣脰修正谓其用币无礼故也若杜氏谓戊寅朝庙则以小君至後必朝庙而後可行宗觐之礼名之为祖故隐八年传郑忽娶于陈先配後祖则陈鍼子非之郑衆注云先祭祖谓之祖然後同牢而

食谓之配盖妇至朝庙必用牲币以祭告易归妹所云士刲羊无血谓男用特羊即饩告之礼女承筐无实谓女用执笄即荐舍之礼也【谷梁娶讐人之子以荐舍于前谓荐筐而置于前也】然且至日必朝庙次日行事即为非礼今世用朱熹家礼谓成妇三日始可庙见自宋至今通行之则不特不读春秋将并礼记三月庙见之说而尽误之夫彼言三月庙见者谓舅姑已亡必三月而行妇见之礼故又云择日而祭于祢祭祢非祭祖三月非三日舅姑未死不得早行死祭也然则周礼在鲁谁谓春秋非礼书乎

大水

冬戎侵曹曹羁出奔陈赤归于曹【公谷曹字接下郭公二字作曹郭公】此左氏无传者公羊谓曹羁贤大夫谏勿亲敌三谏不从而去之于是曹失国而别有失地之君郭国名赤者无所于归而归于曹曹实无赤也因之名曰赤郭公盖连下郭公作顺文也谷梁于曹羁无传而赤则同之然而曹庄以后曹未亡也至哀公八年而后宋灭曹然则此时之灭何时复国盖漫无稽矣杜氏据经文书法仿郑忽出奔卫突归于郑之文谓羁本曹世子败奔于陈而公子赤为戎所纳是为僖公此颇近理然史记年表皆云僖公名夷不名赤且他无可考若孔疏引贾逵说以为羁是曹君赤是戎之外孙故戎侵曹逐羁而立赤似言赤本曹公子而为戎女所出者此虽与杜说不甚远然亦何据焉

郭公

此系经有脱误本当阙者但管子云齐桓公之郭问郭父老曰郭何故亡曰以其善善而恶恶也公曰若子之言乃贤君也何至于亡曰善善不能用恶恶不能去所以亡也则公字乃亡字之误且齐桓管仲又适与庄公时年事相合因从之此与僖十九年书梁亡例同

二十有五年

春陈侯使女叔来聘

陈侯者陈宣公也女叔陈大夫女氏而叔字者卿可字可名聘义见前此以前十九年我媵妇于陈而陈反来伐未免不安故特聘修好然後我遣季友往答之此实为三十二年季友奔陈所本若谓季友与陈好故来聘则陈来伐时何不好乎

夏五月癸丑卫侯朔卒

六月辛未朔日有食之鼓用牲于社

周制凡日食天子伐鼓于社诸侯则伐鼓于朝而用币于社此伐鼓于社非礼不用币而用牲又非礼故记之若左传谓惟正月之朔慝未作日有食之于是乎伐鼓用币则似此不应鼓币者非也传以为唯夏四月为阳月名曰正月【诗正月繁霜言四月也】此时陰尽于巳而未

经夏至一陰不生则隱慝未作【陰为隱慝】以极盛之阳而为陰所蚀故宜用鼓以伐陰用币以禳慝今但六月耳安得用此不知此虽周六月实夏正月也故曰惟正月谓惟是正月故有此也犹昭十七年日食传所谓此月之朔当夏四月谓之孟夏是也若杜氏云用长历推之错置一闰此月是七月误作六月故左氏疑之则左氏此时未必有长历可推且未有知其误而不为之明正者谬矣至若伐鼓之失祇在于社用币之失又在用牲而谷梁曰鼓礼也用牲非礼也则似伐鼓宜在社者公羊谓鼓于社求陰之道也以朱丝营社或曰胁之则不惟鼓必在社而且不谓用牲为非礼俱非是

尚书胤征乃季秋月朔辰弗集于房此九月日食也然亦曰瞽人进鼓嗇夫驰取币则伐鼓用币不必四月矣要或夏礼如是耳

伯姬归于杞

不书逆者举归以见逆也此与前十一年王姬归于齐例同谷梁谓以来逆者微故不书则周制诸侯必亲迎并无遣卿逆女之礼知其尊与卑当在何等虽左传有诸侯送女大国遣上卿小国遣大夫之例或者逆女所遣亦当如是然亦臆见耳未可执以定赏罚也而胡氏又遵之非误乎

秋大水鼓用牲于社于门

周制凡天灾有币无牲此用牲非礼非日月之眚不鼓此用鼓又非礼故记之但于门无考耳若公羊谓于社礼也于门非礼也则可鼓牲于社矣谷梁又曰既戒鼓而骇衆用牲可以已矣则但可鼓社不可牲社俱非是杜氏曰门国门

鼓所以攻陰故非日食不鼓谷梁谓救日以鼓兵救水以鼓衆则谓救日是攻慝故兼陈兵救水则警衆使用力堤遏而已是大水用鼓亦别有义但不当在社耳若左传谓非日月之眚不鼓其云日月之眚非谓日月之食也谓日为月蚀而作之眚杜氏云月侵日为眚则但指日食而月不与焉谷梁亦云天子救日置五麾陈五兵五鼓诸侯置三麾陈三兵三鼓大夫击门士击柝言充其阳也则月食不当充阳矣惟周礼太仆职凡军旅田役赞王鼓救日月亦如之始有用鼓救月之事今救日月皆伐鼓当始周礼然要是误耳

曾子问诸侯从天子救日各以其方色与其兵此即谷梁陈五兵之说也但天子陈五兵以诸侯在朝不止一方故于日食时则使各衣其方色青赤黄白黑之衣而各执其方之兵【东方用戟南方用矛西方用弩北方用楯中夹用鼓】故用五若诸侯三兵宜何三兵此非可以等级为隆杀也故三传言礼虽各有异同而左氏为正公谷辅之若周礼仪礼则後此者矣且用鼓兼用兵者正谓陰能侵阳欲助天子讨陰慝也若月食用鼓将谁讨乎

冬公子友如陈

报女叔之聘也公子友者即季友庄公之母弟也诸侯之弟例称公子杜氏云史策之通言是也

春秋毛氏传卷十一

卷十二

钦定四库全书

春秋毛氏传卷十二

翰林院检讨毛奇龄撰

二十有六年

春公伐戎

夏公至自伐戎

曹杀其大夫

不知何大夫亦不知何事见杀此与前戎侵曹曹羈出奔陈赤归于曹皆曹事而皆有阙误故左传无文而後人即当以史阙置不论者乃公谷谓曹伯为戎所杀大夫不伏节死义故嗣君即位而借衆诛之书曰曹杀盖嘉其非专杀也则在二十三年曹伯射姑卒明书于经至次年而戎侵曹此时未尝有见杀之君也自此年以後射姑之子即为僖公凡在位九年至三十二年而僖公始没则是射姑父子相继立国焉得别有一曹国父子一杀一立者此岂曹郭公耶

秋公会宋人齐人伐徐

徐即戎也春公伐戎而不服故此会两国大夫伐之费誓淮夷徐戎并兴书序称徐夷并兴以夷即是淮戎即是徐也前凡会戎盟戎俱是以戎该徐者胡氏谓戎与徐必合兵表里非是

冬十有二月癸亥朔日有食之

二十有七年

春公会杞伯姬于洮

杞伯姬庄公女杞成公夫人也是时杞惠公在位成尚未立必以事来会而以未归宁故不入国洮鲁境地左氏谓讯不越境非是

夏六月公会齐侯宋公陈侯郑伯同盟于幽

据传陈郑服也是时陈郑无叛齐之事不当云服故杜氏解之谓二十二年陈乱而齐纳敬仲二十五年即郑文公之四年获成于楚皆有二心于齐故云则郑之不服在前二年郑文公事其云获成于楚一语见文十七年传郑子家与赵宣子书中之文而胡氏以郑之贰齐为前此郑伯指郑厉公言误矣且祇称郑而不及陈亦非是

秋公子友如陈葬原仲

据传如陈葬原仲非礼也原仲季友之旧也杜氏云原仲者陈大夫原氏而仲字者礼臣既卒不名故称字此亦直书其事而义自见者若其称公子友者与称公子庆父同史例如是非褒非贬而胡氏必谓公子是褒以友之越境而不见贬则以王朝大夫亦曾外聘其不贬季友所以深贬王朝也则列国弑君皆可援幽厉之事以邀免矣何免爰雉罹如此

公谷谓季友私行所以避难以是时公子庆父公子牙皆庄公母弟通乎夫人以胁公季子治之不能坐视不可故避之盖预指三十二年弑逆事也但是时二叔弑逆尚未显见至季友酖杀叔牙而後子般之弑兴观其能酖叔牙立叔孙氏则非不能治并不得与国政者公羊说非也且惟季友为庄公母弟故为桓公大宗称宗卿庆父叔牙皆庶弟也若三桓皆母弟则庆父大宗也安得季氏自成季至康子终春秋之世皆宗卿乎

冬杞伯姬来

据传此归宁也凡诸侯之女归宁曰来出曰来归夫人归宁曰如某出曰归于某则此以礼书而胡氏曰不当来故书则前此伯姬归于?亦不当归故书乎礼三月致女则自二十五年六月伯姬归?至此已三年矣未有三年之久而尚不可以归宁者观春时伯姬来洮洮是鲁地而犹不入鲁致庄公往会之则必拘于礼而不敢来而至是始来乃又曰非礼则归宁之礼绝矣陋例有常礼不书一语此不可训他不具论如此二十五年夏六月日食此以鼓于社而用牲为非常礼故书则二十六年冬十二月日食未尝有鼓社用牲之非礼而亦书何也予说春秋一扫恶例非故屏之以为其说不验也通人当自解耳孔疏云出者谓犯七出而见绝者宣十六年郑伯姬来归是也若鲁之夫人无被出者文十八年夫人姜氏归于齐此非出而亦书归于某者以子死故去归而不反亦出之类故与出文并同

莒庆来逆叔姬

此以庄公之女而妻于莒大夫者其书来逆礼也礼惟天子不亲迎自诸侯大夫以至士庶无不亲迎者大夫不越境谓私交耳公羊谓不越境逆女非也若周礼天子嫁女于诸侯使同姓诸侯主之诸侯嫁女于大夫使同姓大夫主之其不书大夫主者此是略文其例与十一年王姬归于齐不书庄公为主正同而谷梁胡氏又以无大夫主非之则王姬归齐岂庄公未尝为主而得以书之鲁史之策乎总是以非常礼故书一例必求一非礼之事以诬之春秋真诬史矣至不称逆女但称叔姬者杜氏云卿为君逆称女自逆称女字亦是礼例

伯来朝

夏后氏後本公爵而称伯者杜氏云为时王所黜故也

公会齐侯于城濮

此谋讨卫也先是十九年传庄王嬖子子颓有宠及惠王即位莒国边伯詹父子禽祝跪五大夫及士石速奉子颓伐王不克出奔温苏氏奉子颓奔卫卫师燕师伐周立子颓其明年郑厉公执燕仲父而奉王以归居于栎王与郑伯遂入成周取其宝器而还是时子颓享五大夫乐及徧舞郑伯乃见虢叔谋纳王又明年二十一年郑伯将王自圉门入虢叔自北门入杀王子颓及五大夫乱定而郑厉公卒是此王室大乱天王蒙尘者已及三年而齐桓兴伯并未能勤王讨叛出一旅之师旁观袖手洋洋不理然且伐戎伐我兵戈四出伯主安在此固罪大恶极不止撻牵讨伐为三王罪人已也至是年之冬王乃使召伯廖锡齐侯命命为二伯作九州之长且请伐卫以其立子颓而伐王故也桓然後作城濮之会而要公以谋之二伯当如是乎此亦书其事而义有在者若郑厉公事不经赴告不见于春秋故无从褒美而祇于忽突争国时历称郑伯以微示其意此亦春秋崇尚盖愆之一节也读春秋者能实体其事而无为浮说所惑则几矣城濮卫地名

二十有八年

春王正月甲寅齐人伐卫卫人及齐人战卫人败绩【一本卫人下另作一节】

此齐桓奉王命讨卫而书齐人者桓虽在军而令大夫之无名者帅师则照例书人以奉命不尊也卫亦以大夫御齐而不知其名则亦照例书人所谓卿大夫帅师而不记其名与氏则书人也【说见隐元年】若传称齐桓数之以王命取赂而还此是实事而说左氏者遂谓讳取赂故称人则襄十一年晋侯伐郑受郑之赂告于诸侯曾不之讳而此讳之乎若公羊谓卫未有罪此误认上年同盟于幽中无卫侯因以卫侯不至为罪责故伐卫此驴头马嘴全然不知事实者若其谓春秋书例伐人者为客被伐者为主故书卫人及齐人则考之诸经皆然孔疏所云令狐河曲大棘彭衙长岸泓韩之属皆以主及客此是书例而胡氏以书卫及为贬卫则卫抗王命公然出战已属大罪何必借此字以贬之谬矣祇经文于此不书奉命且齐卫皆称人两相颉颃似乎重以齐桓为不足者据传王锡桓命时谥及伐卫未有成命则自不宜书奉命若卫之立子颓以伐王在庄十九年本卫惠公事今之卫侯乃卫惠之子懿公也自十九年至今二十八年十年之间伯主安在至长鲸已逝元恶考终而始以何有之师移及子姓万一桓数卫罪时卫人答曰先君之过君其问诸地下将若之何故此有文焉不止义也

夏四月丁未邾子琐卒【公羊作邾娄子】

秋荆伐郑公会齐人宋人救郑【谷梁公会下另作一节公羊宋人下有邾娄人三字】

据传楚令尹子元欲蛊文夫人【楚文王夫人息妫也】为馆于其宫侧而振万焉【万舞】夫人泣曰先君以是舞也习戎备也今令尹不寻诸仇雠而于未亡人之侧不亦异乎子元闻之曰妇人不忘袞雠我反忘之遂以车六百乘伐郑入自纯门及逵市县门不发楚言而出【郑人效楚言以示整暇】子元曰郑有人焉诸侯救郑楚师夜遁此公与齐宋俱无贬辞称人见前

冬筑郿【公谷作微 谷梁注左传作麋今左亦作郿】

筑者城也是年大无麦禾而城筑者必有所备也此与襄十九年筑西郭例同郿鲁邑名据传凡邑有宗庙先君之主曰都无曰邑邑曰筑都曰城盖都有大小隐元年传大都不过三国之一中五之一小九之一则都原分三等小即邑也邑而有都称者必其地有先君之庙然後称都但先君之庙世俱不解以为庙在朝左岂有下邑立宗庙者于是无学者妄疑是国之旧都与前代诸国所为都地如颍氏谓城漆以漆有邾之旧庙故称城类夫他国废庙今未必存且亦何得称先君之庙若春秋列国皆无迁徙惟卫自懿公後由朝歌迁睢阳楚自文王後由丹阳迁郢他未尝迁也况迁都则必迁庙未有都既迁而留庙与主在其地者然则何先君之庙曰此宗邑庙也国凡易一君则其君之弟立为大宗必祭所自出立一先君之庙于其邑谓之宗邑亦谓之宗庙凡一宗必有一庙如郑友立厉王庙季氏立桓公庙类此是必有者自後儒昧其制反以立庙为非礼如曰公庙之设于私家由三桓始而于是春秋之礼意亡矣予尝释大小宗备考其制已有成说而注左传者仍不能解故复着此善学者自知之耳

大无麦禾

麦熟于夏禾成在秋书于冬者杜氏云计食不足而後书也其不言饥者正义云以下文告余故不饥也

臧孙辰告余于齐

传云告余礼也又鲁语云鲁饥臧文仲请如齐告余或以自请为难文仲曰贤者急病而让夷居官者当事不避难在位者恤民之患遂以鬯圭与玉磬往且辞命亦甚善于是齐人归其玉而予之余则此亦无可讥者若公谷谓一年饥不当告余盖国无九年之畜曰不足无六年之畜曰急无三年之畜曰国非其国也未有一年即告余者其说固是然夫子书法如造物然随时予夺恐未必全以盛王之礼绳叔世也况此书亦无贬例也臧孙辰字文仲鲁大夫臧僖伯曾孙

二十有九年

春新延廐【公谷作□】

廐者马舍也延廐名新则修旧之词传云凡马日中出入【春分出马秋分入马】然後修廐

今周正春秋有至无分【改时月不改分至故至在春秋分在夏冬】日中未及安所用修则不时而已按周礼校人马四匹曰乘四乘曰皂三皂曰系六系曰廐六廐曰校校分左右是一校得良马千二百九十六匹而分左右则倍之又一良马备三驾马则又三倍之而总名之曰廐天子十二闲以六校分左右而倍之也诸侯六闲良马三闲驾马三闲也卿大夫四闲则良马一闲驾马三闲也凡此皆养之官者谓之国马若田赋之马则提封万乘马四万匹提封千乘马四千匹国马为车路之需兼备不虞如郑子国为盗所杀子产以车十七乘出讨贼类此不及赋之民间者若田赋之马则民养之而临期赋以为兵事之用各不同

夏郑人侵许

传例凡师有钟鼓曰伐无曰侵轻曰袭

秋有蜚

蜚负虱也蝗属即诗所称草虫者通志云以其能害稼故春秋书之是也若公羊说谓臭恶虫南越盛暑所生则今所称臭虫者然不为灾矣左氏于此传特曰凡物不为灾不书据此则益信前秋有 为有蟹之误而公谷妄释之也又蜚是兽名见山海经与此又不同

冬十有二月纪叔姬卒

叔姬者伯姬之媵也初书归纪继书归鄫此又书卒岂贤姬哉亦曰伤纪耳盖自叔姬卒而纪与我绝矣

城诸及防

诸防皆鲁邑传云凡土功龙见而毕务戒事也言龙星角亢晨见东方则农务毕而可戒土功此夏九月也火见而致用水昏正而栽言大火心星次角亢见则可备材木定星营室昏见正中则可栽板筑此夏十月也日至而毕言冬日南至则农务将兴而土功可已此夏十一月也今周十二月城邑正当夏十月则及时矣盖城为保障不固则败不修则坏此每岁当筑者故无讥焉

三十年

春王正月

夏师次于成【左传无师字】

以大夫帅师而无名则但称师与他国称人例同是时齐师将降鄆我将救之故师次于成而止而不前谷梁所谓欲救鄆而未能是也然则鲁弱可知矣

秋七月齐人降鄣

降者胁之使附也不言鄣降于齐而曰降鄣者我有以降之也此书法也然则桓恶可知矣鄣附庸国名

八月癸亥葬纪叔姬

书葬者以我遣大夫会姬葬也其无諡者以媵故且无子也据此则前纪叔姬卒公羊说谓纪未灭时纪侯曾立叔姬为夫人谬矣

九月庚午朔日有食之鼓用牲于社

非礼也说见前二十五年传

冬公及齐侯遇于鲁济

山戎为燕病齐桓谋伐之故来会鲁济者鲁之济也济界于齐鲁其在齐界者为齐济在鲁界者为鲁济

齐人伐山戎

山戎北狄与燕国近而阻燕职贡之入齐伐之宜也其称人者以桓不亲往遣大夫帅师所谓悬车束马以伐之者凡书事有例胡氏既谓书人必将卑师少而此又谓贬桓既谓春秋皆尊周攘夷而此又以攘夷为桓罪则无所适从矣燕齐接壤而山戎界于其间不必甚远若谓远即不伐则禹征三苗王季伐西落岂俱在肘腋间乎

三十有一年

春筑台于郎

筑台刺奢而又非其时故备书以见非义後仿此

夏四月薛伯卒

说见前

筑台于薛

此薛鲁地

六月齐侯来献戎捷

献捷者献俘获也伐不亲往而亲来献捷夸我也传曰凡诸侯有四夷之功则献于王王以警于夷中国则否诸侯不相遗俘

秋筑台于秦

秦鲁地

冬不雨

三十有二年

春城小谷

传称城小谷为管仲也杜氏谓公感齐桓之德故为管仲城私邑其但称小谷不称齐者凡大都自以名通即不系国以其名为世共识也如吴灭州来晋灭下阳类谷梁注鲁邑谬矣小谷齐邑即济北谷城今东阿县地国策称齐王烹阿大夫可验

夏宋公齐侯遇于梁丘

据传齐侯为楚伐郑之故【在二十八年】请会诸侯谋报之时宋公请先见故首宋公梁丘据谷梁在曹邾之间

秋七月癸巳公子牙卒

据传庄公未娶哀姜时曾筑台而临党氏党氏者鲁大夫也见党氏女孟任美公欲从之而闕不得从乃以夫人言许之遂割臂而与公盟生子般焉及娶哀姜无子公欲立子般而未敢定至是公病问後于公子牙即叔牙庄公之庶弟公子庆父同母弟也时牙与庆父同淫于哀姜思重抑孟任遂曰庆父材言庆父可立也又问季友友者公同母弟也对曰臣以死奉般公曰向者牙曰庆父材季友乃假公命使牙待于鍼巫氏【鍼巫即钟巫钟鍼转音】使鍼季酖之曰饮此则有後于鲁国不然死且无後饮之归及逵泉而卒于是立叔孙氏为牙後则是叔牙以酖死而书曰卒者以罪不即着而既为立後并不以诛告故也

叔牙即僖叔为庆父同母弟左传谷梁注皆然惟公羊谓牙与庆父皆公同母弟则季友幼弟岂得作大宗称宗卿且得专置二兄于死地而不之顾乎予前于季友如陈传已略辨之特此传复有谓牙本母弟其不称弟系夫子所削则范甯曾驳云传例诸侯之尊弟兄不得以属通盖以礼诸侯絶葦而臣诸父昆弟若称弟是申其私亲也宣十七年公弟叔肸卒此以贤叔肸而破例称弟反谓称弟是常例某所未详徐仲山日记每以季友酖叔牙为过急而胡氏极颂

之谓周厚本支而庸且仲黜蔡鲜义皆在此不无失实予尝谓此事赖公羊解之曰君亲无将将而诛焉其义遂定且公羊复有俄而弑械成语则或牙有弑之形而友始杀之左传略之也盖危疑之际不嫌急决友既以宗卿与闻国政而二公子之乱又事连宫闱苟非骤起制之则鲜有不蔓衍成势者故先诛叔牙以翦其羽而後庆父继乱可反掌定之此虽季友专决然亦见季之能善于勘乱故叔牙之酖先已诛贼则子般可不言弑闵公之薨既已讨贼则庆父之缢并可不必言卒此皆夫子书法一讳国恶而一即为季子讳使之无所歉于兄弟骨肉之间所谓隐而断刻而能全以其决也然则季子此事竟以周公诛管蔡当之则未必然然春秋则未尝不予之矣独子般之立尚可疑者当时既娶孟任又娶哀姜然姜自为嫡则般系诸子非世子也且诸子有长者僖公是也又有少长者闵公是也按周制立子之法隐元年公羊注曰礼适夫人无子立右媵右媵无子立左媵左媵无子立适侄娣适侄娣无子立右媵侄娣右媵侄娣无子立左媵侄娣质家亲亲先立娣文家尊尊先立侄此立法之最明确者盖立子先後视母贵贱春秋诸侯一娶九女则一适二媵各有侄娣合之为九故先适後媵先媵後侄娣次第秩然今闵公者少姜之子哀姜之娣所生也僖公者成风之子先娶之媵所生也母论僖公长而般闵少年齿不伦即以母言之哀姜无子则孟任成风皆当是媵少姜则侄娣也立法先媵则当先僖而後般以成风先孟任也次及侄娣亦当先僖般而後闵以少姜侄娣也今以般为世子而又使闵先于僖不无贸乱予尝谓桓公是嫡隐公是庶以嫡可再娶仲子者再娶之嫡也【说见桓元年八年传】然而不通春秋如胡氏尚犹诟之谓仲子非嫡桓公非世子是谓三纲沦九法斁岂有哀姜嫡妃俨然未死僖当长庶不减隐公而季友奉子般杀二兄而春秋史官列国诸大夫以及夫子论定无异辞者故予以为桓是适般亦是适此非春秋之礼而周之礼也盖礼有始娶有再娶再娶予前已言之矣【见前十九年传】若始娶则隐元年传杜氏云元妃始适夫人也正义曰始者长也有始而非适孟任是也有适而非始哀姜是也而予则谓孟任亦适而非始其始而非适者成风也庄公始娶成风为媵生僖公矣然後见孟任而悦之娶为夫人则孟任适也非始也至二十四年因求好齐桓再娶齐女于是抑孟任而尊姜氏意当时礼法必又以氏族贵贱仪币隆杀分正次者故哀姜无子则宗卿终以孟任夫人原有适名遂毅然正名而立子般此固春秋所行与周礼相合者是以不立僖而立般以般适而僖媵也且立般而并不立闵以孟任虽降而不失为媵少姜虽适而止于侄娣侄娣不先媵也若闵之先僖则齐人立闵非友之意故友挟僖以奔陈而後乃立之然即以立法论既抑孟任为次妃成风不与孟任齿势必降等为次妃侄娣而少姜适侄娣宜先于二媵侄娣此又立法之不大远者世无周礼而诸大夫之至鲁者皆曰鲁秉周礼此非周礼之饬羊也乎若媵可始娶则僖公成公皆然按成公为宣公子宣元年始娶穆姜此见于经者然而宣二年宣公之孙成公之子衡即已为质于楚则宣未娶时不特成公已长即成公之子已可为质必在成童以後明矣此则谁氏所生者然则人君有元妃次妃下妃而皆可再娶亦皆可始娶晋平公娶少姜则再娶媵鲁庄宣娶僖成之母则先娶媵有始适即有始庶特其礼久亡不能备考耳

八月癸亥公薨于路寝

路寝正寝也

冬十月己未子般卒

子者太子般其名也【见前传】其称卒以未成君也不言弑者讳国恶也礼君在称子君薨即位称公此称子亦以未成君之故此与後子卒子野卒例并同释例谓未葬称子此系在丧所称若踰年则虽在丧亦称公如文公成公皆先公未葬而经皆书公即位可验也若公羊谓既葬亦称子踰年称公则又一例矣据传庄公生子般及女公子以雩祭肆礼于梁氏而般与女弟观焉圉人荦者自墙外以慢言戏女公子子般怒使鞭荦公曰不如杀之是人有力能投身而盖于稷门之上至是公薨般已即位于党氏冬十月共仲【即庆父】使圉人荦就党氏贼【即杀】之成季【即季友諡】奔陈立闵公

公子庆父如齐

此共仲畏罪而出奔者时季子奔陈共仲恐季袭已而已又无备因以姜氏故适齐求援此情事之了然者胡氏向于庆父帅师伐於余丘时发一大议谓权奸篡弑未有不掌兵柄者至是不验乃又谓出入自如皆由其主兵自恣之故遂曲引康王之诰干戈虎贲扈蹕器仗认作军伍责庆父擅兵夫庆父未尝以兵迎立闵也又未尝拥兵而逃也至闵公见弑庆父又奔莒则益穷窜之极旋且伏法而胡氏又谓庆父巨奸以七百里侯国革车千乘执三十年兵柄又复引汉故事谓丞相太尉先夺兵柄庆父根深自难猝制夫春秋出兵田赋徵而後用何曾有南北军府兵厢兵使外戚诸王掌之而一说不已又护一说曾不思杀叔牙使鍼季一人酖之缢庆父祇奚斯一人促之共仲出入未尝弄一兵季友行诛未尝袒一士也论事须以实季友再奔邾特以哀姜内主须少避耳及季自邾返而姜与庆父且抱头并窜矣儒者解经何可言不以实而洵口诞谩若此

狄伐邢

邢小国名

春秋毛氏传卷十二

<经部,春秋类,春秋毛氏传>

卷十三

钦定四库全书

春秋毛氏传卷十三

翰林院检讨毛奇龄撰

闵公【公名啓史世家名开避景帝讳也庄公子母叔姜諡法在国逢难曰闵】

元年

春王正月

不书即位者以继弑而不忍行即位之礼宜也说见隐元年

齐人救邢

狄伐邢在上年冬齐桓用管仲之言故救之谷梁曰善救邢是也书人者以大夫帅师也

夏六月辛酉葬我君庄公

十一月始葬者传曰乱故是以缓也

秋八月公及齐侯盟于落姑【落公谷作洛】

此时庆父在齐季友在陈季欲归鲁定乱而虑齐桓之以姜故助庆父也故先乞公盟齐桓而後来归此皆成季之谋所豫定者不然是时姜在宫闵方九岁国无重臣焉能遇事果断越国而会强大如此落姑齐地名

季子来归

大夫公子例称名字然亦有称子者【男子通称】其在大夫与下二年齐高子来盟例同其在公子与宣十年天王使王季子来聘例同【王季子即刘康公也此时并无褒例可验】

冬齐仲孙来

此因公有落姑之盟而齐使大夫来省难者也据传仲孙名湫此不书名字而书仲孙以史例原有书某氏子某氏孙一例【仲孙齐公子仲氏之孙】此与隐三年武氏子来求赙文十五年宋华孙来盟并同

齐桓问仲孙曰鲁可取乎曰不可犹秉周礼周礼所以本也又曰鲁不弃周礼未可动也然则周礼尽在鲁非一人言矣

二年

春王正月齐人迁阳

阳国名杜氏云齐人逼迁之

夏五月乙酉吉禘于庄公

吉禘者丧毕即吉所以致新主祧远主合食太祖而审谛昭穆之祭也本谓之祫祭然以合食言则谓之祫而以谛亲言则谓之禘盖天子七庙自祧祖曾高而上复有高祖之父高祖之祖二庙祭法称为二祧以昭穆之祧从此二庙始也其所祧之主则另有迁庙藏之曾子问所谓七庙无虚主别有迁庙主可备出载是也诸侯五庙亦然故先君新主将入祧庙则必祧昭于上而后可祔穆于下因之合六庙之主升食太祖以审谛所亲谓之吉禘但丧毕即吉必在二十五月之後【二期祫一月】今庄公以三十二年八月薨至此年五月止二十二月故传以速讥之杜氏以于庄公谓别立庄庙此袭公羊无据之言而胡氏谓禘是禘所自出则误以五年之禘为丧毕之禘又谓四时之禘为礼文错失则又误以祫禘之禘乱吉禘之禘殊不知禘名有三母容濶也且周礼散亡三礼皆後起之书不足深据乃陋儒无学反有执三礼以绳春秋者如鲁有吉禘明是周礼胡氏必强引礼运孔子曰鲁之郊禘非礼也一语遂谓鲁不宜禘又引祭统云成王以周公为有勋劳于天下赐鲁重祭似乎鲁之有禘因赐而得之则襄十六年传晋人答穆叔有云以寡人之未禘祀谓晋悼初薨斯时尚未吉禘也是晋亦有禘孔子身作春秋未闻曰晋之有禘非礼也何与是岂唐叔封晋亦有勋劳成王曾赐之与周末儒者窃引夫子及游夏之徒杂说成礼原有茫然不经读春秋者胡氏既传春秋则当通春秋全经全传而备观之而亦茫然不一读何也若云禘所自出惟王者有之故又曰不王不禘则下文不又曰宗其继别子之所自出百世不迁乎王者禘所自出而祭帝尝宗国亦禘所自出而祭文王故公山弗狃以鲁为宗国而襄公哭吴子寿梦于出王之庙出王文王也则即五年之禘鲁所应有礼也宗法也非成王赐之而周公始受之也故禘礼有三禘所自出则惟王有之鲁亦有之吉禘祫禘则不惟鲁有之凡列国诸侯皆有之此核之春秋旁证之三传及论语诸书而皦然者【详见予论语稽求篇大小宗通绎二书】故曰周礼尽在鲁此周礼也

秋八月辛丑公薨

据传初公傅夺卜齮田公不禁至是共仲使卜齮贼公于武闾【闾宫门之小者武者右也】

其不书弑者讳国恶也薨不以地弑也说见隐十一年

九月夫人姜氏孙于邾【公羊作邾娄】

范氏云哀姜与弑闵公故出奔孙者避也此与庄元年夫人孙于齐例同

公子庆父出奔莒

武闾之弑共仲谋篡也乃以与弑之哀姜而先奔于邾图外应也季即奉僖公以适邾【传成季以僖公适邾共仲奔莒乃入立之】骤扼其去路而制其所应则共仲之势于斯尽矣盖共仲所恃者姜姜所恃者齐也前此子般之弑庆父奔齐及季子使闵公盟齐而齐来省难则姜与庆父俱不敢复至齐国而大援遂绝此皆成季之豫为谋者至是共仲奔莒原属鼠窜故请归而使之自缢【传季以赂求共仲于莒莒人归之及密共仲使公子鱼请勿杀季不许公子鱼哭而往共仲闻之曰奚斯之声也遂缢奚斯鱼字】则讨贼之速莫此为甚而胡氏又以缓而失贼为庆父拥兵之鉴则梦呓中矣若落姑之盟诸传皆不得要领不知仲孙省难高子来盟诛哀姜而定鲁乱皆本诸此此按之经文而自见者其不书杀庆父并庆父卒亦是文例说见前公子牙卒传

冬齐高子来盟

高子齐大夫高傒也来盟者平鲁乱也其称子是书例与前年季子来归宣十年王季子来聘并同

十有二月狄入卫

传狄伐卫卫懿公【惠公子宣公孙也】好鹤鹤有乘轩者将战国人受甲者皆曰使鹤鹤实有禄位余焉能战遂败绩狄乃从入卫卫国不守先是宣公杀子汲而立惠公卫国不伏曾逐惠公而立子汲之母弟黔牟凡八年而惠公复入至是懿公死国人仍恶惠公朔之杀子汲而复立子汲母弟昭伯之子申为戴公庐于漕盖汲与黔牟昭伯皆同母弟而戴公文公宋桓夫人许穆夫人皆昭伯所生子【此据史世家与传不同】故戴公渡河宋桓公逆而济之许穆夫人赋载驰诗于是齐桓使公子无亏帅车三百乘甲士三千人戍漕且归公乘马祭服畜产门材归夫人轩车重锦诸物既而戴公卒文公立大布之衣大帛之冠务材训农通商惠工敬教劝学授方任能元年革车三十乘季年乃三百乘

郑弃其师

传郑人恶高克使帅师次于河上而弗召师溃而归高克奔陈郑人为之赋清人【清人郑诗名诗序云刺文公退臣不以道为危国亡师之本】

春秋毛氏传卷十三

卷十四

钦定四库全书

春秋毛氏传卷十四

翰林院检讨毛奇龄撰

僖公【公名申庄公子闵公庶兄也母成风諡法小心的忌曰僖】

元年

春王正月【不书即位说见前】

齐师宋师曹师次于聂北救邢【曹师左传作曹伯误】

此狄又伐邢而齐统诸侯以救邢之师也师虽衆而大夫帅师君不亲将故称国焉此是书例谷梁见左传经文有曹伯字而不知其误遂谓曹小国不宜称师称师则必君在师中矣夫君在师中当称曹伯其所以不称伯者以春秋欲贬桓桓不侯则曹亦不伯也其所以贬桓者以其救邢而先次聂北则缓不及事救非所救也此则拘曲揉直之已甚者揆其故皆以经文有曹伯二字误之然且不会全经不考本末此一救邢尚疑为庄三十二年冬狄伐邢之事则距此救时已三年矣公谷二传遂奋然曰邢亡曰灭邢曰封邢曰邢复见竟忘前此伐邢已有闵元年齐人救邢之经獬犬狂吠可笑已极全不思邢未尝灭其但书再救而不书再伐者以邢不来告再伐故也若其先次而後救者正以救之之速狄尚在国内杂然相持是必次师其地略覘动静而然後邢人知所向往立散其衆而奔诸侯之师于是玉石分明师遂迸力逐狄狄弃邢而逃乃得收狄所俘之器物而迁邢而还之故传曰诸侯救邢邢人溃【散也】师遂逐狄人具邢器用而迁之师无私焉此与襄二十三年叔孙豹帅师救晋次于雍榆有同例者胡氏吠声又谓先次後救讥救之缓夫公羊所谓缓不及事者谓邢亡也今邢亡否也所谓不及事者谓狄去而救始至事不相及也今事不相及否也然且曲为之例以杜人之口曰齐桓伐楚次于陞与其慎也此则讥其缓夫伐师可以缓而救师必不可以慎此何说耶聂北邢地名

夏六月邢迁于夷仪【公羊作陈仪】

此齐迁邢如邢自迁者传曰邢迁如归

齐师宋师曹师城邢

【远宗曰谷梁以前救邢称曹师为贬桓此又曰美桓何也岂曹原可称师乎】

秋七月戊辰夫人姜氏薨于夷齐人以归

闵二年传哀姜孙于邾齐人取而杀之于夷以其尸归僖公请而葬之据此则哀姜在邾齐桓以伯主行诛乱之典不讳亲恶故取姜至夷而杀之夷者齐地也既杀于夷竟以尸归齐谓义当与鲁絶不当还鲁僖公不忍谓子无絶母之义请尸还葬夫然後桓公许之而姜氏丧归杜氏云齐侯既杀哀姜以其屍归絶之于鲁而僖请丧还则此书以归者归于齐非归于鲁也公谷不善解经谓为归鲁而胡氏又遵之然则十有二月夫人氏之丧至自齐岂七月已归十二月又归耶岂七月已归鲁十二月反至自齐耶夫传春秋者当读春秋予尝谓公谷胡氏全然不读春秋者春秋有本经有前後经传七月之经而不知有十二月此不读本经者也乃经有前後可以比例如经书以归不一皆是归其国非归他国者隐七年戎伐凡伯于楚丘以归是归戎也昭十三年晋人执季孙意如以归是归晋也蔡灭沈以沈子嘉归是归于蔡郑灭许以许男斯归是归于郑若来归我则必如庄六年齐人来归卫俘归之他国则必如成八年晋侯使来言汶阳之田归之于齐以明明有例之书法而全不一解传春秋谓何

楚人伐郑

前此皆称荆此春秋书楚之始也其伐郑者传曰郑即齐故也即者就也

八月公会齐侯宋公郑伯曹伯邾人于柎【公羊邾作邾娄柎作朐】传盟于牟谋救郑也牟即柎宋地

九月公败邾师于偃【公羊邾作邾娄偃作纓】

传公败邾师于偃虚丘之戍将归者也虚丘之戍无解服?云虚丘鲁邑鲁有乱邾遣兵戍虚丘鲁与邾无怨因其将还要而败之所以恶僖公也夫僖公与季友同奔于邾邾方为之主则德之不暇况虚丘为鲁戍而归而败之则狗豕豺狼不若矣且前一月方同盟于柎而可遽为痾噬乎若公羊谓怨邾以夫人与齐为母复讎则齐召姜氏邾安能禁齐杀姜氏与邾何涉公不讎齐而讎邾是恶杀而责刃也故杜氏谓邾还姜氏後因戍虚丘思以侵鲁及僖以姜氏请齐齐将归姜邾人始撤其戍去而鲁乃要而败之虽似近理然亦何据焉况偃属邾地则与戍鲁要败情事不合凡此者概当以阙疑置之可耳

冬十月壬午公子友帅师败莒师于郚获莒挐【郚公作犁谷作丽】

传莒人来求赂【以还庆父也】季友败诸郚郚鲁地则莒师至鲁矣夫赂可也求赂不可也况以师求赂乎挐莒子弟名

谷梁公子谓莒挐曰吾二人不相悦士卒何罪屏左右而相搏公子处下左右曰孟劳孟劳者

鲁之宝刀也公子遂取而杀之称获者恶其给也夫经明书败其师获其人而以搏杀乎考书例搏杀与战杀称获不同

十有二月丁巳夫人氏之丧至自齐

丧自齐来以姜屍在齐也其得来自齐以公曾请之也礼丧至必告庙此以告故书则礼也而文亦寓焉【丧至不再告则前以归非归鲁更可知矣】若氏无姜字明系阙文既已讳恶则例无可贬必欲有贬则不去夫人字而单去姜字不可也况书薨书葬夫人小君称谓历然夫葬将祔庙小君之主将入称室彼时尚不贬而独于告庙时一贬之世无此理若公羊谓丧至最重则夫人之丧至自他国事当极变变礼何重轻也

二年

春王正月城楚丘

楚丘卫邑也此与前城邢例同然彼言城邢此不言城卫者以邢迁夷仪而齐所城者则即其所迁之地所谓迁而後城者也其所城即邢也今卫迁于漕而齐所城者乃在别邑之楚丘则是城而後迁者也其所城时非卫也故曰迁有先後城则一焉胡氏不解迁与不迁之说妄谓邢未灭故迁卫灭故不迁未灭可封灭即不可封【未灭诸侯可相恤灭则须天王封之】因此定封邢封卫之褒贬则又大梦矣邢与卫同被狄伐同一徙都又同一封国而城邢则美救患城楚丘则刺擅权亦思其一灭一不灭何所分别何所徵验胡所信从者惟此公谷前师次聂北时公谷谓邢灭因救援而胡亦遂以次师为缓救罪今又未灭耶然则何以定辞也

夏五月辛巳葬我小君哀姜

虞师晋师灭下阳【下公谷作夏】

传晋荀息请以屈产之乘与垂棘之璧假道于虞以伐虢公曰宫之奇存焉对曰宫之奇懦而不能强谏虽谏将不听乃使荀息假道于虞虞公许之宫之奇谏不听遂起师晋里克荀息会虞师伐虢灭下阳【虢名】先书虞贿故也【时虞请先导故先虞然传以文例言】

按此晋师为晋献公公不亲将故称师虞公者太王次子仲雍之後武王克商封于虞史记名周北虞公是也虢公王季子虢仲之後名虢公丑国语虢公梦神执钺传帝命曰使晋袭于尔门公不戒至是晋果至後六年虢亡

秋九月齐侯宋公江人黄人盟于贯【公羊作贯泽宋地】

江黄楚与国来盟则楚党离矣人者其大夫也

冬十月不雨

楚人侵郑

三年

春王正月不雨夏四月不雨

杜氏云一时不雨必书首月故此连上冬十月春正月夏四月而统记之至下六月然後雨则已二百四十日不雨矣第传谓不曰旱不为灾也史之书此但以记异而谷梁谓君有志于民则书之夫史记灾祥岂以君意为详略乎

徐人取舒【徐舒小国名徐在下邳僮县舒在庐江舒县】

六月雨

秋齐侯宋公江人黄人会于阳谷【阳谷齐地】

传谋伐楚也公羊桓公曰无障谷【即孟子无曲防】无储粟【即无】

【遏籴】无易树子无以妾为妻

冬公子友如齐涖盟【公子友谷作公子季友涖公谷作莅】

传齐侯为阳谷之会来寻盟故季友如齐涖盟公羊曰来盟来盟乎我也涖盟往盟乎彼也

楚人伐郑

传楚人伐郑郑伯欲成孔叔不可曰齐方勤我弃德不祥乃止

四年

春王正月公会齐侯宋公陈侯卫侯郑伯许男曹伯侵蔡蔡溃遂伐楚次于陉

传齐侯以诸侯之师侵蔡蔡溃先是齐侯与蔡姬乘舟于圉荡公公惧变色禁之不可公怒归之未絶之也而蔡人嫁之至是以蔡与楚近先侵蔡而後伐楚遂者继事之词也楚子使与师言曰不虞君之涉吾地也管仲对曰昔召康公命我先君太公曰五侯九伯汝实征之尔贡包茅不入王祭不供无以缩酒【尚书包匭菁茅为祭时滤酒之用】寡人是徵昭王南征而不复寡人是问对曰贡之不入寡君之罪也敢不共给昭王之不复君其问诸水滨

楚于僖立三年三书伐郑齐桓会桎盟贯俱未有以救之则此时进兵当直责其伐郑之罪而反叛援往事与丁零盗苏武牛羊并案何异此理绌语遁词令之最不善者然而无讥者伐楚故也若胡氏谓当请天讨不宜专伐则欲以惠王之庸弱而使之行令势必不能且讨罪救患诸侯本事谁谓齐桓不当救郑患讨楚罪者春秋无义战彼善有之此彼善者也

夏许男新臣卒

此随齐伐楚而死于师者男其爵新臣其名也【说见前】若其但书卒而不书卒于师者史文有详略无义例也胡氏袭刘敞之说谓必归许而死于其国故不书卒于师则召陵之盟尚在卒後此时诸侯未散也故後屈完盟诸侯有云师次召陵齐侯陈诸侯之师与屈完观之然後完与诸侯盟而谓许男先归乎且胡氏不读葬许穆公传乎

楚屈完来盟于师盟于召陵

屈完楚大夫来盟者楚使之来也其可不言使者书例如此此与庄十四年单伯会伐宋二十三年祭叔来聘闵元年齐仲孙来二年齐高子来盟并同诸说谓尊完又谓尊桓又谓完有权皆不读春秋者矣特传称楚子使屈完如师师退次于召陵屈完乃及诸侯盟则祇此一盟而经称盟师又称盟召陵则似实有两盟者传文或略之也

齐人执陈轅涛涂【轅公谷作袁】

轅涛涂陈大夫据传轅涛涂恐师还经陈郑间必费供应给齐桓观兵东夷由郟莒徐夏而循海以归申侯告不便齐遂执涛涂命我公会江黄伐之传谓之讨不忠是也

秋及江人黄人伐陈

及者公及也伐陈说见前

八月公至自伐楚

此告至于庙故书但公伐楚後又伐陈此祇告伐楚者以公出时祇以伐楚告故也其例与後六年公伐郑又救许祇书公至自伐郑正同公羊疑伐陈後楚叛盟而公再伐故书伐楚此属梦梦而谷梁又妄自立例谓有二事偶则以後事致若後事小则以先事致此不致伐陈而致伐楚者大伐楚也此皆由不识公至告庙之礼以致有此然且六年伐郑谷梁胡氏皆与救许较大小夫救许不小于伐楚矣说见桓三年公至自唐传

葬许穆公【穆公羊作繆】

传许穆公卒于师葬之以侯礼也凡诸侯薨于朝会加一等【诸侯命有三等公上等侯伯中

等子男下等】死王事加二等於是有所以褒歛【公服】

冬十有二月公孙兹帅师会齐人宋人卫人郑人许人曹人侵陈【兹公羊作慈】

传叔孙戴伯【兹諡戴伯即叔牙子】会诸侯之师侵陈陈成归辕涛涂【以陈服罪而归之】

五年

春晋侯杀其世子申生

初晋献公娶于齐曰齐姜生太子申生及秦穆夫人而死【传称烝于齐姜生太子则齐姜武公妾其所生安得称太子乎若史世家谓娶齐桓之女则桓方兴伯安能不一顾所出如此】又娶戎二女大戎生重耳小戎生夷吾及伐骊戎得骊姬生夷齐其娣生卓子则嬖之甚姬欲立其子乃赂外嬖梁五与东关嬖五【嬖在外名梁五在东关名东关五晋人称二五耦】谓曲沃宗邑先君庙所在蒲边秦屈边翟当令太子居曲沃重耳居蒲夷吾居屈以镇之而夷齐卓子遂得擅有君国焉既而献公作二军自将上军太子将下军以伐霍伐魏伐耿皆灭之遂为太子城曲沃而赐赵夙耿赐毕万魏以为之大夫乃复使太子伐东山胜之还自稷桑姬乃谓公曰太子势成欲图君矣复谓太子曰君梦齐姜必速祭祭归肉于公姬寘毒而献之覆酒于地地坟与犬脯犬毙与小臣小臣亦毙乃泣曰太子忍哉君老旦暮耳曾不能待而欲弑之公杀太子傅杜原款太子奔新城自经死姬曰二公子皆知之重耳逃翟夷吾逃梁此因晋以杀太子事告故书

伯姬来朝其子

杜云伯姬来宁宁成风也夫僖公为成风子其年最长尚有伯姬者以庄廿五年归?至是约一十四年则姬年当在三十以往益信成风始娶在孟任先矣礼诸侯世子有相朝之义此以子尚幼故母帅而行之谓之朝其子正义曰?伯姬来絶句来者来归宁也朝其子犹言其子朝也

夏公孙兹如牟【兹公羊作慈】

传曰公孙兹如牟娶焉则因聘在牟而假聘以行娶者牟国名桓十五年有牟人来聘公孙兹见前

公及齐侯宋公陈侯卫侯郑伯许男曹伯会王世子于首止【止公谷俱作戴後同】

王世子者惠王之太子郑即襄王也惠王以惠后故将废太子郑而立王子带故齐桓帅诸侯会王太子以定其位首止卫地

秋八月诸侯盟于首止

前会王世子以定其位会之而已不敢盟也何也卑不与尊盟也至是则诸侯自为盟焉此皆书其事而美自见者其後九年公会宰周公齐侯宋公卫侯郑伯许男曹伯于葵丘九月戊辰诸侯盟于葵丘书例正同或又引昭十三年公会刘子及诸侯于平丘八月甲戌同盟于平丘无诸侯字遂谓复举诸侯即是尊世子而不敢与盟之义则同一王臣尊宰孔而不尊刘子不可解矣春秋书法贵实刘子与诸侯同盟则同盟耳王世子与宰周公俱不与诸侯同盟则诸侯盟耳谷梁云复举诸侯公羊曰一事再见胡氏曰书之重词之复皆不通之论也左传于首止之盟曰诸侯盟则世子不盟也于葵丘之会曰宰孔先归则诸侯自盟也

郑伯逃归不盟

传王使周公召郑伯曰吾抚汝以从楚辅之以晋可以少安【言主楚而助以晋可拒齐也】盖欲废太子而不欲定其位也郑伯遂逃归不盟

楚人灭弦弦子奔黄

弦近楚小国传曰楚使鬬谷於菟灭之

九月戊申朔日有食之

冬晋人执虞公

晋侯复假道于虞以伐虢宫之奇谏曰虢虞之表也虢亡虞必从之谚所谓辅车相依唇亡齿寒者其虞虢之谓也不听宫之奇以其族行八月甲戌晋围上阳十二月灭虢虢公丑奔京师晋师还馆于虞遂袭虞执虞公及其大夫井伯以媵秦穆姬而修虞祀且修其职贡于王

六年

春王正月

夏公会齐侯宋公陈侯卫侯曹伯伐郑围新城

此伐其逃盟也新城郑邑

秋楚人围许诸侯遂救许

此楚以救郑围许而诸侯即救许而释郑遂者继事之词亦速词

冬公至自伐郑

此告至也公伐郑後又救许而祇告伐郑者以告出在伐郑故也此与前四年公至自伐楚例同

七年

春齐人伐郑

前以诸侯之师伐郑郑未服而释以救许故此复伐之

夏小邾子来朝

即邾犁来也初得王命而别封于邾故称小邾此是小国新立君而相朝之礼

郑杀其大夫申侯

初轅涛涂之误军归也郑大夫申侯实沮之故齐桓执轅涛涂而赐申侯以虎牢其後涛涂劝申侯城虎牢而譖于郑伯已有间矣今齐屡伐郑郑思杀申侯以悦于齐以为申侯者本申国之甥而为楚文王所宠文王将死予之璧而使之他国曰子专利而不厌恐不免也至是城虎牢专地利而又故为楚所嬖杀楚嬖则齐憾可释矣此则专杀大夫之至无理者申侯申氏侯名

秋七月公会齐侯宋公陈世子欸郑世子华盟于甯母【谷梁作宁母】

传曰谋郑也时郑太子请齐去泄氏孔氏子人氏三族以悦齐管仲以其奸父命不许于是太子华得罪于郑郑伯乃使人请盟于齐

曹伯班卒【班公羊作般】

公子友如齐

冬葬曹昭公

八年

春王正月公会王人齐侯宋公卫侯许男曹伯陈世子欸盟于洮郑伯乞盟【陈世子欸下公羊有郑世子华误文】

按上年闰月惠王已崩襄王虑大叔带【襄王弟惠后子】之难【惠后欲废王立带故前有首止之会】畏不立故不发丧而告难于齐齐因此盟使襄王定位而後发丧例王人内臣之微者然亦王国通称二十九年翟泉之会以王子虎为王人是也王人亦皆可与盟文十年及苏子盟于女栗襄三年公会单子诸侯盟于鸡泽是也惟王世子不与耳【见前盟首止传】乞盟请服也乞盟在盟後则洮盟不入矣或别作他盟未可定耳

夏狄伐晋

晋伐狄败于采桑故狄报伐之

秋七月禘于太庙用致夫人

此禘所自出之禘非吉禘也礼纬称五年一禘而杜云三年大祭之名皆无定据若此夫人则传曰秋禘而致哀姜焉以哀姜既葬则殡庙祔姑礼所当有而至是始致主者以未行吉禘之礼故逡巡焉但传又以为非礼则以哀姜见杀礼有不薨于寝则不致之例姜在所不致者故非礼也公羊谓致非致主此当是朝庙之礼以夫人初至而舍荐于庙者僖本聘楚女为嫡齐女为媵乃齐先致女而胁僖公以朝庙是以妾为妻故谓非礼此不知何据云然然朝庙谒至当另有期安得藉大禘之时杂行其礼此为不合若谷梁谓以妾为妻是僖公之母成风致主宗庙则不会全经不记文四年夫人风氏薨五年葬小君成风之文谓夫人之卒葬之已是大谬而胡氏又从谷梁注刘向范甯之说以为成风未死僖公于祭庙之时立为夫人夫子无立母之义僖既为君则母以子贵在成风自为夫人何必再立况世无先君死後立夫人者又况立后自有典礼升食非策立之地出王非锡命之主宗祝裸献不能司翟楡鞶监拜赐登降之用而欲使秉鬯之子无端立母则直是獬犬狂吠而以说春秋欲春秋不亡得乎

鲁宜用禘予前已历言之胡氏必引孔子郊禘非礼一叹以为僭越夫僭越谓羣公用之耳非周公亦僭越也且礼记所引语俱未实也杂记谓孟献子曰七月日至可以有事于祖七月而禘自献子为之则此所书禘正是七月斯时献子未生也周之七月为夏之五月故曰日至是以明堂位又云季夏六月以禘礼祀周公然则大禘与时禘原是夏月礼记之不足凭如此

冬十有二月天王崩

惠王实以前年闰月崩至是来告说见前

九年

春王正月丁丑宋公御说卒【正月公谷作三月御谷作御】

夏公会宰周公齐侯宋子卫侯郑伯许男曹伯于葵丘此定王位也宰周公太宰而食采于周者天子之三公也传称宰孔其名也宋公称子者是时宋桓公卒襄公立而以桓未葬故襄

公称子亦礼例也传王使宰孔赐齐侯胙【礼二王之後归牐此以尊齐故赐之】曰天子有事于文武【周七庙外别有文武庙专祭故专称文武若七庙则焉得称文武乎】使孔赐伯舅胙齐侯将下拜孔以王命止之对曰天威不违颜咫尺下拜登受

秋七月乙酉伯姬卒

不称国以未嫁也称字许嫁也惟许嫁故得书卒

九月戊辰诸侯盟于葵丘

传宰孔先归故诸侯自为盟盟曰凡我同盟之人既盟之後言归于好

甲子晋侯倮诸卒

冬晋里克杀其君之子奚齐【杀公羊作弑】

传里克杀奚齐于丧次【奚齐晋骊姬子姬譖杀太子申生事见前里克晋大夫见十年传】书曰杀其君之子未葬也【献公未葬故称子】是时齐侯以诸侯之师伐晋及高粱而还讨晋乱也以告不及鲁故不书

十年

春王正月公如齐

狄灭温温子奔卫

温子即苏子司寇苏公之後也以国于温故又称温子温子叛王而居狄又不能于狄狄人伐之王不救故灭

晋里克弑其君卓及其大夫荀息【卓公羊作卓子】

里克杀奚齐【见前】荀息复立卓子【骊姬娣所生者】克又杀卓子于朝荀息死之其称君称弑者以先君既葬也【献公已葬】例未葬称子既葬称君此是书法而胡氏谓里克杀其君之子以国人不子也里克弑其君以里克君之也夫犹是弑君犹是杀国君之子而一则不子责受杀者一则君之责杀者里克已矣二子被杀有何贤否而一受责一不受责乎

及其大夫荀息与桓二年及其大夫孔父庄十二年及其大夫仇牧书例并同

按晋语晋将废太子而立奚齐大夫里克?郑荀息相见里克曰若何荀息曰吾闻事君不违命

君立臣从【言君立奚齐则从之】何贰之有?郑曰不然从其义不阿其惑也必立太子里克曰我不佞虽不识义亦不阿惑【传称中立乃免】乃别则是太子之杀荀息成之向使三子者皆从义而不阿惑献虽有言谁敢承命乃曰臣从是从之者也是即孟子之所谓容悦君逢君者也即?郑之所谓阿惑也然且里克发难复告荀息荀息曰吾与先君言之矣则是太子之杀荀息与先君共谋者乃犹曰不食言夫尾生何尝食言乎然而殉难矣殉又何讥故先仲氏曰及其大夫及者比也连累也虽不美然无刺焉若里克者则在太子伐东山时极力谏公曰豕子奉豕祀君行则守有守则从今君居太子行非古制也且夫专行谋誓军旅非太子事也公不听退见太子太子曰吾其废矣克曰告之以临民教之以军旅不共是惧何故废乎且子惧不孝母惧不得立当时史臣亟称之谓善处父子之间而惜其中立之见胶结于中遂以观望始以僨败终然且太子临废时姬曰吾难里克假使如克者衆则新城之变未必即成故春秋于晋杀里克有怨词焉然而荀息殉难里克死辜回乎不同嗟乎死生之际可不慎与若公谷谓里克为太子之傅荀息为奚卓之傅则全然无据而胡氏又遵之夫太子将杀时先杀其傅一如汉代杀诸王之傅而其时所杀者杜原欸也太子傅已杀今公然以克当之不亦异乎

夏齐侯许男伐北戎

晋杀其大夫里克

里克既杀卓子乃与?郑召重耳于翟舅犯使重耳辞之吕甥卻称者夷吾之徒也令夷吾赂秦以求入夷吾乃遣人告赂于秦秦使公子絳吊二公子覘其贤否重耳受吊曰亡人无宝仁亲以为宝父死之谓何而因以为利拜而哭退而不私夷吾受吊则重许赂焉穆公乃欲纳重耳公子絳不可谓当置不仁以乱其国因与齐隰朋帅师纳晋惠公惠公虑克郑之属重耳也乃召克曰微子不及此虽然子弑二君一大夫为子君者不亦难乎克曰欲加之罪其无词乎臣闻命矣伏劔而死明年杀?郑

晋杀其大夫与前七年郑杀其大夫申侯後二十八年楚杀其大夫得臣书例并同【春秋讨贼则有卫人杀州吁齐人杀无知一例与此全异且後年晋杀其大夫?郑父?郑不与里克同弑君而与之同词则例可见耳】

秋七月

冬大雨雪【雪公羊作霰】

此夏之秋也大雨雪乎

春秋毛氏传卷十四

<经部,春秋类,春秋毛氏传>

卷十五

钦定四库全书

春秋毛氏传卷十五

翰林院检讨毛奇龄撰

十有一年

春晋杀其大夫?郑父

夷吾杀里克时会?郑使秦乞缓秦赂郑乃告秦伯谓赂之不入由吕甥却称冀芮实主之君以重币召三子臣出晋君君纳重耳蔑不济矣及还闻克死见共华曰可以入乎共华曰二三子皆在而不及谓不及克党也?郑入遂杀郑及七舆大夫共华贾华等【皆克党】?豹奔秦【豹郑之子】

是年襄王使召武公内史过赐晋侯命受玉惰【受王命圭也】过归告王曰晋侯其无後乎王赐之命而惰于受瑞先自弃也已何以长世

夏公及夫人姜氏会齐侯于阳谷

此僖公夫人也娶不见经其在齐桓弟与女俱不可考杜云妇人见兄弟不踰阆泛言礼文耳齐僖之死在桓十四年距僖立时已三十八年齐桓尚安有女弟乎

秋八月大雩

孟子七八月之间旱周八月夏六月也此旱雩也杜氏云过时非是说见前

冬楚人伐黄

十有二年

春王三月庚午日有食之【杜云不书朔官失之】

夏楚人灭黄

传黄人恃诸侯之睦于齐也不共楚职楚伐黄灭之嗟乎伯主安在哉故前年书伐此年书灭总见诸国之不能救焉若谷梁胡氏谓贯之盟管仲虑江黄近楚而远齐倘伐不能救则此盟反为厉也桓不听管仲死楚伐江黄桓果不能救君子於是乎闵之则考齐世家管仲之死在齐桓四十一年为僖十五年此时仲未死也且是年襄王以前年之冬王子带召戎伐周因讨子带而子带奔齐齐侯使管仲平戎于王王以上卿之礼飨管仲仲辞不受乃受下卿礼而还此明见是年秋七月及冬十二月传而卤莽如是可乎

秋七月

冬十有二月丁丑陈侯杵臼卒

十有三年

春狄侵卫

夏四月葬陈宣公

公会齐侯宋公陈侯卫侯郑伯许男曹伯于咸

传云会咸以淮夷病杞故且谋王室也秋为戎难故诸侯戍周齐仲孙湫致之【戍守也致者送戍卒也】

秋九月大雩

冬公子友如齐

十有四年

春诸侯城缘陵

缘陵杞邑也杞为淮夷所病将迁于是邑而齐合诸侯以城之其不言城杞者以杞是时未迁也其不序诸国者以史于诸国人氏偶未详也故传云不书其人有阙谓是阙文即释例所云春秋以文史官多阙者而杜氏以有阙为工筑未毕误矣若齐桓救患恤灾迁城封国义在所褒而胡氏谓城邢是褒城楚丘城缘陵是贬则事同义异在夫子无是委曲且胡氏义例谓书城邢而不书城夷仪邢未灭也书城楚丘而不书城卫卫已灭也今淮夷病杞杞并未灭也乃书城缘陵而不书城杞於例谓何

夏六月季姬及鄫子遇于防使鄫子来朝【鄫公谷作縵後俱仿此】据传鄫季姬来宁公以鄫子之不朝也怒而止姬将以絶鄫婚而季姬不忍乃特为防邑之遇【防鲁邑】而使之来

朝然後公许姬还鄆故此书季姬截去鄆字如未嫁者以明与鄆絕也後年书季姬归鄆如始嫁者以明重合鄆也此传与注俱明了者即谷梁谓遇者同谋也公羊谓使来朝者非使来朝使来请已也亦但言夫妇谋合私请归已之意并未言鲁女淫佚通乎鄆子如宋儒所言淫奔者自何休邪陋误作墨守辄谓鲁女要遮鄆子淫佚使来聘已夫鸟兽之行莫过文姜然亦情理有之其将会齐襄时必须先使桓公与襄先会于泺而後以宁母之说从桓归齐岂有未嫁之女独身适防他国人君无事来鲁可以通情愫讲姤合者故范甯注谷梁亦云休言诞妄事所不然而胡氏复谓鲁公鍾爱其女使自择配夫卫宣晋献已踰嫪毒然亦必不使子女献身隣于娼户鲁僖颇自好何至如此况春秋谨严夫子于书法最为不苟二百四十年只书七遇而季姬已处其一所谓遇者盟会之别名也曲礼诸侯未及期相见曰遇故古有遇礼器币晋接杀于盟而亲于会其来有时其见有地其行事有相非如田豕草蠲可猝媾也且事在显着未必非僖公陰主之故夫子特郑重其礼名之曰遇此其例与隐四年公及宋公遇于清庄二十三年公及齐侯遇于谷同何劭公名教罪人甘心倚門胡君何人亦喜道淫佚如此

据胡氏云春秋内女适人则系诸国杞伯姬是也其未适人者则祇书字子叔姬是也今季姬书字而不系诸国明是未嫁则又杜撰立例矣春秋文二年子叔姬卒是既嫁而出归于鲁者十四年齐人执子叔姬十五年齐人来归子叔姬则齐昭公夫人齐君舍之母不惟既嫁且国母也徒以商人弑君舍无礼于姬史官遂截去齐字只称叔姬又宣五年齐高国及子叔姬来则并与其夫同归宁者是春秋三子叔姬皆属已嫁皆与此季姬去国称字同是一例乃谓子叔姬未嫁可怪已极且礼云女子许嫁笄而称字前九年书伯姬卒是也今胡氏谓季姬择配是未许嫁矣未许嫁则并季姬之字亦无有而尚曰书字不书字非梦寐乎

秋八月辛卯沙鹿崩

沙鹿晋地名崩者陷也

狄侵郑

冬蔡侯薨卒

十有五年

春王正月公如齐

楚人伐徐

徐即徐戎在淮泗之间与齐鲁近雅诗所称徐方者楚得越国而伐之其无东方诸侯甚矣故齐鲁必救之下皆记齐鲁救徐之事

三月公会齐侯宋公陈侯卫侯郑伯许男曹伯盟于牡丘遂次于匡【左传谷梁皆以遂次于

匡别作一节】

公孙敖帅师及诸侯之大夫救徐

会牡丘为救徐也公孙敖鲁大夫庆父之子其但称诸侯大夫不列国名者承牡丘会也次匡者以君不亲将故次匡以待之无贬例匡卫地

夏五月日有食之【不书朔与日官失之】

秋七月齐师曹师伐厉

厉楚与国也以救徐故伐之

八月螽【公羊作 𧈧】

九月公至自会

季姬归于鄆

以中絶故特书归鄆如始嫁文说见前

己卯晦震夷伯之庙

晦者每月尽日之名杜氏以长历推之己卯晦是九月三十日公谷以昼冥为晦非也震者劈历也夷伯据传作展氏之祖夷諡而伯字者古諡连字称如共仲成季之类鲁有展氏即公子展之後隐八年传无骇赐族展氏又柳下惠名展禽皆是第不知夷伯是何名何公之大夫耳若展氏有庙则系宗子之庙大宗继所出则其所立庙即先君也惟小宗继祢则诸族各立父庙为小宗继祢之庙此即展氏小宗庙也昭十二年传有游氏之庙注谓是郑大夫子太叔祖庙正与此同谷梁胡氏皆以夷伯有庙为过制何疎陋耶

冬宋人伐曹【左传连下作一节】

楚人败徐于娄林

娄林徐地谷梁云夷狄相败以徐亦戎也

十有一月壬戌晋侯及秦伯战于韩获晋侯

晋惠公之入也许赂秦重地而皆不与前十三年晋饥秦输之粟及十四年秦饥而晋侯闭籴

故秦伯谋伐晋卜之吉时晋将御之先卜车右得庆郑以郑言不孙不从且欲乘郑国所献马【名小驷】而庆郑沮之又不听及战韩原晋侯马旋陷淖中呼郑来救时梁由靡韩简虢射辈已逆秦伯车将止伯庆郑不自来救反呼梁由靡救公遂羣舍秦伯而救晋侯两俱不及秦遂获晋侯以归晋大夫皆被髮坏形毁服从之秦穆姬者由生姊也率太子罃公子弘【左传作太子罃弘刘向列女传作公子弘今从向者以文十年秦伯罃卒单名罃也】与女简璧登台履薪而请罪且使以衰絰迎秦伯示已必死伯乃还晋侯而质其太子圉于秦晋人作爰田【爰易也易公田之粟以赏衆】作州兵【二千五百家为州周制卿大夫岁时登夫家之衆寡以料兵今使州长治之以人少则察易精也】十一月晋侯归杀庆郑而後入是岁晋复饥秦复饫之曰吾怨其君而矜其民且姑树德焉以待能者是役秦为政而书晋及者以晋侯不德自有以召之也此文例也

十有六年

春王正月戊申朔陨石于宋五【陨公羊作霰且连下文作一节】

是月六鷁退飞过宋都

陨石星陨为石也其不言星者以所见祇陨後之石不见所陨时也五者石数也鷁水鸟名即鴈也凡鸟无倒飞者退飞倒飞也倒飞过宋都则亦远矣六者鷁数也是月者此月以不详何日故云公谷前误以己卯晦为昼冥遂曲护已说谓是月必是晦日春秋书朔不书晦则己卯晦非书晦耶

三月壬申公子季友卒

卒有氏不氏并无义例说见隐八年

夏四月丙申鄆季姬卒

大夫书卒不书葬鲁女则有葬有不葬皆以大夫会葬为文皆无义例此与文十二年子叔姬卒成八年杞叔姬卒皆不书葬并同

秋七月甲午公孙兹卒

冬十有二月公会齐侯宋公陈侯卫侯郑伯许男邢侯曹伯于淮

传曰会淮者谋鄆【鄆为淮夷所病】且东略也时诸侯城鄆以役病不果而还

十有七年

春齐人徐人伐英氏

英氏楚与国也齐人为徐伐英氏报娄林之役也

夏灭项

传淮之会公有诸侯之事未归而取项齐人以为讨遂止公盖项本小国近淮公袭灭之故齐执公焉凡列国取灭皆书国于上其不书者即是本国此与成六年取鄆昭四年取郕例同

秋夫人姜氏会齐侯于卞

传声姜以公故会齐侯于卞请归公也姜不知何公女前十一年公与夫人会齐侯此复为公故请会鲁地则姜必桓女矣说见前会齐侯传卞鲁地

九月公至自会

此告至也公灭项见执犹有他事而仍书至会者以告出在会淮也春秋文例有专见者有连事以见者此合上灭项会卞皆连事见意故三事三书各无义例必合观而意始见焉所谓文也盖灭项不书国公执不见经告至书自会皆讳国恶而简策既分则策书所载简并无有【简者经也策即传也】向使无会卞一事则经意尽晦矣故经书灭项知是鲁事何也以不书国灭也乃无故而夫人忽会卞则于是较策而知执公焉但夫人会卞安知非文姜会襄自为出入且其书法又与文姜会襄无异安知为公请而为公急难乃接书曰公至自会则于是又较策而知为公请焉盖公为会淮而出与桓共事未有公未归而桓可赴公夫人之请至鲁地者且夫人会卞与公无与亦未有夫人不请公而公得旋踵归鲁若冥召者此皆夫子书法一本造化单事连事但直书而义无不见并非月日名氏一字增损便可妄称文例也若经文是简传文是策各有名义详见桓十五年郑伯突出奔蔡传

冬十有二月乙亥齐侯小白卒

据传齐桓以十月乙亥卒此书十二月者以内乱故越六十日始得来赴告鲁也【史记六十七日始棺斂尸虫出于户传作辛巳殓正六十七日】初桓娶夫人三王姬徐嬴蔡姬皆无子如夫人六长卫姬生武孟无亏少卫姬生惠公【公子元】郑姬生孝公【公子昭】葛嬴生昭公【公子潘】密姬生懿公【公子商人】宋华子生公子雍公与管仲属孝公于宋襄公以为太子雍巫【即易牙】有宠于卫共姬【即长卫姬】因寺人貂【即貂】以荐羞于公【易牙善调羞食】乞立武孟公许之管仲卒五公子皆求立然未定也及桓卒易牙与寺人貂杀羣吏立公子无亏【即武孟】孝公奔宋

十有八年

春王正月宋公曹伯卫人邾人伐齐【邾公羊作邾娄】

宋襄以齐桓在时会与管仲属孝公定为太子至是宋襄假信合诸侯以纳孝公宜也五公子长幼传无明文胡氏谓桓公君臣以私爱定长幼无据

夏师救齐【单言师者鲁师也】

五月戊寅宋师及齐师战于甗齐师败绩

初宋与诸侯纳孝公齐人即已杀无亏应之此时诸师皆散鲁亦罢去宋反独与齐战必得取胜是明借此堕桓业兴伯功也後孝公伐宋实本诸此

狄救齐

鲁之救齐以昭公夫人本鲁女也狄何属乎此必四公子之徒有召狄援者如周宜臼召犬戎类

秋八月丁亥葬齐桓公【十一月而葬乱故也】

冬邢人狄人伐卫

邢与卫皆受狄伐者今邢反合狄伐卫则必邢与狄平而卫不与平故见伐然邢则甚矣母怪乎邢之後为卫所灭也若狄之伐卫其来已久向徒以齐桓救恤故卫稍安枕今桓死而伐又至矣谷梁不度时不识事务谓狄之伐卫所以救齐夫狄何爱于齐而救之且何所不得于救而复伐卫以救之然且谓狄不称人其称人者所以进狄善其伐卫以救齐也夫狄亦有长衆称狄者狄君也其称人即狄衆也中国夷狄虽殊而书例则一胡氏宗谷梁必谓其称人者以进狄故其进狄者以善伐卫故其善伐卫者以善其救齐故夫果善救齐则当五月救齐时正当善之时也正进人以善之之本事也乃经曰狄救齐未尝人也救齐未尝人而谓伐卫之称人以救齐故通乎不通乎

十有九年

春王三月宋人执滕子婴齐

此宋襄事也滕子者滕君婴齐其名也宋襄不知何事而执滕子滕子亦不知在何所为宋所执此皆无传可考者但宋公称人滕子称名似乎有例而实无例者谓去爵称人贬在宋襄则春秋书执其称人者二十有五称侯者祇两晋侯执曹伯耳一曹伯负刍弑君自立其执而称侯宜也曹宣公无罪晋文以权谄执之而晋复称侯何与且襄二十六年晋人执甯喜喜亦弑君贼而执之者又称人何也若左氏谓归罪于民故称人则未有宋民而可以执他国之君者

齐人执轅涛涂齐桓在楚不得推诿国人也至谓见执称名必是深贬则负刍弑君且犹不名嬰齐何贬乎大抵执人一事君臣共之可称君亦可称臣与晋侯杀申生专杀在君卫人杀州吁公杀在民分例不同故邾人执鄆子系宋襄使邾人执之而亦称邾人则邾君且无与何况邾民此尤称爵称民之必无义者况名与不名全非书例若胡氏谓称人是滕子罪称名亦是滕子罪则不惟宋称滕称两称俱乱吾不知滕子何人其所犯何事乃罪不胜诛如此

夏六月宋公曹人邾人盟于曹南【邾公羊作邾娄後同】

齐桓在时宋公曹伯并随桓盟伐未有间也前十五年宋不知何故忽然伐曹及桓卒而宋纳孝公曹仍共事虽曹为桓故而在宋则滋有负焉故宋为此盟亲赴曹国【曹南者范氏云曹之南鄙是也】思藉此饰恶而曹伯芥蒂不亲来赴使大夫泣盟则宋襄此会为无色矣此围曹之役所由来也第宋襄不德远逊齐桓曹南之会诸侯罕至乃东西迁怒至用鄆子司马子鱼【宋襄庶兄目夷】所谓已德有阙而思以责人祸岂远乎

鄆子会盟于邾

乙酉邾人执鄆子用之

宋公会曹时诸侯不至乃以鄆近召鄆子而鄆又不即至及至而宋公行矣乃追之至邾虽不盟然因盟而来一若已盟于邾者然故既书盟又书会且不书同会一人则人必推求而自得之以为鄆本为会来又为盟来并无罪也宋公乃訾睢暴横使邾人执之已为无礼况用之乎宋襄自此不永终矣用之有二义公谷谓叩其鼻以血社谓取鼻血衅祭礼器以畜礼辱之若左氏载司马子鱼之言谓古者六畜不相为用【如祭马祖不用马类】小事不用大牲而况敢用人乎祭祀以为人也用人谁能飨之则直谓杀其人以当牺牲无道至此但经书邾人不书宋公者非讳宋恶以前後一事经文连书则上承下接书例如此此如齐桓既救邢则下文迁邢更不书齐侯齐桓既伐郑则下文救许更不书齐侯例同

秋宋人围曹【左传合下作一节】

以曹南之会君不亲至故也

卫人伐邢

传曰报菟圃之役也前年邢伐卫围卫菟圃故云

冬会陈人蔡人楚人郑人盟于齐【公羊会有公字】

此谋宋也宋公曹南一会诸国罕至然且东执西讨大肆不道以重失诸侯之心故诸国盟齐专为谋宋其及楚人者亦专为後年楚子执宋公张本此合证之经而皦然者若左氏谓陈穆

公修齐桓之好故盟齐则会无齐人祇列国大夫一盟其地何足修好左氏能传经不能解经此又一证也若序国先後并非书例说已见前

梁亡

据传梁伯好役民以筑城邑城衆民寡名曰新里前一年秦遽取新里迁民实之至是国相惊恐陰塹公宫曰秦将袭我民惧而潰秦遂取梁是梁之亡民实亡之与秦何与故经书梁亡以垂戒焉此与庄十四年书郭亡例同

二十年

春新作南门

南门鲁城南门也南门本故有而今复修之则曰新所修有旧制而今又稍变之则曰作但城郭桥道有关启闭不时可作而传曰书不时者以修饰美大不关缓急则必待土功之月然後可作今经书春则已在冬十月後且不书正月则并在春十一月後非土功时矣杜氏云南门本名稷门後以增大之故改名高门

夏郕子来朝【郕姬姓国名】

五月乙巳西宫灾

公羊曰鲁子曰有西宫知诸侯有三宫也何氏注礼诸侯娶三国女夫人居中宫少在前右媵居西宫左媵居东宫少在後此不知所据然说较近理若谷梁谓西宫是祫宫即闵公之庙则正义谓左祖右社庙不在西即或五庙分列祫即西庙则曾祫皆西列何得独以一祫当之若谓西新转音西可通新则前文新作南门可云西作南门乎

郑人入滑【滑人叛郑而服于卫故郑伐之】

秋齐人狄人盟于邢

此狄谋为邢伐卫而齐参盟以助之以前年狄救齐抗纳为齐孝所畏故也然卫之为邢病则甚矣

冬楚人伐随【随楚与国叛楚故伐之】

春秋毛氏传卷十五

卷十六

钦定四库全书

春秋毛氏传卷十六

翰林院检讨毛奇龄撰

二十有一年

春秋侵卫

宋人齐人楚人盟于鹿上

前诸国盟齐特要楚人所以谋宋故宋盟鹿上专求解于齐楚两大使宋得仍主盟会传曰宋人为鹿上之盟求诸侯于楚楚人许之不虞楚之伪许之也此盟鹿上与後会在孟俱是宋地孟会诸侯全恃鹿上乃盟甫踰时而楚反假孟之会直执宋公以伐宋要盟夷狄其足信乎

夏大旱

周之夏夏之二三四月也於时方下种虽不雨不伤禾稼然三月无雨则亦愆阳矣故书之但是年不饥则终是春旱於禾稼无与耳

秋宋公楚子陈侯蔡侯郑伯许男曹伯会于孟执宋公以伐宋【孟公作霍谷作雩或作宇左公谷皆以执宋公下别作一节】

诸侯会宋地【孟宋地】宋襄主盟乃无故而楚子执襄以伐宋此必诸侯恶襄不道执杀国君因以此报之虽假手楚子实则诸侯共为政故鹿上要盟不足解释以盟齐之役先有以结之故也胡氏不量世事尚谓五国之君不能相救夫五国之君并主之而又救之乎陈蔡楚郑皆盟齐之国唯许曹新会而曹又屡被宋伐必不肯救宋者第楚会中国始于盟齐刼盟窃伐实始此会此则诸侯之罪书其事而义自见耳执宋公不言楚子非分恶诸侯亦非不予夷狄承上连文书例如此此与前十九年邾执郕子不书宋公正同【详见前传】

冬公伐邾【公羊作邾娄】

邾为宋用郕子郕子鲁婿也故公特伐之虽是时邾灭须句传谓为须句伐邾则伐邾取须句在三十二年此非其事也

楚人使宜申来献捷

鲁与盟齐而不与鹿上与孟之盟不直宋也然楚以盟齐之故使来献捷其不言献宋捷者秋伐宋冬献捷事不异年则承上连文亦书例也说见前执宋公传

十有二月癸丑公会诸侯盟于薄释宋公

杜氏云诸侯既与楚共伐宋宋服故为薄盟以释之公本无会期闻盟而往其称公会者书例然也【见前】诸侯即上会孟之诸侯也然执不言释此独言释者亦以公与会得载其事故书之并无义例

二十有二年

春公伐邾取须句【邾公羊作邾娄已後并同】

据传须句颛臾风姓也邾人灭须句须句子来奔且又与僖母成风同姓成风为言因伐邾取须句而返其君取者取之邾也返其君则取之而归其君也犹言取而还之也但经言取不言返者春秋经也经有因传以见者如此但书取不书返其知返者以传见也然亦有因经以见者如此书伐邾取须句文七年又书伐邾取须句向使须句为鲁有则此已取之何必再取观後之取则知此之返此则因经以见之者也若取之为义则推于我曰予得之彼曰取并无书例而胡氏又以书取为擅夫取而有之尚不擅而擅夫还之者乎

夏宋公卫侯许男滕子伐郑

宋襄乃伐郑以报孟之役

秋八月丁未及邾人战于升陞

僖公两伐邾并取须句故邾乘不备而来报之时臧文仲力谏当设御不听因败绩邾人获公胄悬于邾城之鱼门其无礼如此升陞鲁地

冬十有一月己巳朔宋公及楚人战于泓宋师败绩传楚人伐宋以救郑宋待于泓当楚人未渡泓时宋师已成列司马子鱼请击之不听及渡泓楚师未成列司马又请击不听且曰君子不重伤不禽二毛不以阻隘不鼓不成列遂大败此兴师自楚而书宋及者楚虽为救郑而来而宋襄以孟盟见执本思雪耻故知其将来而先兴兵以俟之大司马谏襄曰天弃商久矣君将兴之不可赦也是宋实兴兵先阻先列宋为主而楚就之经书宋及本实事非义例也若宋称公楚称人者楚子虽在军而帅师有人君不亲将则不书说见隐元年传

二十有三年

春齐侯伐宋围緡【緡谷梁作闵後同】

齐孝公为宋襄所纳而曹南之盟齐并不与反与诸国谋宋盟于齐地今又专行讨伐且亲将之实怨乎觚之败齐志在争伯非为纳君也春秋假借仁信终必败露况襄又行诈之尤者乃蹶不旋踵彼车我徒皆辄蹶及之欺世之事可为乎所谓但书事而义自见者春秋有焉不通者于书伐书围妄指义例春秋书伐二百余书围四十四而欲于此二字决是否安能辨之

夏五月庚寅宋公兹父卒【兹公作慈】

秋楚人伐陈

传楚成得臣帅师伐陈讨其贰于宋也

冬十有一月?子卒

卒不书名史阙之也与隐七年滕侯卒八年宿男卒同若?本公爵入春秋称侯庄二十七年称伯今又称子范氏云为时王所黜理或有之说见桓二年滕子来朝传

二十有四年

春王正月

夏狄伐郑

滑本姬姓小国而附于郑者前二十年以滑贰于卫郑伐之滑已听命矣及郑师还而又即于卫故郑再讨之周襄王不知何故使伯服游孙伯为卫请滑郑伯不从则亦已矣乃又执王之二臣则跋扈已甚王怒而伐之宜也乃使颍叔桃子出狄兵以伐郑取栎则非复声罪致讨之师王纲之不振至矣宜其不踰时而召戎祸也此不及王讨一字一若狄之自来伐者虽为王讳然亦曰此非王所为狄为之也文也亦义也

秋七月

冬天王出居于郑

初襄王为世子时母后早死其後母曰惠后【惠王之后】生叔带而欲立之未及而卒【後母死】及襄王即位叔带乃通狄谋伐襄王襄王欲诛带带已奔齐前二十二年用富辰之言而召归之【以亲亲故也】至是王出狄师以伐郑取栎遂德狄人取狄女隗氏为后而叔带与隗氏通因废后颍叔桃子乃奉大叔以狄师攻王杀谭伯获周公原伯毛伯富辰富辰死之王出奔郑居于汜是召寇杀人而适以自杀诱夷用讎奸宫祸国百不一当此固直书之而义

自见者但史记曰王出奔郑与厉王出奔彘书法并同此但书居而不书奔者以诸侯去国则书奔桓十五年郑伯突出奔蔡十六年卫侯朔出奔齐是也天子去国则书居昭二十二年王猛居于皇二十三年天王居于狄泉是也若传曰天子无出谓天子不宜出出则书之非谓天子不书出出即贬之也公羊与曲礼不解春秋谓天子不言出增一言字便与夫子书法有未通矣书金縢王出郊康王之诰王出在应门之内未尝不言出故回命曰出入起居罔有不钦王制曰天子将出类于上帝出与入同入之有出犹出之有入也春秋于襄王之奔但书出而入自见曰天王出居于郑于王猛敬王之奔则但书入而出亦自见曰王猛入于王城曰天王入于成周此真夫子之春秋也胡氏解春秋但知有公谷而全不知有夫子如此经曰贬而书出夫襄固有罪当贬书出王猛与敬王何罪而乃贬而书入乎

晋侯夷吾卒

此晋惠公也据传惠公之死在二十三年越二年而始见于此以赴之晚也是时公子圉立是为怀公怀公乃召晋大夫之从重耳者以狐偃不至杀其父狐突先是重耳出亡过狄狄伐廧咎如获其二女叔隗季隗纳诸公子公子取季隗而以叔隗妻赵衰生盾过卫卫文公不礼焉及齐齐桓妻之及曹曹共公闻其骈胁浴薄而观之及宋宋襄公赠之以马二十乘及郑郑文公亦不礼焉及楚楚子飡之至是及秦秦伯纳女五人怀嬴与焉乃纳公子于晋怀公奔高粱杀之以不告故不书是时襄王亦使大宰文公及内史兴锡晋文命【注命命服也诸侯七命冕服七章】

二十有五年

春王正月丙午卫侯毁灭邢

邢卫皆姬姓国皆为狄所灭而邢迁夷仪卫迁楚丘齐桓公皆城之则邢卫二国本宜协力距狄互相拯援而前十八年邢反挟狄以伐卫围卫菟圃及狄退而邢独留师不去则邢恶过矣越明年卫乃伐邢报菟圃之役并未尝得志于邢又明年齐孝因邢欲报卫盟狄于邢以谋卫则邢实为主而狄反为客然且前年之秋甫盟狄而去年之春狄即侵卫则锋起肘腋狡獪莫测于是卫文用闲使大夫礼至昆弟先陰仕于邢以为内应而後一举而灭之是虽灭同姓然敌国逼处势不俱立非得已也但春秋灭国三十无书名者此独书卫侯毁灭邢遂有灭同姓故名一语而曲礼遂引之曰失地名灭同姓名定之为春秋之例夫失地无书名者曲礼郑注引庄十年荆败蔡师于莘以蔡侯献舞归为据夫献舞即蔡哀侯也哀侯以被执书名未尝失地经凡被执必书名如许男斯沈子嘉类不一而足已见前传实则哀侯之执至楚即还寸土不失观後三年即与齐桓为北杏之会显然在经可验也若失地之君春秋多有纪侯去国谭子奔莒并不书名至于灭同姓则在楚所灭虽不可考然二十六年经书楚子灭夔注云同姓或以为待夷狄之礼故不名若僖二年虞师晋师灭下阳则夏阳虢也虞虢与晋皆同姓以两同姓灭一同姓而虞与晋皆不名何也若晋献灭虢并灭虞则以一同姓灭两同姓然又不名故胡氏亦知难通乃曰晋灭虞不名而此独名者虞公贪璧以易邻与邢之挟狄以伐卫罪有轻重夫不责虎狼之挟群而责虫鱼之贪饵非平情矣予向谓书名书爵并无史例况偶然一见

尤不可据且经有阙文又有美文先仲氏曰桓十二年丙戌盟武父又云丙戌卫侯晋卒下之丙戌由上之丙戌而美之者也此云卫侯毁灭邢下文云卫侯毁灭卒上之卫侯毁灭则由下之卫侯毁灭而美之者也此确论也

夏四月癸酉卫侯毁灭卒

宋荡伯姬来逆妇

荡伯姬者公女而嫁于宋大夫荡氏为妻者也今为其子来逆妇而借以归宁特礼无姑自亲逆者书逆妇则其非礼可知也周礼诸侯嫁女于大夫使同姓大夫主之此来逆妇不知何人女并不知谁主而胡氏谓讥公失礼下主大夫之昏大不可解荡者宋桓公子荡之後

宋杀其大夫

大夫无名阙文此与庄二十六年曹杀其大夫阙文例同公羊谓宋三世内娶故三世无大夫【谓宋公三世皆娶大夫女故不敢臣妇父也】则其时武穆桓庄之族甚夥必非内娶三世便无贍氏且未闻君不臣妇父者周武王未尝不臣齐尚父也若谷梁谓所杀者孔氏故孔子讳之则桓二年宋督杀大夫孔父显见乎经而敢为是说妄矣春秋有阙文又有美文此即阙文之一耳是年晋文勤王以左师迎王入于王城右师取大叔于温杀之因朝王王飨醴命之宥且赐之阳樊温原攢茅之田晋文复请隧弗许

秋楚人围陈纳顿子于顿

顿小国名杜氏谓顿君迫于陈而出奔楚楚因围陈而纳顿君于顿然则楚之围陈为顿故也与前二年楚人伐陈别是一事

葬卫文公

冬十有二月癸亥公会卫子莒庆盟于洮

莒与我旧怨入春秋以来因纪君娶鲁女盟莒于密此後桓二十七年莒庆以莒大夫而娶庄公女叔姬为妇始相和好至闵元年公子庆父出奔莒季友赂莒得庆父而莒复以师责赂故僖元年季友帅师败莒师于郕获莒挈至是卫文欲修好于鲁因之平莒而卫文又死其子成公修成之故卫侯于既葬之後变例称子承父志也然则莒庆即莒大夫之娶庄女者洮向二盟莒庆未必无意焉故先之莒庆而後以莒子乃谷梁曰莒无大夫其曰莒庆何也是全忘君女之得嫁大夫其于春秋前经瞢然不识而欲以传春秋可乎洮鲁地庄二十七年公会杞伯姬于洮是也惟僖八年洮之会杜氏范氏俱注作曹地非是

二十有六年

春王正月己未会莒子卫甯速盟于向【速公作邈後同】

此洮之盟也洮盟卫君为政而莒大夫蒞之此盟则莒君为政而卫大夫蒞之旧注向小国之近莒者隐二年莒人入向是也公谷谓入者得而不居今盟莒于向後宣四年公伐莒取向则公然莒地矣甯速卫大夫庄子即甯武子父也

齐人侵我西鄙公追齐师至弗及【公谷作隳弗左传作不】齐鲁自长勺乘丘诸战後相安至今此何以突见侵伐尝以经考之齐桓卒时宋师纳孝公而鲁曾兴师以距之以孝公之弟公子潘其後继孝公为昭公者本娶鲁女为妻故鲁争立之前十八年经书师救齐者是也至是孝公来修怨而公追逐之者齐地盖逐之出境也诸传不顾经因不识见侵之由第于书人书师晓晓置辨夫齐人者齐大夫也齐师者齐大夫所帅之师总称也此见子隐元年传条例甚明自陋者创为人寡称人人衆称师之说则此既称人又称师多寡杂出为不可通于是谷梁谓人本微者而以我能追故称师以大之而胡氏又谓齐先以少诱我故称人既而伏其衆以邀我故称师殊不知春秋书法人师并见者甚多并无义例前二十二年宋人及楚人战于泓宋师败绩後二十八年晋侯及楚人战于城濮楚师败绩此岂战时人少败时人反多耶抑岂战时以少诱之败时反以多邀之耶何悖诞至此

夏齐人伐我北鄙

是时齐侯亲至境臧文仲曰事急矣乃使展喜乞展禽【即柳下惠】为词以犒齐师齐侯始去其称人者以帅师有人齐侯不亲将也说见前

卫人伐齐

齐卫无恶专以洮向之盟为我伐齐故传曰洮之盟故也胡氏不读春秋谓卫人报德以怨伐齐之丧而公两盟之是党卫也故齐人既侵其西又伐其北是既不解鲁齐之恶又不识齐卫之怨茫然立言夫卫未尝伐齐丧也前十七年齐桓卒十八年宋人曹伯卫人邾人伐齐此非伐丧也齐桓之卒五公子争立而宋襄遵齐桓旧约合曹卫以纳孝公此一伐齐正所谓定齐难正齐位孝公所宜感德不暇者特甗之败齐则诸国师退而宋必取胜故齐衒宋则有之然于曹卫并无与耳且齐果怨卫则直宜伐卫今经书卫伐齐是卫党鲁非鲁党卫也卫怨齐非齐怨卫也且卫以党鲁而後伐齐非齐为党卫而然後伐鲁也事有始末时有前後经文具在何可使颠倒谬乱至于如此

公子遂如楚乞师

公子遂即东门襄仲也强隣荐偪乞师距之亦属恒事特乞楚则撻伐无已矣此直书而义自见者

秋楚人灭夔以夔子归【夔公作隗】

夔熊摯之後楚同姓国也

冬楚人伐宋围缙【缙谷作闵】

据传晋文过宋宋襄赠马二十乘宋遂谓有德于晋背楚即晋楚乃使子玉伐宋

公以楚师伐齐取谷

取者楚取之也

公至自伐齐

二十有七年

春子来朝

?本公爵而称子为时王所黜也传谓?桓公用夷礼故称子谬矣前二十三年书杞子卒此?成公也成公为庄公之婿庄二十五年伯姬归于?是也今此?子则成公之子桓公亦是鲁婿後三十一年?伯姬来求妇为子桓公求妇是也但此时桓公尚幼观前五年伯姬来朝其子以桓幼不能朝故母携持之以朝後三十一年始为求妇则少君初立朝且不能岂有遽行夷礼之理况庄二十七年?伯来朝此成公也後此文十二年杞伯来朝则桓公也是成公则始称伯卒乃称子先不行夷礼而後行夷礼桓公则此称子後复称伯先行夷礼而後又不行夷礼天下无父子对偶两适相左如此经者夫鲁侯无黜陟时君之权春秋亦无用夷礼贬爵之例故范甯曰?子卒?子来朝则时王所黜故父贬爵而子即承之此?子来朝後杞伯来朝则时王所进故初黜而後复进之此明可据者传不顾经徒以春甯来朝秋即伐杞而策书不载其事遂造为恶用夷礼之说不知此本有他故而史未明载春秋多有之如桓二年秋杞侯来朝九月即入?此并不用夷礼也其称?侯并未尝以夷礼贬也然而秋来朝而秋即伐之与此之春来朝而秋即伐其事正同盖必有他故而史阙之矣乃彼曰恶其无礼此曰恶其用夷礼夫既来朝则虽甚无礼然犹愈于不来朝者甯来朝而遽加兵万一不来朝何以处之

夏六月庚寅齐侯昭卒

秋八月乙未葬齐孝公

乙巳公子遂帅师入杞【杜注八月无乙巳乙巳九月六日】

见前传

冬楚人陈侯蔡侯郑伯许男围宋

前年楚自伐宋此则合诸国伐之总以其贰于晋也时楚成王亲在军而称人者以子玉为将也

十有二月甲戌公会诸侯盟于宋

楚与诸国皆在宋而我往会之与楚好也

春秋毛氏传卷十六

<经部,春秋类,春秋毛氏传>

卷十七

钦定四库全书

春秋毛氏传卷十七

翰林院检讨毛奇龄撰

二十有八年

春晋侯侵曹晋侯伐卫

当楚子以诸侯之师围宋宋如晋告急先轸曰报施救患取威定霸于是乎在矣狐偃曰楚始得曹而新婚于卫若伐曹卫楚必救之则齐宋免矣于是蒐被庐【晋地】作三军【闵元年晋献作二军今始复大国之礼】侵曹伐卫盖一以救齐宋一则向出亡时曹卫不礼修夙怨也是时晋侯亲在军与齐侯盟于卫地卫成公请盟不许卫人出卫君以说晋其书晋侯以文公亲帅师也两书晋侯者侵曹伐卫本两事而曹与卫又两告则虽同时而异书无他义焉

公子买戍卫不卒戍刺之

公子者鲁之公子买其名也【左传作丛公羊作启皆不可考】据传晋侯伐卫我以楚好故当为楚救卫故遣买戍之无如楚来救而不能克也于是公畏晋乃故杀买以媚晋曰买自戍卫已杀之矣然又惧楚之觉之也因告楚曰杀买者以不终戍也其首鼠畏罪譎诈无礼之状可谓至极然按之经文则似有未合者经先书晋侯伐卫随书公子买戍卫然後书楚人救卫是买之戍卫在楚救前斯时楚师尚未至而卫人已出其君而居于襄牛曰楚救不克何也且鲁之戍卫非为楚也吾尝以经考之卫成以初丧而为我平莒两会洮向旋以齐侵我而我伐齐即非楚好谁得不有以报之此原不必解免于楚况楚未来告救卫【据杜氏谓楚之告在戍卫後】且未尝约我戍卫终戍与否何用解免纵欲解免则晋先来告而我亦曾先解之乃书于册者独不书告晋之词而单书告楚者闻于国则可耻闻于诸侯则可骇向使闻於晋与楚则晋怨不解而楚亦未必以为德是一举数失虽在愚者犹不为而谓夫子为之乎且简书讳国春秋恒例果有此事何难直书曰刺公子买一如成十六年之书刺公子偃者此在列国杀大夫例原不必指实其罪况本权譎之词而可明载之简书自彰其恶而且以开两大之衅吾故曰左氏记事有因解经而反误者此又一证也盖不终戍者不成戍也不遇晋军不从君出奔而优悠无成公实憾焉故正其罪以刺之周礼有三刺之法一刺讯羣臣再刺讯羣吏三刺讯万民刺者讯也谓讯而杀之不枉滥也

楚人救卫

三月丙午晋侯入曹执曹伯畀宋人

畀宋人者以曹伯与宋也左氏谓分曹田与宋人公羊谓使之听断其罪皆非也楚方围宋晋欲借之以怒楚故执曹伯不以归晋而以畀于宋言使宋拘收之晋文譎而不正于斯见焉若分曹田此必无之事说见三十一年取济西田传

夏四月己巳晋侯齐师宋师秦师及楚人战于城濮楚师败绩

楚子入居于申使申叔去谷【前楚伐齐取谷】使子玉去宋【即围宋之师】子玉不从晋乃先退三舍避之所以报也【报前楚子飨之之德】子玉进战陈蔡之助楚师者先溃既而败绩城濮卫地名楚人救卫之师方至卫故战在卫地此皆经文之可据者

楚杀其大夫得臣

得臣子玉名

卫侯出奔楚

不名史失之说见前

五月癸丑公会晋侯齐侯宋公蔡侯郑伯卫子莒子盟于践土

此晋文大会也前此郑伯畏楚如楚致师及楚败而惧乃使子人九【大夫名】行成于晋晋侯与郑伯盟于衡雍【郑地】乃献楚俘于襄王王亲至践土【郑地】劳晋师享醴命侑【既飨又助以束帛】且使尹氏王子虎命晋侯为伯【方伯也】赐大辂戎辂之服彤弓矢各一旅弓矢千秬鬯一亩虎贲三百人晋侯受策出乃作王宫于践土且三入觐卫侯惧奔楚使元咺奉叔武以受盟于是王子虎盟诸侯于王庭【即践土王宫】其不及王子虎者以不与也是时陈蔡亦背楚来盟此书蔡侯後即书陈侯如会是也卫叔武不成君故称子其列国序次先後互异皆主会者为之并无义例

陈侯如会

公朝于王所

礼行在必朝所者王居之称诗献于公所孟子使之居于王所故汉制车驾所在曰所蔡邕独断曰行在所谷梁谓朝不言所误矣襄王亲至践土经无明文而于此见之经之互可考验如是若祇书公朝不及诸侯者言公则诸侯可知耳

六月卫侯郑自楚复归于卫卫元咺出奔晋

初卫成公以元咺自立叔武杀咺子之从公者至是晋人复卫侯甯武子与卫人盟于宛濮而後入及入叔武方沐喜握髮而出公子?犬为前驱射杀之公不知也乃杀?犬枕叔武之尸于股而哭之而元咺奔晋

陈侯款卒

秋?伯姬来

去年?桓公来朝公以他事遽伐之故此来解免伯姬者庄女?桓公母也三传皆不能解而杜曰归宁夫庄二十七年?伯姬来宁庄公也前五年杞伯姬来宁母成风也此归宁谁乎

公子遂如齐

此聘齐昭侯也昭侯本鲁壻且初立故聘之

冬公会晋侯齐侯宋公蔡侯郑伯陈子莒子邾子秦人于温【谷梁无齐侯二字】

据传会于温讨不服也是时卫许尚未服故谋讨之温者周邑之新赐晋者实周地也序次见前

天王狩于河阳【狩谷作守】

前此践土之会襄王居行所晋侯三朝诸侯皆一朝而退然此犹郑地也今大会于温温本周邑其去京师祇百里是俨然畿地而诸侯反不一朝不无阙然且晋所倚者秦也秦人入春秋以还初来与会晋侯思有以夸之特前此以献俘故王来劳师今祇会诸侯王不必再临其地若欲因会以入觐则朝王本诸侯事何足夸耀於衆不得已思周礼有冬狩之典趁此冬日名戒武事诸侯在所者自当执贄鼓以从借此会朝则一举两得此本借尊王以报私怨夫子所谓譎也召者请也古凡延请曰请召与呼召异今启王冬狩同于延请故旧传曰晋侯召王以诸侯狩是狩于河阳本晋文已然之事而夫子特去召字所以尊王章而讳晋恶非谓晋召王来而夫子改之曰狩也史记不识春秋妄谓晋侯召襄王襄王会之河阳践土夫襄王何尝与晋侯会乎况河阳践土并非一地践土劳师在夏月河阳田狩在冬月又并非一时一事若旧说谓九国之师并入王城恐惊天子故召之来则师次河阳诸侯入朝无可惊也谓诸国远道令其致温不便又令其致洛故须召王则温洛相去何几惜诸侯跬步而劳万乘之绌驾世无是理若曰天子田狩当在畿内今以天王而猎晋地是狩非其地故特书地以明失礼则又不然夫河阳非他即温也温本周地十年狄灭温前年王子带出奔温皆是也及晋文勤王而王始以阳樊温原诸地赐之晋文然皆叛不肯服晋而晋皆舍之复归于周如传称赵衰为原大夫狐溱为温大夫乃昭十二年传尚有周大夫原伯二十二年传又有周大夫樊齐则仍为周地可知也且文元年晋襄朝王于温矣夫惟温周地故可朝不然王不出居晋晋侯亦未尝召王来晋乃曰朝于温其谓之何

壬申公朝于王所

晋人执卫侯归之于京师

卫侯与元咺讼【争杀叔武事】甯武子为辅鍼庄子为坐【周礼命夫命妇不躬坐狱讼谓不亲对理故卫侯使三大夫对理】士荣为大士【大士治狱之官此士荣为对理之正故即加此名与辅坐别旧注士荣原官误】卫侯不胜杀士荣别鍼庄子谓甯俞忠而免之执卫侯归之于京师【方伯正其罪以上于王也】寘于深室甯子职纳橐飧焉【谓以衣橐置食其中宣二年传为之簞食与肉置诸橐以与之是也】

卫元咺自晋复归于卫

元咺归卫立公子瑕

诸侯遂围许

前温之会谋讨卫许故会甫毕而先执卫君旋即围许以许贰于楚也

曹伯襄复归于曹遂会诸侯围许

晋文有疾曹用?侯孺之言赂晋筮史使筮疾时以还曹伯为解遂复归曹襄伯名史凡出奔归国例当称名此与桓十五年郑公子忽复归于郑襄二十六年卫侯衎复归于卫例同胡氏谓伯赂筮史故贬称名夫文王囚羑里亦以赂免乃不贬受辛而贬文王可乎

二十有九年

春介葛卢来

夷无相朝之礼故祇书来言来而已此与襄十八年白狄来例同旧谓其用夷礼故不称朝非是介东夷国葛卢君名

公至自围许

夏六月会王人晋人宋人齐人陈人蔡人秦人盟于翟泉【翟公作狄会上公有公字】

此?践土盟且以谋伐郑者谓晋楚战城濮时郑伯如楚致楚师本助楚者及楚败归晋而晋即与之盟衡雍又盟践土其必盟践土者正以践土郑地所为示楚以服郑也然郑则何以对楚矣故于诸会之後仍修楚好总是晋文出亡郑文不礼故借此为词以伐之翟泉周地以王子虎为政故也史凡王国之臣使于外皆称王人并无贬例胡氏谓王人不宜与诸国盟故诸卿

称人会不书公一以示贬一以讳恶则前八年公会王人诸侯盟于洮襄三年公会单子诸侯盟于鸡泽皆王人也王人未尝不可盟盟亦何贬况史例卿大夫称人凡盟会侵伐皆然其有名有不名则随史文为之亦无定例至于会无公字经文多有全非讳恶如谓公与诸大夫为会故讳之则庄十六年会齐侯宋公陈侯卫侯郑伯许男滑伯滕子同盟于幽此齐桓衣裳之会其时所会皆国君也然反无公字襄二十六年公会晋人郑良霄【此正有名有不名之文】宋人曹人于澶渊皆大夫也反有公何耶

秋大雨雹

冬介葛卢来

介复来者以春时公在会未值也【此为次年介人侵萧张本】

三十年

春王正月

夏狄侵齐

秋卫杀其大夫元咺及公子瑕【三传皆分及公子瑕另作一节】

晋侯使医衍酖卫侯甯俞货医使薄其酖不死公用臧文仲之言为之请纳玉于王与晋侯皆十?王许之且喻晋侯曰君臣皆狱逆矣又为臣杀其君再逆矣一合诸侯而有再逆政不可乃归卫侯卫侯乃使周黻周冶先杀元咺及公子瑕而後入夫咺固有罪然不俟返国不明正其罪而私杀之且及子瑕则君臣俱失之矣故石碏杀州吁不书碏而书卫人以卫人皆得杀之也黻冶杀元咺不书黻冶而书卫则卫侯杀之矣华督杀孔父及君书弑君及孔父以宋公累孔父也黻冶并杀咺与瑕而书咺及瑕则瑕为咺累矣此与列国杀大夫同一书例而别有义者此文例也

卫侯郑归于卫

书名见前

晋人秦人围郑

晋文兴霸实秦之力今复来秦伯以伐郑虽秦本昵晋然秦穆多雄心相形之际未免怀猜乃因郑一言而中变焉此正秦晋交构一关键也据传秦晋围郑郑使烛之武见秦伯曰越国而以郑为鄙甚难何必亡郑以益隣国隣厚则已薄矣且晋颇背秦许秦以焦瑕之地而即悔之况欲难厌足既取郑以为东封万一欲更大其西封舍秦焉取哉秦伯悦乃与郑盟且使杞子

逢孙杨孙三大夫为郑戍守而去子犯欲击秦晋侯不许乃罢初郑公子兰出奔晋晋使从之伐郑兰不忍见围郑请勿与晋使待命于东界至是郑大夫请逆兰为太子以求成于晋晋许之杜氏云秦伯晋侯俱在军而微者帅师故称人夫君不亲将则大夫自将之此时舅犯亦在军何必微者说见前

介人侵萧【介夷国见前】

萧地近宋然为国为邑旧皆误注据宣十二年楚人灭萧当是宋附庸国定十一年宋公子自陈入萧宋乐大心自曹入萧则皆是宋邑不同

冬天王使宰周公来聘

宰周公见九年传

公子遂如京师遂如晋

如京师报聘也

三十有一年

春取济西田

济西曹地之近鲁者庄十八年追戎于济西是也但经书取必此时乘曹之危以力取之此与襄十九年取邾田哀二年取潞东田例同左氏误解前经畀宋人为畀物而此又忽取曹地则必前所畀者即此地矣因有晋文解曹地以分诸侯之传夫侵曹祇以救宋既已侵其国执其君斯已甚矣世无复分其地以与诸侯之理且救宋诸侯齐秦先之鲁未与也是时鲁方助楚而与楚盟之围城之下及晋伐卫鲁又拒晋而使公子买戍卫晋何爱於鲁而必畀以田若鲁得济西则曹地有几其与伐诸侯必不能给且秦处西陲安能越东诸侯国而收此隙地况伐国所得名曰归俘庄六年齐人来归卫俘是也夫归俘有二一俘人民一俘宝玉并无俘土田者即有土田亦当称归俘不当称取况与我曰归取彼曰取经例甚明按隐十年经书取郕取防左氏亦以为郑师取宋地而归之我然我师原在军且先与宋战及宋败而後取之故先书公败宋师于营而後直书之曰取言我取之也非归俘也即桓二年取郕鼎于宋亦我平宋难而取其宝即彼赂我亦可书曰取而无他辞若人之与我则见于春秋并无不书归而书取者乃公羊亦知难通又小变其说谓晋侯班曹所侵地以还诸侯而胡氏遂遵之曰复我故田而谓之取夫济上小国有何侵地即返侵地亦并书归不书取定十年齐人来归郕讙龟阴田是也且此济西田其为取为归经皆有之此取济西田则我取之曹也宣元年齐人取济西田则齐来平我之难而取之我也十年齐人归我济西田则齐取之我而今复还之我也然则取彼曰取取我亦曰取与我曰归还我亦曰归即济西本事有明着矣人欲传春秋而不予春秋全经一通读之可谓知春秋者乎吾故曰不以经解经而以传解经则虽左氏尚有误况其他也

【又晋伐曹在二十八年至三十一年始取田时亦不合】

公子遂如晋

夏四月四卜郊

不从乃免牲

郊者祭天之名以其祭于郊故名郊但郊祭有二一是报反之祭天子用之郊特牲所云大报本反始是也一是祈谷之祭天子诸侯皆用之孟献子所云郊祀后稷以祈农事是也此郊是祈谷之祭与报反异故鲁得用之而不为僭盖报反在子月郊特牲云迎长日之至周礼大司乐冬至祭于圜丘皆子月也祈谷在寅月月令孟春祈谷于上帝桓六年传启蛰而郊孟春夏正月启蛰者正月中气【汉初历启蛰正月中】皆寅月也今四月卜郊周之四月正夏之卯月以启蛰中气多在下月故三卜在寅四卜在卯皆系祈谷并未尝僭而公羊乃以鲁郊为非礼夫不行报反之祭而祇用祈谷犹非礼乎

鲁用天子郊禘并无考据在春秋亦并不一见明堂位造为成王赐鲁之说有云鲁君孟春【周正子月】乘大辂载弧韋祀帝于郊夫春秋九卜郊其在孟春只卜牲耳若卜郊则尽在四月经文现在也胡氏解春秋不信圣经而援明堂位无据之说以駁夫子真不可解先儒谓杂记无理引孟献子曰正月日至【冬至】可以有事于上帝七月日至【夏至】可以有事于祖夫曰可以或泛言恒礼不必即指鲁君然犹考春秋并无夏至禘庙之说以为其言妄诞况经书四月而传必解为孟春用天子之礼此何说也据襄七年传孟献子曰郊祀后稷祈农事也而孝经云郊祀后稷以配天是以后稷配本天子礼而鲁得行之即谓之僭不知此特以祈谷祀后稷非配天也郑玄误解禘尝谓禘即郊也以尝配之而刘炫借以辟杜氏有云夏正郊天后稷配也冬至祭天帝尝配也遂以夏正之郊亦配天之祭不知周末尝以帝尝配郊此显然与孝经配稷国语郊稷相反夫周正之郊配稷非配尝夏正之郊祀稷非配天盖稷本农官至周不改故祈农必祀之此与长至之郊截然不同而谓鲁不当祀稷是将使鲁无社稷也若天本无二郑玄谓有六天固非是但天一而随时可名如四时无异天然亦有苍天昊天旻天上天之称故月令迎气分祀五帝古伊训篇亦有越苒祀方明之文方明即五帝也周礼盟会亦以坛壝祀五帝日月是诸侯不祀天因不敢斥言天而借称五帝此不必纬书文耀钩有是名也特其称帝为灵威仰赤熛怒五名则不可耳若旧注谓此郊是祭苍帝是因方春祈谷之故与郑玄说周以木德王感德报本又不同

卜郊卜日也与卜牲不同郊用上辛虽报反之祭限在子月然仍不限之长至一日凡子月辛日皆可用其日上者以上更吉也若祈谷之祭则自启蛰以後春分以前皆得卜之所谓不过乎分者不得过春分也或谓月令元日祈谷似限朔日然元日与元辰对文元日谓卜天干如甲乙丙丁类元辰谓卜地支如子丑寅卯类则元日之元谓取上中下三干而卜其上董仲舒所谓郊必以上辛者【辛者新也故二郊皆辛日】万一不得则又卜其次故三卜在本月四卜则必在後月以此月中气有迟至後月者谓之下限若五卜则过矣然则卜日之数十日一

卜而谷梁泥于上辛谓一月一卜必得其上则四月四卜其为时为候不知凡几而尚谓冬至报天启蛰祈谷何以解之

左氏谓牛卜曰牲谓先期卜牲【按经文卜牲在子月卜日在寅月】牲虽得吉然卜日不吉则不得称牲而但称牛何则以不用也今不郊而称牲即谓非礼然观成七年免牛定十五年改卜牛其称牛者皆指卜牲不吉者言则不吉称牛吉即称牲与左说不合若公谷谓全曰牲伤曰牛则成七年牛不伤而称牛何也卜吉曰从尚书龟从筮从不从则不郊故免牲

犹三望

望祭名谓望而祭之礼凡郊祭必望祭山川之神以郊尊不独祭也然不郊则可已矣故曰犹言可已而不已也但天子方望无所不通诸侯祭域内名山大川今鲁限以三则正是诸侯之礼但限域内并非僭越观望则郊更可知也贾逵服?谓三者一是分野之星一是山一是川杜氏遵之公羊谓泰山一河一海一按古凡望祭无及星者祭法星为六宗之一与日月风云皆祭于坛不必望祭望则专指山川尚书望于山川柴望秩于山川是也若河则非鲁域内禹贡海岱及淮惟徐州徐本鲁地故郑玄谓三望者海岱淮也此为得之

秋七月

冬?伯姬来求妇【杜云自为其子请昏】

杞伯姬者?成公夫人也前二十七年伯姬子桓公初立来朝而我以他事伐之今伯姬为桓公求妇且以修好故特亲来此与桓二十五年伯姬归?及文十二年?伯来朝子叔姬卒诸经相为本末胡氏全不顾经并不知此伯姬为何人乃曰?伯姬敌矣其来求妇曷为亦书夫此不书而谁书乎

狄围卫十有二月卫迁于帝丘【于谷作於
旧本十二月下另作一节】帝丘卫地即毛诗顿丘帝顿声之转也

三十有二年

春王正月

夏四月己丑郑伯捷卒【捷公作接】

此郑文公也其不书葬者以文公初卒穆公始立而秦来伐丧故不会葬见後年传

卫人侵狄秋卫人及狄盟

此因卫侵狄狄来请平而卫与之盟其不地者杜氏云就狄庐帐盟言狄来卫地之穹帐以即在本国不必地也胡氏袭杜氏庐帐语又曰盟于狄非是

冬十有二月己卯晋侯重耳卒

三十有三年

春王二月秦人入滑

前三十年秦晋围郑时秦反与郑盟使杞子逢孙杨孙三大夫戍郑而去今郑文公死子密告秦使之来伐曰我掌郑北门之管若潜师以来国可得也秦穆以之问蹇叔蹇叔不可曰劳师以袭远非所闻也秦伯不听召孟明西乞白乙三帅出师于东门之外蹇叔以其子在军哭送之且曰晋人御师必于殽吾收尔骨焉秦师遂东及滑郑商人弦高以乘韦并十二牛假郑伯之命以犒师且使急告郑郑穆公新立乃视秦戍三大夫馆果束载厉兵秣马矣因使皇武子辞焉子奔齐逢孙杨孙奔宋孟明曰郑有备矣遂舍郑伐滑滑姬国入者入其国而不据其地也

齐侯使国归父来聘

国归父齐大夫国氏而归父其名者前二十八年公子遂聘齐此报聘也

夏四月辛巳晋人及姜戎败秦于殽【左谷秦下有师字】

晋襄初立闻秦师入滑晋大夫先轸以为秦不哀吾丧而伐吾同姓请邀击之襄公乃墨縗絰与姜戎败秦师于殽【晋地】获三帅舍之秦伯乃素服郊迎且悔不用蹇叔言作秦誓【今尚书篇名】晋襄亲在军而称晋人以先轸帅师襄不亲将也或曰秦不伐晋晋襄何必墨縗絰出军如是其急此正三十年秦晋围郑之役深有以中晋君臣之隐也晋文于围郑之後并不兴举饮恨而卒今秦伯无故伐郑灭滑一似借以窥晋者故先仲氏曰齐孝伐宋晋襄败秦皆霸者之後继世用心似未可以施德报怨恒理妄为解说此善於论世之言

癸巳葬晋文公

狄伐齐

公伐邾取訾娄【公作丛谷作訾楼】

公子遂帅师伐邾

前二十二年邾来伐战于升陞故此报之前鲁以不设备败故此亦乘邾不备连伐之胡氏谓

僖公念母故出师【二十二年邾灭须句僖母氏也公伐取还之】为越礼违义夫念母报怨其于礼义不大远也况鄆子鲁婿而邾戕之公战败失胄而邾尚悬之国门其能忘乎第公既伐邾且取訾娄【邾地】则襄仲再伐似可以已此亦直书其事而义自见者

晋人败狄于箕

白狄伐晋晋败之于箕【晋地】先轸死焉

冬十月公如齐【旧本此作一节】十有二月公至自齐

齐昭公我婿立已七年虽彼此聘问未亲会也乃三十年狄侵齐本年狄又侵齐故此以省难故如齐而还

乙巳公薨于小寝

小寝内寝也据经庄公成公俱薨路寝传以为得正道因有以路寝为正寝小寝为安寝之说按周礼宫人掌王之六寝谓路寝一小寝五诸侯三寝路寝一燕寝一侧室一则天子诸侯皆先路寝而後小寝燕寝似路寝为正死必在是然尝考路寝之制在王朝斧扆之外两楹之间天子诸侯退朝门而听政治者故礼注曰此治事之所似未可以供燕息者故郑玄亦云其尊者所不燕焉言其地尊严非所当燕处也则是薨于路寝者或偶薨于治事之所抑或属纆之时迁於其处如殷人殡两楹间其不及迁者则在小寝故小寝曰内寝路寝曰外寝其曰正者如後人称正殿正堂之类非谓死于路寝为正死于小寝燕寝即非正也况周礼尽亡所藉惟春秋一书而传春秋者率顺文立训并无取证故左氏无解而注三传者见经文有路寝小寝高寝【定公薨于高寝】三名遂曰诸侯三寝高寝第一路寝次之小寝又次之是不惟与诸礼三寝大异而又以路寝为次寝之名则所谓路寝正寝其说安在且高寝何寝乎【杜注高寝宫名】至丧大记又从诸寝名而附会之复有适寝下寝诸名然与春秋诸寝又究竟不合且其说皆似歛後迁尸而居于其所非属纆地也凡此皆礼亡而不可考者则但曰路寝正寝小寝内寝而已若谷梁胡氏谓路寝正小寝非正即不然

陨霜不杀草李梅实【陨公作霽】

先仲氏曰生杀皆不时所以灾也

晋人陈人郑人伐许

传称貳楚未详

春秋毛氏传卷十七

卷十八

钦定四库全书

春秋毛氏传卷十八

翰林院检讨毛奇龄撰

文公【公名兴僖公子母声姜夫人出姜諡慈惠爱民曰文】

元年

春王正月公即位

周制遭丧即位踰年改元其改元时自当在既葬之後然或冬尽遭丧遽当岁首则虽未及葬而已即有改元即位之事此文之即位所以在葬僖之前也胡氏不识典例谓新君即位必当告庙既当告庙则必易服而离次未有初丧服始成而即可易服可离次者故太甲告庙伊尹摄行康王即位尚未成服其言甚辨殊不知改元即位商周不同商制踰月改元【尚书孔注谓成汤十一月死太甲十二月改元】周则踰年改元商祇一即位周有两即位【遭丧一即位踰年两即位说见前】毋论此时即位是逾年即位与遭丧不同而即以遭丧言从来丧中即位并不告庙商书祇见厥祖周书三宿三祭皆是仓皇之顷急就殡宫而奠之谓之奠殡并无入庙飨告之礼胡氏误读尚书远据尧舜禅受上格文祖而不识周制周凡国君将薨则先祷于庙及甫薨又复于庙【以衣呼复】至既薨之後则宗祝歛羣庙之主藏于太室以示弗祭【天子七月而後祭诸侯五月大夫士三月】当是时寢室枵然主尚无有亦安得有庙之可告若谓太甲奠殡伊尹摄行则尚书明言嗣王见祖太甲俨在未有身亲临奠而可云摄者且商周异制高宗三年不言与康王八日作诰回然不同故论语于百官总己曰古之人皆然以为此古制也孟子于五月居庐未有命戒曰鲁宗国莫之行滕先君亦莫之行【数语始明不然岂有三年丧并未行者】以为从来周制无此事也至谓康王即位有成服前则尚书本文显有时日成王以乙丑日崩即于当日迎康王入寢宅忧恤宗则已俨居丧次矣乃越三日丁卯而作册又越七日癸酉而後即位诰羣臣考之通礼天子七日而殡殡而成服而周制则大夫以上皆以死之明日起数则自乙丑至壬申已七日成服至癸酉则八日矣是成服之後又越一日夫然後即位作诰成服者不必不易服居次者不必不离次也至于释冕反服则正以易服之故至事毕而然後释去麻冕反服丧服而胡氏又误以反服为成服夫反者还也礼所谓既除丧已反服其服是也曾成服而反服也乎

二月癸亥日有食之

杜氏曰日食不书朔官失之

天王使叔服来会葬

叔氏服字王朝大夫据传是内史官

夏四月丁巳葬我君僖公

杂记诸侯五月而葬今僖公以去年十一月薨至此已逾一月矣故传以为缓若杜氏谓是年三月闰并闰数之是七月始葬则葬与丧服无数闰者杜说非也

天王使毛伯来锡公命

此襄王也锡公命锡文公命也毛伯毛国伯爵以入为卿士遂世为王臣而食采于毛者凡诸侯新立王有锡命则锡瑞之命也周礼大宗伯以玉作六瑞以等邦国【公执桓圭侯执信圭伯执躬圭】谓之命圭以命而後锡也诸侯既薨王亦有锡命则策谏之命也周制王遣卿士下吊锡以哀词谓之追命以追叙其德也前此锡桓公命是锡追命与昭七年王使成简公如卫吊且追命襄公例同此锡文公命是锡命圭与僖十一年天王使内史过锡晋侯命侯受玉【即圭】不敬例同公羊以锡命为赐服此据诸侯七命冕服七章而误者若胡氏据谷梁历引诗序以为王无来锡之礼是乌知春秋本文自有典例不烦诗序乎

晋侯伐卫

卫成公屡为晋执讐晋不朝且侵郑焉【以郑服晋也】晋襄在祥练之间使告诸侯以伐卫至南阳用先且居谋朝王于温而转使胥臣伐之围戚【卫邑】取其地获孙昭子而还【守戚者】其转遣大夫而仍书晋侯从初帅师也

叔孙得臣如京师

拜锡命也【何休谓丧聘误】得臣者叔牙之孙

卫人伐晋

前晋人伐卫卫使告于陈陈共公不平谓晋卫敌也不朝而伐之围其邑俘获其守臣何其甚也盍报伐之乎卫以为然遣孔逵帅师伐晋报围戚也左氏曰君子以为古以为庶见古道焉

秋公孙敖会晋侯于戚

公孙敖鲁大夫庆父之子时晋侯取戚而疆其田故往会之此与宣十九年公孙归父会齐侯

于谷昭十一年仲孙貜会邾子于祫祥例同

冬十月丁未楚世子商臣弑其君頤【公谷作髡】

传楚子将立商臣为太子令尹子上沮之不可既又欲立庶子职而黜商臣商臣乃与其师潘崇谋以宫甲围楚子楚子请食熊蹯而死弗听遂自缢商臣立以其室赐潘崇使为太师且掌环列之尹

公孙敖如齐

礼凡君即位卿出并聘传曰穆伯如齐聘礼也

二年

春王二月甲子晋侯及秦师战于彭衙秦师败绩前此殽之役晋人既归秦帅或以罪孟明秦伯曰是孤之罪也仍使为政至是秦谋报复重遣孟明伐晋战于彭衙更为晋所败晋人谓之拜赐之师【以孟明言三年将拜君赐故诮之】但彭衙不知何地公谷注秦地而杜氏亦云冯翊合阳有彭衙城如此则仍是晋伐秦非秦伐晋矣此必注有误者若晋侯本御秦而反称晋侯及秦者以晋襄有意伺敌身亲帅师虽名为客应而实则主之故书法如此胡氏必以此为晋侯罪则不然此与僖二十二年楚人来伐宋而反书宋公及楚人例同

丁丑作僖公主

据传凡君薨卒哭而祔祔而作主【言因祔作主非祔後始作主也】而考诸礼文则卒哭在虞祭之後祔又在卒哭之後大抵诸侯之礼五月而葬【天子七月诸侯五月】葬日即虞而诸侯有七虞【天子九虞诸侯七虞】七虞之明日然後卒哭【杂记天子九月而卒哭诸侯七月而卒哭此战国言礼与周制不合】卒哭之明日然後以主祔庙【士虞礼明日以其班祔】是作主在五月之後祔庙之前率以卒哭为度【卒哭日当主成】今僖薨在三十二年十一月而文元年四月始葬则逾一月至二年二月始作主则又逾十月故传曰缓曰不时此实录也何休公羊注不检经文谓逾十九月既已误矣又公羊谓丧有二主一是虞主一是练主【谓练时别作一主】则遍考诸礼文并无其事且曰虞主用桑练主用栗则国语晋文设桑主在献公久丧之後并非虞时即论语问主以松以栗则栗固有之然未闻期练时可易主也若谷梁依附公羊分丧主吉主且曰吉主于练坏庙易檐亦于练谓新主将入庙而先坏旧庙而易其檐皆当在练祭之候则又全不知周制者周制君薨即斂羣庙之主而藏于太室以五月不举祭也至祔之前一日则以新主将祔庙而先迎羣庙之主以还旧庙使新主可祔然祔主之礼第迎新主于祖主之旁而祖孙并祭之【礼所云孙从祖】祭毕即迎主还寝而羣庙羣主则仍安旧庙以便行祭左氏所谓特祀于主烝尝禘于庙者至禫後丧毕夫然後迁主入祧而禘新主于庙焉是练祭之时羣主正在庙并非虚庙岂有先君之父俨居此中而可易其檐毁其屋者公羊道听不晓祔庙之非吉禘故吉禘庄公不解何祭而此又疑卒哭而祔不

无太急因创为期练之祔【惟两祔故造两主】以为卒哭行祭先用丧主而期练即吉则始作吉主入祔而不知练祭非吉祭祔庙非禘庙期年非迁庙之时祥练无致主之礼古礼与周制无一而可吾故曰公谷言礼皆战国儒说往往与春秋多不合非虚语也

三月乙巳及晋处父盟

据传晋人以公不朝【晋襄初立鲁卫俱不朝】来讨公如晋晋使阳处父盟公以耻之是公亲至晋而晋侯不出会但使大夫与公盟则辱甚矣故不书如晋并不书会于何地一似不知有晋并不知是盟之在晋地者此文例也此所谓春秋讳辱之书法也若大夫与国君盟则礼例有之并无贬义其书及与成三年及孙良夫盟同书处父无氏与桓十一年柔会宋公陈侯蔡叔盟于折同

夏六月公孙敖会宋公陈侯郑伯晋士穀盟于垂陇【公谷作垂斂】

晋以鲁卫俱不朝伐卫讨鲁故公知晋尚未还而晋复讨卫以卫方抗晋未能平也前此晋侯疆卫田时公孙敖曾往会晋侯于戚而卫之伐晋则陈共公劝成之故卫遣孔逵帅师以图报复而不虞卫之非晋敌也至是陈共公不安乃邀敖并诸侯求成于晋而晋使士穀受成因有是盟是时陈侯并执卫孔逵以求说於晋以为前此报伐实孔逵为之经不书者为诸国讳也但公尚在晋敖不受公命而出似乎过专旧注谓命卿守国例得专行故经无贬文且于同恶相恤之义有并切焉若谓士穀能任事贵而见书则天下有君使之受成而可告不能者乎士穀士蔦之子垂陇郑地名

自十有二月不雨至于秋七月

杜云周七月今五月也不雨足为灾而不书旱者以未为禾稼害耳

八月丁卯大事于太庙跻僖公

大事者吉禘也【见闵二年传】竹书吉禘于先王许慎谓三年丧毕则致新死之主于太庙而合羣主而祭之本谓之祫【公羊称大祫】其又名禘者以谛视昭穆故也但禘须禋後一月士虞礼称禋月吉祭犹未配妣故必当踰此禋月始可行吉禘之祭而礼记又谓吉事先近日谓禋祭以前其卜日皆先远日从下旬起卜而此是吉祭可先卜上旬是明明于禋祭之後改月卜日【上旬必须月初】在二十七月之後今计僖薨至此祇二十二月其于再期之祥尚阙三月而遽行大事则非礼矣至跻僖公则又一失礼事而连记者据传僖公是兄闵公是弟而闵先兄立其于四亲庙中已在祫庙今僖将入祔而宗伯夏父弗忌欲依兄弟为先後因易其昭穆令闵仍在穆而升僖公於昭庙谓之跻僖然而逆矣【孔子讥臧文仲纵逆祀】尝考庙次与世次不同世次以伦叙言而入庙之次则一以传位之先後準之国语云工史书世世即世次如曹为文昭晋为武穆是也又云宗祝书昭穆昭穆即庙次如懿王侄而孝王叔则孝之嗣懿侄昭叔穆以侄先入庙而叔继之也平王祖而桓王孙则桓之嗣平祖昭孙穆平不

得有子在穆则桓亦不得有父在昭也盖昭穆者父子之别名凡昭即是父穆即是子而祖祢者则又祖庙父庙之定位凡先入祢庙即于新君为之父而继入祖庙则又于新君为之祖是以就世次言闵僖本兄弟而就庙次言则在闵僖为君臣为父子而在文公则僖为祢而闵为祖故宗有司曰子虽齐圣不先父食久矣言僖未入庙时闵踞父之庙而先僖而食者且三十三年【僖在位之年皆祭祢之年】不可为不久也【旧以父子喻君臣谓君即父臣即子非是】而公羊又曰其逆祀奈何先祢而後祖也以为祀有何逆如文公之先父祢而後闵祖即谓之逆【旧谓祢是亲祖是庄非是】然则僖不得跻闵庙次之不得同世次有断断者若何休又云兄弟同次不分昭穆鲁惠南向则隐桓皆北向庄公南向则闵僖皆北向其所云升亦但同向分上下耳则不然母论宗祝所争明争昭穆与所言不合而即曰同次同宫耶抑异宫同向耶同宫则一庙无二主必欲通变或中一以祢【如闵僖一祖一祢已踞二庙而僖复有弟则祢之闵傍谓之间一祢祖又谓之孙从祀】一正一傍不得同向而苟其异宫则诸侯五庙二昭二穆闵僖既两穆尚得有隐桓耶无隐桓尚有惠耶且庄已在昭二矣闵可在穆一耶夫南向北向就太室合食言之而合食之次即东西分宫之次无二次也休但以合食妄论而不知于宫庙之位有大戾者周礼尽在鲁何可使言礼舛错如此

冬晋人宋人陈人郑人伐秦

晋复连诸国大夫伐秦报彭衙之役取汪及彭衙而还此大夫帅师而不以名告即不书并无贬例

公子遂如齐纳币

此不知月日然传称有礼则必在十二月再期後矣纳币说见前

三年

春王正月叔孙得臣会晋人宋人陈人卫人郑人伐沈沈溃

据传庄叔会诸侯之师伐沈以其服于楚也溃者衆散也沈小国名

夏五月王子虎卒

王子虎者即王叔文公也前此僖二十九年经书会王人盟于翟泉传以王人为王子虎则虎本王子而諡文者凡有諡必有爵其但称王子杜氏以为必天王命赴故特书其亲不书其爵礼或有然若公谷谓虎是叔服即元年来会葬者以新使乎我故来赴则叔服为周内史传称内史叔服能相人曾为公孙敖相二子者此别是一人非子虎也

秦人伐晋

秦伯伐晋济河焚舟取王官及郊【晋地】晋人不出乃自茅津济河封殽尸而还遂霸西戎是时帅师当不出孟明而并不指名故书人凡人皆国之通称原不以将之尊卑师之多寡为言不然晋人不出岂卑者不出乎抑不出之师有多寡乎说见前

秋楚人围江【江小国名见僖二年】

雨螽于宋

雨螽传谓螽队而死故如雨不然螽飞无如雨之理此不以灾书以异书者而谷梁独曰灾甚茅茨尽矣着于上见于下谓之雨谓如雨之得穿屋而下也则安见螽之雨宋必屋下地乎

冬公如晋十有二月己巳公及晋侯盟

传晋人惧其无礼于公也请改盟【改二年处父之盟】公如晋及晋侯盟晋侯飧公赋菁菁者莪庄叔以公降拜晋侯降辞登成拜【礼凡君燕臣臣降阶再拜君辞之则升成拜此拜下礼也今公谦亦降阶将拜而晋侯亦降阶辞之故升成拜】公赋嘉乐

晋阳处父帅师伐楚以救江【公谷无以字】

传晋以江故告于周王叔桓公【即王叔文公之子】晋阳处父伐楚以救江门于方城遇息公子朱而还【子朱楚大夫伐江之帅师者今闻晋来伐撤围而还】其不书王人者以桓公不帅师便不得书诸国大夫後也按城濮之战晋文伐卫以致楚此则晋襄伐楚以救江其用计虽同而此为较正但江黄楚属不当与争齐桓会江黄而楚灭黄此以救江而楚反灭江不惟为德不卒且以一救而灭之矣胡氏动辄云上告天子下告方伯今晋襄继文思逞而此又先告天子宜无所讥乃复曰宜合诸侯则是撽伐胜征讨矣且曰独遣一军远攻强国必不能济故书此以为春秋纪用兵之法则向使晋如法以行令秦甲出武关齐以东兵略陈蔡而南而江已灭之久矣且此时之晋能必齐秦之皆至乎今师甫至楚而围江之师即撤之而还则救似有济而特恶其不终救而反致灭也则仍是罪耳

四年

春公至自晋

前垂陇之盟晋於鲁卫皆受成焉今鲁复就盟而卫憾亦释因于公还时并释孔逵归于卫曰此卫之良也【二年卫执孔逵说晋】卫侯亦如晋拜焉

夏逆妇姜于齐

此文公娶夫人也礼娶大国以上卿往迎此以所迎非上卿故不书然非礼矣若称妇姜则并

无贬例凡娶在家称女在途称妇两皆可称此与庄十九年公子结媵陈人之妇宣元年夫人姜至自齐例同公羊谓此所娶者必齐大夫之女以非国君女故贱之谷梁谓不书卿逆者公自逆也称妇者公自逆而即在齐成婚也是不据策书不考史事一如唐人作赋得题但取题中字凭臆撰造嗟乎春秋此时已亡矣若胡氏谓文公丧娶禫制未终而逆女故贬称妇则试取夫子经文较之僖以三十三年十一月薨至此四年夏已四十月矣天下有四十月而禫制未终者乎或曰此云禫制以纳币时言前此纳币在二年之冬则正值二十五月为大祥易服之际故原意诛之则春秋书法未有诛纳币而贬逆妇先王制礼亦无有当大祥而称禫制者其为理之难通已非一节且周制二十五月即可娶妇考士虞礼荀子三年问诸书无不曰二十五月而免丧而曾子问曰免丧则不复昏礼乎言必当昏礼也是再期大祥原可娶妇并不待禫服之终制与否而况纳币非娶妇大祥不禁娶而谓禫制禁纳币乎向予避人在禹州与客论三年丧制予坚执三十六月因作三年之丧不折月说【见丧礼吾说篇】然犹断言嫁娶之期在禫纆以後虽非再期然亦不必尽三十六月盖不以一礼废诸礼有如是矣儒者注经贵有贯穿岂可释春秋以礼而茫不识礼制乃尔

狄侵齐【狄为齐桓所惩久矣至是以齐昭势稍衰因屡侵之】

秋楚人灭江【惟秦伯为降服出次不举曰矜灭国也】

晋侯伐秦

晋侯伐秦围邠新城以报王官之役其书侯以亲帅师也胡氏不知例以为书晋爵者正所以深善秦伯夫称桀为帝而谓之尊尧可乎

卫侯使甯俞来聘

甯俞卫大夫即甯武子也公与之宴赋湛露及彤弓不辞又不答赋公使问故曰臣以为肄业及之也【肄业习乐也】昔诸侯朝王而王宴之则赋湛露诸侯献功而王赐之则赋彤弓何敢干大礼以取罪戾

冬十有一月壬寅夫人风氏薨

此礼例也夫人者庄之媵僖之母也媵无称夫人者惟其子嗣位则母以子贵正名夫人以子既为君则邦人上下不敢于君之母有异称也但适夫人在则丧葬诸礼不能备文至适夫人薨而耐姑反哭成丧诸礼无一不备则并书曰葬我小君某氏所以正其为夫人之礼也今适夫人哀姜早已死齐则此称夫人後此书葬于礼最宜而胡氏以为越礼误矣【详见丧礼吾说篇】春秋书法谨严全在比例後此以子贵正夫人者三一宣八年一襄四年一昭十一年皆先书夫人某氏而後书葬我小君某氏前後一例并无异词则此在鲁行之谓之礼而在史官书之即谓之例故曰此礼例也胡氏不识礼例先以此极贬风氏而後于敬嬴则与此所贬不合无所置喙但曰无如何夫无如何而可以注经也乎风氏即任氏後何休曰任宿颺與之

姓

五年

春王正月王使荣叔归含且赠

此襄王也荣叔者王国大夫荣采而叔字者礼有饭含谓以物实死者口也周礼玉府大丧共含玉杜氏注珠玉曰含赠者赠丧物也【见隐元年】周制天子有赠送诸侯小君之礼其赠物等数惟二王之後有含有禭有赠有赙四者俱备若诸侯则含且赠而止小君亦如之是归含且赠正与赠诸侯小君礼合无所过也胡氏不识礼又不识例妄谓天子赠诸侯之妾废王法而乱人伦故天王削天以贬之夫母以子贵正名夫人在前已言之屡矣犹是诸侯之妾则已耳既正名夫人正名小君则书薨书葬是礼来赠来会葬亦是礼未有在本国已赴告薨葬而反罪天子以赠送者况书薨书葬在後此宣八年襄四年昭十一年已有成礼书赠书天王则前此隐元年已有成例吾故曰此是礼例其不书天者阙文也【说见前】若公羊谓含赠宜二使今兼使非礼则杂记云诸侯相吊含禭赠临同日而毕况天子乎谷梁谓赠早含晚两不及事则邦国异地赴告不迭从未有能逮事者故诸侯既殡来含则以苇席承含物既葬来含则以蒲席承含物明殡葬之後皆可致含未尝晚也若赠则将葬以前先赠车马正是及时而又以为早何与

三月辛亥葬我小君成风

正名小君反哭成丧则书葬礼也此与宣八襄四昭十一年书葬例同胡氏以二夫人祔庙为乱伦失礼则礼凡葬後无不祔庙者虽天子诸侯庙制无考其继室以子贵者或别立一庙如隐元年考仲子之宫类要之当其葬後卒哭则必先祔庙而後三年而始易庙焉杂记所谓主妾之丧则主人自祔是也若三年入庙则後世天子祇以一帝一后为太庙之制其于春秋以前礼未知若何如以大夫士礼推之则凡诸妻妾无不同庙小记云妇祔于祖姑【庙制孙从祖故孙必间一位而祔祖】祖姑有三人则祔于亲者三人谓适与继与妾也【或云一适二继则继何限于二】适孙妇祔适祖姑继妾之孙妇祔继妾祖姑则妾不已在庙乎又云妾祔于妾祖姑夫妾不入庙而可有在庙之妾祖姑乎

王使召伯来会葬【谷梁作毛伯】

传召昭公来会葬礼也【召采地伯爵】

夏公孙敖如晋【三年冬公与晋侯盟此修好焉】

秦人入郟【初郟叛楚即秦今又贰于楚故入郟入例见前】

秋楚人灭六【六人叛楚即东夷故楚灭六六国今庐江县】

是年冬楚又灭蓼臧文仲闻之曰皋陶庭坚不祀忽诸【二国皆皋陶後】德之不见民之无援【无大国援】哀哉

冬十月甲申许男业卒

六年

春葬许僖公

夏季孙行父如陈

传臧文仲以陈卫之睦欲求好于陈故聘之且娶焉行父季友之孙即季文子也是年秦穆公卒以子车氏之三子为殉【称三良】不告故不书

秋季孙行父知晋

季文子将聘晋闻晋侯疾使求遭丧之礼以行【谓丧中所用币物】杜氏曰论语所谓三思此其一也

八月乙亥晋侯驩卒【公羊驩作謹】

传晋襄公卒灵公少【灵公适子穆嬴所出】晋人以难故欲立长君赵孟【即赵盾】请立公子雍【襄公庶弟杜祁所出】贾季【即狐射姑】曰不如立公子乐【亦襄公庶弟怀嬴所出】赵孟曰乐母淫且贱班在九人乐僻处在陈无援雍母杜祁【杜伯之後祁氏】让偏姑【襄公母】而下之又让季隗【狄女】故班四而雍仕秦为亚卿焉乃使先蔑士会如秦迎雍贾季亦使召乐于陈赵孟乃伺乐至郕【晋地】使杀之孟之专而无礼如此余见七年晋先蔑奔秦传

冬十月公子遂如晋葬晋襄公

晋杀其大夫阳处父晋狐射姑出奔狄【谷梁晋狐射姑下别作一节射作夜】

前五年晋赵衰栾枝先且居胥臣皆卒至六年晋蒐于夷【晋地】舍二军【先蒐清原作五军今复三军制】改择诸将佐以补赵衰等三军之阙已使狐射姑【即贾季狐偃之子】将中军赵盾【衰子】佐之而阳处父至自温【从使卫返】改蒐于董【亦晋地】易中军【盾为帅射姑佐之】阳故党赵氏至是曰盾能使能国之利也及晋襄卒既葬贾季怨阳子之易其班也使续鞫居杀处父十一月晋杀续简伯【鞫居字】而贾季奔狄按贾季以私怨实杀上卿而经书晋杀一似假国刑以贯其罪而实不然者季使续鞫居杀处父而鞫居已正法则贼已有人而贾季之罪反匿不着故策书有晋杀续简伯而简独不书但曰晋杀阳处父则

此时先君已葬而新君未定谁杀之者是一书晋而必求其故以得其人此文例也公羊道听造言晋君欲将射姑而处父谏沮及处父出射姑入而君与射姑言之射姑怒遂出刺处父于朝而走则一时之事此时晋襄方葬晋灵未立不知此君是何君无理极矣谷梁袭其说颇知难通因作为两时之事谓晋襄与狄战射姑为将处父请公易赵盾而公见射姑而泄其言及公死射姑杀处父则晋襄何人其沉密有算历见成事岂有直告所言如蜀汉五伐诸愍主者且晋自五年之冬诸将佐卒至六年春复置三军然後补盾与射姑而其年甫秋而晋侯即卒并无狄侵晋与晋伐狄之事谷梁徒以射姑出奔狄而遂曰晋与狄战此思黻公羊之阙而仍有漏者乃胡氏又遵之何也

闰月不告月犹朝于庙【告月一作朔】

告月告朔也周礼太史颁告朔于邦国郑玄云天子颁朔于诸侯诸侯藏诸祖庙至月朔则朝于庙告而受行之其告庙之礼则诸侯用特羊论语所云告朔之饩羊是也至告朔毕则即以是日听视此月之政谓之视朔亦谓之听朔玉藻天子听朔于南门之外诸侯皮弁听朔于太庙是告朔视朔本是两事文公此时但不告朔而犹视朔至十六年公四不视朔则并视朔亦亡之矣但此是闰月公谷以为原可不告朔如丧事不数闰类【葬与丧服俱除闰数月】闰者附月之余日也则不然闰有气有候气候所至虽分属前後两月而逐候逐日皆有时政左氏所云时以作事岂可因闰月而并捐之且不闻闰之为义乎天子遇此月则听朔于明堂闔门左扉而立其中以听此终月之政因作闰字象一王之居门内是闰以此名而反曰闰不告朔谬矣祇朝庙有二解杜氏谓每月必告朔因朝宗庙是朝庙为告朔设故曰犹朝于庙谓一事而不行在彼犹有行在此者如三望因郊而设而不郊而犹三望则谓之犹此本一事而分行者而孔氏疏谓是两事告朔一事朝庙是朝享祭法所谓月祭者又是一事古者月朔必祭庙不关告朔在月朔行之谓之朝享在岁首行之即谓之朝正其曰犹者谓不行彼礼犹行此礼也按日祭月祭见诸国语然不明言祭于何庙而祭法则云王立七庙曰考庙王考庙皇考庙显考庙祖考庙皆月祭之二祧享尝乃止【只时祭也】诸侯五庙曰考庙王考庙皇考庙皆月祭之显考庙祖考庙享尝乃止是诸侯月祭未尝及祖庙也告朔在祖庙所云诸侯受而藏诸祖庙者而月祭朝享皆在他庙安可以祖庙之朝庙濶作月祭若岁首朝正则又合七庙五庙而并朝之其云朝正即朝享朝享即月祭皆非也孔氏言谬也

春秋毛氏传卷十八

<经部,春秋类,春秋毛氏传>

卷十九

钦定四库全书

春秋毛氏传卷十九

翰林院检讨毛奇龄撰

七年

春公伐邾【为其灭须句也】

三月甲戌取须句【公作胸】

须句鲁封内之国前此僖二十二年邾曾灭须句矣僖公伐邾取须句盖取而还之也至是邾又灭须句文公又伐而取之乃不还其国而以邾公子在鲁使守须句则絶太皞之祀忘君祖母之讎【须句与僖母成风同姓】纵隣小之暴一举而三失备焉但前书取此亦书取似乎无别而实有别者凡取必我得之彼者也乃前既书取而为我得矣亡何而今复书取是前此所取未必得也前取未必得而谓今取得之乎而于是检之传文所谓因经以见传因简书以见策书此书例也若其义则比观其事而义自见者其於书例无与焉说见前

遂城郕【郕鲁邑以备邾故城之】

夏四月宋公王臣卒【谷作壬臣】

宋人杀其大夫

传宋成公卒子昭公立以公子成为右师公孙友为左师乐豫为司马鳞矐为司徒公子荡为司城华御事为司寇昭公将去羣公子乐豫沮之不听穆襄之族率国人以攻公杀公孙固公孙郑于公宫六卿和公室乐豫舍司马以让公子邛昭公始得即位而葬其不书杀者与所杀者名以杀者不得其人而所杀者又不得其故则略之一如策书之本无其事者与庄二十六年曹杀其大夫僖二十二年宋杀其大夫例同

戊子晋人及秦人战于令狐晋先蔑奔秦【蔑公作昧奔上有以师二字】

前此晋襄卒时赵盾以灵公少迎公子雍于秦秦康公多与之徒卫以入尚未至也既而穆嬴【灵公母】日抱太子以啼于朝曰先君何罪其嗣亦何罪舍适嗣不立而外求君将焉寘此

出朝则抱以顿首于盾曰先君奉此子而属诸子今君虽终言犹在耳而弃之若何盾患之乃背先蔑而立灵公且创谋距秦师秣马蓐食【早食于寝蓐】潜师夜起败秦师于令狐【秦地】先蔑与士会奔秦是传有可疑者四前传赵盾使先蔑士会迎公子雍于秦而雍尚未至则此时先蔑当在秦也经云晋先蔑奔秦正以先蔑从秦来而晋败之故还奔此了然者今晋师拒秦而云先蔑将下军疑一拒秦之谋创自赵盾盾曰我受秦则宾不受则寇也既不受矣而复缓师则秦将生心然後夜起以进兵而传于盾谋之前已早有御秦之师行及堇陰疑二先蔑既将兵御秦已及堇陰是先蔑本拒秦者也及令狐之败而又奔秦疑三士会随先蔑使秦未知其在秦与否若御秦之师则历数有人并无士会在军也及先蔑奔秦而士会从之疑四凡此皆策书稍脱而传辑其文而必有误者若其事则盾实无道擅废立起隣衅杀乐拒雍走贾季先蔑士会罪大恶极亦第书其事而义自见者公谷必以经书人为先蔑贬夫先蔑何贬焉

狄侵我西鄙

秋八月公会诸侯晋大夫盟于扈【郑地】

公以晋侯之立与诸侯晋大夫盟于扈其不书诸国名者以公後至未尝以国通也此与後十五年诸侯盟于扈十七年诸侯会于扈并同

冬徐伐莒

公孙敖如莒涖盟【涖公谷作蒞】

穆伯娶于莒曰戴己生文伯其娣声己生惠叔戴己卒又聘于莒莒以声己辞乃为襄仲【穆伯从弟】聘焉至是徐伐莒莒人来请盟穆伯如莒涖盟且为仲迎婚至鄆陵见之美自娶之襄仲请攻之叔仲惠伯【叔牙孙】谏于公使两皆不娶而返之莒焉

八年

春王正月

夏四月【是月秦伐晋取武城以报令狐之役】

秋八月戊申天王崩【襄王也】

冬十月壬午公子遂会晋赵盾盟于衡雍

晋以扈之盟公後至来讨故报盟焉衡雍郑地名

乙酉公子遂会雒戎盟于暴【雒公作伊雒】

时雒戎将伐鲁遂不及复君故专命与之盟所谓大夫出境有可以安社稷利国家者专之可也此与庄十九年公子结及齐侯宋公盟同暴郑地

公孙敖如京师不至而复丙戌奔莒【公无而字】

穆伯如周吊丧不至以币奔莒从己氏焉

螽【公作 𧈧】

宋人杀其大夫司马宋司城来奔【公谷宋司城下别作一节】

据传宋襄公夫人襄王之姊也昭公不礼焉【昭公适祖母】夫人因戴氏之族【华乐皇皆戴族】以杀襄公之孙孔叔公孙锤离及大司马公子邕【即前乐豫让司马者】皆昭公党也司马握节以死司城荡意诸【公子荡之孙】致节于府人而出因来奔【传又云公以其官迎之礼卿违从大夫公贤其致节故迎以原官焉】

九年

春毛伯来求金

求金即求赙供葬用也不称王命者未葬也【未葬不称王无命】此与隐三年武氏子来求赙例同毛伯见前

夫人姜氏如齐【归宁也】

二月叔孙得臣如京师辛丑葬襄王【公谷辛丑下别作一节】公不亲往而使卿共葬事非礼也说见隐三年天王崩传得臣叔牙孙【即庄叔】

晋人杀其大夫先都

前此晋蒐于夷晋襄将登箕郑父先都为上军而使士穀梁益耳将中军先克曰狐赵之勲不可废也乃以狐射姑【狐偃子】将中军而赵盾【赵衰子】佐之【在前六年】及御秦师又夺蒯得田于董阴【在前七年】至是箕郑等贼杀先克晋人讨贼乃杀先都梁益耳其不书贼杀先克者以不告故也大抵国杀大夫原系重事然告则必书不告则不书并无义例而至于书例则第书其事而其义自见亦并无书名书人之法行乎其间如此称晋人谓彰国讨书先都者谓正贼之名则前七年宋人杀其大夫是大夫为贼杀者也而彰国讨可乎前六年晋杀其大夫阳处父阳处父为贼杀者也乃又书其名然则贼书名为贼杀者亦书名可乎

三月夫人姜氏至自齐

晋人杀其大夫士穀及箕郑父

此亦晋讨贼书也事见前传其不同月杀者以得情有先後也及者次及之也此及字与襄二十三年陈杀其大夫庆虎及庆寅例同谷梁不通书例谓箕郑父累及之故称及是以晋弑君及荀息宋弑君及孔父仇牧为例失之甚远而胡氏过遵谷梁遂谓三人中必有可从末减者夫箕郑父首恶而可末减乎据传尚有蒯得梁益耳二人在经文外其讨之周罗无少遗者以先克党盾是时盾为政而恣刻情以行之故得如此【释春秋者当以此论事论世体夫子窃取之义而妄以书名书人书及矫强论说欲春秋不亡得乎】

楚人伐郑公子遂会晋人宋人卫人许人救郑【公谷公子遂下另作一节】

传范山【楚大夫】言于楚子曰晋君少不在诸侯北方可图也楚子师于狼渊以伐郑囚公子坚公子彪及乐耳【皆郑大夫】郑及楚平公子遂会晋赵盾宋华耦卫孔達许大夫救郑不及而还其不书诸大夫名以不及战不知帅师何人也左氏曰缓缓不及也

夏狄侵齐

秋八月曹伯襄卒

九月癸酉地震

冬楚子使椒来聘【椒穀作荻】

此楚穆王也椒者子越椒令尹子文从子也春秋诸国来聘凡二十有八无不书爵者所以重往来之礼而尊王制也楚凡三聘鲁惟庄二十三年书荆人来聘以此时甫通中国国号未定故不书爵此之书子则与襄三十年楚子使鬬罢来聘例同胡氏谓书爵以进之误矣若谷梁谓书大夫名者褒其来我则椒本令尹司马氏楚卿岂大夫乎

秦人来归僖公成风之襚

此秦康公也康公远慕诸华欲修敬于鲁无以为辞因翟泉之盟秦先公与僖公与焉因假其义以通好谓追赠僖公并僖公之母本隣国归襚恒礼而周制含襚可致葬後【见予丧礼吾说篇】是以距僖丧十年成风五年而仍为是举甚盛心也但僖与成风本是两襚孔疏所谓二襚一使而并致之其先僖公者以僖先薨也其不言及成风者以成风君母公羊所谓子不可及母也此与隐元年天王来归惠公仲子之赠同其称秦人与庄二十三年荆人来聘同其不称夫人与仲子不称夫人同胡氏不知礼谓削去夫人既已非是乃又袭谷梁说并僖公成风为一人谓是僖之成风夫妇为夫有母不为子有其云惠公之仲子虽误解经文然犹可通

者以妇为夫有也若云僖公之成风则母为子有矣试一思之世有称武王之太姒成王之邑姜与惠文之吕后薄后而可以成史书者乎何不通至是

葬曹共公

十年

春王三月辛卯臧孙辰卒

夏秦伐晋

前此令狐之役晋实无礼虽八年传秦有取武城之举犹报师也至是传云春晋人伐秦取少梁夏秦人伐晋取北徵则晋不谢过而黜兵负衅秦人之伐之宜矣何休无识以书秦为贬以狄礼而胡氏遂谓不顾义理专以报复为事夷狄之道夫不责施者以义理而单责报者已不伦矣况报者欲已而施者不厌谁则执华礼而拱手听之若胡氏谓少梁之取不见经则前此武城之取亦未尝见经也此皆偏词之无当者也春秋书例凡君大夫皆在军而不知其孰帅师则称国此与七年徐伐莒成三年郑伐许昭十二年晋伐鲜虞例同

楚杀其大夫宜申

宜申鬬氏楚大夫子西也宜申初为商公既而改为工尹疑有谗于楚子者而心不安也乃与子家谋弑楚子事觉而杀之并子家焉

自正月不雨至于秋七月【杜云义与二年同】

及苏子盟于女栗【顷王新立故也苏子见僖十年女栗地阙】

冬狄侵宋【一本与下文连作一节】

楚子蔡侯次于厥貉【公厥作屈】

楚子会陈侯郑伯蔡侯麇子于息遂及蔡侯次于厥貉将以伐宋宋华御事曰楚弱我也我实不能民何罪乃逆楚子而听命焉楚子乃田于孟诸而还其不书诸国者以次厥貉时祇蔡侯也【厥貉地阙】

十有一年

春楚子伐麇【公作圈】

前年次厥貉麋子逃归故伐之

夏叔仲彭生会晋却缺于承匡【公谷无仲字匡公谷作匡】

传叔仲惠伯会却缺谋诸侯之从于楚者【承匡宋地】

秋曹伯来朝【曹文公也】

公子遂如宋

传襄仲聘宋且贺楚师之不害也

狄侵齐【此长狄也见後】

冬十月甲午叔孙得臣败狄于咸【鲁地】

此狄国号酈瞞防风氏後漆姓也据传秋狄侵齐至是伐我公使叔孙得臣追之败于咸获长狄侨如时富父终甥为驷乘撻其喉以戈杀之【谷梁称瓦石不能害】埋其首于子驹之门【郭门名】以命宣伯【命名也谓名其子宣伯曰侨如以旌已功】初宋武公之世【在春秋前】酈瞞伐宋司徒皇父帅师御之彤班为御获长狄缘斯【此侨如先世也】而皇父与车右皆死因赏彤班以门关之税谓之彤门晋之灭潞也【宣十五年】获侨如之弟焚如而三弟荣如在齐襄二年【桓十六年】酈瞞伐齐为齐王子成父所获埋其首于周首之北门【周首齐邑计桓十六年荣如死时至宣十五年已一百三岁而次兄犹在则不知几何年矣】其季弟简如退而走卫为卫人所获至是获侨如又获焚如而酈瞞遂亡按此长狄在酈瞞国不知是君长与否【四人焉得皆君长也】且酈瞞国人亦不必皆长者【若皆长则不当纪四人矣】故但称狄而不称长狄此与後赤狄伐齐白狄伐秦不同胡氏惑宋刘敞说以经文无长狄字为疑夫经但书败而不书获以贱酈瞞而不矜所俘则略之盖所败者狄而所获者长狄也故传曰败狄于咸获长狄侨如上总称狄下特称长狄可验也况少见多怪陋儒宿习鲁语吴伐越隳会稽获骨节专车以问仲尼曰此防风氏之骨也禹会诸侯恶防风後至戮之在昔为汪芒氏在周为长狄氏漆姓则长狄种系原有明证此固无可疑者祇鲁语曰其长几何仲尼曰僬侥长三尺短之至也长不过十尺数之极也则长止一丈而春秋考异邮曰长百尺谷梁身横九亩【广一步长百步为一亩】为五丈四尺杜氏云长三丈则未可尽信耳

十有二年

春王正月邾伯来奔【邾公作盛】

传邾伯卒邾人立君太子以夫鍾与邾邾【皆邑名】来奔其称爵者必邾伯既葬而後邾人别立君也

杞伯来朝

二月庚子子叔姬卒

此?桓公夫人僖三十一年杞伯姬来求妇者是也方桓公来朝时以叔姬有故请絶叔姬而无絶婚更以其娣为夫人公许之至是叔姬卒礼既嫁见出与室女同服故书卒其称子者亦正以同室女故也不称杞絶之也【女未嫁而卒不书公谷误】

夏楚人围巢【巢吴楚间小国】

秋滕子来朝【左传合下作一节】

秦伯使术来聘【术公作遂】

术即秦大夫西乞术也秦康公求好于鲁先来归綈至是以瑑玉来聘鲁使公子遂辞玉而礼遣之其不称氏者史例略文与九年楚子使椒来聘襄二十九年吴子使札来聘并同

冬十有二月戊午晋人秦人战于河曲【晋地】

秦晋以令狐之役交相侵伐至此思一决而临战并却谓之交绥绥者退也交绥交相退也据传晋赵盾荀林父却缺俱在军用舆骈之计深垒固军不出战秦用士会计谓赵有侧室【庶子】曰穿好勇而狂盍以轻军挑之穿果出不利反怒曰裹粮坐甲惟敌是求敌至不击将何俟焉军吏曰将有待也穿曰我不知谋遂独出宣子恐为秦所获遂俱出交绥既而舆骈请薄险穿与胥甲横沮之乃止是时秦伯亲在军而不帅师故称人余无义例

季孙行父帅师城诸及郛【公作运】

诸郛皆鲁邑以远偪他国故城之

十有三年

春王正月

夏五月陈侯朔卒

邾子遽薨卒

自正月不雨至于秋七月【自二年十年至此凡三见矣】

世室屋坏【世左传谷梁作太】

世室公羊云鲁公伯禽庙也周公称太庙鲁公称世室羣公称宫其云世者以世世不毁为名然据明堂位则鲁公称文世室武公称武世室此但云世室不着何公者以立武宫在成六年此时但有伯禽耳若左传作太室则周公之庙洛诰所称王入太室裸系太庙中央之室在鲁惟周公有之而谷梁又云伯禽曰太室谬矣

冬公如晋卫侯会公于沓【公无公字沓地阙】

狄侵卫

十有二月己丑公及晋侯盟公还自晋郑伯会公于棐【左传谷梁公还下别作一节公还谷无公字棐公作斐杜氏云己丑在十一月十一日棐郑地名】传公如晋朝且寻盟卫侯会公请平于晋及还郑伯会公亦以平晋请公皆成之郑伯宴公而退

十有四年

春王正月公至自晋

邾人伐我南鄙叔彭生帅师伐邾

传邾文公卒公使吊不敬邾人来讨故惠伯报之

夏五月乙亥齐侯潘卒

六月公会宋公陈侯卫侯郑伯许男曹伯晋赵盾癸酉同盟于新城【宋地】

传曰从于楚者服【陈郑宋本从楚而今服晋】且谋邾也【见後】

秋七月有星孛入于北斗

孛彗也既见而移入北斗非常所有故书之

公至自会

晋人纳捷菑于邾弗克纳

邾文公元妃齐姜生定公次妃晋姬生捷菑文公卒邾人立定公捷菑奔晋晋赵盾以诸侯之师八百乘纳捷菑于邾邾人曰齐出纘且【定公名】长词屈而还捷菑不称国与庄九年公

伐齐纳纠例同

九月甲申公孙敖卒于齐

穆伯之从己氏也鲁人立文伯【长子谷】穆伯生二子于莒而求复文伯以为请襄仲使无朝听命【不奉朝请听政】三年而尽室以复适莒文伯疾请曰谷之子弱【子即孟献子年尚少】请立难也【弟惠叔】许之文伯卒立惠叔穆伯请重赂以求复惠叔以为请许之将来卒于齐告丧请归葬不许

齐公子商人弑其君舍

齐昭公者桓之子潘鲁婿也配叔姬无宠生子舍无威公子商人【昭公弟】施于国而多聚士至是昭公卒舍即位商人乃于七月之乙卯弑舍自立至九月而后来赴书例凡君立未葬称子既葬称君齐昭以是年五月卒至七月而舍见弑是相距两月尚未葬也未葬宜书子今以九月赴则诸侯五月而葬已五月矣五月犹未成君乎遂乘其来赴直书为君以正其弑逆之罪此文例也若公谷曰踰年称君则与僖十年晋里克弑其君卓以葬而称君显相悖矣说见桓十一年郑忽奔卫传

宋子哀来奔

传宋高哀萧封人也【萧邑大夫】後为宋卿至是以宋公不义出而待放遂来奔此春秋之高蹈者虽来奔必书原是史例然志可嘉也此皆书其事而义自见者杜氏以书字贵之则安知去氏非贱之者左氏所云贵岂在是乎

冬单伯如齐齐人执单伯

齐人执子叔姬

齐懿公【公子商人】既弑其君舍舍之母则鲁女也鲁使襄仲告于王请以王宠【亲厚】求昭姬于齐【昭公妻故称昭姬】曰杀其子焉用其母请受而罪之冬单伯如齐请子叔姬齐人执之又执子叔姬其不称夫人称子叔姬以义与齐絶比之室女士丧礼所称女子子者是也夫以弑君之贼鲁不能讨天王不能正其罪第请其还母而见辱如是则周之衰鲁之弱齐之恶逆无道第书事而义皆见焉

十有五年

春季孙行父如晋【以执单伯事告也】

三月宋司马华孙来盟

华孙者华耦为宋司马官其称孙以华氏之孙如鲁之称臧孙季孙据此则益信书爵书名书氏书字之无所取也前新城之盟公与宋公同会宋地故宋复来盟修同好焉

夏曹伯来朝

齐人归公孙敖之丧

穆伯卒时请归葬不许齐人谋曰饰棺而寘诸堂阜【鲁境上地】鲁必取之卜人以告【卜邑大夫入告】惠叔犹毁以为请【前惠叔请归葬今期年犹哀毁以请】立于朝以待命许之取而殡之其葬视共仲【制如庆父皆以罪降】

六月辛丑朔日有食之鼓用牲于社

六月者夏四月也周制日食天子伐鼓于社诸侯则伐鼓于朝而用币于社此伐鼓在社与社之用牲皆非礼也说见庄二十五年日有食之传

单伯至自齐

晋却缺帅师伐蔡戊申入蔡

新城之盟蔡人不与故伐之盟城下而还

秋齐人侵我西鄙【以子叔姬故也】

季孙行父如晋【告齐侵也】

冬十有一月诸侯盟于扈

据传晋侯宋公卫侯蔡侯陈侯郑伯许男曹伯盟于扈?新城之盟且谋伐齐也齐人赂晋侯故不克而还时公以齐难不与会其不书诸国名者正以公不会则未能以国通也说见七年盟扈传

十有二月齐人来归子叔姬

此归大归也夫死子杀贼人立无所依则归所自来此是恒礼但此与文公出姜同一不幸且同一大归而出姜则书夫人姜氏归于齐于此则书齐人来归子叔姬以出姜归齐姜自为之子叔姬来归则齐人为之也此文例也若一称夫人一称子叔姬则皆我所称说见前传

齐侯侵我西鄙遂伐曹入其郛【郛郭也】

侵我复伐曹者以是年曹来朝也齐于是恶稔矣

十有六年

春季孙行父会齐侯于阳谷齐侯弗及盟

齐将与鲁平公有疾使季文子会齐侯于阳谷请盟齐侯不肯曰请俟君间【疾廖也】

夏五月公四不视朔

视朔者谓告朔後听视此月之政也【见六年闰月不告朔传】公以疾故自二月至五月凡四月不视朔

六月戊辰公子遂及齐侯盟于鄆丘【鄆公作犀谷作师公羊疏作菑】传公使襄仲纳赂于齐侯故得盟鄆丘齐地

秋八月辛未夫人姜氏薨【僖公夫人文公母也】

毀泉台

据传有蛇自泉宫出入于国如先君之数【伯禽至僖公十七君】至是声姜薨以为妖也故毀之

楚人秦人巴人灭庸

楚大饥庸人麋人率百濮以伐楚申息之北门不启楚人谋徙于阪高蔦贾不可曰不知伐庸夫麋与百濮谓我饥不能师也我出师则羣蛮走矣乃自庐以往发廩同食先使庐人侵庸示以弱而後合卒而进之遂灭庸

冬十有一月宋人弑其君杵臼【杵公作处】

宋公子鲍【昭公庶弟文公】厚施贷以结国人襄公夫人【昭公祖母】助之谋杀昭公而代立前八年夫人杀其孙孔叔等司马子邛握节死司城荡意诸来奔公义之于十二年襄仲聘宋时送意诸还宋而复其官焉至是昭公田孟诸夫人使帅甸攻杀公意诸殉之

十有七年

春晋人卫人陈人郑人伐宋

国语宋人弑昭公晋赵盾请师于灵公且旁告诸侯治兵振旅鸣钟鼓撝鐸于丁宁以伐宋曰何故弑君至宋立文公而还【不能讨贼反立之盾之谬戾如此】

夏四月癸亥葬我小君声姜【公作圣姜有齐难是以缓葬】

齐侯伐我西鄙六月癸未公及齐侯盟于谷

齐侯亲伐我而晋不能救遂请盟左传西鄙作北鄙孔疏疑经误者以谷在鲁北故也【今济北谷城县】

诸侯会于扈

晋侯蒐于黄父遂复合诸侯以平宋无功时公以齐难不与会说见前盟扈传

秋公至自谷

冬公子遂如齐【拜谷盟也】

十有八年

春王二月丁丑公薨于台下

秦伯罃卒【秦康公也公羊疏作穆公误】

夏五月戊戌齐人弑其君商人

传齐懿公之为公子也与邴歜之父争田弗胜及即位乃掘而刖之【断尸足也】而使歜仆纳阎职之妻而使驂乘至是公游于申池二人浴于池歜以扑扶职职怒歜曰人夺汝妻而不怒一扶汝庸何伤职曰与刖其父而弗能病者何如乃谋弑懿公纳诸竹中归舍爵而行【饮酒後去】齐人立公子元【懿兄惠公亦桓子】

六月癸酉葬我君文公

秋公子遂叔孙得臣如齐

襄仲庄叔皆卿也礼凡宾介必一卿一大夫今二卿以两事往襄仲贺齐惠新立庄叔谢齐来会葬故两卿并行非宾介也谷梁不识策书误以两卿相为介而胡氏遵之误矣据传文公二妃敬嬴生宣公敬嬴嬖且私事襄仲襄仲欲立之叔仲不可【叔仲惠伯】襄仲见齐侯而请之时齐侯新立而欲亲鲁遂许焉

冬十月子卒

襄仲乃弑恶【太子】及视【太子母弟】并杀叔仲惠伯立宣公不书弑讳国恶也按书例未葬称子既葬称君时文公既葬礼当称君与庄三十二年子般卒襄三十一年子野卒两皆未葬迥然不同然而新君讳之国史讳之在夫子当时自有急难以更正者况书君必书薨书薨必书葬既薨且葬则必祔主而禘庙一如闵公之为例而事经久定岂能追易试问羣宫之中可得容子恶立一主否不得已而别为书法第书子而不书名以为此卒者不知何人假曰恶耶则恶宜称君视耶视又不宜称子傖以为恶不成君而此不成君者子也非恶也傖以为恶不入庙而此不入庙者非恶也子也此必旧史有恶字而夫子特删之者世不解春秋不能解夫子书子之意以致汉儒许慎作五经异义遂谓未踰年之君不当立庙引左传公羊为证而郑玄蔡邕皆主其说使东汉幼主权奸强制如孝殇孝冲孝质诸帝皆以幼少崩殂不令列庙但遣太尉司徒分祀三陵谓春秋子恶明有前事是乌知春秋无子恶耶曾子恶而不成君不入庙耶

夫人姜氏归于齐

归大归也传曰将行哭而过市曰天乎仲为不道杀适立庶市人皆哭鲁人谓之哀姜

季孙行父如齐

莒弑其君庶其

莒纪公生太子仆又生季陀爱之将废仆仆因国人弑纪公以宝玉来奔公用季文子之言却之

春秋毛氏传卷十九

卷二十

钦定四库全书

春秋毛氏传卷二十

翰林院检讨毛奇龄撰

宣公【公名倭一名接又作委母敬嬴夫人穆姜諡善问周逵曰宣】

元年

春王正月公即位

踰年改元必又行即位礼此是周制但遭弑逆之变则不行而此又行者不以子恶之杀为弑也余见桓元年公即位传

公子遂如齐逆女

三月遂以夫人妇姜至自齐

前宣未立时襄仲聘齐惠以立宣请而惠公许之及宣立而季文子如齐因请婚焉至是即位以求助之急切於逆女致先君之丧甫及朞年而遽行婚礼谓之丧昏【一名丧娶文十八年正月至此年二月刚十三个月正朞年祥练之际胡氏谓未朞年误】此直书而恶自见者若其称女又称妇又称夫人正所云在家称女在途称妇在国称夫人三名杂称总无义例盖讥贬有在而不在是也说见文四年逆妇姜传

夏季孙行父如齐

宣公篡立未安季文子既请婚于齐至是又复纳赂以请会以齐惠鲁宣皆弑君新立相为声援而齐大足恃则鲁又将托命焉然而君臣上下之罪不可问矣其後公会齐侯于平州以定位襄仲如齐以拜成而齐则竟取我济西田以责其赂焉经之不憚缕悉而次第以记之使见者就其事以求其义至于如此谁谓春秋为断烂报乎

晋放其大夫胥甲父于卫

前文十二年晋与秦师战河曲两军交绥輿骈见秦使覘其将遁请薄诸河必败之赵穿与胥

甲当军门呼曰死伤未收而弃之不惠也不待期而薄人于险无勇也乃退师而秦师果遁至是以军法讨罪放胥甲于卫宜也然赵穿安在乎以宣子为政行司马法而不中如此夫子所为直书之而义有取也放者罪遣之名【安置此地不得他适曰放】

公会齐侯于平州【齐地 定公位也】

公子遂如齐【拜成也】

六月齐人取济西田【责我赂也】

我虽赂之未与也齐人乃责赂而取之去虽不用师徒然亦黷矣故特书曰取说见前

秋邾子来朝

楚子郑人侵陈遂侵宋

晋赵盾帅师救陈

宋公陈侯卫侯曹伯会晋师于榘林伐郑【榘公作斐郑地名】晋自赵盾秉政後外启秦衅内杀诸卿大夫且累当列国篡弑构伐之际并无一词能讨正而所至纳赂且隳坏军政不克行阵如文九年楚人伐郑盾会诸侯之师以救郑而中道而返不及楚师十四年邾人伐我文公亲乞盟于盾盾乃合诸侯之师以伐邾而反以纳叛争国词屈而返十五年齐公子商人弑齐君执天王之使以逐国母反来伐我盾以我乞师之故大会诸侯以伐齐而反纳齐赂竟不出师十六年宋公子鲍弑宋君杀诸公族盾请合诸侯之师载钟鼓并鐸于丁宁大声其罪以伐宋而宋人赂盾盾反立鲍为宋君而还宣孟之为政也如此【宣孟盾諡】至是齐弑君莒弑君鲁又弑君而皆坐视不能讨徒与楚人争郑陈宋三国又不能胜郑穆公乃叹曰晋不足与也适楚谋伐陈遂背晋归楚随楚师而侵陈宋焉盾乃亲帅师救陈不克仍大会四国改救陈之师而为伐郑以为郑新贰於楚可讨也楚复遣蔣贾救郑遇于北林【名林亭在郑北】楚获晋大夫解扬囚之晋人乃还

冬晋赵穿帅师侵崇【公作柳】

据传晋欲求成于秦赵穿曰我侵崇【秦之与国】秦急崇必救之吾以求成焉乃侵崇而秦弗与成然则赵穿之误军政以误国事者亦既多矣【见前传】

晋人宋人伐郑【报北林之役也】

二年

春王二月壬子宋华元帅师及郑公子归生帅师战于大棘宋师败绩获宋华元【大棘宋地】

北林之役楚囚晋大夫解扬辱之甚矣其冬晋人犹合宋伐郑而仍不能克至是宋郑舍晋楚自决各帅师以战而宋师败绩囚华元获乐吕【司寇以非帅师不书】及甲车四百六十乘俘二百五十人馘百人其两书帅师但纪相敌并无义例与哀二年晋赵鞅帅师及郑罕达帅师战于铁郑师败绩同据传宋将战时华元杀羊食士其御羊斟不与焉及战斟曰畴昔之羊子为政今日之事我为政与入郑师故败宋人以兵车百乘文马百驷赎华元半入而华元逃归立于门外告而入【不苟入也】见叔牂【羊斟字】而慰之曰子之马然也对曰非马也人也遂来奔【叔牂来也】

秦师伐晋【报崇也】

夏晋人宋人卫人陈人侵郑

秦报崇之役【元年冬】伐晋围焦【晋河外邑】晋赵盾救焦遂自陰地【晋河南山】及诸侯之师侵郑以报大棘之役【前二月】楚鬬椒救郑盾师复还

秋九月乙丑晋赵盾弑其君夷皋【公作獐】

晋灵公不君厚歛以雕墙从台上弹人而观其避九也宰夫胾熊蹯不熟杀之寘诸畚使妇人载以过朝赵盾士季见其手问其故而患之【士季即隋会也文七年与先蔑奔秦文十二年晋使魏寿余诱士会还晋】士会先进谏盾继之三进及溜而後视之【公佯不省】曰吾知过矣会盾稽首曰人孰无过过而知改善莫大焉既而不改宣子骤谏公患之使鉏麇贼之鉏麇不忍贼触槐而死公乃饮盾酒伏甲将杀之其右提弥明知之趋而登曰臣侍君宴过三爵非礼也遂扶以下公喉斃焉【斃猛犬能顺人意噬人】明搏而杀之鬬且出明死初宣子田于首山舍于翳桑见灵辄饥问其病曰不食三日矣食之舍其半问之请以遗母使尽之而为之簞食与肉寘诸橐以与之既而与为公介【甲士】倒戈以御公徒而免之问故对曰翳桑之饥人也问其名不告而退于是赵穿【夙之孙盾从父之子】攻灵公于桃园宣子未出山而复太史书曰赵盾弑其君以示于朝宣子曰不然对曰子为正卿亡不越境反不讨贼非子而谁宣子乃使赵穿逆公子黑臀于周而立之朝于武宫据传称赵穿弑君而太史董狐必书盾弑盾实未弑也春秋责备贤者且以防渐故强加之罪其在史官为谨微而在宣子则为受恶至今称之无异词焉尝考春秋弑君三十有六而其实书弑君者则二十有三若其可疑者有四则此与宣四年郑公子归生弑其君夷昭十三年楚公子比弑其君?哀六年齐陈乞弑其君荼皆未尝亲弑其君而陈乞与楚公子比为一类此与归生为一类虽不弑而实弑之与谨微受恶之说迥然不同夫穿本盾弟亦本盾党秦晋之战皆二人相为鼯鼠穿挑战河曲而盾即随之【文十二年】穿侵崇而盾实听之【元年】盾之出山焉知不与穿相期而彼不伏也吾即以反不讨贼四字诘之夫太史之为此言者岂谓其事已往吾将以此定爰书哉以为上卿既返正当讨贼果能讨贼便可无罪故大声以急呼之盖欲其杀穿以谢先君不欲其受

恶而遂已也夫贼假人手尚知解免齐襄戕鲁桓则杀公子彭生以卸过晋狐射姑害阳处父则必杀续鞠居以委罪纵同谋不忍犹当割恤以自白况本不相闻则必大奋其忠果之气立杀逆贼如鹰鹯之逐鸟雀不待逾时而乃为穿受恶即遣穿迎立新主与之比肩而事之则一弑一立皆属豫定不谓之同谋不可也夫先君方被弑则继立之际亦属大事以晋之盛岂无荀韩隋却之可使而必使此贼且记曰并朝武宫不共之谓何【徐仲山春秋日记曰继弑以迎立而定使穿迎君所以杜他人之讨之者此虽深文然盾非无意也】故後儒马氏【之鹏】有云游侠传云轹儒生有毁郭解者解客杀儒生而断其舌解不知也公孙弘曰解一匹夫而能使其客杀人解虽不知有甚于知者遂族解以此观之盾虽不知有甚于知者予谓郭解实不知而盾则知之何也解惟不知故客得杀人亦惟解不知故客得幸免而不偿杀使解知之则必不使杀知之则必能杀客以谢儒生而盾不然也然则灵公之弑盾固已知之者也不惟向知之今亦知之也若欧阳氏【修】谓经书盾弑则必盾实弑其君而无与穿事则又不然从来操莽行弑并无手推刃以及其君者律杀人者死尚有造意知情与加功下手之不同既已造意亦何难令人加功且不必加功而後可称为杀人也如谓祗书盾弑并不及穿则此经所书将必待传发而事始明万一无传不几曾参真杀人而盗跖可掉臂则又全不知春秋者春秋有简书有策书予既已言之屡矣【见前】孔子所修者简书也左氏之所修者则策书也简者书其目而策书则详记其事故甯殖逐君经文所无而殖曰吾名在诸侯之策则以策书之必载也【策一献王朝一藏本国一布诸侯谓之三策】岂有策书既载而尚虞简书之有漏者然则是传云孔子曰赵宣子古之良大夫也为法受恶此策书乎曰此非策书何言之曰晋史为此策书时孔子尚未生也安所得孔子之言而记之此实左氏当时慑强赵之名疏盾功德因妄为此言而实则犹有义者孔子不又曰惜也越境乃免乎越境者正欲其不反也谓反则必讨贼也然则鉏麇之死灵辄之报提弥明之忠盾得人矣得人非贤乎曰据此则盾真弑君之贼有为之而非一朝一夕之故也春秋乱贼半属守礼以要誉假行惠以结人心策书所载比比而是试即以迹年策书证之公子商人之弑齐君也传云商人骤施于国尽其家不足贷于公有司以继之宋公子鲍之弑其君杵臼也传云鲍礼于国人年自七十以上无不馈诒也国之才人无不事也亲自桓以下无不恤也夫然後一出而衆皆归之今晋君左右皆盾人矣推是术也陈完之移国操莽之移天下皆在于是是赵氏分晋实始于盾尚何弑与不弑之有

冬十月乙亥天王崩【匡王也】

三年

春王正月郊牛之口伤改卜牛牛死乃不郊【公合下作一节谷以改卜下别作一节】

郊祀在三月然必先祀一时豫卜牛而涤养之【公羊注涤宫名养帝牲三牢之处也每一牢养一月谓之三牢】故正月卜牛虽所卜者既伤其口再卜者又死而三月之期依然不减则何难三卜而遽废不祀则非礼矣故传曰非礼若公羊谓卜祗二牛一是帝牛在涤宫三月一是稷牛即后稷配天之牛惟具是视【祗视牛体无灾害不养涤宫】故帝牛不吉则扳稷牛而卜之若又不吉则已之并不三卜此与传义稍不同然周礼不传而战国诸礼又别无可据

且春秋郊牛因死伤而废祀者二易祀者二皆再卜而止并未三卜则似公羊此说犹差可信者若胡氏谓匡王未葬公当在凶服之中而遽行郊祀为非礼则不然王制丧三年不祭惟祭天地社稷则越绋而行事越绋者谓天子在殡輶车设绋而遇有郊祀则越而行之谓之越绋故曾子问云天子崩未殡惟五祀不行其尊于五祀者无不可行若既殡未葬即五祀亦行矣况郊祀乎是以杜氏云不以王事废天事正以郊者天事也天事则何可废也胡氏言非也

犹三望

望以郊及不郊何望故传曰非礼若鲁三望是海岱淮非河海岱也胡氏言又非也【说见僖三十一年犹三望传】

葬匡王

天子七月而葬今止四月可谓礼乎【说见隐元年传】

楚子伐陆浑之戎【公谷俱无之字陆公作贲】

楚子伐陆浑之戎遂至于雒观兵于周疆定王使王孙满劳楚子楚子问鼎之大小轻重焉对曰在德不在鼎周德虽衰天命未改鼎之轻重未可问也

夏楚人侵郑

郑自元年秋背晋即楚侵陈宋後晋随合诸国伐郑棐林而晋大夫解扬为楚所囚其冬晋宋复伐郑不克至二年春则宋郑大棘之战郑且获宋华元焉故至夏而赵盾合四国伐郑以报大棘乃楚师救至而盾即引还至是晋人骤伐郑及邲郑不得已与晋平而随会入盟楚人乃恶郑人之贰于晋也于是侵郑此实晋人无道必强其服已以嫁祸于郑其中是非亦但书其事而义自见者若其不书晋人伐郑与晋郑平者以晋郑不告故也胡氏谓郑人即楚则书伐以贬之郑能归晋则不书平以褒之误矣晋楚两大各争宋陈郑三国不过以忮忌之心两不相下致争噬弱小使之东西奔命无所适从向使大小相倚力能庇护则小之事大何难从一而乃朝攘之而夕弃之小国何辜长途喝鬼惟?是依而腐儒无识又且执春秋之法以妄绳之谓朝从晋则朝褒暮从楚则暮贬而於是三国之冤?无可告矣春秋书事以论世此晋楚争国系文宣以後一大变局春秋历书但有责晋楚而并无责宋郑陈之理此义一定则时而责晋时而责楚开卷了然两虞呼卢则卢必起而东西顾之乃司猎者不让两虞而反让卢之东西顾其可通乎

秋赤狄侵齐【狄有赤白二种以赤衣白衣分别得名】

宋师围曹

前文十六年宋文公弑昭公十八年宋武氏之族将因昭公子奉司城须【文公母弟】以作乱文公杀母弟须及昭公子使戴庄桓之族攻武氏于司马子伯【华耦】之馆遂出武穆之族至是武穆之族以曹师伐宋宋兴师围曹报武氏之乱也

冬十月丙戌郑伯兰卒

葬郑穆公

初郑文公贱妾燕姑梦天使与已兰既而文公见之与之兰而御之生穆公名之曰兰至是病曰兰死吾其死乎吾所以生也刈兰而卒

四年

春王正月公及齐侯平莒及邾莒人不肯公伐莒取向杜氏谓莒邾二国相怨故公与齐侯共平之乃莒不肯而公遽伐莒则又事之非礼者按向本小国隐二年莒人入向而取之即为莒邑今此取向则仍不有其地观襄二十年仲孙速与莒人盟向依然莒邑可验也【徐仲山春秋日记谓莒邾相去远不类有怨此非经传文杜氏但以意解之者据经传莒仆弑纪公以宝玉来奔而公却之未经平也至是鲁与齐好欲共平之已行及邾国而莒又来辞故公怒伐莒其说较近理但无他可据且及邾当作至邾与公追齐师至鄆弗及相比例恐终未妥姑记此以俟学者】

秦伯稻卒

夏六月乙酉郑公子归生弑其君夷

据传楚人献鼋于郑灵公公子宋【子公】与子家【归生】将见子公之食指【第二指】动以示子家曰他日我如此必尝异味及入宰夫将解鼋相视而笑公问之子家以告及食大夫鼋召子公而弗与也【欲使指动无效】子公怒染指于鼎尝之而出公怒欲杀子公子公与子家谋先【先下手也】子家曰畜老犹惮杀之而况君乎反谮子家【子公谮也】子家惧而从之夏弑灵公书曰郑公子归生弑其君夷权不足也按此与二年赵盾弑其君夷臯例同赵盾造意归生知情同是一例不必加功下手始为弑也传文本策书经本简书说已见前但传自楚人献鼋起至子家惧而从之止是策书原文左氏因而润色之若夏弑灵公至权不足也是左氏愚意而大谬者归生虽不知何官然郑国上卿皆公子为之其与公子宋必无甚低仰且前此文十七年诸侯会扈时归生亲作书使执讯之官告赵宣子此皆当国者所为其中叙十二年归生佐寡君之嫡夷【即今所弑灵公】请陈楚朝晋则亦非上卿不任此使且自归生此书出而晋来行成且使赵穿晋侯女婿池皆质于郑则其人之强干有为原不在赵盾下者况宣二年大棘之战归生实帅师与宋右师华元相持竟获华元乐吕并狂狡焉此其当国用事万万超子公之上为何如而曰权不足是日较策书而茫然不知其就里者宜乎啖助赵匡之徒得共起而议其後也

郑穆公以三年冬卒其子灵公以四年夏即被弑裁七月耳于是郑人立子良【穆公庶子】子良辞曰以贤则去疾【子良名】不足以顺则公子坚长乃立襄公【即坚】襄公将去穆氏【逐群兄弟】而舍子良【以其让已】子良曰穆氏宜存则固愿也若将亡则亦皆亡去疾何为【何为独留】乃舍之皆为大夫

赤狄侵齐

秋公如齐公至自齐

冬楚子伐郑【以三年侵郑而未服也】

五年

春公如齐

夏公至自齐

传公如齐齐高固【齐大夫】使齐侯止公请叔姬焉杜氏所谓留公而强与大夫为婚是厌尊毁列累其先君而公然于庙行饮至之礼岂非过乎

秋九月齐高固来逆子叔姬【左传无子字】

叔孙得臣卒

冬齐高固及子叔姬来

传云逆叔姬卿自逆也冬来反马也按礼大夫以上嫁女有车马送之诗王姬之车谓王姬家所乘来车百两将之谓诸侯大夫家所送车凡言车则马在其中至三日之後先还其车而留其马必俟三月行祭然後并马亦还之谓之反马今高固迎姬已及三月正当反马但反马遣使不必婿来而固以叔姬归宁之便与之同行公羊所谓双双俱至者则虽曰行礼实失礼矣若其称子叔姬者则以嫁不相敌如室女然与文十二年十四年称子叔姬虽事不相类而其书并同

楚人伐郑

楚来伐郑陈及楚平以晋不足恃也晋荀林父救郑并伐陈焉

六年

春晋赵盾卫孙免侵陈

以上年楚伐郑时陈及楚平故也然是时荀林父救郑时已伐陈矣今又伐之乎

夏四月

秋八月螽

冬十月

七年

春卫侯使孙良夫来盟【公即位卫始修好也】

夏公会齐侯伐莱

秋公至自伐莱

大旱

冬公会晋侯宋公卫侯郑伯曹伯于黑壤

郑及晋平公子宋之谋也故相郑伯以会晋而盟于黑壤王叔桓公【周卿士】实临之但晋侯初立公未朝晋又不使大夫聘晋人止公于会而不许与盟至纳赂而後得归故黑壤书会而不书盟为国讳也

八年

春公至自会

夏六月公子遂如齐至黄乃复

遂使齐不知何事但受命而出虽疾亦行若宾死未将命犹有斂于柩而造朝使介将命之礼故哀十五年传云朝聘而终以尸将事今遂之返亦不知何故然以下卒垂观之则应是以疾返者故杜氏曰有疾而还然非礼也黄齐地

辛巳有事于大庙仲遂卒于垂

有事者禘也凡大祭曰有事故昭十五年有事武宫亦是禘祭与此例同但此两事合书以公

子遂之死适当祭日故上以辛巳冠之而书两事于其下其不废祀者据曾子问尝禘郊社簠簋既陈闻有天子与后丧即废之卿无废礼况垂在齐地岂有死日即赴至者此时丧尚未闻焉能废祀谷梁云闻大夫之丧则去乐卒事檀弓卿卒不绎皆不识经文者矣若其称仲遂者仲本遂字故或称襄仲或祇称仲传所云仲为不道是也但字即是氏如孙以王父之字为氏而苟其赐氏则不必王父即本身之字亦皆可赐祇生不赐氏必俟其身死而後赐之故宣公德仲立已急乘仲之死而赐氏焉其称仲遂则即字赐氏并非史官书法有所参预且亦并不在春秋褒贬之例观仲遂之子称仲婴齐则明是实氏父子相承并无假借可验也公羊不识例但知孙以王父字为氏而不晓赐氏遂疑婴齐氏仲定非子可氏父字者是必婴齐曾继兄归父为子而呼襄仲为王父故有是氏因于归父奔齐後造为婴齐继归父之说以乱经传考归父婴齐皆襄仲之子归父奔齐婴齐居鲁并无一絕一续彼此相继之事此本经传所无有者纵或有之大夫继爵不继统与天子诸侯不同天子诸侯以君臣为父子故僖之继闵即子继父归父与婴齐同为大夫非君臣也婴齐总继兄亦不至呼兄为父呼父为祖而况大夫为後祇是继爵并非继人如郑厉公立叔段後叔段未絕臧武仲求为後于鲁是时武仲现在也大夫无爵则继之何曾絕人求继如子之继父孙之继祖盖国君始继絕大夫士庶并无继絕如近代时俗之礼故文十四年公孙敖卒于齐敖之二子则文伯与惠叔也文伯以其子孟献子少因以已继敖之爵让之惠叔然而文伯未尝子惠叔惠叔未尝以继爵之故父文伯而祖公孙敖也此皆春秋近事之显然者况春秋书法当校全经公谷释经但就一经以造说而于全经前後并不一观如公羊是说第知仲婴齐卒而不知有仲遂卒夫婴齐之父已氏仲矣近代吴俗多有以弟继兄後呼兄嫂为父母者此败伦伤化之极而长洲汪氏且复引公羊邪说以为之据嗟乎六经从此扫地矣是不可以不辨

壬午犹绎万入去龠

绎者祭之明日又祭之名卿丧不废祀而绎本轻礼且齐鲁接境翼日则赴可以达而绎亦可已故曰犹绎犹者可以已而犹不已也若万入去龠则祭必用乐而乐必舞万万者文舞武舞之总名其舞万而去龠者以武舞用干戚【左手执盾右手执斧】文舞用龠翟【左手执龠右手秉翟】文近吉而武近凶故稍去文以示凶丧之意而公羊分万龠为二舞且曰万者干舞龠者龠舞则于诗方将万舞而下承之以执龠秉翟皆不通矣若杜氏以去龠为恶其声闻此亦袭公羊去声之说而误者夫乐以声传八音之奏何止于龠必欲去声将必咏歌之尽亡而第却舞人之左手何为乎

戊子夫人嬴氏薨【嬴公作熊】

嬴氏文之媵宣之母也说见前

晋师白狄伐秦

晋成秦桓初立後并未构兵而晋忽会狄伐秦大无道矣白狄见僖三十三年传

楚人灭舒蓼【公作鄧】

楚为衆舒叛故伐舒蓼二国而灭之及滑汭盟吴越而还

秋七月甲子日有食之既

冬十月己丑葬我小君敬嬴【公羊合下作一节敬嬴公谷作顷熊】

己丑是卜葬日观下文庚寅始克葬则葬在次日然仍书己丑者以出葬之日言也此与定公丁巳出葬至戊午始葬而仍书丁巳例同敬嬴者敬諡而嬴氏公谷作顷熊则以秦女为楚女矣且諡法甄心动惧曰顷例无諡小君为顷者况王妣乎公谷之好异而无理类如此

雨不克葬庚寅日中而克葬

礼庶人悬封而葬不为雨止言惟庶人葬事忽略悬封便葬故不为雨止自大夫以上葬事烦多雨即止之然且葬避不怀故先卜远日【先卜下旬以次而中旬上旬】今幸迟一日可以嬖于葬用远日之义故传曰礼也谷梁谓丧不以制故遇雨即止而徐邈引士丧礼有潦车载蓑笠之文以为事有设备何用雨沮而胡氏又力主其说殊不知潦车蓑笠乃士官师之制与天子诸侯大异按周礼遂师大丧使帅其属以渥帟先道野役而泽虞丧纪则共其苇蒲之事凡天子诸侯丧制甚设其御雨诸备较有甚于士官师者岂周礼在鲁并不一具必待士丧礼一言而後知之特是輶綍碑窆仪注既繁廐葆荼蜃工力复殫定非帷盖箠簟所能行事故唐杨氏疏有云安得执紼五百人皆触雨而行则万一急于行事偶失不戒此非蓑笠苫盖所得遮蔽其罪戾也若胡氏又云丧事即远有进无退此为行匱言之今遇雨而止亦未尝解车綍返庙庭不葬而退而乃以为反丧之戒不亦谬哉日中日之中谷梁谓足乎日之词则古云日中则仄将尽日而後仄乎况士虞礼云日中而虞言葬至日之中必急归虞祭孔子所谓速反而虞者则日中二字明指葬节岂可妄言也

城平阳【今泰山有平阳县】

楚师伐陈

陈及晋平故楚复伐陈取成而还

春秋毛氏传卷二十

<经部,春秋类,春秋毛氏传>

卷二十一

钦定四库全书

春秋毛氏传卷二十一

翰林院检讨毛奇龄撰

九年

春王正月公如齐公至自齐【左公谷皆以公至下别作一节 兼礼例】夏仲孙蔑如京师

春王使来徵聘至夏而孟献子聘于周当时王以为有礼厚赂之不书徵聘者讳之也

齐侯伐莱

秋取根牟【东夷国名 公羊以为邾娄之邑误】

八月滕子卒

此滕昭公也不书名说见前

九月晋侯宋公卫侯郑伯曹伯会于扈晋荀林父帅师伐陈辛酉晋侯黑臀卒于扈【左公谷皆以晋荀林父及辛酉分作三节】传曰会于扈讨不睦也陈侯不会【前年与楚成故】晋荀林父以诸侯之师伐陈晋侯卒于扈而还【杜氏云九月无辛酉日】按扈是郑地凡君卒赴地即书之杜氏谓扈在晋境外故书地则于襄七年郑伯卒于鄆昭二十五年宋公卒于曲棘皆境内地为不合矣若公谷谓扈是晋邑在境内则晋四会扈并非晋邑

冬十月癸酉卫侯郑卒

宋人围滕【伐丧也】

楚子伐郑晋郤缺帅师救郑【左公谷皆以晋郤缺下别作一节】

前七年冬郑用公子宋之谋请与晋平会王人诸国而盟于黑壤楚恶之故此复伐郑晋郤缺救郑郑伯败楚师于柳棼【郑地】国人皆喜惟子良【公子去疾】忧曰是国之灾也吾死无日矣至十二年卒有楚子入郑之祸按此楚恶郑之贰已故亲帅师称楚子并无褒赏于其

间胡氏不识例妄以四年伐郑特书楚子为褒其讨归生弑立之罪则此时书子为不通矣晋楚争强有何褒赏况四年伐郑专以前年侵郑郑不即服而伐之非讨逆也若左氏策书又有六年盟厉之役楚郑既平而郑伯逃归故有此伐则此时此事未见于经当是十二年楚子围郑之由而误记于此者吾第取经以证经而传之有无所不计焉

陈杀其大夫泄冶【泄公谷作泄】

陈灵公与孔宁仪行父通于夏姬皆衷其相服以戏于朝【孔宁即公孙宁与仪行父皆陈卿夏姬郑穆公女陈大夫御叔妻衷怀也相服近身之衣】泄冶谏曰公卿宣淫民无效焉且闻亦不令公其收之【藏其相服】公曰吾能改矣以告二子二子请杀之公弗禁遂杀泄冶

十年

春公如齐公至自齐

齐人归我济西田

此元年赂齐而齐取之者至是归我以我服故也

夏四月丙辰日有食之【杜云不书朔官失之】

己巳齐侯元卒

齐崔氏出奔卫

据传齐惠公卒崔杼有宠于惠公高国畏其偪也公卒而逐之遂奔卫其书崔氏者杜氏以为典策旧法凡告者本皆书名今齐特以族来告而鲁史仍之夫子亦因而不改此书例偶然非有他也若左氏谓非其罪故不名则非罪出奔而书名者亦衆矣且崔杼逆贼出而能反反而能弑君此何如人而可以非罪与之至公羊谓书氏以讥世卿则苏氏释辨有云崔杼祖父名不见经并非世卿且周制立宗专尚氏族故尚书曰世选尔劳诗刺幽王恶其絶功臣之世而孟子亦曰所谓故国者有世臣之谓则一日行封建将一日不絶世卿而公羊墨守必欲立此义以实已说然于春秋何当焉

公如齐五月公至自齐

此如齐者奔丧也经不书讳之也

癸巳陈夏徵舒弑其君平国

陈灵公与孔宁仪行父饮酒于夏氏公谓行父曰徵舒【陈大夫名夏氏子也】似女对曰亦似君徵舒病之公出自其廄射而杀之二子奔楚

六月宋师伐滕

滕人恃晋而不事宋故宋伐滕

公孙归父如齐葬齐惠公【归父襄仲之子】

晋人宋人卫人曹人伐郑

郑及楚平故晋合诸师伐郑取成而还

秋天王使王季子来聘

主季子传以为即刘康公盖王之季子而食采于刘者其来聘报前年叔孙蔑之聘也

公孙归父帅师伐邾取绎【公作繇绎邾邑】

大水

季孙行父如齐【齐侯初即位故往聘焉】

冬公孙归父如齐【传曰子家如齐伐邾故也】

齐侯使国佐来聘【左传合上作一节】

国武子来报聘杜氏曰既葬成君故称君命使也

饥

楚子伐郑

是年夏郑及楚平而晋即合诸侯之师以伐郑郑不得已遂与晋成至是而楚师又至然则为郑亦难矣是时晋士会救郑逐楚师于颍北诸侯之师戍郑而还

郑子家【公子归生】卒郑人讨幽公之乱斲子家之棺而逐其族【以四年弑君故也】改葬幽公諡之曰灵【斲棺者凿剖其棺耳旧引丧大记谓上大夫大棺八寸属六寸皆斲薄之不使从卿礼则迂矣属里棺名】

十有一年

春王正月

夏楚子陈侯郑伯盟于辰陵【谷作夷陵】

是年春楚子复伐郑以去年冬潁北之逐为不得志也及栎子良【郑公子去疾】曰晋楚不务德而兵争与其来者可也晋楚无信我焉得有信乃从楚夏楚盟于辰陵陈郑服也辰陵陈地名

公孙归父会齐人伐莒

前四年公与齐平莒不肯因伐莒取向然莒仍未服也至是复会齐大夫伐之

秋晋侯会狄于攒函

晋郤成子求成于衆狄衆狄疾赤狄之役已也遂服于晋时诸大夫欲召狄而郤成子止之遂就狄盟攒函狄地名此与成十五年会吴于锺离例同

冬十月楚人杀陈夏徵舒

丁亥楚子入陈

纳公孙寧仪行父于陈【寧公作甯】

前年陈夏徵舒弑灵公时孔宁与仪行父并奔于楚以楚能制陈也至是楚子果伐陈谓陈人无动将讨于少西氏【少西徵舒祖子夏之名】遂入陈轘夏徵舒于栗门【轘者车裂也】因县陈【改为楚县】时陈侯在晋【灵公子成公午】申叔时使于齐及反复命而退楚子让之曰夏徵舒弑君寡人以诸侯讨而戮之诸侯县公【楚县之公如叶公白公类】皆庆寡人女独不庆何故曰夏徵舒弑君君讨而戮之义也今县陈则贪其富也以义召诸侯而以贪归之无乃不可乎楚子曰善乃复封陈纳其二大夫每乡取一人以归谓之夏州【每乡取一人以成一州以旌讨夏氏所获故名】按晋自文七年後赵氏忽主盟中夏而荀郤继之日与楚争宋郑陈三国而楚庄当兴霸之际晋徒肆忿虐必不能胜以致三国受祸东凌西创者历二十余年究之厄运将裂使楚得大肆其威今年入陈明年入郑又明年入宋三国残佚几乎灭尽即晋自号能霸六卿三帅亦将举而并丧之邲之一战夫然後愤戾稍息自宣十三年至成六年晋楚争郑偶见于经而陈宋则终不及焉然则晋君臣之庸愚不道徒祸人国为何如矣若夫楚之无礼徒知讨贼而不知孔仪之当正法左氏称善固不必然亦何足责焉

十有二年

春葬陈灵公【自十年夏被弑至此已二十二月矣】

楚子围郑

前年楚来讨郑用子良之言已从楚而有辰陵之盟其冬晋复来讨以其盟于辰陵也郑复徼事之至是楚复围郑旬有七日郑人卜行成不吉卜临【哭也】于大宫【郑祖庙】且巷出车【示将见迁】吉于是国人大哭守陴者皆哭楚子退师听郑人修城而复围之三月【九十日】而後克入自皇门至九达郑伯肉袒牵羊以迎曰孤不天不能事君使君怀怒以及敝邑其俘诸江南以实海滨惟命其翦以赐诸侯使臣妾之亦惟命若惠顾前好徼福于厉宣桓武不泯其社稷使改事君夷于九县【楚灭九国以为县今欲等之】君之惠也非所敢望也楚子许之退师三十里使潘圉【楚大夫】入盟郑以子良为质焉

夏六月乙卯晋荀林父帅师及楚子战于邲晋师败绩晋师救郑荀林父将中军先穀佐之士会将上军郤克佐之赵朔将下军栾书佐之赵括赵婴齐巩朔韩穿荀首赵同俱为军大夫韩厥为司马及河闻郑及楚平桓子【荀林父】随武子【士会】皆欲还独彘子【先谷】不可先以中军佐济河桓子不得已乃俱济时楚子北师次于埏【郑地】沈尹将中军子重将左子反将右将饮马於河而归闻晋师既济令尹孙叔敖请勿战已南辕矣楚子听伍参【伍奢祖父】之言遽令改辕而北之会赵括赵同佐彘子邀战而魏錡与赵旃以求卿未得且怒於失楚之致师者驾以请盟入楚军而实则挑之楚使潘党逐魏錡而赵旃又至楚子亲逐之晋人惧二子之为楚得也使輶车来迎潘党见尘起告曰晋师至矣遂疾进师车驰而卒奔以乘晋军桓子乃不知所为鼓于军中曰先济者有赏中军下军乃争舟舟中之指可掬焉惟上军未动工尹齐将右拒卒以逐下军军之奔者以广队【兵车】不能进楚人教之脱扃【车上兵□】少进马旋又教之拔旆投衡【拔旗投衡上使车轻马可进】乃遁独赵旃被逐时以良马二与兄与叔父而已乘他马以奔遇大夫逢氏始得车而魏錡御知庄子【荀首】庄子之子知罃为楚熊负羁所囚庄子急反战射连尹襄老死载其尸又射公子谷臣而获之及昏楚师军于邲晋之余师不能军宵济终夜有声或劝楚子筑武军而收晋尸以为京观楚子不许遂还

秋七月

冬十有二月戊寅楚子灭萧【杜云十二月无戊寅当是十一月十九日】萧宋附庸国之近楚者庄二十三年萧叔朝公僖三十年介人侵萧皆萧国也至是为楚所灭矣若定十一年自陈入萧与自曹入萧则实宋邑名与此无涉旧注皆误说见庄十二年宋万奔陈传

晋人宋人卫人曹人同盟于清丘

陈与郑几为楚灭晋固不得而争之矣惟宋尚服晋晋乃惩陈郑之叛重结曹卫以要宋清丘一盟所以为宋人伐陈地也

宋师伐陈卫人救陈

前清丘之盟晋恶陈郑之服楚而共谋讨之宋先伐陈当以曹卫为同恶之国而卫反救陈则叛盟矣但晋卫本相敌而晋视卫为臣属卫久不平况晋自赵孟主盟以来日与楚争与国而不能护毗徒授祸耳在昔文元年晋伐卫时卫成公与陈共公约不受晋责故垂陇之盟陈卫相恤【在文二年】至今不忘此非清丘一盟所能间也是以今之救陈在清丘为叛盟而在垂陇则为守信况当文元年卫报伐晋本孔达帅师以致卫人执孔达以说晋今孔达仍帅师则达亦直以其身殉此行矣故达曰先君有约言焉若大国来讨我则死之则是晋之恶卫之弱达之致死不避有直书其事而义自见者胡氏不知时并不识春秋大义责楚责宋曾无一定乃于此曰卫之叛盟则不待絶而恶自见而于後杀孔达则又曰孔达弃信以危社稷称国以杀恶其累上夫争强要信虽在孺子犹知其非义以解经之儒而一曰叛盟再曰弃信亦已异矣且孔达临杀直曰苟利社稷我则死之今反曰累上曰危社稷则必达死而晋有一矢之遗加于卫者遍考经传无是也全经既不观而一事始末又茫然不知其所自祇于书人书国间妄称贬絶嗟乎卫君臣何罪而忍贬絶之

十有三年

春齐师伐莒

前十一年齐鲁共伐莒以四年平莒未服也至是则齐专伐之

夏楚子伐宋

以宋为清丘之盟而伐陈也

秋螽【公作 𧈧】

冬晋杀其大夫先穀【谷作穀】

讨邲之败也

十有四年

春卫杀其大夫孔达

卫之救陈也卫孔达实帅师焉晋以背清丘之盟使来责卫其来使之人守而勿去曰罪何所归盖欲得孔达也达因请曰苟利社稷请以我说【说谓说晋与文二年陈共公请卫执孔达以说晋同】我则为政而亢大国之讨将以谁任晋使去至是达自缢卫人以说晋并告诸侯曰寡君有不令之臣达构我敝邑于大国既伏罪矣敢告已而哀其有成劳【谓平国之功】

卫侯以己女妻达之子且使襄父位为大夫焉按春秋专杀大夫者三十有二其称国以杀而不去其官如云某国杀其大夫某者二十有四凡杀弑君之贼与忠良无故而被杀者书总一例旧以书国书人书名书爵妄生褒刺者全属冤狱然而书例不殊而义各有取如此经连杀大夫一是先穀一是孔达皆书国以杀而不去其官本似一例然各有义者晋之先穀楚之得似皆以丧师杀者也晋杀其大夫先穀当与僖廿八年楚杀其大夫得臣同卫之孔达蔡之公子燮一以违晋杀一以违楚杀者也卫杀其大夫孔达当与襄二十年蔡杀其大夫公子燮同

夏五月壬申曹伯壽卒

晋侯伐郑

晋使宋伐陈又亲伐郑总以其贰于楚也夫以临灭乞存之国而恶其乞存而必伐之豺虎无是矣是时晋但蒐郑而不入犹畏楚也郑伯乃如楚且使子张伐子良而还【子良质楚者】

秋九月楚子围宋

楚子使申舟聘于齐曰无假道于宋亦使公子冯聘于晋曰不假道于郑申舟以孟诸之役恶宋【文十年楚子田孟诸时申舟扶宋公仆】曰郑昭宋聋【言一明一闇也】晋使不害我则必死楚子曰杀汝我伐之见犀而行【犀申舟子以子托王示必死】及宋宋人止之华元曰过我而不假道鄙我也鄙我亡也杀其使者必伐我伐我亦亡也亡一也乃杀之楚子闻之投袂而起履及于室皇【寝门阙】劔及于寝门之外车及于蒲胥之市遂围宋

葬曹文公

冬公孙归父会齐侯于谷

十有五年

春公孙归父会楚子于宋

据传孟献子言于公曰臣闻小国之免于大国也聘而献物【玉帛皮币】于是有庭实旅百【主人答飧之盛】朝而献功【如郑伯亲献蔡捷类】于是乎容貌采章嘉淑而有加货【言来报之备】谋其不免也诛而荐贿则何及矣【见责而往晚矣】今楚在宋公其图之公说乃使归父会楚子于宋

夏五月宋人及楚人平

宋人使告急于晋晋侯欲救之伯宗【晋大夫】不可使解扬如宋令无降楚佯曰晋师悉起将至矣夏五月楚子以围久【自去年秋九月至此已九閱月矣】将去宋申犀稽首于马前

曰无畏【其父申舟之字】知死而不敢弃王命王弃言焉楚子不能答申叔时仆【御也】
曰筑室反耕者【筑室于宋而分兵归田示无去志】宋必听命楚子从之宋人惧使华元夜
入楚师登子反之牀起之曰寡君使元以病告曰敝邑易子而食析骸以爨虽然城下之盟有
以国毙不能从也去我三十里唯命是听子反惧【惧其猝害已也战国刺客之风于此兆矣
杜氏谓兵法因其乡人而知其守将左右谒者门者而利道之盖用此术】与之盟而後告楚
子退三十里于是宋及楚平华元为质此与十一年楚子入陈十二年楚子围郑同一晋楚争
与国事而至此而宋郑陈三国皆以大创晋苟知耻夫亦可以稍休暇焉

六月癸卯晋师灭赤狄潞氏以潞子婴儿归

赤狄狄之衣赤衣者潞者国名赤狄之别种也子爵也婴儿潞子名据传潞子婴儿之夫人晋
景公之姊也酆舒为政【潞相】而杀之又伤潞子之目晋使荀林父伐之败狄于曲梁辛亥
灭潞【书癸卯从赴】酆舒奔卫卫人归诸晋晋人杀之

秦人伐晋

秦自文二年报晋人侵崇之後秦晋各易君两相休息而晋复召狄伐秦故秦又伐晋次于辅
氏【晋地】会晋景公治兵于稷略狄土立黎侯而还【狄夺黎地故晋复立之】及雒魏颗
遇秦师辅氏遂败之

王札子杀召伯毛伯

王札子王子而札名者传称王孙苏与召氏毛氏争政使王子子捷【札字】杀召戴公及毛
伯卫此非王命杀而两下自相杀者与昭八年陈侯之弟招杀陈世子偃师例同据传王孙苏
奔晋晋侯使随会平王室定王享之原襄公相礼殽烝【升殽于俎】武子【随会】私问故
【以享当体荐而今殽烝故怪之】王闻之召武子曰王享有体荐【王为公侯设享则半解
其体而荐之为不食也】宴有折俎【宴则须可食故体解节折之即殽烝也】公当享卿当
宴王室之礼也武子归而讲求典礼以修晋国之法

秋螽【礼例】

仲孙蔑会齐高固于无娄【公作牟娄杞邑】

初税亩

公田之法十取其一今又履其余亩复十取其一故论语哀公曰二吾犹不足盖自宣十五年
至定哀皆税亩矣其曰初言自此始也税者徵取之名

冬蛭生【蛭螽之始生者】

饥【五稼不熟曰饥】

十有六年

春王正月晋人灭赤狄甲氏及留吁

甲氏留吁赤狄别种范氏曰前既灭潞氏今又并尽其余邑也左传又有铎辰亦留吁之属

夏成周宣榭火【榭公穀作谢火公穀作灾】

成周洛阳周之东都宣榭者周宣王之榭也火者灾也按尔雅释宫无室曰榭凡庙无无室者室即寢也但寢制有三一是庙後之室庙以宴尸而室以藏主分作两层如礼器子路与祭室事交乎尸堂事交乎阶是也一是割庙前之半以为室如庙前庭曰庙寢曰正寢其两楹之间曰适室两楹之傍曰翼室是也一是割庙後之半以为室如周礼疏祭在前庙荐在後寢汉传昭仪传注庙前曰殿半以後曰寢是也是以周七庙之制无无後室与前寢者惟周礼隶仆掌五寢之埽其曰五寢谓高曾祖祢并祖庙五庙有後半之寢而高祖之父与高祖之祖虽同在七庙中而以远当祧不置半寢遂限为五寢之埽此庙制也今宣王中兴虽本不祧而远庙无寢因之有宣榭之名何则以无室故也孔疏引国语先王之台榭一语以为榭必是讲射之堂而其名曰宣则不能解且射堂偶灾何足以布告天下公羊明知为宣王之宫然不晓其制遂有疑祧庙之无後室者胡氏且从而兼之谓讲射宣庙有堂无室夫以先王之庙而可为射堂宜乎在泮献囚直戮人于夫子之庙庭而不知非也【古学宫与孔子庙庭为二今以文庙为泮林则献囚在庙矣此亦大无礼者】

秋郯伯姬来归【出也】

冬大有年

十有七年

春王正月庚子许男锡我卒

丁未蔡侯申卒

夏葬许昭公葬蔡文公【左公谷俱分作两节】

六月癸卯日有食之【杜云不书朔官失之】

己未公会晋侯卫侯曹伯邾子同盟于断道【晋地】

晋侯将盟诸侯使却克徵会于齐齐顷公帷妇人使观之却克跛而登阶妇人笑于房克怒出而誓曰所不此报者不涉此河乃先归使其介栾京庾待命于齐齐侯使高固晏弱蔡朝南郭偃赴会高固先逃晋乃会于断道而执蔡朝晏弱南郭偃三人既而用苗贲皇【楚鬬椒之子奔晋者】言使逸之

秋公至自会

冬十有一月壬午公弟叔肸卒

叔肸宣公母弟也左传云凡大子母弟公在曰公子不在曰弟此策书通例使然若简书则不同僖十六年公子季友卒则公不在亦称公子昭元年陈公子招昭八年陈侯之弟招则公不在而公子与弟皆可称并无一例

十有八年

春晋侯卫世子臧伐齐

晋以断道之会齐侯不亲至为讨齐侯乃会晋侯盟于缢以公子疆为质于晋晋师遂还

公伐杞

夏四月

秋七月邾人戕郕子于郕

此邾大夫就郕杀郕子也凡大夫不得名则皆称人说见前

甲戌楚子旅卒

公孙归父如晋

冬十月壬戌公薨于路寝

归父还自晋至笙遂奔齐

公孙归父以公命如晋公薨季文子言于朝曰使我杀适立庶以失大援者仲也夫【襄仲杀子恶是齐甥故失齐援】臧宣叔【臧文仲子】怒曰当其时不能治也後之人何罪子欲去之许【臧孙名】请去之遂逐东门氏子家【归父字】还及笙坛帷【除地为坛而张帷】复命于介【君薨当复命于殡升自西阶执圭复命北乡哭出袒括发入门右即位踊今不得

至殡则立介为位介南面归父北面执圭如前行礼】既复命袒括髮即位哭三踊而出遂奔齐

春秋毛氏传卷二十一

卷二十二

钦定四库全书

春秋毛氏传卷二十二

翰林院检讨毛奇龄撰

成公【公名黑肱宣公子諡法安民立政曰成】

元年

春王正月公即位

二月辛酉葬我君宣公

无冰

周二月夏之十二月也无冰则冬恒燠矣

三月作丘甲

前断道之盟晋侯以齐侯不至邀卫伐齐时宣公与盟而又使公孙归父求好于晋齐实怨之至是将伐我而我为预备因作丘甲传所谓臧宣叔令修赋缮完正谓修此兵赋也但丘甲不可解在诸书俱无明文惟杜氏引周礼并司马法作解似乎可据然犹有未合者据周礼九夫为井四井为邑四邑为丘四丘为甸则丘者十六井甸者六十四井也而司马法则云四邑为丘丘出戎马一疋牛三头四丘为甸甸出长毂一乘戎马四疋牛十二头甲士三人步卒七十二人戈楯备具谓之乘马之法今鲁以用兵之故增益兵赋以一甸所赋之车责之一丘故曰丘甲则无论国家增赋必正多加少若以四丘之车而责之一丘则四倍加赋定无是理乃即司马法而周礼小司徒注所引与此不同彼以百井为成成出革车一乘甲士十人徒卒二十人其出车之井与甲士徒卒数俱不合且此司马法者非他即齐景公时司马田穰苴所着书也穰苴变齐法改管仲内政竝非周制且其人在昭定之间成公此时尚未有此法也况出车与出甲截然不同古赋车之法不传其散见诸书者大抵乡遂赋人都鄙赋车而甲楯诸器则皆官制而官给之如周礼司甲司兵当出军时皆颁自司马名曰授兵及其还军则仍收之官名曰受兵输凡弓矢戈楯皆如之则是车是车甲是甲春秋凡出车名曰赋车成二年传羣臣赋舆襄二十五年传赋车兵是也出甲谓之授甲受甲昭二十年陈桓子授甲闵二年狄入卫卫人受甲者皆曰使鹤是也未有出车而可名出甲者自春秋之季将变车战晋魏舒毁车而

为行吴以百行为万人带甲三万鲁三家将作三军亦愿毁其乘以作行兵而行必带甲如成十八年晋胥童率甲八百以攻郤氏襄二年楚婴齐帅组甲三百被练三千以伐吴国语吴有水犀之甲三千即宋郑小国宋景公卒大尹兴空泽之士千甲郑讨西宫之难子孔以其甲与子革子良之甲相为防守则其时之崇卒而尚甲为何如者是以管仲作内政首修甲兵其有不足则使有罪者以犀甲鞶盾赎罪而楚蔦掩为司马使子木赋甲兵且赋甲楯之数则是列国用兵各为定赋而鲁以外备齐难亦令赋甲使每丘出甲若干勒以为制谓之丘甲盖赋以丘为准如鲁定田赋孔子曰以丘足矣亦谓丘有十六井可相准耳其後鲁各有甲定十年围郕以叔孙氏之甲出于郕门哀十一年齐师伐我有季氏之甲七千皆以是也若谷梁谓一丘士农皆使作甲则驱四民而为工势有不能若胡氏据唐太宗兵法谓周制以二十五人为一甲凡四丘出七十五人止三甲今增二十五人使一丘出一甲可得四甲则周制竝无二十五人为一甲之事且仅增人数则既非赋车又非赋甲直是季世抽丁之法全非古制况周礼大司马起徒设法凡万有二千五百家为乡即以万有二千五百人为军故小司徒云凡起徒役无过家一人则不问车甲但徵徒兵在周制亦自有法何得遽以唐制溷之

夏臧孙许及晋侯盟于赤棘

臧孙宣叔名许文仲之子以齐难乞盟赤棘晋地

秋王师败绩于茅戎【茅公谷作贸】

前文十七年周大夫甘歊乘戎饮酒败戎于邲垂而戎憾之至是年春晋侯使瑕嘉【即詹嘉】平戎于王王使单襄公如晋拜成刘康公【即王季子】以为戎无备可乘间也叔服【内史】谏阻不听遂伐茅戎而败绩焉

冬十月

二年

春齐侯伐我北鄙

齐伐我围龙【鲁邑】顷公之嬖人卢蒲就魁门焉【攻龙邑门】龙人囚之齐侯请勿杀不听膊诸城下【膊磔也】齐侯亲鼓士陵城三日取龙遂南侵及巢丘

夏四月丙戌卫孙良夫帅师及齐师战于新筑卫师败绩【杜注四月无丙戌在五月一日】

卫侯以齐师伐鲁使孙良夫石稷将侵齐值齐师自伐鲁还遇于新筑石成子【即稷石碯孙】欲不战孙子不可遂败绩时齐人将获良夫幸新筑人仲叔于奚【守新筑大夫称新筑人犹孔子父邹邑大夫称邹人类】救之得免

六月癸酉季孙行父臧孙许叔孙侨如公孙婴齐帅师会晋却克卫孙良夫曹公子首及齐侯战于鞌齐师败绩【首公谷作手】

孙良夫还自新筑不入国遂如晋乞师会臧宣叔亦如晋皆主卻克晋侯许以七百乘而却克请增之至八百乘遂将中军士燮佐上军栾书将下军韩厥为司马以救鲁卫此以前盟断道时晋使却克徵会于齐齐侯不至且帷妇人以观克而笑之故以报也至是臧宣叔逆克从齐师至于靡笄【齐山名】齐高固入晋师投石以尝之癸酉师陈于鞌时齐侯以逢丑父为车右急于战不介马而驰却克伤于矢流血及屨而桴鼓未絕马逸不能止师从之齐师败绩逐之三周华不注【齐山名】逢丑父与公易位【欲代公也】将及华泉驂絙于木车止丑父易輶车而佯使公取饮公逸韩厥获丑父献之却克克纵之齐侯还军使军人求丑父三入三出【言出入晋军也】晋师乃入自丘舆击马陉【皆齐邑】齐侯使宾媚人【即国佐也】赂纪甗【纪国之甗】玉磬与地以求成晋人不许曰必以萧同叔子为质【萧国名同叔萧君之字子者女指齐侯母也难斥侯母故曰萧君女也公羊作萧同侄子注萧同国名则国非戎狄无二字者谷梁作萧同侄子之母则益无解矣其好异而无理如此】且使齐封内尽东其亩【垄亩东行则晋可循垄而达齐】对曰萧同叔子寡君之母也若尽东其亩则君车便利其如先王之制何时鲁卫在军者皆谏曰齐疾我矣遂许之书例凡聘问盟会虽二卿并行止书一其书二使者必两事使也至于行师则诸卿并书一则重兵事一则本国与列国有异此与後六年仲孙蔑叔孙侨如帅师侵宋昭十年季孙意如叔弓仲孙矍帅师伐莒例同

秋七月齐侯使国佐如师己酉及国佐盟于袁娄【谷作爰娄】袁娄齐地是时晋人使齐人归我汶阳之田成公会晋师于上鄆赐三帅【却克士燮栾书】先路【革路木路】三命之服【三帅三卿本三命故鲁以此赐之】司马【主甲兵】司空【主营垒】舆师【主兵车】候正【主斥候】亚旅【次于卿者】皆受一命之服

八月壬午宋公鲍卒

据传宋文公卒始厚葬用蜃炭【以蜃作炭堙圻御湿】益车马【多齐车道车廐车并马之类杜注误】始用殉【俑葬曰殉俑者偶人也古用刍灵周用偶人孔子谓刍灵为善俑为不仁则此时无用俑者矣故曰始用若用生人殉则前文十八年秦伯卒以子车氏殉何得言始杜又误矣盖用生人者戎狄之礼中国无是也】重器备【明器有干竿甲楯备御之物】椁有四阿【阿柱也晋语立于西阿西柱也杜作四注误】棺有翰桢【翰旁饰帷墙之类桢上饰荒齐之类此皆王礼】

庚寅卫侯速卒【速公作邈】

取汶阳田

晋师败齐时鲁卫与焉及齐使国佐求成而晋不许则鲁卫与有请焉故晋于盟爰娄时令齐还我汶阳田而至是取之取者不以好得也

冬楚师郑师侵卫

宣公之世楚强而晋弱故宣公使大夫求好于楚而楚庄既卒宣公亦薨值晋景嗣兴却克秉政之际遂藉晋败齐而纾我齐患此非背楚实势使然也乃楚复责好鲁卫以宋郑陈三国已事移之鲁卫则以宗邦望国而奔命强大辱之甚矣然而罪在晋楚仍不在我者以我固无如何也时楚师救齐以鲁卫皆在晋军遂移师侵卫并侵我及阳桥【鲁地】孟孙请赂之乃以执筑【男工】执针织紵【女工】皆百人并公衡为质【公衡成公之子此时可为质则必始娶之媵所生者】楚人许平其不书侵我并纳质讳国辱也此文例也

十有一月公会楚公子婴齐于蜀【地阙】

丙申公及楚人秦人宋人陈人卫人郑人齐人曹人邾人薛人郕人盟于蜀

公乃与楚公子婴齐【庄王之弟楚卿也】蔡侯许男秦右大夫说宋华元陈公孙宁卫孙良夫郑公子去疾及齐曹诸国大夫盟于蜀其不书蔡侯许男者传称楚共王不在军而蔡景公当王车之左许灵公当王车之右是二君者共乘一车祇得为楚王车左右之御士非国君也故不书此文例也若列国大夫俱不称名而称人则五国知名五国不知名遂略之也左氏以此为匱盟匱盟者窃盟也言畏晋之知而窃与楚盟则不然天下无十二国共盟而犹谓晋不知者且楚师实临我晋不能救而禁我之求成不得也况书法无贬例也此与隐三年公及莒人盟于浮来庄九年公及齐大夫盟于蔑例同

三年

春王正月公会晋侯宋公卫侯曹伯伐郑

前阳桥之役郑从楚侵卫及鲁鲁卫恶之至是会晋师并曹宋伐郑左氏误谓讨邲之役夫邲之战在宣十二年是时楚方伐郑郑几灭矣晋以救郑而致败与郑何憾至十四年郑以晋败故如楚谋晋而于是晋讨郑贰经书晋侯伐郑见在也今相距十一年经明书楚师郑师伐卫而此请大国之师方合诸侯以报之而仍曰讨邲之役其于夫子之经一概悖尽吾故曰左传策书但当叙事若偶出一意以解经文必致大误即此是也

卫侯与宋公俱先君未葬宜称子而皆书爵者以是役鲁为政而卫副之不当以非礼之事显咎人国故隐而书爵且是役已败传称郑公子偃帅师御之使东鄙覆诸鄆败诸丘舆【皆郑地】郑皇戌如楚献捷是诸师败绩而皆不书一讳国恶一讳国辱也

辛亥葬卫穆公

二月公至自伐郑

甲子新宫灾三日哭

新宫宣公之宫也【羣公庙皆称宫】灾者天火也庙灾哭三日礼也按新主入庙礼无明文惟春秋吉禘在二十七月禘祫之後以禘月遇吉祭【时祭】虽可以奉主祭庙然犹是祫祖而不以妃配必踰月吉禘然後迁主于弥庙名曰新宫今宣以二十年十月薨则成元年十一月为大祥二年正月为禘至是二月则禘已踰月正二十八月吉禘之际其名新宫则当在吉禘後已经迁主故毁而哭之胡氏谓不称宣宫必神主未迁宫虽成而主未入遇灾而哭实为非礼则不惟不晓禘後踰月正当吉禘无新主未入之礼且亦不识庙制妄谓新宫必新造一庙可空宫无主而不知此新宫者即先公之宫也先公居五庙之末名为祫庙自伯禽以来即已有之虽名为新宫而实即旧庙并无新造之例是必待吉禘之日将四亲并祫合食太祖及其临彻先迎高庙一位随诸祫主还迁庙中而然後新主逐队随三亲归分高曾祖祫而各入庙焉是一日不吉禘则一日不迁主一日不迁主则一日不易庙安有所谓无主之庙可虚悬一座以称新宫者况檀弓云有焚其先人之室则三日哭正言庙也而胡氏又误解檀弓疑是先人生平所居之室故谓先人之所居可哭而虚庙不可哭夫先人所居即後人所居是也所居室灾吊而不哭宫庙火三日哭礼之不讲而妄议哭法徒增人笑耳若谓丹楹刻桷经称桓宫而此称新而不称宣必非无故则以丹楹刻桷在庄二十三年此时已旧而不新故称桓耳若初入庙则未有不称新者不闻夏宗伯称新鬼大乎

乙亥葬宋文公

七月而葬且厚葬焉【见前】非礼极矣凡此皆书事而义自明者何则二年八月卒三年二月葬义可知也不然此时书例亦何难去日去諡如俗所云而并不一及何耶

夏公如晋

翊盟蜀之不得已也

郑公子弃疾帅师伐许

许久服郑隐十一年为郑所灭至桓十五年而後许复有其国嗣此经屡书郑伯伐许为讨贰也及僖六年楚人围许後则郑不能再有许矣今乃以许恃楚不事郑而兴师伐之则郑以强大凌弱小罪在强大此一定义例而又以已所服事之楚而徒以许故而隐与楚争此在义理与事势两有未便而谓郑可为之乎故夫子于郑之伐许凡二年之间三致意焉

公至自晋

是时晋与楚求和归楚公子谷臣与连尹襄老之尸于楚【此邲之战为晋所俘者】以求知罃【此为楚所俘者】楚子许之

秋叔孙侨如帅师围棘

棘者汶阳之田之邑也齐不伏取故围以师焉

大雩

晋却克卫孙良夫伐麇咎如【麇公作将谷作墙】

麇咎如者赤狄之别种也宣十五年晋灭赤狄潞氏其余民散入麇咎如种中故复讨之据传有麇咎如溃上失民也八字则必经有麇咎如溃四字而左氏以己意释此句今阙之耳

冬十有二月晋侯使荀庚来聘卫侯使孙良夫来聘丙午及荀庚盟丁未及孙良夫盟

此皆为晋来?盟恐贰楚也荀庚者荀林父之子元年齐将伐我臧宣叔与晋侯盟于赤棘宣七年卫侯欲为晋致鲁而使孙良夫来盟至是皆?之其两盟两日以各聘不合故也二卿不系国以承上晋卫文也胡氏袭刘敞之说谓书及不书公见二卿之抗二卿不系国见遂事之专则二年齐侯使国佐如师己酉及国佐盟于袁娄此时齐求成未敢抗也且以君命来未尝专也然而书及不书公书国佐不书齐何居

郑伐许

四年

春宋公使华元来聘【宋共公新立也】

三月壬申郑伯坚卒

杞伯来朝【将出叔姬故来朝修礼以告其故也】

夏四月臧孙许卒

公如晋

葬郑襄公【三月而葬何速也】

秋公至自晋

公如晋晋侯见公不以礼及公归欲求成于楚季文子曰不可晋虽无道然国大臣睦而通于我诸侯听焉未可以贰楚虽强非吾族也乃止

冬城郛【公作运】

郛鲁地名冬而城郛亦与时合但文十二年已城诸及郛矣此又城之岂一地两城耶按杜氏于前城郛注云此是东郛为莒鲁所争地今所城为备晋而设即後十六年传晋人执季文子公待于郛者其地在鲁西名西郛与前不同

郑伯伐许

此郑悼公也郑襄自去年夏冬两伐许而死今悼公丧未踰年即遣公孙申帅师以疆许田许人败之展陂【许田】郑伯乃亲伐许取鉏任泠敦之田是时晋栾书荀首士燮俱帅师救许伐郑赖楚使子反救之以郑方事楚楚不悟郑伐许之与已争也及许灵公愬郑伯于楚与郑讼而郑不胜楚乃执皇戌及公子固【郑穆公子】郑伯归因弃楚而请成于晋先与晋赵同【赵衰子】盟于垂棘【晋地】而于是晋楚之争郑则以楚郑之争许而又一变焉

五年

春王正月杞叔姬来归

此大归也大归犹称杞者杂记诸侯出夫人未致命以前仍以夫人之礼行此时未致命故称杞余见前年来朝传

仲孙蔑如宋【报前年华元之聘也】

夏叔孙侨如会晋荀首于谷【首公作秀】

传晋荀首如齐逆女故宣伯餽诸谷餽者野馈之名所以畏晋而申敬礼者谷齐地

梁山崩

记异也传曰凡山崩川竭君为之不举【去盛饌】降服【损盛服】乘缦【车无文】彻乐【息八音】出次【舍于郊】祝币【陈玉帛】史辞【自罪责】以礼【以行礼于山川之神】梁山晋地

秋大水

冬十有一月己酉天王崩【此定王也】

十有二月己丑公会晋侯齐侯宋公卫侯郑伯曹伯邾子杞伯同盟于虫牢【郑地】

同盟虫牢为郑服晋也时天王崩四十日矣

六年

春王正月公至自会

二月辛巳立武宫

武宫者武公之宫也武公名敖伯禽五世孙有武德曾朝周而宣王飨之诸侯事四亲自高祖而上则皆祧之鲁惟伯禽不祧今鲁以尚武功之际特立武公一宫为不祧之庙其名宫者以太庙称庙羣公称宫也其名武宫者以晋曲沃武公为不祧之庙亦名武宫今效之一以着謚一以崇武也其又名世室者以世世不祧主则世世不毁室明堂位曰鲁公之庙【伯禽】文世室武公之庙武世室也【惟崇武故特加文字以与武相对】左氏断以己意谓以鞏之功立武宫【鞏战见前二年】夫鞏非鲁功虽旁人皆知之岂有鲁君臣亲受晋辱而肯贪晋功为己功者若如宣十二年楚子云为先君之宫以告成事则此系行军之际各载迁主以出战而及乎战胜则就其战地设宫告主如大传所称牧室为牧野告胜之处何尝在国中特立一庙且其所载主虽系迁主然实称祖祢尚书所谓用命赏于祖曾子问所谓以币告祖祢是也其于武公何与焉

取鄆【附庸国也】

卫孙良夫帅师侵宋

此晋命卫讨宋也虫牢之会宋公初辞之而後与会晋以其抗也命卫伐之是时晋伯宗夏阳说同卫孙良夫甯相并郑人及伊雒陆浑诸蛮戎一齐出师然师过卫时见卫不守备夏阳说即欲袭卫若全不知有孙良夫甯相之在师者然则卫之在晋虽不得当次国然亦何至卑弱如是故此不书晋并不书诸国及戎而独书卫大夫帅师侵宋使晋之恶卫之辱求其事而皆见焉夫卫何庸侵宋哉嗟乎卫自顾且不暇乃侵宋哉

夏六月邾子来朝【邾公作邾娄】

公孙婴齐如晋【婴齐子叔肸子】

壬申郑伯费卒【此郑悼公也】

秋仲孙蔑叔孙侨如帅师侵宋

此晋命鲁讨宋也三年公会宋伐郑四年宋使华元来聘五年仲孙蔑如宋是年冬公与宋公同盟于虫牢未尝有隙可乘也以受人之命而遣将兴师公行侵掠耻可知矣故不书晋命一

似我之自为之者虽讳国辱乎然而晋之恶我之辱求其事而皆见焉此文例也

楚公子婴齐帅师伐郑【以服晋故】

冬季孙行父如晋

晋栾书帅师救郑【救公作侵误】

据传晋栾书救郑与楚师遇于绕角【郑地】楚师还晋师遂侵蔡楚公子申公子成以申息【楚二县】之师救蔡御诸桑隧【上蔡地】赵同赵括欲战请于栾武子武子将许之荀首士燮韩厥皆不许遂止

七年

春王正月鼯鼠食郊牛角改卜牛鼯鼠又食其角乃免牛

卜郊在寅月卜牛在子月鼯鼠鼯鼠今名鼠狼是也未卜日不成牲故称牛余见前

吴伐郟

郟小国季文子曰中国不振旅蛮夷入伐而莫之或恤无吊者也夫【言无相恤者】

夏五月曹伯来朝

不郊犹三望

秋楚公子婴齐帅师伐郑公会晋侯齐侯宋公卫侯曹伯莒子邾子杞伯救郑八月戊辰同盟于马陵【卫地】楚子重伐郑师于汜【郑地】诸侯救郑郑共仲侯羽军楚师【二子郑大夫】囚郟公鍾仪献诸晋八月同盟于马陵晋人以鍾仪归囚诸军府

公至自会

吴入州来【楚邑即淮南下蔡县】

前宣十四年楚围宋还子重请赏已以申吕之田申公巫臣独不可谓申吕成赋以御北方若赏之是无申吕也晋郑将至汉矣子重怨之当楚讨陈夏归【在宣十一年】楚子欲纳夏姬巫臣谏止焉及子反欲娶之巫臣曰是不祥之人也是天子蛮【姬郑穆公女其兄灵公杀死无後】杀御叔【其夫】弑灵侯【即陈灵公】戮夏南【其子徵舒】出孔仪【孔宁仪行父】丧陈国何不祥如是人生实难其有不获死所乎天下多美妇人何必是子反乃止楚以

与连尹襄老襄老死于邲不获其尸其子黑要烝焉巫臣乃使郑召姬而待已于郑及楚共即位将伐鲁【阳桥之役】使屈巫【即巫臣】聘于齐且请师期巫臣乃尽室以行就郑娶夏姬使介反币【复命】而奔晋因却至以臣于晋晋使之为邢邑大夫至是子重子反灭巫臣之族尽杀子闾子荡及清尹弗忌襄老之子黑要而尽分其室巫臣自晋貽二子【子重子反】书曰余必使尔罢于奔命以死乃请使于吴晋侯许之见吴子壽梦而悦之留吴以一偏之车九乘与一两之卒二十五人并其射御教之以乘车战陈而使之叛楚且寘其子狐庸为吴行人吴始伐楚伐巢伐徐【皆楚属国】子重奔命焉於是会马陵而复以州来之入子重乃自郑奔还计子重子反於是乎一岁七奔命凡蛮夷之属楚者吴尽取之而于是晋复强而楚乃顿衰

冬大雩

卫孙林父出奔晋

孙林父者良夫之子卫定公恶之乃奔晋其奔也献晋所食戚邑卫侯如晋晋反戚邑焉

春秋毛氏传卷二十二

<经部,春秋类,春秋毛氏传>

卷二十三

钦定四库全书

春秋毛氏传卷二十三

翰林院检讨毛奇龄撰

八年

春晋侯使韩穿来言汶阳之田归之于齐

汶阳之田本鲁地而为齐所侵者二年以从晋伐齐而归我三年以齐不伏取而兴师焉今已七年矣又使之归齐何以处鲁鲁亦何以自处时季文子虽有辞然不敢显言第于饒晋使时私言之嗟乎晋无道如此

晋栾书帅师侵蔡

晋复侵蔡以六年救郑时已侵蔡而未得志也至是遂侵楚获申骊【楚大夫】郑伯将会晋师门于许东门而大获焉郑之反覆其又得以侵小如此

公孙婴齐如莒

宋公使华元来聘【传云聘共姬也】

夏宋公使公孙壽来纳币

宋公宋共公也纳币者聘共姬也【共姬为穆姜女成公姊妹】士昏礼有六礼五礼四礼之殊而诸侯则止有行聘纳币二礼与士不同又昏礼无主人以婿不自主须父母命也天子诸侯总无父矣此称宋公则必并其母亦无有者说见前

晋杀其大夫赵同赵括

初赵婴【盾弟】通于赵庄姬【盾子朔之妻】原屏放诸齐【原即赵同屏即赵括皆婴兄也】庄姬怨之至是谮于晋侯曰原屏将为乱栾却【二族】为徵晋乃杀同括惟朔子武从庄姬畜于公宫得免其称国杀并称名俱是书例使以同括为无罪耶则与陈杀其大夫泄冶例同以为有罪耶则与晋杀其大夫里克例同余见前

史赵世家晋景公三年大夫屠岸贾为司寇治灵公之贼徧告诸将曰盾虽不知犹为贼首以臣弑君而子孙在朝何以惩罪乃攻赵氏于下宫杀赵朔赵同赵括赵婴齐而灭其族与传颇异且其辞甚直其理甚正其事亦不可为无据此必当时有其说而战国以後尚相传为实录者祇史迁记事极疎谓赵朔妻系成公之姊则文公女也未有赵衰娶文公女而其孙朔可并娶其女者且此八年杀同括在晋景为十七年非三年也凡此皆存之以置勿论者然要其说则何可废哉

秋七月天子使召伯来赐公命【赐左公谷皆作锡】

召伯召桓公周卿士也礼诸侯即位天子赐以命圭及诸侯来朝而合瑞焉但赐在即位之後如文元年毛伯来锡命僖十一年传王赐晋惠公命同而此在八年之秋故杜氏以为缓然诸侯久不朝矣而王尚赐此此正告朔饩羊有志者所当愤然思去而尚责其缓也乎春秋十二公惟成朝京师【僖公朝王所耳】然已在十三年矣缓乎否耶

冬十月癸卯杞叔姬卒

叔姬虽来归而杞伯悔之请归葬于杞则不终归矣故称杞与文十二年称子叔姬卒不同

晋侯使士燮来聘叔孙侨如会晋士燮齐人邾人伐郯【左公谷皆以叔孙下别作一节】

晋士燮来聘特谋伐郯以郯事吴故也夫吴伐郯时伯主不能救恤及伐郯後又不能讨吴以辟後患徒使受祸之国以苟存而乞成者乃甫成而讨貳之师集于城下恶盈贯矣是时公赂燮请缓师燮不可季孙惧使宣伯帅师会伐郯

卫人来媵

此以我将嫁共姬而来致媵者礼诸侯娶夫人则两国来媵每国三人谓之九女以本国一夫人一侄【兄子】一娣【弟】两国皆一媵一侄一娣也但左氏谓同姓媵之异姓则否则春秋媵多异姓即此亦俨然有齐媵也又国语云王御不参一族正谓非一姓岂左氏自矛盾耶抑王礼异耶若公羊谓媵止二国无三国媵者则此年卫媵明年晋媵又明年齐媵俨三国矣惟徐仲山春秋日记有云何休云夫人居中宫少在前右媵居西宫左媵居东宫少在後侄娣总名少少或一或二不必定三故有三国来媵之事以为三国亦九女耳此说近之至于十二公嫁女不特共姬然此特详者公羊以为闻其贤而来媵则共姬以守礼死岂能预知且春秋何时齐晋何国何有乎一女子之守礼而争来致媵此不过以鲁系宗国其生平仪节往来在诸国久行不废不当以挽近降杀而在我则方畏强大值齐晋侵虐之际而尚能致媵则他时不记而此独记之以饰大体此正春秋扬美讳辱之微情也

九年

春王正月杞伯来逆叔姬之丧以归

公会晋侯齐侯宋公卫侯郑伯曹伯莒子杞伯同盟于蒲【卫地】

寻马陵之盟也

公至自会

二月伯姬归于宋

夏季孙行父如宋致女

女嫁三月则当庙见舅姑以成妇礼今国君夫人于三月後则其舅先公早已在庙夫人之家当遣卿聘问致成妇之礼在他国来谓之来聘在我国往即谓之致女此恒礼也胡氏谓遣卿非礼则桓三年齐侯使弟年来聘仲年介弟然亦卿也此何所分耶

晋人来媵

秋七月丙子齐侯无野卒

晋人执郑伯晋栾书帅师伐郑

蒲之盟郑既受命于晋矣既而楚反赂郑郑伯复会楚公子成于邓至是郑伯如晋晋以其贰于楚也执诸铜鞮【晋县】而遣栾书伐郑郑人使伯嚭行成晋人杀之其无道如此楚乃使子重侵陈以救郑

冬十有一月葬齐顷公

楚公子婴齐帅师伐莒庚申莒溃楚人入郕【公作运】楚子重自陈伐莒围渠丘渠丘城恶衆溃奔莒莒人乃获楚公子平而囚之楚人曰勿杀吾归而俘莒人杀之楚师乃围莒而莒城亦恶遂溃楚乃入郕左氏曰莒无备故也又曰备之不可以已也

秦人白狄伐晋

前宣八年晋师白狄伐秦至十五年而秦人伐晋已报之矣至是必驱白狄来以答白狄之役

郑人围许

郑伯执于晋公孙申谋之曰我出师围许以示之暇且若将改立君者而缓为晋使晋必归君

城中城

中城鲁邑冬而成城书时也且言急备也

十年

春卫侯之弟黑背帅师侵郑

晋命也

夏四月五卜郊不从乃不郊

礼以后蟄祈谷正周三月也凡卜以旬日当三月正郊之时已三卜矣至是四月又两卜合得五卜而不吉则後此将春分矣郊不过分遂不郊

五月公会晋侯齐侯宋公卫侯曹伯伐郑

郑公子班闻叔申之谋【前年公孙申有改立君之谋】立公子繻夏四月郑人杀繻立髡【郑成公太子】公子班奔许栾武子曰郑人立君我执一人焉何益不如伐郑而归其君以求成焉时晋侯有疾乃生立太子州蒲为晋君而会诸侯以伐郑其直书晋侯着其恶也杜氏曰父不父子不子一国两君大乱之道也于是郑子罕赂晋以襄钟【郑襄公之庙钟】子然受盟以子驷为质【皆穆公子】而郑伯得归

齐人来媵【媵有迟致者以待年也】

丙午晋侯孺卒

秋七月公如晋

公畏晋如晋亲吊已非礼矣晋人复止公使公送葬是时诸侯莫在者而公独送焉不书讳之也

冬十月【公无此三字】

十有一年

春王三月公至自晋

初晋景之未死也观于军府见锺仪问之【前马陵之战所获者】曰南冠【楚冠】而縶者

谁也曰郑人所献楚囚也问其族曰伶人也【乐官】与之琴操南音【楚音】范文子曰此君子也【以不忘楚】会晋侯方虑楚将以饰好遂遣锺仪归而使之求成楚乃使公子辰如晋报锺仪之使而修好焉及去年春晋复使余蒍【晋大夫】如楚报公子辰之使而未反而晋景死至是公如晋吊晋已止之送葬矣复疑鲁之曾通楚也曰将俟余蒍反验鲁虚实必不与楚通而後得归自去年秋七月至此春三月已閱九月矣公乃不得已而乞受盟焉夫友国相恤贵抚以德乃徒恃强暴以加于宗邦已则求敌成而反忌人之往来凌弱虐小莫此为甚左氏无识徒夸晋君臣之能动以范文子栾武子知庄子韩献子作人求善为之铺张而胡氏拘迂全以晋顺楚逆为诸国向背之断其于事理之得失毫厘不解惟夫子伤之自晋会赤棘以後凡受盟受伐取田归田如晋还晋皆一一详载而于作丘甲城中城立武宫诸绸缪事且三致意焉世尚昧其旨何也

晋侯使却鞮来聘己丑及却鞮盟【鞮公作州後同】

却鞮来聘且涖盟鞮求妇声伯声伯夺其外妹【出母之女】之嫁施氏者以与之妇人曰鸟兽犹不失伋子将若何声伯曰吾不能死亡【言不与则死亡矣】妇人遂行

夏季孙行父如晋

此报却鞮之聘且亦涖盟而经不书者必不成盟或晋君不亲盟故讳之也

秋叔孙侨如如齐

初以齐见侵不得已乞事晋为鞏之战絶前好矣至是齐君新立乃复聘于齐而修成焉

冬十月

十有二年

春周公出奔蔡

周公楚【周卿士名楚而食采于周者】恶惠襄之偪也【惠王襄王之族】且与伯与【周卿士】争政不胜怒而出及阳樊【晋地】王使刘子复之盟于鄧而入三日复出奔晋

夏公会晋侯卫侯于琐泽【公作沙泽地阙】

宋华元善于楚令尹子重又善于晋栾武子闻晋使余蒍求成于楚而楚子许之将复命矣华元乃如楚复如晋合晋楚之成使晋士燮楚公子罢盟于宋东门之外而後会琐泽以合齐鲁使听成焉

秋晋人败狄于交刚【地阙】

冬十月

十有三年

春晋使却錡来乞师

将伐秦也时召公佐师且却錡将事甚不敬故不书召兵而书乞师以讳之後凡书乞师皆同

三月公如京师

赴晋召过周因朝王焉其不书朝者文例也

夏五月公自京师遂会晋侯齐侯宋公卫侯郑伯曹伯邾人滕人伐秦

公及诸侯朝王毕遂从刘康公成肃公【皆王卿士】会晋侯伐秦於是栾书荀庚士燮却錡韩厥荀罍赵旃却至却縠栾鍼俱在军夏五月与秦师战于麻隧【地阙】秦师败绩获秦成差及不更女父其不书王人者为王讳也不书秦败者故阙之也皆文例也不然未有公在军而不知有王人兼不知秦败者此不须告也按杜氏云经文阙漏传文独存夫经据简书传据策书策书既存简何得阙孔氏又谓经之阙漏以策书所无也今传反有者必当时简书尚有此文故采而入传则是其简其策在夫子作时必有一存而一阙者而夫子即因其已阙而故阙之盖甚不取乎逼王人胁列侯越疆夸界动中国之衆以报私憾而徒博此区区之一胜也

不更女父是为秦不更之官而名女父者汉书称商君为法于秦战斩一首赐爵一级其爵级凡二十中有不更左庶长右庶长诸名此传有不更而襄十一年传又有庶长鲍庶长武则必春秋时秦先有此官而後渐增之以至二十非尽商君新立名也唐啖助赵匡据此疑左氏秦人在战国之後故有此官而陋儒遂谓其传为汉人所造夫左氏即秦人後于商君然岂不知爵级二十为商君所定而反以其名强入之鲁成襄秦桓景之间以自取败漏是□儿也且诸官实不自商君始也史记秦怀公四年庶长黪与大臣围怀公怀公自杀又出子二年庶长改迎灵公之子献公于河西此皆在春秋之末秦孝公用商君前者即商君初说孝公孝公拜为左庶长是商君未立法前且身为其官矣即商君诛後毁其所立法而庶长疾战修鱼庶长章击楚诸名仍存未尝以毁法而去之也啖赵本无学而陋者又从而和之夫爵级中有大夫名矣将母大夫亦秦末官乎

曹伯庐卒于师【庐左作卢】

时成肃公与曹宣公俱卒于师成肃公不书讳王辱也

秋七月公至自伐秦

冬葬曹宣公

当曹伯死晋师时公子负刍与欣时皆庶子也负刍为居守使欣时迎曹伯丧及还而负刍已弑太子而自立子臧【即欣时】将出亡国人从之至是既葬负刍虑国人有变告罪请子臧反子臧不得已乃反国而辞采邑焉

十有四年

春王正月莒子朱卒

夏卫孙林父自晋归于卫

前七年卫定公恶孙林父而林父奔晋今卫侯如晋晋侯强使见林父而卫侯难之及卫侯还则晋使却鞮纳林父于卫卫侯欲不从夫人定姜劝之曰不从将亡【晋见伐必亡】虽恶之犹愈于亡乎乃受之而复其位

秋叔孙侨如如齐逆女

此成公逆夫人也

郑公子喜帅师伐许

传子罕【公子喜】伐许为许所败郑伯复伐之入其郛许人平以叔申之封【四年郑公孙申疆许田不得今许以申所封田求和于郑】

九月侨如以夫人妇姜氏至自齐

冬十月庚寅卫侯臧卒

秦伯卒

不书名史失之说见前

十有五年

春王二月葬卫定公

三月乙巳仲婴齐卒

仲婴齐者襄仲之子公孙归父之弟也宣十八年逐东门氏归父走之齐而婴齐无与至是卒以大夫礼葬而书之于册其不称公孙而称仲者以襄仲卒时宣公赐襄仲氏仲【赐以己字】经于宣八年书曰仲遂卒于垂是也公羊解春秋不顾前经因不晓婴齐氏仲之故乃造为说曰曷谓仲婴齐为兄後也为兄後则曷谓之仲婴齐为人後者为之子也为其子则称仲何孙以王父字为氏也而于是以兄为父以父为祖丧生伦乱昭穆灭理伤教由春秋始矣夫归父奔齐并未絶嗣原不必为後即欲为後而大夫继爵不继统亦并无有弟为兄子子为父孙之理盖以继统言则僖兄为子闵弟为父何则以君臣也君臣即父子也以继爵言则臧宣叔以庶子武仲为後及武仲出奔则反以嫡兄臧为为後然而兄不父弟为不祖叔何则以继爵也继爵非继统也今以兄弟为父子则为无父以大夫而继统系则为无君无父无君总谓之大逆而乃以大逆之事在经传所本无者而公羊造之杜氏引之後人且从而遵之据之乱臣贼子不絶于春秋而反兴于後此之解春秋者不亦怪哉

癸丑公会晋侯卫侯郑伯曹伯宋世子成齐国佐邾人同盟于戚晋侯执曹伯归于京师【公归下有之字】

此曹伯即负刍十三年杀太子自立者故执归京师使天子治之时诸侯欲立子臧子臧奔宋

公至自会

夏六月宋公固卒

楚子伐郑

楚将北师子囊【公子贞庄王子】曰新与晋盟而背之可乎【盟在十二年】子反不从遂伐郑并侵卫

秋八月庚辰葬宋共公

宋华元出奔晋宋华元自晋归于宋宋杀其大夫山宋鱼石出奔楚【公谷宋杀六字宋鱼六字俱各一节】

宋共公既葬以华元为右师鱼石为左师桓庄之族皆以次为卿会司马荡泽谋弱公室而杀公子肥【文公子】华元不平将奔晋左师鱼石者荡氏族也与大司寇向为人少司徒鳞朱太宰向带少宰鱼府五人皆桓族惟华元与司徒华喜为戴族司城公孙师为庄族故鱼石欲止元而鱼府沮之曰右师反不讨桓氏乎曰反则讨止及泽耳不反必以晋楚之兵来无桓氏矣鱼石乃亲止华元于河上元请讨许之元乃反使华喜公孙师帅国人攻荡氏杀子山【泽字】而鱼石向为人鳞朱向带鱼府畏以同族故并罪故出舍睢上以示将奔乃华元固留之

且亲留之而五人不从及元反而鱼府始曰今不从不得入矣右师视速而言疾有异志焉至登丘望之则右师果驰归决睢水闭门登陴以防变于是左师二司寇二宰遂奔楚徐仲山曰记谓此经有五疑华元未奔晋曰奔晋一疑【或曰以奔晋告则未有朱奔先告者】不自晋归曰晋归二疑荡泽去氏而称字予耶否耶三疑五大夫同时出奔而止书其一何去何取四疑书例多省文两宋华元五宋字五疑此必简牕有脱误者

冬十有一月叔孙侨如会晋士燮齐高无咎宋华元卫孙林父郑公子魇邾人会吴于鍾离

左氏曰始通吴也

许迁于叶

许灵公畏郑之偪请迁于楚楚公子申迁许于叶

十有六年

春王正月雨木冰【雨着木成冰也】

夏四月辛未滕子卒

郑公子喜帅师侵宋

郑子罕伐宋宋将鉏乐惧【二大大】败郑师于沟陂退不设备郑人覆之获将鉏乐惧以还

六月丙寅朔日有食之

晋侯使栾黶来乞师甲午晦晋侯及楚子郑伯战于鄢陵楚子郑师败绩【公以甲午晦别作一节言昼冥也晋侯下又作一节谷梁甲午晦晋侯以下合作一节鄢陵楚地】

前年楚伐郑郑与楚成至是晋侯将伐郑栾书将之士燮却錡荀偃韩厥却至皆在军却犇徵齐卫之兵栾黶来乞师三国兵未至而晋师起郑人乃告楚楚子救郑以子反将中军子重子辛佐之五月晋师济河闻楚师将至范文子欲反栾书不可六月遇于鄢陵范文子不欲战却至不可楚子登巢车以望晋军晋侯?于淖栾鍼掀之及战晋吕錡射楚子中目楚子召养由基令射錡中项死楚师薄于险叔山冉搏人以投养由基所射无不殪晋师不能从子反乃命军吏察夷伤补卒乘缮甲兵展车马以图复战楚子召子反谋值谷阳豎献饮于子反子反醉楚子曰天败楚也乃遁范文子立于马前曰君幼诸臣不佞何以及此君其戒之

楚杀其大夫公子侧【即子反也十五年伐郑背盟以致败故杀之】

秋公会晋侯齐侯卫侯宋华元邾人于沙随不见公方晋之来召兵也齐国佐高无咎至于师卫侯出于卫公出于坏隤【鲁邑】已赴召矣叔孙侨如【宣伯】欲去季孟【季文子孟献子】而取其室穆姜助之【姜成公嫡母与侨如通】请逐二子而後行公难之姜怒会公子偃公子鉏趋过【二子公庶弟】指之曰是皆君也公乃申儆备设守使孟献子守公宫然後行故不及会宣伯使告却犇曰鲁侯待坏隤待胜者而归之也晋侯怒不见公此不讳者家难不可没然亦以甚晋之恶故书之

公至自会【左连上作一节】

公会尹子晋侯齐国佐邾人伐郑

公受晋命会尹武公【王卿士】及诸侯伐郑诸侯师次于郑西我师次于督扬【郑东地】不敢过郑子叔声伯【公孙婴齐】使叔孙豹【侨如弟】逆晋师而已为食于郑郊以待之四日不食【晋师未至不敢先食】诸侯迁于制田知武子【荀偃】又以诸侯之师侵陈并侵蔡未反诸侯又迁于颍上既而郑师夜突出诸侯皆失军【晋之虐诸侯如此】

曹伯归自京师

曹请晋侯赦曹伯晋侯曰子臧反吾归而君【子臧前奔宋】子臧反曹伯归子臧致其邑与卿而匿而不出

九月晋人执季孙行父舍之于苕丘【苕公作招晋地】

宣伯愬却犇使执季文子杀之晋从公所执季文子公还待于郚【西郚城】使子叔声伯请季孙于晋曰宣伯之情君知之悉矣若去蔑与行父是大弃鲁国而罪寡君也夫二臣者鲁国社稷之臣也二臣朝亡则鲁必夕亡夫亡鲁以属齐楚治之何及时却犇与声伯善【前十一年却犇娶声伯外妹】欲为声伯请鲁邑以赦行父声伯力辞之会范文子亦为言谓信谗愿杀忠良不可乃许鲁平而赦季孙冬十月鲁人出叔孙侨如而盟之【公未归而国人逐之诸大夫共盟以为戒】侨如奔齐十二月季孙及却犇盟于扈归刺公子偃乃召叔孙豹于齐而立後焉【宣伯弟即叔孙穆子也立之为得臣後】

冬十月乙亥叔孙侨如出奔齐

十有二月乙丑季孙行父及晋却犇盟于扈

公至自晋

乙酉刺公子偃

公子偃即穆姜所云皆可君者然不及公子鉏必宣伯与偃别有谋也故不书杀而书刺刺者讯也谓讯得其情而後诛之也说见前

十有七年

春卫北宫括帅师侵郑【括公作结】

晋命也

夏公会尹子单子晋侯齐侯宋公卫侯曹伯邾人伐郑晋召伐也

六月乙酉同盟于柯陵【郑西地
国语注经书公会尹子单子晋侯齐国佐邾人于柯陵今经无此文】

因伐而盟之

秋公至自会

据传楚子重救郑师于首止诸侯还然奔命极矣

齐高无咎出奔莒

据传齐庆克【庆封父】通于声孟子【齐侯夫人】身蒙妇人衣而出入焉鲍牵【鲍叔牙曾孙】见之以告国武子【佐】武子召庆克而敕之夫人怒会齐灵公从晋伐郑高鲍处守及还先闭门索客以备奸冗夫人愬灵公谓高鲍将拒君而立公子角【顷公子】国子知之公乃刖鲍牵而逐高无咎无咎奔莒时鲍牵弟国在鲁齐人召鲍国立之【为鲍氏後】

九月辛丑用郊

周九月为夏七月无郊之礼且用字无解此必经文有脱误者若胡氏谓以人飨则必曰用于郊且此何人也

晋侯使荀息来乞师

冬公会单子晋侯宋公卫侯曹伯齐人邾人伐郑十有一月公至自伐郑

壬申公孙婴齐卒于狸脤【公作軫谷作蜃
狸脤地阙十一月无壬申日似有误】十有二月丁巳朔日有食之

邾子貜且卒

晋杀其大夫却錡却犇却至

晋厉公侈多外嬖反自鄢陵欲尽去羣大夫而立其左右胥童者胥克子也怨却缺废克【在宣八年】与嬖人夷阳五长鱼矫之讎却氏者使楚公子茷【鄢陵所囚】告公曰是战也却至实召楚君欲乘败而奉孙周【晋襄曾孙即悼公】以事楚公信之以告栾书书亦忌却氏曰其有焉会公田与妇人先杀而饮酒後使大夫杀却至奉豕寺人孟张夺之却至射杀张公曰季子欺予将作难胥童请先杀三却却錡将攻公却至不可胥童乃与羊夷五帅甲攻却氏先杀錡与犇而至欲出奔追杀之皆尸诸朝且刳栾书中行偃公命勿杀既而公游匠丽氏栾书中行偃遂执公焉召士匄士匄辞召韩厥厥曰杀老牛莫之敢尸而况君乎乃先杀胥童使程滑弑厉公以车一乘葬之于翼东门之外使荀罃士魋迎周于京师【即孙周也】而立之朝于武宫逐不臣者七人【夷阳五之属】

楚人灭舒庸【楚与国】

十有八年

春王正月晋杀其大夫胥童【传在前年经在今春从告也下同】

庚申晋弑其君州蒲

齐杀其大夫国佐

初高无咎之奔莒也【在前年】其子高弱以卢【高氏邑】叛庆克帅师而围之时国佐从晋伐郑以难请于晋而归遂如卢师杀庆克而佐亦畏祸而据谷以叛齐侯与之盟于徐关而复之至是齐侯使士华免以戈杀国子于内宫之朝师伏夫人宫并杀子国胜而使胜弟国弱嗣国氏後

公如晋【朝新君也】

夏楚子郑伯伐宋宋鱼石复入于彭城【宋邑】

楚郑伐宋纳宋鱼石向为人鱗朱向带鱼府五人【皆十五年奔楚】于彭城以三百乘戍之而还【左氏书复入例与经不合】

公至自晋

晋侯使士匄来聘【谢朝晋也】

秋杞伯来朝

八月邾子来朝

筑鹿囿【书不时且非务也】

己丑公薨于路寝

冬楚人郑人侵宋

宋围彭城楚子重会郑师救之华元告急于晋晋韩厥为政师于台谷以救宋楚师还

晋侯使士魴来乞师

十有二月仲孙蔑会晋侯宋公卫侯邾子齐崔杼同盟于虚朮【地阙】

谋救宋也宋人辞诸侯而请师以会彭城孟献子以先君将葬请先归

丁未葬我君成公

春秋毛氏传卷二十三

卷二十四

钦定四库全书

春秋毛氏传卷二十四

翰林院检讨毛奇龄撰

襄公【公名午成公子母定姒諡法因事有功曰襄】

元年

春王正月公即位【杜曰公年四岁】

仲孙蔑会晋栾黶宋华元卫甯殖曹人莒人邾人滕人薛人围宋彭城

前年夏楚伐宋纳宋鱼石于彭城而去其冬宋围彭城楚复同郑来救之宋告急于晋故十二月晋为虚扞之盟以谋伐宋仲孙蔑与焉至是会晋师以围彭城彭城降晋晋取鱼石向为人鳞朱向带鱼府兄弟五人归而寘之瓠丘其不书降晋者以外事略之也若彭城上加宋字传以为特别于楚且不系叛人以成宋志则不然楚未尝取彭城而有之何必别楚鱼石兄弟亦偶据彭城并未尝为楚所封【公羊妄说】而君其地又何必不为之系且鱼石兄弟本是荡氏即宋桓之族亦非宋之一字可以絶其系而惩其叛况此入彭城围彭城与哀二年蒯聩入戚齐与卫围戚无异彼当夫子在卫时不书卫字则此非追书可知大抵史官不一人此时史官书宋事又各有书法往往多书宋字以志异而别无义例如此事始成十五经书宋华元出奔晋宋华元自晋归于宋宋杀其大夫山宋鱼石出奔楚连书五宋字既则十八经书楚子郑伯伐宋宋鱼石复入于彭城连书两宋字此皆一时之书法无所为者不然书宋彭城不以宋地与叛人也乃历书宋鱼石则早以叛人系宋矣以宋鱼石守宋彭城夫亦孰得而絶之【是时齐人不会彭城晋以为讨齐以太子光为质于晋後凡盟会有齐世子光以此】

夏晋韩厥帅师伐郑仲孙蔑会齐崔杼曹人邾人杞人次于郕【厥公作屈郕公作合】

晋韩厥帅诸侯之师伐郑入其郛败其徒兵于洧上於是东诸侯之师次于郕以待晋师晋乃复侵楚焦夷及陈时晋侯卫侯皆次戚以为援兵焉

孟子定五伯之罪惟在搂诸侯以伐诸侯今晋悼争伯全用此术日役使诸与国以啗喝此诸小国幸吴方逼楚楚罢奔命晋得以稍逞其威然而齐鲁卫之侮辱与宋郑陈之炮割则惨极矣胡氏不解论世祇知向晋为顺向楚为逆而不知向甲而乙争之师临城下国已垂灭而甲

不知救则不得不与乙平及平乙而甲之讨贰者其撻伐之师又至城下则向背顺逆将何取正先仲氏尝读宋史叹太王避狄未为失计夫天之立君本为民也君不能庇民而致使百万生灵日供惨戮我何以自安春秋自文宣以後大之爭小实类于是故徐仲山曰春秋小国当守郑公子去疾之言曰晋楚不务德而兵爭我与其来者可也晋楚无信我焉得有信其大国当守晋韩厥之言曰欲求得人必先勤之【言勤救其急】若以晋楚分逆顺是豎儒端见不足道也此为名言

秋楚公子壬夫帅师侵宋

楚子辛救郑侵宋吕留【宋二县名】郑子然侵宋取犬丘

九月辛酉天王崩【周简王也】

邾子来朝

冬卫侯使公孙剽来聘

晋侯使荀罃来聘

左氏曰凡诸侯即位小国朝之大国聘焉【时天王赴未至】

二年

春王正月葬简王【五月而葬速也】

郑师伐宋

楚令也

夏五月庚寅夫人姜氏薨

此成公夫人襄之嫡母也初穆姜【成嫡母】使择美櫨以自为櫨与颂琴【櫨者亲身棺也天子四重诸侯三重其亲身者名裱即櫨也颂琴雅琴】季文子取以与夫人焉【成十六年穆姜欲逐季文子故恶之】

六月庚辰郑伯睂卒

郑成公疾子驷请息肩于晋【欲更事晋以息争】公曰楚君以郑故亲集矢于其目吾何忍背之

晋师宋师卫甯殖侵郑

此晋伐丧也时子罕当国子驷为政子国为司马诸大夫欲从晋子驷曰官命未改

秋七月仲孙蔑会晋荀罃宋华元卫孙林父曹人邾人于戚

谋伐郑也

己丑葬我小君齐姜

齐侯使诸姜宗妇来送葬【妇人越疆送葬非礼】召莱子【使其送会葬者】莱子不会故晏弱城东阳以偪之【东阳齐近莱之邑】

叔孙豹如宋【聘新君也】

冬仲孙蔑会晋荀罃齐崔杼宋华元卫孙林父曹人邾人滕人薛人小邾人于戚遂城虎牢

前此会戚谋郑时孟献子请城虎牢以偪郑【虎牢郑邑时属晋】盖岩险之邑为地利所必争者第恐齐贰于晋而滕薛小邾俱不至欲借城虎牢以覘其向背至是献子通诸齐以全其好故诸国皆至城虎牢而郑人乃成

楚杀其大夫公子申

楚公子申为右司马以多受小国赂逼子重子辛楚人杀之

三年

春楚公子婴齐帅师伐吴【吴楚争强之始】

楚子重伐吴为简【选练也】之师克鸠兹【在芜湖东】至于衡山【在乌程县南】使邓廖帅组甲三百被练三千以侵吴吴人要而击之获邓廖其能免者组甲八十被练三百而已子重归既饮至吴人伐楚取驾驾良邑也邓廖亦楚之良也楚人咎子重子重病之遇心疾而卒而於是楚顿衰

公如晋【即位而始朝也】

夏四月壬戌公及晋侯盟于长檣【晋地】

公与晋盟孟献子相公稽首知武子曰天子在而君辱稽首寡君惧矣孟献子曰以敝邑介在

东表密通仇雠寡君将君是望敢不稽首

公至自晋

六月公会单子晋侯宋公卫侯郑伯莒子邾子齐世子光己未同盟于鸡泽

晋为郑服故且欲修吴好因合诸侯使士勾乞盟齐侯欲勿许而难为不協乃与士勾盟于郕外【郕水名】晋乃会王人单顷公及诸侯同盟鸡泽【晋地】时齐世子质于晋故以从晋复使荀会逆吴子于淮上吴子不至春秋书同盟一十有六然并无义例不过曰共盟已耳若谓以王臣预盟为同则洮与翟泉皆会王人而皆不书同若谓诸侯同欲故书同则现有齐侯不欲而盟之郕外者矣释例之不可据每如此

陈侯使袁侨如会

袁侨陈大夫以楚弱来成晋侯使和组父告诸侯以夸之

戊寅叔孙豹及诸侯之大夫及陈袁侨盟

诸侯既盟而侨始至故使大夫别与之盟其不书诸国者省文也祇书叔孙者详内而略外也

秋公至自会

冬晋荀罃帅师伐许

此时惟许未来服故伐之

四年

春王正月己酉陈侯午卒

夏叔孙豹如晋

此不知何事如晋左氏以为报知武子之聘夫荀罃来聘在元年冬迄今已四年矣中间孟献子会晋于戚又为晋城虎牢又公亲如晋及归又如晋会鸡泽又叔孙穆子为晋盟诸大夫岂有至此未报聘者况左氏于荀罃来聘下明曰凡诸侯即位小国朝之大国聘焉荀罃之来大国聘也公之如晋小国朝也夫朝即报聘矣左氏自为例而自叛之如此吾但知有经而不知有传夫然後夫子之春秋见焉然则经之没于传也不既多乎

秋七月戊子夫人嬖氏薨【嬖公作弋後同】

此成之媵襄之母也时公方七岁而定姒又微季文子将不使殡庙【古制皆殡庙故三代之殡皆在阶上三礼出自战国妄解殡庙是朝庙夫朝与殡何涉】不榾【复棺见前】不虞【既葬之祭诸侯五虞】而匠庆谏之且曰君长谁受其咎遂如礼又匠庆请木季孙曰略言任凭掠取之也时季孙曾树六榾于蒲圃东门之外将为已榾匠庆乃掠而用之季孙无如何余见文五年传

葬陈成公

八月辛亥葬我小君定姒【定諡踰月而葬速】

冬公如晋

左氏曰听政也谓受其贡赋多寡之政也且亲丧未五月而即往听政然则鲁直以天子之礼事晋矣时公请以郕属鲁谓可稍助鲁贡赋以为晋司马徵发兵赋之用名为官命晋许之

陈人围顿

前此鸡泽之盟陈人背楚而归晋楚使司马公子何忌侵陈为其叛也时冬月出师而今年之春楚师犹未归而驻于繁阳【楚地】韩献子患之已言于朝然仍不即救则亦何赖有晋矣幸陈侯初卒楚人将伐陈而闻丧而止得以稍解万一如郑成公卒【前二年】晋师伐丧将若之何今顿本服楚楚使伺陈人之间而陈反围顿以启楚衅且受命于晋而晋不之禁是祸小非恤小也故经于司马侵陈略而不书而第书陈之围顿以见後此之被伐皆陈自为之晋成之而楚无与焉

五年

春公至自晋

夏郑伯使公子发来聘

郑僖公初立且初服晋又与公为鸡泽之会故来聘公子发者子产之父也

叔孙豹鄆世子巫如晋【鄆谷作繒】

公再如晋时请以鄆属鲁故邾莒伐鄆而臧纆救之败于狐骀檀弓所云鲁人之鬻而吊自败于狐骀始者是也即国人亦有诵曰臧之狐裘败我于狐骀至是则叔孙穆子同鄆世子名巫者受成于晋以谢鄆属鲁之命此是实事故後此经书灭鄆书如邾书如晋皆以此为根据而公羊好诞造为鄆子立莒甥以絶祭祀谓之灭鄆则于策书实事既无可据且即此经前後文皆不通矣吾不知胡氏何以必遵之而不一顾也

仲孙蔑卫孙林父会吴于善道【公谷作稻吴地】

吴以不会鸡泽故使大夫壽越如晋谢之且请更会晋乃使鲁卫先会吴且告会期嗟乎鲁卫之受晋命乃尔

秋大雩

楚杀其大夫公子壬夫

楚人讨陈叛之故云令尹子辛实侵欲焉乃杀之

公会晋侯宋公陈侯卫侯郑伯曹伯莒子邾子滕子薛伯齐世子光吴人鄫人于戚

盟于戚会吴且命诸侯戍陈也时穆叔以属鄫不利【以前年为邾莒所败】故使鄫大夫聽命于晋而自为会焉

公至自会

冬戍陈

诸侯之在戚会者除吴人外皆受命于晋而为晋戍陈其独书我鲁不书诸侯者以诸侯无受戍之理且不逐衆戍一若我之自戍之讳国辱也

楚公子贞帅师伐陈

公会晋侯宋公卫侯郑伯曹伯齐世子光救陈【公谷曹伯下有莒子邾子滕子薛伯】

楚子囊为令尹范宣子曰我丧陈矣楚人讨贰而立子囊必改行【改子辛之贪欲】而疾讨陈陈近于楚民朝夕急能无往乎有陈非吾事也无之而後可【力不能有陈不如舍之】其冬诸侯戍陈子囊乃帅师伐之晋复会诸侯于城棣【郑地】以救陈

十有二月公至自救陈

辛未季孙行父卒

传季文子卒大夫入斂公在位【在阼阶西向作丧主】宰庀【具也】家器为葬备无私积无藏金玉其公俭如此

六年

春王正月壬午杞伯姑容卒

夏宋华弱来奔

宋乐婴与华弱相狎戏以张弓贯弱颈近于囊首平公见而恶之曰司武【司马】而桎于朝难胜任矣遂逐之华弱来奔

秋葬杞桓公

滕子来朝

莒人灭鄆【谷作繒】

鲁不能有鄆惩狐骀之败而反命于晋听其自输贡赋而自与於会则鲁之任莒灭鄆而复与邾平虽不无过弱非恤隣之道然其无负于鄆则尚可原也晋不能卫鄆及既灭又不能讨莒以还鄆乃复来责鲁必使季武子如晋而听晋命焉行伯者如是乎故夫子于灭鄆始终连书之以见晋之肆鲁之不振失恤隣之道但书事而义皆见焉

冬叔孙豹如邾

以莒之灭鄆复愆前狐骀之役如邾聘且修平焉

季孙宿如晋【行父之子】

晋人以鄆故来讨曰何故亡鄆季武子如晋听命杜氏曰听命者受罪也

十有二月齐侯灭莱

前二年齐侯伐莱莱人以马牛百匹赂齐寺人宿沙卫而还其年秋齐召莱子使送齐宗妇之会鲁葬者而莱子不至因使晏弱城东阳以偪之至是围莱筑堙环莱城而傅於堞遂入莱莱共公奔棠【莱邑】晏弱围棠而灭之迁莱于郕【迁放郕国】陈无宇【齐大夫】献莱宗器于襄宫【齐襄公庙】高厚【高固子】崔杼定其田

七年

春邾子来朝

夏四月三卜郊不从乃免牲

此祈谷之郊必在建寅月启蛰之後春分之前周夏四月即夏之春二月也春分为二月中气三卜三十日则在分後矣故不从则已孟献子曰吾今而後知有卜筮夫郊祀后稷【祈农必祀稷非长至配天之祭杜注误】以祈农事也是故启蛰而郊郊而後耕今既耕而卜郊宜不从也余见僖三十一年传

小邾子来朝

城费

费季氏邑也南遗为费宰叔仲昭伯为隧正【昭伯者叔仲惠伯之孙隧正主役徒即周礼遂人也】欲善季氏而求媚于南遗谓遗请城费吾多与而役故季氏城费【此强私家之渐也】

秋季孙宿如卫

传言报聘非是卫剽聘在元年未有七年始报聘者观是冬孙林父来聘则必此施聘而卫即报之不然我七年一报而彼不踰时而又来聘必无是理鲁卫为晋役而已好未修故至此为一修之

八月螽

冬十月卫侯使孙林父来聘壬戌及孙林父盟

楚公子贞帅师围陈

十有二月公会晋侯宋公陈侯卫侯曹伯莒子邾子于鄆【谷作?郑地】

此本以救陈为会而经不书救陈者以无志于救徒驱役诸侯之师而观望不急前也此文例也

郑伯髡顽如会未见诸侯丙戌卒于鄆【顽公谷作原鄆公谷作操】据传郑僖公以不礼子罕子驷兄弟在道被弑因以疟赴于诸侯此原可疑子罕子驷皆郑穆之子当僖初立时子罕当国子驷为政一时称盛未必即行此大逆之事且未有君不加礼而臣即可以推刃者特公谷谓公欲如晋而郑大夫俱欲从楚相争不下因以被弑则直是造事叛经之言而胡氏又恪遵之夫郑之服晋见于前经郑大夫之欲从晋见于前传当郑成公临卒时子驷请从晋而公不欲及公卒晋来伐丧诸大夫又欲从晋而秉政者徒以公遗命而不即许及晋城虎牢而郑诸大夫即羣然归晋而听命焉是欲事楚者郑君欲事晋者诸大夫也纵左氏作传在文宣以後多用晋策书张扬晋事剧不足信然经具在也经于二年城虎牢後则三年盟鸡泽五年盟戚历历书郑于晋侯卫侯之下即戌陈救陈郑皆与焉郑固坚事晋而楚亦时以伐吴失利无

意争郑安得有从楚之争忽生其间向使郑僖之弑果由如晋则郑僖卒後诸大夫正可叛晋而归楚之时而考之经文则今日葬僖公明日即诸大夫并侵蔡而伐楚疆献楚捷焉经书夏葬僖公郑人侵蔡获蔡公子燮明明在也公谷道听涂说纯乎诬经固不足怪宋儒极称尊经致三百年来不知夫子有春秋而祇知胡传乃其叛经悖圣至于如此岂不可叹故吾于文宣以後不甚信传以晋君臣之极恶而策书扬之比于周文如祁奚举贤魏绛戮仆诸事与经何与而至于经文前後疏密烦简则蛛丝马迹夫子实有意焉如此经郑君道卒其被弑与否有策书在但从其所告书之而其义则专为晋欲争胜而不能庇小徒日役诸侯之师观望道路致有死于役者有逃归者嗟乎行霸恶习流毒如是夫子所为一举笔而三致意也

陈侯逃归

楚子十月围陈至十二月陈侯于围城之中出而告急以为可以即救也而晋无意救徒留陈侯会以待诸侯之师夫城郑救郑戍陈救陈亦无多事而必藉诸侯之师所谓祁奚为元尉魏绛为司马张老为元候羊舌职知铎遏寇为军佐舆尉训御训卒知义知礼师不陵正旅不偪师观于道而迎颂于国者何在夫如是则安可恃矣是以楚围之急陈人大恐其大夫庆虎庆寅使人于围城之中出告楚曰吾使公子黄而第执之楚人从之执公子黄二庆乃使告陈侯于会曰楚人执公子黄矣君若不来羣臣不忍宗庙社稷之即于亡也惧有背吾君而属于楚者陈侯乃逃归

八年

春王正月公如晋

传曰公如晋朝且听朝聘之数也夫十二月甫会鄆至正月而即如晋何其劳也夫即此七年间公如晋者三如会者五鲁大夫之奔命者十有三矣

夏葬郑僖公

郑人侵蔡获蔡公子燮【谷作湿】

郑人恃晋于先君甫葬即使子国子耳侵蔡获蔡公子燮【庄公子】郑人皆喜惟子产【子国子尚幼】不悦曰此祸也楚人来讨能勿从乎从之晋师不即至乎晋楚伐郑郑自今不得宁矣

季孙宿会晋侯郑伯齐人宋人卫人邾人于邢丘传曰会邢丘者所以命朝聘之数也惟郑伯献捷于晋故亲听命余即使诸国大夫听之时公尚在晋观经书公至自晋在此会後而公不与会者不敢以朝聘之数使诸侯亲听命也宋儒无学苏辙谓晋悼修文襄之业定朝聘之数诸国称人所以夸衆而胡氏又谓朝聘大事重烦诸侯而但命大夫为大夫执国之渐则不知此朝聘者非天子朝聘可以坐王朝而使四方诸侯頽首而听命者也晋为不道定事大之礼

自为典制以使诸国禀朝晋聘晋之节四年定贡赋此年定朝聘则虽各国大夫頽首听命亦甚无礼而况诸侯乎晋悼惟自知无礼故公尚在晋而不使与会公亦稍知与会为非礼故虽实在晋而但使季孙听命而不嫌而胡氏反谓大夫与会君若贅旒则必鲁君臣相率稽首于坛坫之下方为得礼解经至此扫地矣朝聘数无可考惟昭三年郑子太叔云昔文襄之霸也其务不烦诸侯令诸侯三岁而聘五岁而朝有事而会不協而盟此与昭十三年传所称天子之制岁聘志业间朝讲礼【间者隔一岁即三岁一朝】再朝而会再会而盟不同朝聘较天子为减而会盟则无限数有事即会有不協即盟此晋文晋襄私定之制而後君行霸因复申命传所谓听朝聘之命以此

公至自晋

莒人伐我东鄙【疆鄙田也】

秋九月大雩

冬楚公子贞帅师伐郑

楚子囊伐郑讨侵蔡也郑诸大夫欲从晋者半从楚者半然而晋救卒不至乃及楚平使告晋曰君命敝邑修车赋餼师徒以讨乱略因讨蔡俘燮献于邢丘今楚来讨曰女何故称兵于蔡焚我郊保冯陵我城郭夫妇女不遑啓处以相救也翦焉倾覆无所控告夫民之死亡者非其父兄即其子弟乃人人愁痛并不知吾等为谁所庇而但知穷苦而受盟焉将安禁之晋对曰君有楚命亦不使一介告晋而即安于楚君之欲也寡君将帅诸侯以见于城下惟君图之

晋侯使士匄来聘

报公朝也

春秋毛氏传卷二十四

<经部,春秋类,春秋毛氏传>

卷二十五

钦定四库全书

春秋毛氏传卷二十五

翰林院检讨毛奇龄撰

九年

春宋灾【公作火】

传宋灾乐喜为司城以为政【作救火之政】使伯氏司里【里宰】火所未至彻小屋涂大屋【以泥水涂之】陈畚局【土甕】具绠缶【汲器】蓄水潦积土涂巡丈城缮守备【恐因灾有变】表火道【火起则从其所向以表之】使乐遄庀刑器【防有干犯旧注误】使皇郕命校正出马工正出车备甲兵庀武守【防奸宄不测】使西鉏吾庀府守【守府库】令司宫巷伯儆宫【守宫禁】祝宗用马于四墉祀盘庚于西门之外【用马祭四城以禳火盘庚宋远祖以配火神】

夏季孙宿如晋

八年晋士匄以公朝报聘此又谢之

五月辛酉夫人姜氏薨【四月而葬速】

此成之嫡母襄之祖母也成十六年姜通于侨如欲废成公因迁姜于东宫至是薨焉

秋八月癸未葬我小君穆姜

冬公会晋侯宋公卫侯曹伯莒子邾子滕子薛伯杞伯小邾子齐世子光伐郑十有二月己亥同盟于戏【杜氏曰十二月无己亥日正义曰此十一月之误】

诸侯伐郑季武子与齐师宋师从晋中军门于鄆门卫师曹人邾人从晋上军门于师之梁【亦郑城门】滕人薛人从晋下军门于北门杞人郕人从晋新军斩行栗【表道之树】且令诸侯修器备盛餼粮归老幼使病者归养虎牢以示必下郑人恐乃行成中行献子【荀偃】曰姑围之以待楚人之救也而与之战不然无成【必如此方有辞于郑不然两大无雄雌而徒强郑服则楚来救郑而郑复属之矣故无成】知武子曰许之盟而还师以敝楚人吾三分

四军与诸侯之銳以逆来者犹愈于战夫暴骨以逞不可也君子劳心小人劳力先王之制也乃许郑成十一月同盟于戏郑服也至将盟郑六卿公子駟【子驷】公子?【子国】公子嘉【子孔】公孙辄【子耳】公孙蚤【子蟠】公孙舍之【子展】及其大夫门子皆从郑伯晋士庄子为载书曰自今日既盟之後郑国而不唯晋命是听而有异志者有如此盟公子駟趋进曰天祸郑国使介居二大国之间大国不加德音而乱以要之【谓以兵力强要郑伏】使其鬼神不获歆其禋祀其民人不获享其土利夫妇愁苦垫隘无所底告自今日既盟之後郑国而不唯有礼与强可以庇民者是从而敢有异志者亦如之【徐仲山春秋日记曰晋悼争郑不惟无礼亦并不强不可以庇民故子驷载书之言痛心伤骨呼号抢擗之中复寓讽言晋闻之而无慙色无悔心不当前谢罪引师而退直虫豕之不若者左氏能记此词而复扬晋德称为三驾之师嗟乎冤哉】荀偃曰改载书公孙舍之曰昭大神而要言焉书可改也大国亦可叛也乃盟而还晋人不得志于郑以诸侯复伐之十二月癸亥门其三门【即前所门三门】闰月【是年无闰月闰为门五之误月为日之误谓一门各攻五日欲以苦郑即前知武子所云三分四军法也】戊寅【计癸亥至此刚三五十五日】济于陰阪侵郑【别邑】次于陰口而还子孔曰晋师可击也师老而劳且有归志必大克之子展曰不可是役有郑成而经不书不与成也有晋复伐郑而经又不书不与其复伐郑也夫郑亦何罪欲伏之而不能庇欲与人争强而不能与战徒役诸国之师以久劳于外而胡氏尚曰善为国者不师善师者不阵善阵者不战知武子真明于战阵之法夫晋固不师然列国之为师久矣晋固不阵不战然郑之受人阵受人战亦已多矣然且不敢与强大战而其门三门分四军积一十五日而且阵且战何其勤也夫暴骨以逞在己不可而在郑则可是尚为能明战阵之法也乎夫子伤之故不书郑成不书晋再伐而特于楚之伐郑则郑重书之以致意焉若如杜氏言经书同盟而郑之受成在其中则成十七年柯陵之盟晋侯会诸侯伐郑而自为盟斯时郑未尝受成也然而书同盟其谓之何

时襄公年十二礼诸侯十二当冠晋侯问季武子且请冠具武子曰君冠必以裸享之礼行之以金石之乐节之以先君之祧处之【始祖庙为祧】今寡君在行未可具也请及兄弟之国而假备焉乃还及卫冠于卫成公之庙假钟磬焉夫以伯主之威使宗国国君不冠于国而冠于道路其横极矣春秋重礼例而此独不书讳国辱也

楚子伐郑

楚子伐郑子驷子展曰吾盟固云惟强是从今楚师至而晋不我救则楚强矣遂及楚平会楚庄夫人卒楚未能定郑遽归乃左传袭晋策书文妄称晋侯息民国乃有节故三驾而楚不能与争夫三驾者三兴师也一驾在十年师于牛首经书公会晋侯【及宋公等十三国】伐郑是也尔时郑有盗祸不得已服晋而楚救一至晋师欲逃即栾黶勉强争进夹水驻师而究不敢犯楚师而逡巡引还是一驾而不敢与楚争也二驾在十一年师于向经又书公会晋侯【及宋公等十三国】伐郑是也尔时郑甫服晋而楚子囊与秦师俱至郑复迎楚与秦楚二师同出伐宋而晋不敢救是二驾而不敢与楚争也三驾在其秋观兵郑东门经又书公会晋侯【及宋公等十三国】伐郑会于萧鱼是也尔时郑不得已又服晋而楚约秦师救郑惟恐晋不出直入晋地渡河与战而晋师败绩其明年楚公子贞复伐宋战于杨梁报伐郑之役而晋

又不敢敌是三驾而皆不敢与楚争也夫以三驾并不敢争楚之霸主而反曰三驾而楚不能与之争此固晋国春秋诬妄铺扬之词左氏无识而采入之与吾夫子之春秋全然相反而胡氏又曰三驾不能争虽城濮之战亦何以过又曰自此郑不复背晋者二十四年夫郑以厌乱之故自画策以谢楚师而一意归晋楚亦以厌兵之故又值吴患遂舍郑不争而听其自便此真贪天之功以为己力者欲知春秋何不于夫子经文一再读之

十年

春公会晋侯宋公卫侯曹伯莒子邾子滕子薛伯杞伯小邾子齐世子光会吴于柤

柤楚地会吴者谋病楚也吴子寿梦即後称吴子乘者其不称子外之也与成十五年会吴于鍾离十四年会吴于向并同

夏五月甲午遂灭偃阳【偃谷作傳】

偃阳妘姓楚附庸国晋侯藉诸侯之师兼恃吴势灭之所以病楚故旧史祇书灭偃阳而夫子特加遂字以诛其意以为会柤者固灭偃阳所自来也是以既灭之而必以其地予宋谓宋与楚郑恶予宋所以辱楚郑也宋甫受偃阳而楚子囊即与郑子耳同出伐宋谓宋受晋地伐宋所以报晋也此夫子春秋也初晋荀偃与士匄请灭偃阳而封宋向戌为附庸荀罃曰城小而固胜之不武弗胜为笑及围之弗胜会鲁孟氏之臣秦董父以步辇挽輜重如师偃阳人启门诸侯之士有攻门入者偃阳设版作悬门从门上垂下以截攻门入内之人鄢人纆【即叔梁纆夫子父也叔梁字】抉之以出门者【抉举其悬门以出入内之人】又有狄虎弥挟大车轮作櫓楯以右手拔戟当一队之人【百人】既而城上悬布秦董父登之及堞绝其布董父坠则又悬之再绝再坠至坠死而苏复上如故偃阳人谢之乃取其断布徇师三日以示勇然而城固终不克荀偃与士匄请还师荀罃不许乃限七日克遂灭之以其地封宋向戌戌辞乃与宋公宋公享晋侯于楚丘奏桑林之乐【商先王乐】乃以偃阳子归献俘于武宫既又以偃阳妘姓不灭其祀使周内史选其族嗣令守祀于晋之霍邑其曰使周内史者假天子之命一若天子复其祀周礼内史职所云内史掌爵禄废置是也传又曰师归孟献子以秦董父为右董父生秦丕兹事仲尼

公至自会

楚公子贞郑公孙辄帅师伐宋

楚子囊郑子耳伐宋围宋门于桐门卫师救宋郑子展曰必伐卫不然是不与楚也既得罪于晋又得罪于楚不可子驪曰国病矣子展曰得罪二大国必亡病不犹愈于亡乎遂遣皇耳帅师侵卫卫人追之乃获皇耳于犬丘既而楚子囊郑子耳侵我西鄙复围萧【宋邑】克之夫春秋鲁史也楚郑伐宋尚书之岂有伐本国而反不书者此意服?能道之服?云其不书者以公亲从晋伐郑不能服郑旋复为楚郑所伐耻之故讳之也

晋师伐秦

秋莒人伐我东鄙

传曰莒人闻诸侯之有事也故伐我东鄙

公会晋侯宋公卫侯曹伯莒子邾子齐世子光滕子薛伯杞伯小邾子伐郑

周礼典命诸侯之适子命于天子摄其君则下其君之礼一等未命则以皮帛继子男今齐世子光未命天子【见十九年传】则当继子男之後观前粗之会列小邾子下可验也今忽跨滕薛而上之传称齐崔杼使太子光先至师遂长于滕此似可据但後此亳城萧鱼二会未闻其先莒邾至师乃公然两列其名在莒邾滕薛之上则似夫子之书法全不在此或亦告文本参错而简书依之故尔耶

冬盗杀郑公子騂公子?公孙辄【騂公谷作斐】

据传郑子驷当国与尉氏司氏堵氏侯氏子师氏五族有隙五族聚不逞之人因八年所杀公子婴之徒以作乱时子国为司马子耳为司空子孔为司徒盗将尽杀之攻于西宫之朝杀子驷子国子耳惟子孔先知之得免盗乃劫郑伯以如北宫子驷之子子西【公孙夏】不能追盗子产【公孙侨】者子国子也先戒衆官设守备谨府库盖藏而後成列而出以车十七乘攻盗于北宫尽杀之仅有奔者特郑当积创之余复遭盗祸自此厌乱不能与诸侯争矣此亦晋楚争郑一大节目故夫子备书焉其不称大夫以非国讨不当书爵也旧说非是

戌郑虎牢楚公子贞帅师救郑【左公谷楚公子下别作一节】

诸侯之师受晋命以城虎牢於以逼晋而夫子特书曰戌郑虎牢不书诸侯者责在鲁也夫鲁宗国也其可受强大之命以偪同姓诸侯国乎【经凡不书列国者皆属鲁事】特书郑虎牢者责不当戌也夫此谁之地而可以戌之也乎【杜预谓晋欲还郑地故书郑以见晋志夫成虎牢时何曾欲还郑乎且夫子特书鲁戌而并不及晋是鲁志也不通甚矣】然且承上冬文不另书月日以示乘盗祸之後急以偪之故楚之救郑一若幸其急至者盖一书而数义备焉

据传不止戌虎牢晋使诸侯戌虎牢而已复城郑之梧制诸邑以迫胁之使士魴魏绛守梧制而经不书者恶其事也惟时郑不得已又与晋平而楚子囊忽救至荀罃欲退师曰今我逃楚楚必骄骄则可战矣栾黶曰逃楚晋之耻也合诸侯以益耻【谓诸侯同逃则增耻】不如死我将独进师遂进与楚师夹颍而军郑子蟜曰诸侯有去志必不战矣我服晋晋必去不服晋晋亦必去晋去楚必围我总之晋在必去何如服楚亦可以使楚去于是夜涉颍水与楚人盟栾黶欲伐郑荀罃不可曰我实不能御楚又不能庇郑郑有何罪不如留郑一怨隙之地使楚去後我可来伐若今即伐之则楚必救之战而不胜为诸侯笑矣夫胜可必乎不如还也于是诸侯之师还楚人亦还【三驾之一如此】

公至自伐郑

十有一年

春王正月作三军

周礼大司马职王六军大国三军次国二军小国一军传所云成国不过半天子之军言成为大国祇得半天子而为三军是也鲁本大国则自宜有三军而至是而始作者以大国称为元侯可作师以承天子而次国小国则祇帅贡赋以从元侯之征行此旧制也至文宣之际王室衰微政在伯主伯主自立一贡赋之法量诸国大小以责车役致大国三军皆自贬损其军以冀免贡赋故鲁在文宣间不知何时减去一军而至是季武子连岁从征慑晋楚之强思以自振又其时车战稍坏值毁车为行之候将征人以充步士于是取旧制三军後祇存上下二军者增一中军于其间又将旧制征军之法天子六乡征六军诸侯三乡征三军周礼万二千五百家为乡即万二千五百人为军每一家征一人故一乡为一军凡三军共三万七千五百家皆公家自征之临师则但以三卿帅其军而征人与征税皆不与焉至是季氏作三军使三家分征之传所谓三分公室而各有其一是也然且增军士之数或加什伯以益一军或加仟伯以益一军渐将变车乘而为行列因各自毁其私家之乘尽以益之使私家之乘之人令其余徒役如姜卒余子之类皆入之为军而并邑税亦尽征入已而不贡之公惟叔孙则臣其徒役子弟使皆为军而邑税仍还公家孟氏则并徒役子弟亦但臣其半入军而半还之公传所谓三子各毁其乘季氏即以其乘之人与其役邑俱入之已否则徒役邑税俱倍征之叔孙使其徒役子弟尽为之臣而邑税不征孟氏即徒役子弟亦半使为臣是也当是时惟恐伯主责大国贡赋故叔孙穆子不肯作恐不能久行也季氏使诅盟以示必行而後昭五年则仍舍中军而不能竟行

天子六军以六卿将之大国三军以三卿将之且每军各有副贰则虽三军亦用六卿如晋行三军每出六卿以将之至作五军则以十卿领之是也公羊谓三军者三卿也古者上卿下卿上士下士其说难解如谓古三卿为司徒司马司空至行军时则祇用司徒司空而不用司马如繇诗乃召司徒乃召司空而不召司马故但有上下二卿而无中卿今增一司马官谓之增中军则牧誓司徒司马司空主伯亚旅立政司徒司马司空亚旅阪尹未尝以行军而缺其官况行军最重司马司马者主兵政之官也故传凡叙战亦皆以司马为政繇诗所云召司徒召司空者此太王迁都作室之官非行军官也如谓司徒司空皆卿一人大夫二人惟司马卿一人大夫二人未尝于司马有所缺也凡此皆说之周章无理者至谷梁谓天子六卿诸侯一军则误认晋曲沃武公以一军兴而不知其初之以都邑而篡侯服本属创事非尝制也不然晋清原之蒐共作五军鞏之战始作六军岂大国有五军有六军耶唐啖氏谓天子六军大国三之一小国半大国则直杜撰立说无凭无据之语以此解经何愁圣经不晦蔑也

夏四月四卜郊不从乃不郊

说见僖三十一年传

郑公孙舍之帅师侵宋

郑人厌乱极矣乃合诸大夫谋曰晋楚虽并强而晋合十三国诸侯之师则楚弱于晋矣特恨楚来晋不急救我耳晋能急救则楚当避晋何道而可使晋师为我致死使楚不复来而後可终事晋也子展曰吾苟侵宋则诸侯必至吾从之盟楚师至吾又从楚盟则晋怒甚矣晋近能骤来而楚远不能吾重赂晋师而然後谢楚则或可免斯难乎于是先使疆场之吏恶于宋致宋来侵郑然後子展出侵宋

公会晋侯宋公卫侯曹伯齐世子光莒子邾子滕子薛伯杞伯小邾子伐郑

晋合十三国之师伐郑宋东门晋营西郊卫侵北鄙诸侯师于向围其城而观兵南门

秋七月己未同盟于亳城北【亳公谷作京】

郑人乃乞盟同盟者郑与盟也亳城郑地

其盟词有曰若间兹命司慎司盟名山名川羣神羣祀先王先公七姓十二国之祖明神殛之俾失其民队命亡氏蹈其国家其词如此而既而郑即从楚不顾渝盟者盖欲因之以谢楚而非背晋也以为其谋固然也

公至自伐郑

楚子郑伯伐宋

楚子囊以救郑来而诸国之师已解去遂伐宋但是时楚邀秦师并来救而郑即从之经不书秦人而反书郑伯者深予郑之善自谋也当是时楚已在郑意量中矣

公会晋侯宋公卫侯曹伯齐世子光莒子邾子滕子薛伯杞伯小邾子伐郑会于萧鱼

诸侯悉师至观兵于郑东门郑人行成晋赵武入盟郑伯郑子展出盟晋侯乃会于萧鱼三日乃赦郑囚毁斥堠禁侵掠晋侯使叔肸告于诸侯郑人乃赂晋侯以师捰师触师蠲【三乐师名】广车輶车【皆兵车】淳十五乘【淳耦也谓两十五也】甲兵备凡兵车百乘【合广輶车】歌钟二肆【悬钟十六为一肆】及其鐃磬【鐃钟鐃磬皆倚歌者】女乐二八晋侯以乐之半赐魏绛嘉其和戎狄而正诸华为有功也夫晋楚争郑在绛亦偶一与师至三驾之出绛并不与乃金石之乐祇以予绛而嚮偃魴勾诸君徒事劳苦而并不一及且十二国君奔命暴露连年累岁而歌钟鐃磬曾不得比于郤鼎之取与济田之归同泽安在况师中之赏最贵明信郑之赂晋本属郑谋而为之史者实以此张晋之功已为可笑且此与和戎从无干涉

虽三驾七合【国语七合诸侯】总不如和戎之善然而郑赂全不由此吾故曰左氏铺扬悉本之强晋策书之谬文不足道也萧鱼郑也

公至自会

旧例书至必以後事初公以伐郑往而既盟于亳城则宜书公至自会乃书公至自伐郑者不与其盟也以郑将变盟也此以代郑往而既盟萧鱼则直书公至自会与其盟也以郑有此盟而其後可不用兵也虽是时秦复救郑次年楚复报晋取郑仍为郑用兵而经书并不及郑一似与郑絶无与者盖喜郑谋之从此定也虽然公以年少初立十年之间凡书公至者不一矣三年两书如晋两书至四年书如晋至五年始归而始书至五年又书会晋又书至七年又书会晋乃不书至以是年陈侯逃归郑伯死于会恶其会遂不书至以示变也八年春即书如晋至夏而始书至九年又书会晋至十年始归而始书至是年夏始归而秋又书会晋至冬尽而始书至至此年春书会晋秋书至秋即书会晋秋又书至则其奔命道路无顷刻之安为何如者然且在途加冠在晋朝正者非一年谁为为之以至于此夫子书至此亦伤之矣

楚人执郑行人良霄【谷作良宵】

郑人使良霄大宰石?如楚告将服于晋曰孤以社稷之故不能怀君【言将他事也】君若能以玉帛绥晋不然则武震以摄威之【言非讲好则大为震摄】孤之愿也楚人执之【其後用公子囊言仍使归郑】然自是楚无意争郑矣

冬秦人伐晋

据传秦庶长鲍庶长武帅师伐晋以救郑直入晋地与晋士魴战于栢晋师败绩经不书救郑者非郑志也且以絶夫後此之争郑者也

十有二年

春王二月莒人伐我东鄙围台【台谷作郚】

莒既灭鄆鲁侵其西界故前此曾伐我东鄙以疆鄆田至前十年秋乘诸侯多事复伐我东鄙则强抗甚矣今不惟伐鄆又且围邑其能已乎

季孙宿帅师救台遂入郚【郚公作运】

季武子乃救台遂乘胜入郚以报见伐且取其钟以为公盘经书遂者与之也与其能继事也古者命将得专制阃外之事凡可以安国家利社稷者则专之可也公谷以大夫无遂事为言此是妄语而胡氏又从之则必如後世之承庙算以取进止致强敌在前而不敢问可乎况以小抗大又实无道且十年之间九作同盟而三见侵我非大创何待矣若汉五行志引刘向传

谓季武子作三军有侵陵用武之意故隣国不和伐我三鄙【秋邾人伐南鄙十六年齐侯伐北鄙连此东鄙为三鄙】则莒人伐我早见之八年之间此时三军尚未作也事外闲论全不考本末而信口妄诞皆害经之学观者察之台鲁地郛莒地

夏晋侯使士魴来聘【魴公作彭】

秋九月吴子乘卒

传曰吴子寿梦卒临于周庙【鲁立文王庙以为周公宗子所自出名出王庙】礼也凡诸侯之丧异姓临于外【城外】同姓于宗庙【即出王庙其名宗者以宗子所出也】同宗於祖庙【始封之君即周公也】同族于祢庙【同族自高祖以下小宗也祢父庙】是故鲁为诸姬临于周庙为邢凡蒋茅胙祭【皆周公支子别封为国】临于周公之庙

冬楚公子贞帅师侵宋

楚子囊秦庶长无地伐宋师于杨梁以报晋之取郑也经不书报晋取郑者以为郑从此可不争也

公如晋

公如晋朝且报士魴聘也

春秋毛氏传卷二十五

卷二十六

钦定四库全书

春秋毛氏传卷二十六

翰林院检讨毛奇龄撰

十有三年

春公至自晋

夏取郛【公作诗】

郛小国名【公羊谓邾娄之邑】据传郛乱分国为三部鲁以师救郛既而取之

秋九月庚辰楚子审卒【楚共王也】

冬城防

十有四年

春王正月季孙宿叔老会晋士匄齐人宋人卫人郑公孙虿曹人莒人邾人滕人薛人杞人小邾人会吴于向【虿公作嚳】

前年楚共王卒吴伐楚丧为楚所败而告败于晋至是晋复会诸侯以谋之传曰会于向为吴谋楚故也叔老叔孙齐子即叔肸孙也【以叔为族】是时亦为卿礼聘使盟会皆一卿一大夫卿为正大夫为介今鲁特遣二卿以尊晋极为无礼而春秋书法则惟本国征伐详内略外备书正介两人而聘使与列国征伐则虽有二使而祇书一焉今夫子深恶晋恶不讳国辱特书二卿以为鲁耻此皆旧史所无有而夫子特增之者盖晋自文襄兴伯以後约七十余年泗上十二诸侯无日不从征从会至晋悼尤甚此虽勉应亦可憾而况复尊之故夫子破例於诸国大夫有名者皆书曰人而於本国二卿则并书其名以示耻焉或曰据传宋华閱仲江齐崔杼卫北宫括俱在会彼何以不书而此独书岂彼不耻耶曰此正所以深责鲁也例无卿大夫与会有名氏而不书者今列国皆不书而独书鲁且备书二卿寃彼正所以责此且亦惟耻之故责之盖深耻夫两卿之可以已也或曰鲁敬晋使两卿故晋亦敬鲁两卿而书两卿于告文夫子之加一卿者从告文耳则不然列国诸卿皆在会岂有告文去其名而但书两卿以告者况崔杼华閱公孙括皆名卿也告文敬鲁卿岂不敬诸卿而乃无故而尽去其名而独告此鲁

两卿世无此理或曰传谓崔杼华閱皆惰慢夫子以惰慢贬之故不书则从来惰慢皆实书其名而後可曰某惰某不敬传文可考也今名且无有谁为惰慢且春秋书法并无以惰慢去名者正义曰仲尼新意吾亦曰仲尼新意盖意固有在而人不识也若书郑之公孙蚤则郑初与会特表之非耻之也此又一意也

二月乙未朔日有食之

夏四月叔孙豹会晋荀偃齐人宋人卫北宫括郑公孙蚤曹人莒人邾人滕人薛人杞人小邾人伐秦【蚤公作囡】此则仲尼新意之尤显着者据传诸侯之大夫从晋伐秦报栢之役也【在十一年】晋侯待于境使六卿帅诸侯之师以进而诸侯之师及涇而止皆不肯济盖亦厌搂伐之无已时也惟叔孙穆子【豹】赋匏有苦叶决意先济叔向乃具舟济之而郑子蟜【蚤】见北宫懿子【括】曰与人而不固取恶莫甚焉若社稷何懿子悦二子乃见诸侯之师而劝之济济涇而次焉秦人毒涇上流诸侯之师多死者惟郑司马子蟜帅郑师以进诸侯之师皆从之至于棫林不成军而退是时荀偃令曰鷄鸣而驾塞井夷竈【示不反】惟余马首是瞻栾黶曰晋无此命也余马首欲东耳乃归而下军从之左史谓魏庄子【绌】曰不待中行伯【荀偃】乎庄子曰夫子【指荀偃】命从帅栾伯吾帅也吾将从之从帅所以待夫子也于是伯游曰吾令实过悔之何及多遗秦禽耳【为秦所获】乃命大还晋人谓之迂延之役惟栾鍼【黶弟】叹曰是役也报栢之败也役又无功晋之耻也吾兄弟在戎路耻尤甚焉乃与士鞅【士匄子】驰秦师鍼死而鞅反栾黶谓士匄曰余弟不欲往而子召之余弟死而子来是而子杀余弟也弗逐余将杀子而士鞅奔秦则是济涇之役在本国尚不欲往至诸侯之师则全不欲往者而叔孙穆子与子蟜懿子三人实劝之进之而毫不知耻故当时齐之崔杼宋之华閱仲江輩亦仍在军经但书三人而于诸大夫皆不之及盖亦甚恶夫诸国之从伐秦而三大夫且劝进之也然则郑公孙蚤之书名表之乎抑耻之耶曰此则经之尤显着者夫济涇之役报栢之役也栢之役则秦人为救郑来也楚争郑而秦不争郑无故而兴师专伐以救我此不可忘矣郑先君成公将死诸大夫请背楚成公曰楚君以郑故亲集矢于其目吾何忍背之其将死言善如此向使为郑大夫者稍有人心而辞晋不行曰宁从伐楚必不从伐秦秦无故救我我何面目报之则晋未必不以为义而听其自便而乃不惟从之且先之又踊跃鼓舞以劝诸侯而争进之虽其言曰如社稷何一似惕晋之威而不得不然然而从之已矣争先何为故夫子曰此一人者亦幸有此役而吾不解也吾不知其持何说以兵向秦也可耻也故曰前之书名也表之今之书名也耻之仲尼新意盖至此而益着也

己未卫侯出奔齐【公羊卫侯下有衍字】

卫献公戒【命】孙文子【林父】甯惠子【殖】食皆服【朝服】而朝日旰【晏】不召而射鸿于囿二子从之【至囿】不释皮冠【田猎冠】而与之言二子怒孙文子如戚【林父邑】孙蒯【林父子】入使公饮之酒令太师歌巧言之卒章【取居河之湄而为乱阶也】蒯惧告文子文子曰君忌我矣弗先必死并帑于戚【帑子也先与子分居今并居戚】见蘧伯玉谋易君伯玉难之从近关出【伯玉出境】公乃使诸公子与孙子盟孙子尽杀之公出奔齐孙子追公败公徒于河泽卫人乃立公孙剽【穆公孙】孙林父甯殖相之以听命于

诸侯时鲁使厚成叔吊于卫齐侯以郟邑寄卫君【寄寓也古失国寓他所名寄公】鲁又使臧孙纆至郟唁之晋为伯主不即救恤兼为之讨贼至其冬反合诸国盟会以定新君使逐君之贼亲至坛坫以重固其势三纲絕矣第春秋凡逐君皆书出奔桓十五年郑伯突出奔蔡是也若本国君见逐则并不书出奔而但书逊昭十五年公逊于齐是也盖君而出奔与逊则必有奔之逊之者不必书见逐而逐在其中是以策书书逐君简书书出奔此旧时书例固然非夫子有更易也胡氏惑杜氏之说见襄二十年甯殖将死召其子曰吾得罪于君名藏在诸侯之策曰孙林父甯殖出其君因谓策书书逐君而夫子改之且谓夫子有归罪于君之意夫子苟逐父必不问不父之罪而以君被逐而反治君罪则为君危矣况此策书逐君简书出奔夫子修简书从其原文何曾有改策书之事故曰此书例非文例也若出奔者必书名此不书阙文耳如公羊经文原作卫侯衎出奔齐可验余见桓十五年传

莒人侵我东鄙

报入郟也【十二年】时伯主安在鲁日事奔命屡见侵伐而曾不见伯主之救恤同恶谓何

秋楚公子贞帅师伐吴

前吴伐楚丧为楚所败而楚复报之子囊师于棠吴不出战子囊以吴为不能而勿傲及还吴人自皐舟之隘要而击之遂败楚师获楚公子宜谷

冬季孙宿会晋士匄宋华閱卫孙林父郑公孙蠆莒人邾人于戚

孙林父逐君晋不能讨贼平乱反因其所立新君而大为会以定之使孙林父名俨然与诸国大夫并列于会将盟书所谓保奸与长乱并犯之矣夫子于此但直书其事而义自见焉

十有五年

春宋公使向戌来聘二月己亥及向戌盟于刘

报二年叔孙豹之聘也刘鲁城外地

刘夏逆王后于齐

前十二年灵王求昏于齐齐侯【灵公】许昏王使陰里【周大夫】结【成】之十四年王使刘定公【刘夏】赐齐侯命【将昏故先赐命】至是遂逆后焉礼天子不亲迎凡逆后必使上卿行事而以公一人监之桓八年祭公来遂逆王后于纪是也今经书逆后而不书公来似无监者据传云官师从单靖公逆王后于齐则已有监公矣其不书者以周制天子下娶尊卑不敌凡娶侯国女必使同姓诸侯命迎之谓之主婚前桓王娶纪女使鲁主婚故祭公至鲁受鲁命以往经书祭公来书遂逆今不知何国主婚但使迎者至鲁一告而单靖公不来其不

书公来以是也若刘夏者即刘康公之子前赐命时称刘定公即其人也释例天子公卿书爵大夫书字士书名今刘夏称名则非公卿大夫而士矣故传曰官师逆后而卿不行非礼也官师者士也此亦直书之而义自见者

夏齐侯伐我北鄙围成公救成至遇

齐不知何故伐我传曰贰于晋故也夫贰于晋而伐我则伐晋矣伐晋而晋尚不救不惟不能同好恶兼不能伐恶矣晋之自大而不能相恤如此然则晋霸以来其七十余年间鲁君臣之日夕奔命暴露道路以从晋四伐者为何遇鲁地

季孙宿叔孙豹帅师城成郛

郛者郭也郭不必城今以备齐故城之

秋八月丁巳日有食之【杜云八月无丁巳考丁巳在七月一日】

邾人伐我南鄙

莒连岁伐我今邾又无故见伐据传亦以为贰晋之故乃又云鲁使告晋晋将为会以讨邾莒因晋侯有疾而止夫晋师救鲁有如举芥而必为会以救之则仍役诸侯之师且缓不待矣况以疾中止犹是饰文三驾伐郑四月师北林七月师东门鲁君臣帅师以从其如而归归而又如者三月之间两往返焉今邾人伐我距晋侯之卒亦有三月君纵有疾何难遣下军东出以示救意乃公然袖手至平公即位欲结诸侯以继霸始执邾莒二子于溴梁之会事已不及然且为辞曰通齐楚之使则仍是晋恶齐楚而讨邾莒之贰已於鲁何有

冬十有一月癸亥晋侯周卒

十有六年

春王正月葬晋悼公【三月而葬速也】

二月公会晋侯宋公卫侯郑伯曹伯莒子邾子薛伯杞伯小邾子于溴梁戊寅大夫盟

晋平公【悼公子】即位以羊舌肸【叔向】为太傅张君臣【张老子】为中军司马祁奚韩襄栾盈【栾黶子】士鞅【士匄子】为公族大夫虞丘书为戎马御改服【既葬除凶服】修官【临御百官】烝于曲沃【既葬卒哭作主祔庙可行时祭】警守而下【在国有守而君自东下】会于溴梁图继霸也惟时齐久服晋至是不平有争霸之意故齐侯不至但遣其大夫高固与会而晋觐得之因先为讨贰执邾子莒子于会且状其罪曰通齐楚之使则明言齐之已通楚矣及会毕晋侯宴诸侯于温使诸大夫歌诗而高厚之诗不类【不从义类】

荀偃怒且曰诸侯有异志矣使诸大夫盟高厚而高厚逃归于是叔孙豹晋荀偃宋向戌卫甯殖郑公孙蛰及诸国大夫自盟而还经不书高厚于会以逃归也但书大夫盟不书诸国君以大夫自盟国君不与盟也公谷不知本事但疑君在而大夫自盟有政逮大夫之渐而胡氏又宗之夫大夫之盟君使之盟也大夫可盟高厚国君不可盟高厚也今以衆大夫盟一高厚而谓之逮大夫向使合衆诸侯以盟一高厚则大夫役诸侯矣若其他盟会虽尽役大夫吾犹恶其奔命无已必国君亲临则诸侯何罪为腓臆不如为贅疣也

晋人执莒子邾子以归【见前】

齐侯伐我北鄙

公未归而即见伐此与晋争我也

夏公至自会

五月甲子地震

叔老会郑伯晋荀偃卫甯殖宋人伐许

此郑伐许而晋师藉之以报楚者本两事也而夫子合之为为一事虽事本策书而简书立义迥乎不同即左氏修策书亦且茫然不知为何意此夫子全经之所以不可不通读也据传许男请迁都思叛楚也诸侯各帅其师以赴晋听晋迁许而许不肯迁是晋为许召诸侯而许反却之也晋侯乃请诸侯各归国仅留诸侯之师以伐许夫欲留其师而先归其君固已知其师之有他用矣乃诸侯各归而惟郑不然郑公孙蛰特相郑伯从诸侯之师而不肯归于是叔孙豹从鲁君归国而留叔老会晋荀偃及郑伯卫甯殖宋人伐许则以事言之伐许者晋事也即或有他用或伐许或伐楚皆晋事也春秋书例凡主事者皆书名在前不问其同事者为诸侯为大夫而总以主事者先书之如僖二十七年楚人陈侯蔡侯郑伯许男围宋虽楚人为楚大夫子玉而反书之于诸国国君之先何则楚为政也今晋召诸侯晋谋伐许为政在晋则自宜先荀偃而忽改其例以先郑伯虽左氏亦疑之遂造为说曰为夷故也而杜氏又曲解之曰夷者平也谓礼卿不会公侯而可以会伯子男今郑是伯爵原与卿尊卑等夷可以同会故仲尼新意不先书主兵之荀偃而书後至之郑伯盖取其等夷故也夫既取等夷则仍当先大夫而後伯若先伯则何云等夷且此等夷何关于大事其于晋平继霸兴兵接伐诸大礼大典有何重系而兴师之始顿及此例且卿大夫士其与公侯会久矣何曾有卿不与会之事而以此为例全属无理殊不知夫子之先郑者予郑主也其不先荀偃者不使荀偃为政也盖郑意在伐许晋意在伐楚两不同矣策书知伐楚而不知伐许简书则但知伐许而不知伐楚不观许之请迁晋乎许何以请迁晋以向曾迁楚也向何以迁楚以畏郑之偪请于楚而迁之也许郑之相讐久矣其自入春秋以来至隐十一年而许即为郑所灭至桓十五年而许始复国当齐楚争郑时郑逃齐归楚齐桓伐郑而楚救之乃不救郑而伐许以许间于齐也至晋楚争郑则许愬郑伯于楚楚责郑而郑弃楚而归晋以许间于楚也至郑悼公时连岁伐许故于成十五年许

灵公畏郑之偪而请迁于楚惟时楚公子申为之迁之经书许迁于叶是也则是许向之迁楚盖为郑而迁之矣今许乞迁晋郑应晋之召不得已而帅师以来而一闻伐许则君臣独留而帅师以前此非晋伐许而郑伐许也向迁楚为何今之迁晋又为何此皆诸侯所不关而郑君臣独刺心者故传之记请迁晋与经之书请迁叶两相比合而不善读者不察焉若夫伐楚则策书有之观传云师次械林师次函氏【皆许邑】而晋荀偃栾黶复帅师伐楚以报扬梁之役楚公子格帅师拒之战于湛阪楚师败绩晋师侵方城之外然後复伐许而还则是晋无意伐许徒借诸侯之师以伐楚其专意伐许者独郑耳然而经不书伐楚而但书伐许者以为伐楚非郑伯之所得与也夫扬梁之役何役也救郑之役也楚以救郑来而郑帅诸侯之师以报之非人理矣故伐楚之举虽亦郑伯所愿从而夫子既书伐许则必不与其伐楚而从而削之若与前伐秦之役特书鲁卫郑三卿者有同义焉盖仲尼新意必通观经文而後知之经文一綫必有照顾宋儒谓断烂朝报此欲废春秋之言不足道也

秋齐侯伐我北鄙围成【左作郕】

齐侯围成孟孺子速徼之【献子之子孟庄子也】齐侯曰是好勇去之以为之名速遂塞海陘而还【鲁隘道】

大雩

冬叔孙豹如晋

乞晋师也齐两年之间凡三伐我且与晋争霸而因晋及我则晋事矣至是告急晋尚曰以寡君之未禘祀言三年丧未毕未急祭也穆叔曰敝邑之急朝不及夕若必待执事之间而至三年恐无及已见中行献子赋圻父见范宣子赋鸿雁之卒章二人皆许之

十有七年

春王二月庚午邾子貜卒

宋人伐陈

策书未详

夏卫石买帅师伐曹

据传卫孙蒯【林父子】田于曹隧饮马于重丘【曹邑】毁其甝【汲水器】重丘人闭门而詢之【恐其入故闭门詢骂】曰亲逐而君【林父逐君在十四年】尔父为厉【恶鬼】何以田为卫石买【石稷子】孙蒯伐曹取重丘曹人愬于晋【为明年晋执石买传】经凡帅师祇书卿蒯不书非卿也且责买之身为卿而为蒯役也

秋齐侯伐我北鄙围桃【公作洮鲁邑】

齐高厚帅师伐我北鄙围防

防臧孙纥【武仲】邑也高厚欲取纥鲁师将逆臧孙于旅松遣鄫叔纥【即叔梁纥】臧畴臧贾【皆纥弟】帅甲三百宵犯齐师送纥至旅松而还守于防齐师退时齐人有获臧坚【纥族】者齐侯使夙沙卫【奄人】唁之且曰无死坚稽首曰拜命之辱顾君赐不终姑又使其刑臣礼于士【言使贱人来唁是惠赐不终也】以袂抉其伤而死

九月大雩

宋华閱出奔陈

宋华閱卒其弟华臣以閱子臯比幼弱使贼杀其宰华吴幽其妻而索其大璧宋公将逐之左师向戌请舍之已而国人逐瘠狗瘠狗入于华臣氏国人从之华臣以为逐已也惧而奔陈

冬邾人伐我南鄙

助齐也

春秋毛氏传卷二十六

<经部,春秋类,春秋毛氏传>

卷二十七

钦定四库全书

春秋毛氏传卷二十七

翰林院检讨毛奇龄撰

十有八年

春白狄来

白狄者狄之别名外域无相朝之制来之而已此与僖二十九年介葛卢来例同

夏晋人执卫行人石买

执卫石买以其与孙蒯同伐曹也【见前年】是时石买与蒯同使于晋晋执之故称行人第伐曹之衅起于孙蒯且蒯亦见执而经不书者非正卿也凡诸侯使聘正卿介大夫例但书正而不书介说见十四年会向传

秋齐师伐我北鄙【师谷作侯杜云不书齐侯以不入境也】

冬十月公会晋侯宋公卫侯郑伯曹伯莒子邾子滕子薛伯小邾子同围齐

围与伐无称同者此独变例书同以为此一围齐在晋为讨贰而在我实为报伐一若两国兴师而至此而合同之盖不欲使晋主兵事也据传晋及诸国会于鲁寻湫梁之言【遵晋平之会也】同伐齐齐侯御诸平阴堑防门而守之多死者鲁卫攻险晋下军克郛上军围卢鲁大夫秦周伐雍门之荻孟庄子斩榑焚雍门及西郭南郭诸侯之师焚申池之竹木又焚东郭北郭环诸门而门齐侯将走太子光阻之乃止于是东侵及淮南及沂是役也虽晋侯为政而鲁卫诸侯之师实并力焉故书同围一则伯主用兵全用搂伐不甘以诸侯之师统属之晋一则晋自为晋鲁自为鲁虽鲁实藉晋而必不可使争伯之师得窃其名为恤鲁之师春秋书法其过于谨严不憚破例如此

曹伯负刍卒于师

此与僖四年许男新臣卒于师同但彼祇书卒而此书卒于师者史文有详略无义例也若其礼例则凡薨于朝会与薨于师者其礼加一等此曹伯爵当葬以公礼见僖四年葬许穆公传

楚公子午帅师伐郑

郑子孔欲去诸大夫将叛晋而兴楚师以去之使告楚公子午午弗许楚子闻其谋使强之午叹曰君王其谓午怀安乎对使者稽首曰诸侯方睦于晋臣请尝之若可则君继之不可止之则兵可无害而君亦无辱乃帅师治兵於汾於是子蟜伯有从郑伯伐齐子孔子展子西守二子知子孔之谋也完守入保使子孔不敢会楚师楚师次鱼陵右师遍围诸郑邑侵郑东北至于虫牢而公子午独门于纯门信宿而还是役也楚为郑所诱非专意伐郑且姑尝而退未尝终伐而经反正书伐郑者以郑方内叛招师召祸有可伐之道非于楚师有贬词焉

十有九年

春王正月诸侯盟于祝柯【公作阿】

祝柯齐地前年围齐之诸侯至是未退故又盟之

晋人执邾子

执邾悼公以其贰晋并伐我也

公至自伐齐

去年围齐当以围齐致如僖二十九年诸侯伐许即以围许致今特书伐齐者以我自伐齐不关晋师一似与前之围齐有各见者总是不予晋主兵前以同见而分其主今又以各见而并去其主焉公羊谓围齐而致伐以未围也则其围平陰围卢围齐诸郭谓何若贾逵注谷梁谓不言围而言伐以策伐勲则伐者加兵之总名伐与围有二勲乎

取邾田自濞水

晋令邾还所侵鲁田以濞为界时晋侯先归公享晋六卿于蒲圃赐之三命之服军尉司马司空舆尉候奄皆受一命之服与成二年鞏之战晋使齐归所侵田公赐三帅命服正同

季孙宿如晋【拜师也】

葬曹成公

夏卫孙林父帅师伐齐

此晋令也据传初荀偃将伐齐梦与厉公讼【偃于成十八年弑晋君州蒲即厉公也至是讼】弗胜公以戈击之首坠于前偃跪而戴之以走见梗阳之巫臯【臯巫名醒而占之】巫夜

梦与偃同【亦见偃与厉公讼】曰今兹主必死若有事于东方则可以逞【主指偃有事东方伐齐也】故偃请伐齐济河以朱丝系玉二?沈祷之至是伐齐还瘕疽生于头济河及着雍目出【瘕疽目出二病】既卒而视不可含【目不闭口闭】栾盈曰其为未卒事于齐也乎【齐尚未服】乃抚之曰主苟终所不嗣事于齐者有如河乃瞑受含盖畏首之坠犹望东方有事之可以逞也嗟乎何及矣至是栾盈欲践誓使卫伐齐而令栾魴帅师从之经不书不予晋也或曰苟偃忠死不忘国夫以弑君之贼天王不能诛列国不能讨死君魂魄仅得于宵冥不可知之中报以天刑而乱臣贼子犹思有事东方以逞其志而无学之徒又从而忠之则春秋可废矣吾故于前此伐齐特书同围今此伐齐但书卫伐取其必不予晋者以见义焉

秋七月辛卯齐侯环卒【环公作瑗】

齐侯娶于鲁曰颜懿姬无子其侄鬻声姬生光以为太子【颜鬻母姓懿声諡也】诸子【妾】仲子戎子【皆宋女】戎子嬖仲子生牙属诸戎子【为戎子所养】戎子请立为太子仲子不可公许之遂废太子光使高厚傅牙为太子齐侯疾崔杼潜逆光乘疾立之及公卒庄公即位杀戎子而尸诸朝

晋士匄帅师侵齐至谷闻齐侯卒乃还

前年伐齐鲁以得胜故季武子以所得于齐之兵作林钟而铭鲁功焉臧武仲极言其不可然而鲁之报齐则已意满无余事矣向使晋之伐齐为恤鲁之师则我已释怨岂有恤我之师尚未已者今以齐未服而复出师以侵齐则是同围至此始终不为鲁可知也若其不伐齐丧至谷而返则所谓无礼之中又有礼者夫子直书之而义之钜细又无一不见如此

八月丙辰仲孙蔑卒

齐杀其大夫高厚

为其傅公子牙也其称国杀称大夫称名书例如此全无义例说见宣十四年卫杀其大夫孔达传

郑杀其大夫公子嘉【公作喜】

郑子孔之为政也专国人患之乃讨西宫之难【十年尉止作难子孔知而不言】与纯门之师【前年子孔召楚师至纯门】子展子西率国人伐之杀子孔而分其室郑人乃使子展当国子西听政子产为卿书例见前

冬葬齐灵公

城西郭

惧齐也西郭者西郭郭本无城故城之

叔孙豹会晋士匄于柯

齐及晋平盟于大隧鲁惧故穆叔会范宣子于柯以自固焉柯晋地

城武城

穆叔归曰齐犹未也不可以不惧乃城武城

二十年

春王正月辛亥仲孙速会莒人盟于向【速公作邈後同】

莒数伐鲁至是孟庄子与之成之向莒地

夏六月庚申公会晋侯齐侯宋公卫侯郑伯曹伯莒子邾子滕子薛伯杞伯小邾子盟于澶渊

传曰齐成故也澶渊卫地

秋公至自会

仲孙速帅师伐邾

邾数伐鲁未有成也故孟庄子报之

蔡杀其大夫公子燹蔡公子履出奔楚【燹谷作湿】

蔡公子燹欲去楚事晋曰先君与于践土之盟【僖二十八年】晋不可弃且兄弟也畏楚不能行而卒请从先君之志以事晋蔡人杀之传曰言不与民同欲也其母弟履遂奔楚夫去楚事晋在蔡人言之谓之去夷就华以蔡受夷祸人莫知讐独解春秋者为之作其气而雪其愤意非不善然而夫子之经实不如是母论楚本先王封国虽实介蛮夷而埒于秦越大于邾莒纪鄆并非淮徐陆浑山戎赤狄之比而即以春秋之旨言之其所最忌者惟是强大争霸侵陵小弱日以撽伐兴师为事此无分夷夏并当以三王之罪人罪之况陈蔡近楚则附楚为便幸而晋楚争郑历数十年而并不及蔡则可安矣乃无端起衅忽欲去彼而就此岂非大戾盖建邦立君本为生民拂民之欲罪必归之故传曰不与民同欲杜氏曰恶其违衆以为功罪所定祇于民心争从违不于霸力分向背也此春秋之旨也

陈侯之弟黄出奔楚【黄公谷作光後同】

据传陈庆虎庆寅【二庆陈卿】畏公子黄之偪【怨偪夺其政】谮诸楚曰与蔡司马同谋【即前公子燮谋去楚事晋】楚人以为讨【责也】公子黄出奔楚夫楚以背楚来责黄而黄反奔楚者以楚能明二庆之为谮也【後二十三年楚讨二庆】释例书弟所以罪兄则春秋书弟甚多并无此例若贾氏注谷梁谓书弟以罪黄之偪则大谬二庆谮黄黄有何罪此其例与卫侯之弟鱄出奔晋秦伯之弟鍼出奔晋并同

叔老如齐

通齐好也

冬十月丙辰朔日有食之

季孙宿如宋【报十五年向戌之聘】

二十有一年

春王正月公如晋

拜师【十八年伐齐】及取邾田也

邾庶其以漆闾丘来奔

庶其者邾大夫漆与闾丘邾二邑也庶其叛其君窃其邑以来奔而季武子受之且以公姑姊【公之姑姊有寡者】妻之于是国多盗【言效尤也】武子使臧武仲诘之武仲曰子为正卿而来外盗欲使纡去盗得乎旧谓以邑出为叛以邑归我曰来奔此与莒牟夷以牟娄及防兹来奔例同

夏公至自晋【礼例】

秋晋栾盈出奔楚

栾黶娶于范宣子【士句】生栾盈范鞅【士鞅】以其亡也怨栾氏【十四年栾黶驱逐范鞅使奔秦】故与栾盈同为公族大夫而不相能栾黶卒栾祁【乐桓子之妻盈之母范宣子女也范氏祁姓】与其老州宾通栾盈患之祁惧其讨也愬诸宣子曰盈将为乱范鞅为之徵【证其有此事也徐仲山日记曰下宫之难栾却为徵而赵氏灭三却之难栾书为徵而却氏灭今栾盈之难亦有徵之者而栾氏遂灭是却氏一为徵以灭赵栾氏且两为徵以灭赵郤而欲盈之免也得乎天道好还栾氏必灭况书又弑君贼乎世人无识以为栾亡于黶之汰虐固哉】宣子信之遂使栾盈城着邑将逐之盈好施士多归者其党箕遗黄渊嘉父等凡十人共起作乱不克而死平公乃以问阳毕阳毕曰栾书实杀厉公以厚其家室不去其枝叶而絶其

本根乱未已也公遂逐羣贼使祁午及阳毕逐栾盈于曲沃【盈邑】盈出奔楚

九月庚戌朔日有食之

冬十月庚辰朔日有食之

曹伯来朝

曹武公以新君来朝礼也然已三年矣

公会晋侯齐侯宋公卫侯郑伯曹伯莒子邾子于商任据传锢栾氏也【禁锢之使诸侯不得受】夫栾氏世逆逐则已矣锢不无太甚而胡氏举大夫去国之礼责晋不导之出疆先于所往则误以被逐者而为去国者其词固已悖矣且曰晋不念栾氏世勲而逐盈则以弑君之逆贼而题为世勲是於春秋全经未尝梦见而以之解春秋得乎【徐仲山春秋日记曰栾氏世逆罪固当灭而栾盈无罪犹之赵氏世逆罪固当灭而原屏无罪此为名言】

二十有二年

春王正月公至自会

夏四月

秋七月辛酉叔老卒

冬公会晋侯齐侯宋公卫侯郑伯曹伯莒子邾子薛伯?伯小邾子于沙随

复锢栾氏也夫祇锢其臣而远召诸国两年之间复两奔命如此

公至自会

楚杀其大夫公子追舒

楚观起有宠于令尹追舒未益禄而有马数十乘【言偏宠违制令富】楚人患之王乃杀追舒而輶观起复使薳子冯为令尹公子薳为司马屈建为莫敖

二十有三年

春王二月癸酉朔日有食之

三月乙巳?伯句卒

夏邾畀我来奔【畀公谷作鼻杜云即庶其党也】

葬?孝公

陈杀其大夫庆虎及庆寅

陈侯之弟黄自楚归于陈

陈侯如楚公子黄愬二庆于楚楚人召之使庆乐往【二庆族人】楚杀之二庆据陈叛夏屈建从陈侯围陈二庆筑城以拒君陈人乱遂杀庆虎庆寅楚人乃纳公子黄而还夫以楚师讨二庆而经书陈杀喜陈人之能杀之也陈侯同弟归而经书自楚喜楚人之能归之也此与陈杀其大夫泄冶蔡季自陈归于蔡同

晋栾盈复入于晋入于曲沃

前二十二年自会商任鞶栾氏後栾盈反自楚适齐及沙随之会复鞶栾氏而盈犹在齐至是晋将嫁女于吴礼凡诸侯嫁女异姓有媵【左传谓同姓致媵异姓则否非是见予成十九年传】齐侯使析归父媵之以藩【障蔽之车】载栾盈及其士纳诸曲沃栾盈夜见胥午【曲沃大夫】而告之对曰天之所废谁能兴之子必不免我非爱死也知不成也盈曰虽然因依子而死吾无悔矣我为天所废子必无害午许诺乃伏盈而觴曲沃人乐作午言曰今也得栾孺子何如对曰得主而为之死【盈为曲沃旧主】犹不死也皆叹有泣者爵行又言皆曰得主何貳之有盈出遍拜之乃帅曲沃之甲因魏舒入绛【晋都】以舒父魏绛将下军时盈曾为佐而舒与相亲故也第赵氏以原屏之难怨栾氏【成八年庄姬之譖原屏栾却为徵】中行氏以伐秦之役亦怨栾氏【十四年栾黶违荀偃命马首欲东】他族多与范氏亲惟魏氏及下军大夫与之范宣子用乐王鲋计急奉晋君以走于固宫而身乘妇人辇以随之使其子范鞅刼魏舒时舒将驾车迎栾氏矣鞅急趋进曰栾氏帅贼以入鞅之父与二三子在君所矣使鞅逆吾子遂超乘【跳上舒车】抚劒命驱之出仆请所之曰之公宣子迎诸阶执其手而入栾氏登公门范氏之徒从公台後出栾氏败盈乃奔曲沃经两书入不书叛者初以入而叛非叛而入也继以叛而入非入而据邑以叛也此与郑良霄入于郑宋鱼石复入于彭城不书叛同【杜氏谓以邑属他国始称叛非是】

秋齐侯伐卫遂伐晋

齐晋本匹敌而晋悼兴霸以後使齐奔命者若干年齐环之起而抗之宜也特齐环过于忿肆不思自固反侵陵与国以大致诸侯之师不惟不足以威晋而祇以自戕丧师辱国抑郁而死此固不足道者今太子光思绍前烈即位之始即发愤报伐未为不可第光之无道较环尤甚根本未立而欲虚张以逞志难矣故经于齐侯伐晋无所可否但就事书之而意已见焉是时

先伐卫後伐晋者以十九年卫受晋命以伐齐故先卫恶卫也据传齐有先驱【前锋军】申驱【次前军】有御右贰广【副军】有启有肱【左右军】有大殿【後军】而皆择将佐帅之自卫伐晋取朝歌为二队入孟门登太行山张武军于荧庭【筑营垒也】戍郛邵【取而守之】封少水【封晋尸以为京观】以报平陰之役乃还

八月叔孙豹帅师救晋次于雍榆【公谷作渝】

己卯仲孙速卒

初季武子无适子公弥【即公鉏】长而爱悼子【即纥】欲立之访于申丰丰不可武子曰吾非不爱弥吾欲择才而立之已耳访于臧孙纥【武仲】纥曰饮我酒吾为子立之季氏饮大夫酒臧纥为客既献臧孙命北面重席洁新樽而召悼子降迎之大夫皆起及旅酬而後召公鉏使之齿悼子下遂立悼子既而使公鉏为马正公鉏欲弗受闵马父劝而受之季孙喜公鉏而厚赐焉孟庄子有二子曰秩曰羯皆庶也至是庄子疾孟之族人欲立羯如悼子且孟氏与臧氏不相能因谓公鉏苟立羯请讐臧氏公鉏乞季孙季孙不应庄子卒公鉏奉羯立户侧【丧主位】季孙至入哭而出曰秩焉在公鉏曰羯在是矣曰孺子长曰何长之有惟其才也季孙无以应遂立羯秩奔邾

冬十月乙亥臧孙纥出奔邾

臧孙哭庄子甚哀既而孟氏闭门告于季孙曰臧氏将为乱不使我葬季孙不信臧孙闻之为戒备及孟氏将辟藉除于臧氏【借人助除葬道】臧孙使隧正助之除于东门以甲从已而视之季孙怒命攻臧氏臧纥斩鹿门之关以出奔邾初臧宣叔娶于铸生贾及为而死其侄继室穆姜之姨子也【媵侄为穆姜从母之女】生纥长于公宫故立之臧贾臧为出在铸武仲乃自邾使告臧贾且致大蔡焉【臧文仲所居之龟】曰纥不佞失守宗祧然纥罪不及不祀子以大蔡纳请其可贾拜受龟使为以纳请武仲乃如防使来告曰纥非能害也知不足也非敢私请苟守先祀无废二勲【文仲宣叔】敢不避邑乃立臧为武仲致防而奔齐

晋人杀栾盈

晋人围栾盈于曲沃克之尽杀栾氏族左氏曰不书大夫自外入也与三十年郑人杀良霄例同

齐侯袭莒【掩其不备曰袭】

齐侯还自晋不入国而袭莒伤股而退杞殖华还载甲夜入而宿于莒郊明日遇莒子于蒲侯氏【莒邑】莒子重赂之华周【还】不可曰贪货而弃命何以事君莒子乃亲鼓而伐之遂获杞梁【殖】莒人行成齐侯归【书例大夫死战曰获】

二十有四年

春叔孙豹如晋

仲孙羯帅师侵齐

晋命也羯即孟庄子之子孟孝伯也

夏楚子伐吴

楚子为舟师以伐吴以不设军政无功而还

秋七月甲子朔日有食之既

按律历推法此月日食既则後月必无又食之理今七月日食既而八月又日食当有误文

齐崔杼帅师伐莒

齐侯既伐晋而惧将会楚子楚子使鬬启强如齐聘且请会期齐乃祭社蒐军实使客观之既而闻将有晋师使陈文子从鬬启强如楚辞会且乞师崔杼乃帅师送之而伐莒焉

大水

八月癸巳朔日有食之

公会晋侯宋公卫侯郑伯曹伯莒子邾子滕子薛伯?伯小邾子于夷仪【公作陈仪後同】

会夷仪将复以诸侯之师伐齐值大水不克

冬楚子蔡侯陈侯许男伐郑

楚子伐郑以救齐自棘泽还使鬬启强帅师送陈文子归

公至自会

陈鍼宜咎出奔楚

陈人讨庆氏之党故出奔

叔孙豹如京师

前年谷洛鬪【二水相厄】毀王城齐人叛晋欲求媚于天子而城之鲁遣使聘且贺城焉
大饥

春秋毛氏传卷二十七

卷二十八

钦定四库全书

春秋毛氏传卷二十八

翰林院检讨毛奇龄撰

二十有五年

春齐崔杼帅师伐我北鄙

前年春孟孝伯受晋命伐齐齐报之公将告晋孟公绰曰崔子将有大志必速归齐师果还

夏五月乙亥齐崔杼弑其君光

齐棠公【棠邑大夫】之妻美棠公死崔杼娶之庄公通焉数如崔氏且以崔子之冠赐侍者崔子怒又以伐晋故谓晋必报齐欲弑公以说于晋至是莒子来朝齐飧于北郭公复如崔氏崔子乃弑之从公者十人皆死惟晏子立崔氏门外门启而入枕尸股而哭三踊而出卢蒲癸奔晋王何奔莒【二子公党】于是以灵公之子名杵臼者【即景公】崔杼立而相之庆封为左相与国人盟于大宫曰所不与崔庆者读未已晏子抄易其辞仰天曰所不惟忠于君利社稷者是与有如上帝乃?时太史书曰崔杼弑其君崔子杀之其弟嗣书而死者二人其弟又书南史氏闻太史尽死执简以往曰既书矣乃还

公会晋侯宋公卫侯郑伯曹伯莒子邾子滕子薛伯小邾子于夷仪

前年会夷仪今又会夷仪以报齐而两会诸侯之师虽使周天子以勤王来召亦必以为数而去之矣今齐人以庄公说晋使隰鉏请成庆封如师赂晋侯以宗器乐器自六正五吏三十帅三军之大夫百官之正长师旅及处守者皆有赂而即挥诸侯以退嗟乎诸侯何罪乃至此若胡氏责伯主不能讨贼此是春秋大旨但晋自兴伯以来凡诸国弑逆无不受其贿而定其所立之君如文十五年之盟扈十七年之伐宋类胡氏并不责伯主而但责列国则春秋之失刑亦已久矣况中行栾赵亲弑其君韩魏诸家争相窃国此固非一时一事所足责者故经于夷仪两会不书伐齐并不书齐成若不知曰召诸师之何所用者盖责其细者而大自见焉

六月壬子郑公孙舍之帅师入陈

初陈侯会楚子伐郑当陈隧者刊木堙井以通楚师郑人怨之至是子展子产帅车七百乘伐

陈夜穿陈城遂入之陈侯乃免【丧服】拥社【抱社主】使其衆男女分别而累之以待于朝子展子产再拜稽首返其民致其地复修其官职使之安定始还

秋八月己巳诸侯同盟于重丘

会夷仪之诸侯未还而同盟齐成故也重丘齐地

公至自会

卫侯入于夷仪

前十三年卫侯衎出奔齐齐侯寄之于邾曰寄公今晋侯愍其久寄于外使卫分一邑以居之此与郑伯突入于栢同

楚屈建帅师灭舒鸠

舒鸠者楚属国也吴人为楚舟师之役召舒鸠人而使之叛楚楚子使人让之舒鸠告无有且请盟楚人欲加兵而蘧子不可谓彼告不叛而又伐之是伐无罪也及蘧子冯卒屈建为令尹而舒鸠人叛则怙终矣屈建乃伐之及杂城吴人救舒鸠建分左右师而使吴人居其间击之吴师大败遂围舒鸠而灭之

冬郑公孙夏帅师伐陈

郑子产献捷于晋虽不献俘而献功以尊晋也且戎服以将之尊之至也晋曰陈有何罪夫二十四年经书楚子陈侯伐郑者以救齐也其救齐者以齐告晋之伐齐也是郑被陈伐本为晋故晋不能救郑又不能为郑报楚与陈是晋可掇诸小国而小国必不敢假伯主一旅之师其蔑王法伤天理丧人心固已极矣乃小国揶揄括其私徒以为晋释憾又不敢自恃而复归功于晋晋反曰陈有何罪吾犹惜子产之不以楚陈救齐之说抗言之也子产第曰前年春郑伯朝晋曾稽首宣子告以陈之恃楚凌虐敝邑请得罪于陈而稽首焉是以陈罪告也其冬楚子以陈蔡并许伐郑门于东门陈且井堙木刊以通楚师道故郑讨罪而陈服之是陈知罪而晋不知也乃又曰何故侵小夫报伐非侵小也且陈未尝小于郑【正义曰陈大于郑而谓之小者言陈对晋为小非小于郑也】晋以为此我之小尔我小不当伐而不知陈已事楚晋亦安得而小之顔厚矣子产第曰先王制令有罪即诛何大小焉且天子一圻方千里列国一同方百里今大国多数圻矣非侵小何以至焉是时晋人不能诘而罢于是郑子展复相郑伯如晋拜陈之功然後遣公孙夏帅师至陈与陈人平而夫子特书之曰伐陈盖斯时不伐陈而称伐正以为郑非讳伐陈也故夫子又曰晋为伯郑伐陈非文词不为功以为郑之伐陈非无说也晋当自思也

十有二月吴子遏伐楚门于巢卒

吴子诸樊【遏】伐楚以报舟师之役门于巢门巢守者牛臣射之卒凡攻门曰门如门于扬门于东闾门于师之梁类公谷以巢为小邑以门为入门则於经文词义俱不识矣

二十有六年

春王二月辛卯卫甯喜弑其君剽

初卫甯殖与孙林父逐卫献公殖将死召其子甯喜曰吾得罪于君名藏在诸侯之策曰孙林父甯殖出其君【简书君出策书出君】若能复入则掩之矣喜许诺及献公入夷仪使人与喜言求复国而喜又许之至是献公使母敬妣弟子鲜谓喜曰苟反政由甯氏祭则寡人喜告蘧伯玉曰瑗不得闻君之出敢闻君入遂行从近关出时孙林父在戚其子孙嘉聘于齐孙襄居守喜与右宰谷伐孙氏孙襄死喜乃弑君剽及太子角

卫孙林父入于戚以叛

以戚邑属晋而叛

卫侯衎复归于卫

复归例称名与卫侯郑复归于卫曹伯襄复归于曹同胡氏谓责其不改过而书名夫不改过仅见于右宰谷之臆言有何实事而可作罪状且右宰谷与喜同谋弑君本是逆贼未有以逆贼之言定爰书者胡氏不识例而又好为无理之言每如此

夏晋侯使荀吴来聘

晋人为孙氏故召诸侯将以讨卫也夏中行穆子来聘召公也

公会晋人郑良霄宋人曹人于澶渊

此晋会诸侯讨卫也是年孙林父据戚以叛卫人侵戚东鄙晋使人戍戚而卫人杀之晋乃会诸侯于澶渊以讨卫澶渊与戚皆卫地相近故兼疆戚田并取卫西鄙懿氏田六十以与孙氏尔时卫侯亦与会晋人于会中执卫甯喜及北宫遗使司马侯监之先归於是卫侯乃如晋而晋人执之囚于士弱氏诸侯闻变齐侯郑伯并如晋齐臣国弱使晏平仲私于叔向曰晋君宣明德于诸侯恤其患而补其阙正违而治烦所以为盟主也今为臣执君如之何晋侯乃始归卫侯夫卫献固非令君然失国归国并无足罪为伯主者自宜讨孙甯二贼共正王法而乃长逆獎叛为臣执君悖乱天常莫此为甚故不书讨卫不书疆戚并不书执君即甯喜之执原在会间而亦不并书而移之他时即公自会归亦不书至一若此会之大可已者若晋赵武宋向戌虽会不书名而独书郑良霄者曰此必良霄此时实成此会而据实书之一如十四年伐秦之书北宫括公孙蚤者而先至後至与夫卿不会公侯之说皆无与焉详见十年会牛首十四

年伐秦传

秋宋公杀其世子痤

初宋芮司徒生女而弃之名曰弃长而美平公嬖之生佐太子痤狼寺人惠墙【氏】伊戾【名】者为太子内师而怨太子楚客聘于晋过宋太子请野享之伊戾从则诈为牲以加书而驰告公曰太子将为乱既与楚客盟矣公使视之则信有焉问诸夫人【弃】与向戌向戌怨其狼皆曰然公乃囚太子太子曰惟佐能免我使召佐向戌故留佐与语不至太子缢後公察无罪乃烹伊戾此与晋侯杀其世子申生天王杀其弟佖夫例同

晋人执卫甯喜

前会澶渊时执之而书于此此文例也

八月壬午许男甯卒于楚

许灵公如楚请伐郑曰师不兴孤不归矣八月卒于楚【许之怨郑见十六年伐许传】

冬楚子蔡侯陈侯伐郑

时宋向戌欲平晋与楚楚子曰不伐郑何以求诸侯盖为许灵公请伐故也子产曰晋楚将平诸侯将和不如使逞志而归乃易成也因不御寇楚遂入南里堕其城门于师之梁获九人涉汜而归而後葬许灵公

葬许灵公

二十有七年

春齐侯使庆封来聘【通嗣君也】

夏叔孙豹会晋赵武楚屈建蔡公孙归生卫石恶陈孔奂郑良霄许人曹人于宋【奂公作瑗】

宋向戌善于晋赵武又善于楚屈建欲弭诸侯之兵以为名盖亦甚苦于奔命之无穷期也如晋告赵孟孟疑之韩宣子曰兵民之残也财用之蠹小国之大菑也将或弭之虽不利于我亦将许之苟弗许则楚将许之矣夫楚许之以召诸侯而我尚得为盟主乎哉许之如楚楚亦许之如齐齐难之陈文子曰晋楚许之我焉得已且人曰弭兵而我弗许则我好兵矣好兵焉用许之告于秦秦亦许之因遍告诸国而为会于宋经不书向戌而书会宋以向戌即宋也宋主会者也五月甲辰晋赵武至丙午郑良霄至六月戊申叔孙豹齐庆封陈须无卫石恶至甲寅

晋荀盈至丙辰邾悼公至壬戌楚公子黑肱至时楚屈建先至陈使黑肱成言于晋丁卯宋向戌如陈就屈建成言于楚戊辰滕成公至屈建谓向戌请晋楚之从交相见也谓从晋楚之小国使更相朝见而从晋者朝楚从楚者朝晋然而齐秦如何庚午赵孟曰晋楚齐秦匹也晋不能使齐朝楚犹楚不能使秦朝晋也楚能得于秦则晋将固请于齐至壬申以告楚王楚王曰释齐秦不会而第令他国相见经不书齐秦以是也秋七月戊寅向戌至夜令赵孟及公子黑肱齐其盟辞庚辰陈孔奭蔡公孙归生至曹许之大夫皆至以藩为军【不用壁垒而用篱落】既而齐人请邾宋人请滕谓请二国为属国可助贡赋然而属国不与会故邾滕之君亲身至会而经又不书以是也当是时会者凡一十四国而祇书九国其不书宋主盟也不书齐秦以不与会也邾滕不书者属国也若其先书晋後书楚此是恒例而说者谓楚先?而先书晋者为信晋夫此时未盟亦安知?之先楚而妄为是言【旧说书国名则其国人必与盟然僖十九年盟齐无齐人二十七年盟宋无宋人此以特与向戌故特书之非地主例】

卫杀其大夫甯喜

卫甯喜专公患之公孙免余请杀之遂攻甯氏杀甯喜及右宰谷尸于朝虽杀之不正其罪然喜贼也此与晋杀其大夫里克卫杀其大夫元咺例同

卫侯之弟鱄出奔晋【鱄谷作专】

鱄卫侯母弟子鲜也献公复国时公母敬嬖与弟子鲜要喜有成言今杀喜子鱄怨公负约遂奔晋此贼党假信夫子书以垂戒者而胡氏袭谷梁说谓义合春秋嗟乎春秋乃至此

秋七月辛巳豹及诸侯之大夫盟于宋

是时盟于宋西门之外楚人衷甲将?晋楚争先叔向劝赵孟无争乃先楚时季武子假公命使叔孙视邾滕恐两事晋楚则贡赋重也叔孙不从曰邾滕私也【属国为私】我列国也何故视之乃盟夫季氏以作三军分公室之故恐赋重累已使叔孙从之将此盟亦不得与矣夫堂堂宗国甘为人私此必不可之事况本非公命而左氏无识谓豹以违命而去其氏夫史文去氏并无贬例见隐八年无骇卒传【徐仲山日记谓汉後亲则去氏如同姓不书氏类尊则去氏如三公宰执大将军等不书氏类】

冬十有二月乙亥朔日有食之

杜氏谓以长历推之则乙亥为十一月朔非十二月朔已差一月若左氏谓乙亥朔其辰在申则全差三月盖月建十二辰与每岁十二月各有定配故十二月必建亥以日当昏时斗柄所指在亥故也今斗柄指辰则应是九月必历酉与戌而後至亥是中间隔二月差三个月矣故明年春无冰正以春正在酉月不当有冰也正义谓正月无冰必是时于建辰之後连闰两月而後十二月在亥正月仍在子故子月无冰以见灾异则连闰之说并不见经传且春秋记事逐月附见岂有连闰两月而冬後所记无一事者鲁史不知此正月非子月故以无冰为灾而

不知此尚是酉月其无冰者是顺时非违时也若长历与春秋亦往多不合且经但书春亦不知是何月不可考

二十有八年

春无冰

夏卫石恶出奔晋

卫人讨甯氏之党故也时立其从子圆守石氏祀

邾子来朝

秋八月雩

仲孙羯如晋

告晋以将朝楚也当盟宋时晋荀盈如楚涖盟楚薳罢如晋涖盟其明年齐侯陈侯蔡侯北燕伯杞伯胡子沈子白狄朝于晋尔时崔庆沮齐侯勿朝而陈文子劝之行则必鲁卫宋郑亦已朝晋特未朝楚也郑伯使游吉朝楚楚子以伯不亲至责不受至是仲孙羯郑游吉俱以朝楚告晋向使世无伯主则大小与国修睦讲信何至好即朝贡怒则侵伐至于如此此实晋伯所定之例相嬗不改者幸而更伯之局至是俱衰然余烈犹在故夫子于诸国朝贡并不一书而独书公之如楚志国辱焉盖春秋至此一变矣

冬齐庆封来奔

齐崔杼生成及强而後娶棠姜生明棠姜携棠公之孤棠无咎来与弟东郭偃同相崔氏崔成以疾废而立明成请老于崔偃与无咎请勿予崔邑成强怒谋诸庆封而杀偃无咎于崔氏之朝崔子奔而见庆封封曰崔庆一也何敢然请为子讨之使卢蒲癸帅甲以攻崔氏卢蒲癸者庄公党也尽杀成与强灭崔氏而俘其家棠姜缢癸复命崔子且御崔子归则无归矣于是崔子亦缢而招庄公之党之亡在外者卢蒲癸与王何归焉庆封之子庆舍嬖癸何使执寝戈而先後之癸何虽为庆氏昵而既灭崔氏乃日伺庆氏之间通公孙子雅子尾及陈鲍之怨庆封者乘封田于莱庆舍涖事于太公之庙虑蒲癸刺舍王何击之解其左肩庆封归伐内宫弗克反陈于岳【里名】遂来奔已而奔吴吴子予之朱方聚其族焉而居之

十有一月公如楚

为宋之盟故公及宋公陈侯郑伯许男如楚

十有二月甲寅天王崩【周灵王也】

乙未楚子昭卒【康王也】

公如楚及汉而闻楚子卒公欲反叔孙昭伯曰我为楚国来非为楚王来也子服惠伯曰君子虑远小人虑近吾饥寒之不恤而遑恤後不如归也叔孙穆子曰子服子未虑远也公遂行宋向戌曰吾为楚王来非为楚国来也吾饥寒之不恤而遑恤後吾俟其立君而更为之备宋公遂还

二十有九年

春王正月公在楚

正月在楚左氏曰释不朝正于庙也予曰讳国恶也前此成十年公如晋至十一年春而公尚在晋若襄则四年如晋五年在晋十二年如晋十三年又在晋然经皆不书而独书此者诸侯无相送葬之礼公与陈侯郑伯许男皆送康王之葬于楚西门外其诸大夫皆送至于墓则无礼极矣宋向戌倡宋之盟及朝楚洫盟而闻丧而返曾穆叔从公而见不及此然且天王之丧相距无几日而诸侯絶无问者堂堂宗国乃相率朝楚而为之执紼王安在此春秋所最恶而不忍言者故成公朝晋亦送晋葬亦朝正在晋而经但书如晋至自晋并不书在晋而此则特书所在以重别之虽讳恶实着恶焉

夏五月公至自楚

庚午卫侯衎卒

閻弑吴子余祭

吴人伐越获俘焉以为閻使守舟吴子余祭观舟閻杀之

仲孙羯会晋荀盈齐高止宋华定卫世叔仪郑公孙段曹人莒人滕人薛人小邾人城杞【仪公作齐莒人下公谷有邾人】晋平公杞出也因合诸侯之大夫以城杞卫太叔仪曰甚哉其城杞也郑子太叔曰何哉弃诸姬而夏肄是屏【杞夏之後肄者余也屏藩也】夫前十三年王城以谷洛鬬毁天下诸侯无城者即周平王以外家戍申然亦第役畿内民未闻合十一国诸侯而为之戍也子太叔不知大体但以同姓异姓分厚薄而胡氏遂以父族母族差等为言夫分同异姓则宋莒邾薛宜城矣若先父族则鲁城西郛礼亦无能合十一国而共城之者解经贵能通岂可解春秋而难通如此

晋侯使士鞅来聘【拜城杞也】

子来盟

以公爵而自入春秋以来或降书侯或降书伯或降书子此皆有时王陟黜之者今自僖二十三年後间称子伯则以既经黜降即间从降称无义例也说见前滕子来朝及子卒传

吴子使札来聘

札者吴子之弟季札也其但称札而不加氏史略文也第吴子不知为何人按经文吴子被弑与季子来聘同在六月吴子弑前书五月季子聘後书七月则聘与被弑皆不得出六月矣然而吴子六月死即六月焉能有吴子使人而或谓不然吴子使在前而死在六月犹之季子之受使在前而至在六月死与使不同时而死与使至同时此有何碍然而吴赴至鲁吴使又至鲁在鲁必将以所赴告使臣而为使臣者致命之後亦必将哭辟为位行在使闻丧之礼而以知礼如季子反流连赠答至请观周乐而不能已原不可解乃左氏又不能解经妄曰其出聘也通嗣君也谓新君即位通好问也考礼凡命使必旧君既葬而後新君可出命未有一月之间旧君未葬而嗣君可在殡而通聘使者于是杜氏诸儒谓此嗣君非余祭之子即是余祭以诸樊死後未通上国故藉此通之则考诸樊为巢牛臣所杀在十五年越今四年而後通新君于礼未合且新君即余祭也新君已故而通新君之使者于故後方至则将通故君乎通新君乎夫即此余祭一人而一月之间既告其死又告其为新君大为不伦故孔氏诸儒又以为閹弑余祭之告必非六月其在通使之时鲁与季子俱不知吴子之死及季子去後而始来告因遂记于此则又不然例凡死先而告後俱有年月如桓五年陈侯鲍卒一书甲戌一书己丑周惠王崩在僖七年闰月而告在八年十二月类此并无年月吾知其所告何时死又何时而妄自立说此皆史之无可解而当阙疑者史记世家谓余祭立十七年而後卒其卒时在楚灵王伐吴杀齐庆封于朱方之後为昭之十一年则距此季札来聘十三年矣此可释聘赴并行之疑然春秋年月岂有不信经而反信史者且灵王伐吴非余祭之世此必因余祭未弑时先以朱方居庆封而误以伐朱方杀庆封之事当之此等前後在汉人自多未辨耳

若胡氏谓书名去氏为贬其让国按传吴子诸樊既除丧将立季札季札辞之诸樊固强之至札弃其室而耕而後舍之此又何罪夷齐泰伯未闻付吏议也况书法去氏并无义例此与隐七年齐侯使弟年来聘文十二年秦伯使术来聘例同

秋七月葬卫献公

齐高止出奔北燕

高止高厚之子好事而专故放之奔者放也范甯曰南燕姬姓在郑卫之间北燕姬姓在晋北

冬仲孙羯如晋【报士鞅聘也】

三十年

春王正月楚子使薳罢来聘【罢公作颇通嗣君也】

夏四月蔡世子般弑其君固

蔡景侯为太子般娶于楚通焉太子弑之

五月甲午宋灾宋伯姬卒【公谷伯姬上无宋字】

或叫于宋太庙曰譖譖出出鸟鸣于亳社亦如曰譖譖者宋灾伯姬待傅姆不至卒于火夫伯姬为共公夫人在位十四年而共公卒其子平公立亦且三十有三年矣以国母而御妇妻何所不得而必待傅姆而行左氏谓其女而不妇非无礼也

天王杀其弟佖夫【公作年夫】

周灵王崩景王立王子瑕儋括以谋立景王弟王子佖夫为名而自为乱围蕞邑而逐其大夫佖夫不知也周大夫尹言多等杀佖夫王子瑕奔晋

王子瑕奔晋

秋七月叔弓如宋葬宋共姬【公谷共姬上无宋字】

共姬从夫諡也公羊以为贤而諡之则不知共姬为共公之姬又不知妇人无諡共者谬又谬矣叔弓叔老子

郑良霄出奔许自许入于郑郑人杀良霄

良霄汰虐?酒诸大夫恶之公孙黑怨其使已如楚乘其醉以驪氏之甲攻之良霄奔许既而还袭郑驪带乃帅国人攻杀良霄于羊肆经不书黑与驪带而但书郑人以国人与杀也其不书大夫以其自外入也此与晋栾盈出奔楚复入于晋晋人杀栾盈例同

冬十月葬蔡景公

晋人齐人宋人卫人郑人曹人莒人邾人滕人薛人?人小邾人会于澶渊宋灾故

以宋灾而会十二国大夫岂盟书所称恤灾者此灾也乎嗟乎晋霸遗习动辄召会其无礼乃至此

三十有一年

春王正月

夏六月辛巳公薨于楚宫【楚宫别宫名】

秋九月癸巳子野卒

据传立胡女敬归【归姓而敬諡】之子子野而卒乃立敬归之娣齐归【齐諡】之子公子稠穆叔不欲曰太子死有母弟则立之无则立长年钧择贤义钧则卜古之道也且是子也居丧不哀而有嘉容季武子不听卒立之是为昭公

己亥仲孙羯卒

冬十月滕子来会葬【诸侯会葬非礼】

癸酉葬我君襄公

十有一月莒人弑其君密州

据传莒犁比公虐国人患之其子去疾与展舆争立展舆因国人以攻莒子弑之乃立展舆而去疾奔齐经不书展舆弑君而书国人以国人为乱而展舆因之则简书但书国人以俟策书之检核此如子皙驷带杀良霄而经书郑人例同胡氏不解经义遂袭唐赵匡说谓传文展舆因国人以攻莒子弑之以字是之字之误展舆因国人之攻弑而得立非谓以国人弑也不知古文因字皆作依字解论语因不失其亲传称栾盈因魏献子以入绛又魏舒为栾怀子所私故因之是因原有依主之义主国人以攻莒子岂是之字传文可改而不知字义有不可通如之何

春秋毛氏传卷二十八

<经部,春秋类,春秋毛氏传>

卷二十九

钦定四库全书

春秋毛氏传卷二十九

翰林院检讨毛奇龄撰

昭公【公名稠襄公子母齐归夫人孟子諡法威仪恭明曰昭】

元年

春王正月公即位

叔孙豹会晋赵武楚公子围齐国弱宋向戌卫齐恶陈公子招蔡公孙归生郑罕虎许人曹人于虢【弱公作酌齐恶公作石恶罕公作轩虢公作漕谷作郭】

会于虢寻宋之盟也宋之盟楚人先?兹但用牲载旧书而不?血故经书仍先晋从策书例也虢郑地

三月取郕【公作运】

前年莒人以弑君故国乱季武子乘其乱伐之取郕时诸侯方会虢莒人告于会楚公子围以为寻弭兵之盟而鲁伐莒渎齐盟矣将戮叔孙豹而赵孟止之其说甚详且国语亦有之按经文楚来主盟始于襄二十七年宋之会其时无莒人也若楚公子围寻盟在前月又无莒人惟襄三十年以宋灾故盟于澶渊则?莒小邾俱在会然是晋人请召为会其?莒小邾诸国皆是晋从来服役之私属与楚何与而曰犯渎齐盟说甚不伦且会止一日虢之会在正月之後鲁之取郕在三月经文甚明岂有正月後为会而三月尚在会可告于会者春秋策书有极荒唐而不可为训者此类是也胡氏全不读经反谓经不书伐莒不书叔孙豹事为讳辱嗟乎经未尝亡也何不取夫子全经一通读之【李塉曰後五年莒牟夷以其邑来奔莒人告晋值公方在晋晋侯欲执之与此相类此必由彼事而致误者非实录也】

夏秦伯之弟鍼出奔晋

秦公子鍼者桓公子景公弟也有宠于先君桓公而富埒于景其母惧其得罪也使之奔晋鍼乃以其车千乘随之而行後昭五年秦景卒复归于秦

六月丁巳邾子华卒

晋荀吴帅师败狄于大卤【公谷作大原】

荀吴【荀偃子】伐狄将战魏舒【魏绛子】曰彼徒我车所遇又厄【险隘也】以什共车必克【增十人以当一车之用】既而困诸厄又克舒乃曰请皆卒自我始乃毁车而为行【毁其属车尽为步阵】先分三乘为三伍【乘车者车三人三乘十五人为三伍】使车之甲士下而即卒荀吴之嬖人不肯下斩之遂列五陈分前後左右而各有其名曰两曰伍曰专曰参曰偏大败羣狄于大原崇卒也【春秋时晋楚吴越皆以步卒取胜而诸国效之如季氏作三军之自毁其乘是也车战自此不复用矣】大卤即太原晋地

秋莒去疾自齐入于莒

前年莒展舆弑君而去疾奔齐以去疾齐出也今齐纳去疾而展舆奔吴以展舆吴出也时叔弓帅师乘莒乱遂疆郚田

莒展舆出奔吴

叔弓帅师疆郚田【春取郚今疆之】

葬邾悼公

冬十有一月己酉楚子麇卒【麇公谷作卷 杜云己酉日在十二月误】楚子麇者康王之子郟敖也襄二十九年楚康王卒立之已三年矣康王之弟公子围【共王子又名?】在本年虢之会来寻盟者至是使聘于郑伍举为介未出境闻王有疾遣伍举独往而入问王疾缢之【荀子云以冠纓绞之】遂杀其二子幕及平夏【郟敖子也】右尹子干【即公子比】出奔晋宫廐尹子皙【即公孙黑肱】出奔郑杀太宰伯州犁而葬王于郟谓之郟敖【旧谓楚人谓未成君而死者为敖此已立三年非未成君者其称郟敖以无諡号也】经不书弑者以疟疾赴也此与襄七年郑伯髡顽书卒哀十年齐侯阳生书卒并同

楚公子比出奔晋【即右尹子干也亦共王子公子围之弟】

二年

春晋侯使韩起来聘

韩宣子以昭公即位故来聘时宣子代赵武为政传谓以为政来见非也【韩宣子观书于太史见易象春秋曰周礼尽在鲁矣】

夏叔弓如晋【报宣子也】

秋郑杀其大夫公孙黑

郑公孙子皙【黑字】者穆公孙子驷子也将作乱欲去游氏而代其位【游氏太叔之族黑为游楚所伤故欲害游氏】驷氏与诸大夫欲杀之【驷氏即黑之族】子产使吏数其罪而使之自缢书例历见前传

冬公如晋至河乃复季孙宿如晋

据传晋少姜卒公如晋及河晋侯使士文伯来辞曰非伉俪也请君无辱公还季孙遂致服焉服者褻也按礼天子诸侯俱无亲吊丧者天子赴至列国则列国各遣上卿奔丧共吊赙器币而君不亲往至送葬则然後六服诸侯齐赴京师所谓天子七月而葬同轨毕至是也若诸侯则吊丧送葬俱但遣使而各有重轻大抵葬重而吊轻游吉所云吊遣大夫送葬遣卿而至于夫人则轻之尤轻所云吊遣士送葬遣大夫其礼甚明今少姜不知是夫人与否虽平公在位日久定非初娶然天子诸侯俱有再娶夫人之礼如鲁惠公又娶于宋曰仲子卫庄公又娶于陈曰厉嬀显可考据晋平娶少姜始以韩须逆于齐韩须者韩起之子此公族大夫犹曰不以卿迎至齐以大夫陈无宇来致少姜晋以其非卿而执之则直以夫人视姜矣盖致大国之夫人必以上卿正义所云晋以少姜为夫人则齐当以上卿送是也且後此复求昏于齐直曰伉俪曰内主曰任社稷之事明日继少姜为夫人而于少姜且云在縗絰之中直为少姜服夫人服此亦何一非伉俪而以此为辞吾于是知晋虽无道尚有天良而鲁君臣之卑溷无耻为已甚也晋景之丧诸侯并无至者而成公独往吊丧送葬成十年书冬公如晋至十一年春三月而始书公至自晋夫子伤之今以宗国之君在天子诸侯并不当奔吊者而乃吊此诸侯之夫人且以诸侯之夫人在与国属国又并无一君亲吊虽服役如郑亦仅遣太叔一往而独此鲁君鲁臣相率齐至故晋亦不得已必不肯以宠嬖视少姜者而至此以非伉俪借辞之观其曰请君无辱盖歉辞非倨辞也故夫子亦急书至河乃复以幸其犹不至晋稍减渙浚耳胡氏无学不羞其如晋而羞其不入以为却而不纳即当为辞以入之果非伉俪则陈无宇何以见执苟有二命则晋何以为盟主以此见责晋必纳公则万一季孙宿无学一如胡氏之为言吾不知其入而哭少姜者当何如也此则说春秋者之所漫然不省者也【李塉曰胡氏不晓夫人亦不可吊故争伉俪二字观传郑游吉送少姜葬晋梁丙曰甚矣哉子之为此来也谓游吉上卿不当为夫人来耳夫上卿犹不可来况国君乎】

三年

春王正月丁未滕子原卒【原公作泉】

夏叔弓如滕五月葬滕成公

秋小邾子来朝【朝新君也】

八月大雩

冬大雨雹

北燕伯欵出奔齐

据传燕简公多嬖宠欲去诸大夫而立其宠人诸大夫相比以杀公之外嬖公出奔齐

四年

春王正月大雨雹

夏楚子蔡侯陈侯郑伯许男徐子滕子顿子胡子沈子小邾子宋世子佐淮夷会于申

楚子於弑立之後假合诸侯以自固故为申之会而地偏力拙究不能狎主齐盟与强伯比故齐晋鲁卫曹邾燕秦诸国并无一与祇郑许陈蔡是其旧属余俱夷蛮小国而已传称如晋求诸侯而晋君许之又云时郑伯许男原以从猎在楚遂留之而使求诸侯今诸侯之来止于如此然则楚之为霸可知耳

楚人执徐子

徐子吴所出楚以其贰于吴也故执之

秋七月楚子蔡侯陈侯许男顿子胡子沈子淮夷伐吴楚效晋撽伐而以与会之郑宋又去而不从故虽因申会而不书诸侯之师以是也时楚伐吴使屈申围朱方克之执齐庆封而尽灭其族【庆封党崔杼弑君以襄二十八年奔吴吴以朱方使聚族居之】

执齐庆封杀之

遂灭赖【公谷作厉】

赖小国名时赖子面缚衔璧士袒而舆榱造于中军楚子释之因迁赖于鄢而还

九月取鄢

鄢者本鄢国地莒灭之以为邑者今莒去疾争国从齐入莒而以不抚鄢之故鄢叛而来遂取之後竟为鲁邑哀七年公会吴于鄢是也公羊不知鄢是莒邑尚以为是鄢子国而鲁始取之因曰取之者何灭之也则於襄六年莒人灭鄢之经显相悖矣因于莒人灭鄢传造为事曰莒之灭鄢非灭其国也取後于莒也其取後于莒柰何以莒女有为鄢夫人者而立其出也夫春

秋策书之例凡言所出皆指母氏凡言其出皆指子氏今云其出则是莒女所生之子正鄆公子也未有取莒女之家人为後而可云其出者于是何休又知不通又造云莒女为鄆夫人者其女还嫁之莒生一子而取为鄆後则是鄆女为莒夫人非莒女为鄆夫人另一事矣【一是莒出一是鄆出】且春秋继絶皆天子诸侯之事大夫以下皆无之从无异姓可继絶者如有则必本国争之列国正之岂有彼以继絶告而我可匿其本事而矫书灭鄆者乃胡氏又以黄歇吕不韦之事当之则是闇埋其子于腹中与明取其甥于国外又另一事矣【一是篡国一是窃国】诸传说经多涉影响原可不辨故前莒人灭鄆传但记本事而并不一及特经文前後多有照应因于取鄆文而并为灭鄆略辨如此

冬十有二月乙卯叔孙豹卒

据传叔孙穆子避兄侨如之难奔齐过庚宗【鲁邑】先与妇人宿而生牛至齐又娶国氏女生孟丙仲壬及归则庚宗妇人携其子来而国氏他适矣故二子迟归而穆子恶之竖牛以计杀孟丙逐仲壬乘穆子有疾而闭之不食三日卒考经文晋人听侨如之谮执季孙行父在成十六年九月是时经又书公会尹子及诸侯伐郑叔孙豹尚在军也至十月经书叔孙侨如出奔齐至十二月经书季孙行父与晋盟于扈归即召叔孙豹而立之为後则自十月至十二月不过两月间焉能遇一妇又娶一妇而遽生三子荒唐矣或曰穆子先奔齐而侨如继之夫发难在侨如几有侨如未奔而豹先奔者且豹随公往当随公返公在十二月经始书公至自晋是公未返而豹先舍公而遁将侨如未叛而豹先叛矣或曰鲁之立豹不在十二月而在他时观经书叔孙豹如宋在襄二年则或前此未立也襄二年始立则自成十六年至襄二年已四年矣四年何事不可为而又不然者大夫之见经以有事无事不以有人无人也此四年之间季孙行父亦不见于经岂无季孙行父乎况立後不待时叔牙之死即立戴伯臧紇之奔即立臧为从无踰四年而始立後者又况赏罚并行既已刺偃【侨如与穆姜所欲代成公者即公子偃也】即当立豹皆一时事岂容一在目前一在四年後而并记一处此皆策书之大无理而不足据者吾故曰解春秋者但据经勿据传传苟可疑即阙之可也况说传者也

五年

春王正月舍中军

前此襄十一年作三军矣今特以伯主责贡艰于悉索故仍舍中军而为二军而实则名减而实不减第分此一军之人而加之二军之间所谓朝三暮四以行其计者而其变制则向之三分之而三家各有其一者今四分之而季氏独有其二向之季氏征夫役家税而尽有之叔孙征夫役而不征家税孟氏并夫役亦征其半者今并夫役家税皆尽征之而但分其税而贡于公如是而已至于帅师则虽两军而仍以三卿领之季氏领上军曰左师孟氏领下军曰右师叔孙氏则自以叔孙为军名哀十一年战于清传称孟孺子泄帅右师冉求帅左师叔孙武叔退而蒐乘是也余说见前

楚杀其大夫屈申【为其贰于吴也】

公如晋

公初立未经朝晋二年冬以少姜卒往原兼新君朝聘之礼而辞不得入因再往焉然亦奔命矣

夏莒牟夷以牟娄及防兹来奔

莒牟夷莒之大夫也牟娄防兹皆莒邑也牟夷窃邑以奔鲁而鲁受之莒人愬于晋时公在晋晋侯欲执公范献子曰人来朝而执之诱也请归而以师讨焉公始归

秋七月公至自晋

戊辰叔弓帅师败莒师于蚡泉【蚡公作瀆谷作责鲁地】

莒人以我受牟夷既愬晋矣又来讨而叔弓败之

秦伯卒

不书名史失之说见前

冬楚子蔡侯陈侯许男顿子沈子徐人越人伐吴前四年楚伐吴围朱方杀齐庆封而吴即入棘栌麻以报之经未书也至是楚复伐吴以报棘栌麻之役而吴复败之楚子惧而归则楚非吴敌矣其时越通楚而以大夫来会师故书人越之见于经而为吴难自此始

六年

春王正月?伯益姑卒

葬秦景公【鲁遣卿会葬故也】

夏季孙宿如晋【晋将为莒讨鲁而不果讨因谢之】

葬?文公

宋华合比出奔卫

据传宋寺人柳有宠太子佐恶之右师华合比欲杀柳以媚太子柳闻之乃坎牲加书而告公曰合比纳亡人之族【襄十七年华合奔陈】盟北郭矣公视之有焉时合比之弟华亥欲代兄为右师遂为之徵因逐之而合比奔卫按襄二十六年宋平公杀太子痤寺人惠墙伊戾潜

太子亦曰坎牲加书与楚客会矣公视之有焉时左师向戌为之徵遂杀太子则是宋之行潜必是寺人寺人之潜必是坎牲加书其证坎牲加书必是左师与右师似太数见且犹是宋平一人前既识太子之冤已烹寺人而今复受其潜犹是太子佐前以失时不能救兄而今复不能为合比解此皆策书之大无理而不足据者吾尝谓经累书华氏之奔【襄十七年华臣出奔此书华合比出奔二十年书华亥华定出奔】必有一事始末相因以见者而策书自成襄以後但记晋事而于他国每略焉故凡此所记不无沿误解经者不可不察也

秋九月大雩

楚薳罢帅师伐吴

徐大夫聘于楚楚人执之策书未之详也至是使薳泄伐徐而吴人救之令尹子荡乃帅师伐吴吴人复败楚师于房鍾获宫廐尹弃疾焉其不能敌吴如此

冬叔弓如楚【以聘往且吊败也】

齐侯伐北燕

北燕简公以三年奔齐至是齐侯帅师以纳之史记世家称纳惠公不同

七年

春王正月暨齐平

及至燕而不能纳燕人乃行成盟于濡上经不书燕与齐平蒙上伐燕文也然不书齐与燕平而反曰与齐平以求盟自燕也胡氏见经文无燕字不晓间时而不间事可蒙上为文如桓五年州公如曹六年春书实来不更书州公一例遂误谓本国与外盟可不书本国名又误疑下文叔孙舍如齐涖盟则必正月与齐盟而三月又寻盟者因云昭公欲结强吴附荆楚而故与齐平盖鲁齐平非燕齐平也殊不知平虽是盟然必先有怨隙而後借盟以平之所谓行成非齐盟也鲁自襄二十五年齐崔杼报伐後已一十四年未有一十四年之怨而今始平者且涖盟非寻盟也阳谷之会鲁未与盟故公子友涖盟之并非寻盟若文七年公孙敖如莒涖盟未尝先有莒盟而後寻之也况此齐平在正月涖盟在三月且记其文在公如楚之後不惟间时抑且间事与定十一年及郑平叔还如郑涖盟又不相合又况燕齐之平明见他传郑公孙段卒在燕齐平之月罕朔杀罕魋在齐师还自燕之月此如襄公之生在会于沙随之岁卫灵公之生在晋韩宣子聘于诸侯之岁传例并同则是燕与齐平在他传引经又有旁证胡氏不读经又不读传乃欲凭臆而武断之岂非妄与

三月公如楚

楚子成章华之台愿与诸侯落之而不可得太宰薳启疆谓我能使鲁侯来遂以辞召公曰昔鲁先君成公会我先大夫婴齐以衡父照临楚国【成二年楚伐我成公与楚公子婴齐盟于蜀而以长子公衡为楚质】于今四王矣嘉惠未至惟襄公辱临我丧【襄二十八年襄公如楚临康王丧】今君若步玉趾以伸蜀之役既受赐矣何质之敢望【不望质子】君若不来使臣请问行期【问鲁见伐之期】公遂如楚先是元年会于虢楚子初娶郑公孙段氏女矣四年会申楚子使椒举请再娶于晋晋侯许之及晋使韩宣子送女叔向为介楚子朝其大夫曰晋吾仇讐也吾欲别韩起使守閭宫羊舌肸使为司宫以辱之如何薳启疆谏沮之楚子之无道而晋畏事之如此至是晋又恶公往乘公之未返而来治杞田【襄十九年晋平公为?所出使鲁会诸侯城?且治鲁所侵?田使还?今又治之】乃为?取成而去【成鲁邑】

叔孙舍如齐蒞盟【舍左谷作媾後同叔孙豹之子】

夏四月甲辰朔日有食之

秋八月戊辰卫侯恶卒

九月公至自楚

初公往以孟僖子从不能相礼至是归学礼逮死使其子孟懿子南宫敬叔事仲尼焉

冬十有一月癸未季孙宿卒【季武子也】

十有二月癸亥葬卫襄公

八年

春陈侯之弟招杀陈世子偃师

陈哀公元妃郑姬生悼太子偃师二妃生公子留下妃生公子胜哀公爱留属之其弟司徒招与公子过而公有废疾招与过遂杀偃师而立留是世子之杀启之者哀公成之者招与过而主之者招也故但书招杀而三罪之等从此定焉若称弟称世子别无义例说见前

夏四月陈侯溺卒

陈侯既杀世子而忧患自缢身死国亡几于不葬罪可知矣经书卒而不书缢书例如此

叔弓如晋

楚人执陈行人干徵师杀之

陈赴于楚陈公子胜亦愬于楚楚乃执赴者杀之陈公子留遂奔郑【干姓徵师名】

陈公子留出奔郑

秋蒐于红

蒐者春田之名所谓中春教振旅遂以蒐者盖藉田猎以习武虽春蒐秋獮各有其名然亦通称也红鲁地

陈人杀其大夫公子过

陈公子招归罪于过而杀之虽招不当杀过然过可杀也前但书招以正其名今又书过以正其罪春秋无佚罚如此

大雩

冬十月壬午楚师灭陈执陈公子招放之於越杀陈孔奂【奂公作瑗】

楚公子弃疾帅师奉孙吴【陈悼太子偃师之子】围陈宋戴恶会之遂灭陈改陈为县封穿封戌为陈公而放招于越其杀孔奂者招党也公谷于灭陈之役无一词实不知何故灭者特谷梁于此附以四字曰恶楚子也嗟乎恶之已乎

葬陈哀公

公死无葬者輿人袁克杀马毁玉以葬之楚子将杀克且令置马玉不用而使之见已克乃见楚子于幄加絰于颡而逃示不臣楚也时鲁往会葬故书葬云

九年

春叔弓会楚子于陈

时叔弓宋华亥郑游吉卫赵黶俱在会然特书会陈者夫此地陈国耶抑陈县耶而往会之

许迁于夷

楚公子弃疾迁许于夷夷者许地即城父也因许欲迁城父故使然丹迁城父于陈以夷淮西田益之乃迁许于夷使伍举取州来淮北之田以益之

夏四月陈灾【灾公作火】

陈既为县无称县以记灾之例庄二十年齐大灾襄九年宋灾二十年宋又灾昭十八年宋卫陈郑灾凡记外灾皆以国未尝以都邑也即本国记灾皆关宫社如御廩新宫雉门亳社之类并无及都邑者况灾必有告此时陈既不告而楚必无以县灾而来告者乃特书陈灾则分明以国予陈矣夫子春秋从无以一字为褒讥而此则实有意者虽陈後幸复而此时已灭故夫子于书灭陈之後连书葬陈哀公会楚子于陈及陈灾以示陈之何可灭盖恶强楚伤衰霸闵列国兴废一事而三致意焉

秋仲孙获如齐

孟僖子如齐殷聘杜氏云自叔老聘齐至今二十年礼意久旷故为盛礼以将之

冬筑郎囿

春秋毛氏传卷二十九

卷三十

钦定四库全书

春秋毛氏传卷三十

翰林院检讨毛奇龄撰

十年

春王正月

夏齐栾施来奔【齐公作晋误】

栾施字子旗公子栾之孙也与高疆字子良者同为惠族皆嗜酒信谗强于陈鲍氏【陈完鲍叔牙之後】而与之相恶或告子旗与子良将攻陈鲍氏而陈鲍氏先之子良欲劫公而使之助已反攻公虎门公徒出战败二氏于稷又败于庄又败于鹿门栾施与高疆皆来奔疆不书非卿也按齐有栾氏高氏以齐惠公子有子栾子高而栾施与高疆皆就祖字而分之为氏左传称栾高氏史记世家称高栾氏然总称惠族故子旗之父子雅子良之父子尾皆惠族有名子雅之卒晏婴叹曰姜族弱矣而嬖将始昌【言陈氏】二惠竞爽犹可又弱一个焉姜其危哉所云二惠正指栾氏与高氏也公羊但知晋有栾氏而不知齐亦有之改经齐字为晋字夫传春秋而于春秋事茫然不晓乃信口胡柴而名之曰传真不可解况此一出奔正齐陈兴废一大关键夫子书此系春秋节目而可不晓耶当是时齐使陈鲍分二氏之室陈桓子尽致诸公而请老于莒【齐邑】且公族甚衰桓子乃召高氏所逐子山子商子周栾氏所逐子城子公公孙捷皆反其邑益其禄厚给其衣屨帟幄器用凡公子孙之无禄者私与之邑国之贫约孤寡者私与之粟而民心归之陈氏至是益大矣

秋七月季孙意如叔弓仲孙矍帅师伐莒【意公作隐後同】季孙意如季平子也仲孙矍孟僖子也叔弓叔老之子子叔氏之族也三卿同伐莒取郕【莒邑】乃献俘而用人以祭亳社臧武仲在齐闻之曰周公不飨矣按鲁此时已舍中军而仍用三卿者非必一卿领一军或但用上下二军而又分正佐以领之祇以春秋书法详内略外本国用兵虽副佐必书故备列其名而胡氏竟谓季孙领二军二家各一军则四军矣左氏称四分者就夫役家税而言之非军法也且叔弓系宣公弟叔盼之後为子叔氏宣族并非桓族而胡氏谓三家各将所属则于鲁之公族尚未明白而欲解春秋可乎

戊子晋侯彪卒

九月叔孙舍如晋葬晋平公

传云叔孙婣齐国弱宋华定卫北宫喜郑罕虎许人曹人莒人邾人滕人薛人?人小邾人如晋葬平公也

十有二月甲子宋公成卒【成公作戌】

不书冬史阙文也

十有一年

春王二月叔弓如宋葬宋平公【二月公作正月】

夏四月丁巳楚子?诱蔡侯般杀之于申【?谷作乾兼文例】楚子在申召蔡灵侯飧而杀之刑其士七十人经就其事直书之其深恶痛絶固不待言但书楚子名例所不解杜氏谓从蔡所告则此时蔡人当君亡国灭之际未必有告胡氏谓恶其以诈灭人国则未有以书名责诈者即恶其灭国然灭国多矣未尝书名也且楚虔是举罪大恶极岂书名便足蔽辜大抵春秋国君死与被弑无不书名间有不书如宣十八年邾子貜酈子于酈其事原无可考僖十九年邾人执酈子用之其用之者为宋襄为邾君亦俱无明徵因略

其文比之夷蛮相杀如楚子诱戎蛮子杀之之例而其他诸国则无分大小无不实书名者是蔡侯之必

书般所固然也祇楚子不名则似以尊戮卑如天王杀太子痤晋侯杀世子申生类非敌体之例而敌体

相杀列国无有因特为创例亦加杀之者以名使两君相杀记有同等此亦因事成文而即可以立例者或谓蔡侯般曾弑父蔡君【襄三十年】故楚虔讨之而?又弑君之贼故两名以见并罪则不知蔡般之名其恒例也且弑逆大事何得于是时附讨之

楚公子弃疾帅师围蔡【弃疾者共王子灵王弟也】

五月甲申夫人归氏薨【昭公母胡女归姓】

大蒐于比蒲

蒐以习武然有小君之丧而大蒐是丧蒐也

仲孙貜会邾子盟于祲祥【公作侵羊地阙】

盟不知何事然丧盟何也

秋季孙意如会晋韩起齐国弱宋华亥卫北宫佗郑罕虎曹人杞人于厥慝【公作屈银地阙】

谋救蔡而不能也时晋使狐父请蔡于楚弗许

九月己亥葬我小君齐归【齐諡】

公葬母不戚晋送葬者归告之叔向曰国不恤丧不忌君也君无戚容不顾亲也国不忌君子不顾亲殆将失国矣

冬十有一月丁酉楚师灭蔡执蔡世子有以归用之【有谷作友】

楚子灭蔡改蔡为县即以其弟弃疾为蔡公俘隐太子有而用于冈山太子者蔡侯般之子蔡侯庐之父有其名隐其諡也此时君死于外国又被兵公羊谓有不成君故不称子而称世子固无理矣胡氏又谓蔡有知父母之讐效死不降至于力诘就擒虐用其身而不顾故称世子以为得世子之道则在三传并无其事南宋儒者竟可造事实以注夫子之书怪之极矣若用之为牲则僖十九年邾人执郕子用之与此正同前年鲁伐莒用莒人于社而经讳之非莒君也然无道乃至此

十有二年

春齐高偃帅师纳北燕伯于阳

北燕伯名欵三年出奔齐六年齐伐北燕纳伯不得故此又纳之然曰纳于阳则仍未入国以国自有君也公羊不知阳地何在以为伯于阳三字是公子阳生四字之误则传称伯为简公史记世家称伯为惠公传称纳于阳世家称至燕而死虽稍不同然并无有公子阳生其人者且此时惟伯在齐安得有公子也予揣其误似齐侯之子有公子阳生者其後弑荼而立名为悼公与世家之纳燕惠而死燕人立悼公两名相合遂疑燕悼公者必齐悼公之误燕伯于阳者必公子阳生之误盖齐景公欲纳其子为燕君而不可得也然荒唐矣阳一名唐燕之别邑後中山有唐县是也高偃高傒玄孙

三月壬申郑伯嘉卒

夏宋公使华定来聘

宋元公新即位通嗣君也华定华椒孙

公如晋至河乃复

齐侯卫侯郑伯皆如晋朝嗣君公至河晋以我取郟莒曾慝晋未治也辞不使入遂遣公子慝如晋

五月葬郑简公

楚杀其大夫成熊【公作能谷作虎其事不详】

秋七月

冬十月公子慝出奔齐【慝公作整】

季平子立不礼于南蒯【蒯为南遗之子季氏费邑宰也】南蒯谓子仲【公子慝字】吾出季氏而归其室于公我以费为公臣如何子仲许之既而蒯以语叔仲小叔仲小构叔孙昭子【叔孙豹之子】于季孙昭子将与季孙讼季孙惧而归罪于小小乃与蒯与公子慝共谋季氏会公如晋慝告公而从之前公自晋还复遣慝如晋是也至是南蒯以费叛慝将还闻其乱惧而奔齐

楚子伐徐

楚子狩于州来次于颍尾使五大夫围徐以惧吴而亲驻乾谿以待之

晋伐鲜虞

鲜虞白狄种也晋荀吴诈言与齐师会假道鲜虞以灭肥俘肥子緡皐以归肥亦白狄种緡皐者其君名也既而伐鲜虞乘其无备又胜之大获而归

十有三年

春叔弓帅师围费

南蒯以费叛叔弓围费弗克既而败季平子怒欲俘诸费人冶区夫【鲁大夫】曰如是是为南氏毆矣吾以恩抚之而使之来何有乎南氏平子从之费渐有叛者于是南氏家臣司徒老祁与虑癸二人劫南氏请出蒯遂奔齐其不书叛者徐仲山日记曰春秋国书也家臣叛家不叛国书叛则疑于国矣又公史也私人叛私不叛公书叛则疑于公矣故南蒯以费叛阳虎以讎阳关叛经皆不书而第书围费则费何以围第书盗窃则盗何以窃于是观策书而其情见焉若谓夫子恶季氏特削叛字以为张公室之劝则大不然南蒯至齐慝曰臣欲张公室也景公曰叛夫也未有夫子曾不如景公者故夫子于论语曰公山弗扰以费叛而于春秋则从例

以为书法凡史各有体如此

夏四月楚公子比自晋归于楚弑其君虔于乾谿【谷作溪】楚子灭蔡有蔡洧者仕于楚而其父死灭蔡之难每思报之而楚观起之被戮也【襄二十二年】其子观从事蔡大夫朝吴而居守于蔡至是曰楚不能复封蔡矣乘诸族怨楚者作乱乃假蔡公弃疾命召公子比于晋公子黑肱于郑【皆元年楚子弑麇时出奔者】弃疾初不从既而观从僞为盟强蔡大夫朝吴及蔡人奉弃疾与公子比盟于邓公子比为王黑肱为令尹弃疾为司马依陈蔡为国帅陈蔡许叶之师及羣怨诸族入楚除王宫以陈蔡复讐为名杀太子禄及公子罢敌时楚子在乾谿急帅师奔还而师溃于訾梁欲从夏口以入鄢不得乃缢于芋尹申亥氏或曰楚麇为?所缢而经书卒楚?自缢而经反书弑似乎不伦且观从朝吴原为陈蔡复讐发难而楚比以因人成事事败身死乃反蒙首恶之名又似乎失实往与先仲氏论此谓春秋书法有不书弑而不足贯臣子之讐书弑而反以甚君父之恶者如楚麇不书弑岂宥楚?但以令终予郑敖而楚?之罪同盟讥之即齐庆封亦得诟之未尝减也至楚?自缢而必书以弑在公子比罪尚可原而灵?大恶必不使祗宫得没而乾谿之可以不辱此等笔削真非游夏所能赞矣若夫复讐之师足有名楚比胁从似可不治然而三叔称王而并无禄父主乎其间则复讐何与且未有殷顽挟管蔡以畔而其罪不在管蔡者也此春秋之旨也

楚公子弃疾杀公子比【杀公作弑】

观从屡请子干【即公子比】杀弃疾而子干不忍观从曰人将忍子矣吾不忍待遂行国人夜骇曰王入矣弃疾复使人周走而呼曰王至以惊国人子干恐既而使蔓成然【鬬韦龟之子】告子干曰王果至矣国人杀司马【谓杀弃疾】将来矣衆怒如水火焉如何随使人走而呼曰衆已至子干子皙【公子黑肱】皆自杀弃疾乃即位名曰熊居葬子干于訾为訾敖【未成君而死曰敖】使蔓成然为令尹封陈蔡还所收邑召观从归而官之初共王无冢适有宠子五人而不知所立乃以璧见羣望【祀山川神】曰当璧而拜者神所立也埋璧而使五人拜康王跨之灵王肘加焉子干子皙皆远之平王【弃疾】弱抱而入再拜皆压纽其验如此

秋公会刘子晋侯齐侯宋公卫侯郑伯曹伯莒子邾子滕子薛伯?伯小邾子于平丘

晋成虬祁宫诸侯朝而归者多贰心乃用叔向谋大会诸侯而假兵力以胁之则无道之甚晋自此不复会诸侯矣刘子王朝卿士刘献公也因徼王国威而请以来会且又会吴子于良将藉强大之势而吴辞不至诸侯至者皆有赂既而寻盟【经书同盟】忽治兵建而不施已又施之诸侯皆惊乃以我伐莒取郕之故莒人愬于会晋侯遂斥公不许与盟【经书不与盟】又既而执季孙意如以归【经书执以归】又越日公乃归鲁【经书公至】按宣七年黑壤之盟公至而晋侯却之亦不与盟然而经不书同盟并不书不与盟以为国讳而此独备书而不一讳者杜氏与正义皆以为此由莒譖原非国恶故不必讳而不知用莒人以祭陰社恶之大者也晋伯将絶其恶已稔而鲁恶至此而抑进焉夫两恶则讳何得矣

八月甲戌同盟于平丘

公不与盟

晋人执季孙意如以归

公至自会

蔡侯庐归于蔡陈侯吴归于陈

灵王灭陈蔡而平王复之故隐太子【即世子有】之子庐归于蔡悼太子【即世子偃师】之子吴归于陈策书云礼谓兴灭国之礼也特庐与吴皆公孙不惟未成君兼未尝立之为子而遽称曰侯一若其自有之者此为文例杜氏谓受封于楚故称爵非也若胡氏谓不书复归不使楚?得灭之不书自楚不使楚平得封之其说未尝不善但书例复归则必先书去此者而後可言复归如郑忽出奔卫始可曰郑世子忽复归于郑元喧出奔晋始可曰元喧复归于卫庐吴未尝去陈蔡也若又书所自则但记其所自来未必其地之有以与之如蔡季自陈归于蔡系蔡人召归于陈无与卫侯郑自楚归于卫系晋人召归于楚无与此皆书例之显然者故曰春秋自有例特不可造例尔书名见前

冬十月葬蔡灵公

公如晋至河乃复

时季孙尚被执未归故公往而晋又辞之

吴灭州来

州来楚邑成七年吴入州来矣至是灭之令尹子旗【蔓成然】请伐吴楚子不许曰姑待之

十有四年

春意如至自晋

季孙之见执也晋人以幕裹其身使狄人守之而入时子服湫【惠伯】从私于中行穆子曰鲁兄弟也其事晋宁不如夷之小国而为夷弃之鲁土地犹大以事齐楚谚所云臣一而主二不必晋也穆子乃告韩宣子而归季孙惠伯不许曰寡君无罪合诸侯以执其老而惠而免之诸侯不闻也请仍会诸侯以免宣子患之叔向使叔鱼乞惠伯惠伯使季先归而已成见遣之礼然後还

三月曹伯滕卒

夏四月

秋葬曹武公

八月莒子去疾卒

莒以卒赴鲁而鲁不会葬修平丘之恶故也顾赴吊恒礼以怨废礼似不可或曰以夷小略之

冬莒杀其公子意恢

莒子去疾卒其子郊公立公子意恢者郊公党也莒大夫蒲余侯与意恢恶而公子铎怨郊公因杀意恢逐郊公而迎去疾之弟庚舆于齐而立之

十有五年

春王正月吴子夷末卒【末公作昧】

二月癸酉有事于武宫僉入叔弓卒去乐卒事

传凡称禘曰有事但禘在太庙而此曰武宫者以此时非禘年【以吉禘三年推之则昭二年起当在十四年】必是用武之际行禘礼于武公之宫如十五年传所云将禘于襄公者非常祭也故书之武宫者即武世室成六年所立为不祧之庙者是也尔时叔弓以卿临祭事当僉入之际而叔弓暴卒于庙遂去乐而终祭事此亦非常之变而即以变礼行之盖郊社大事惟君与后夫人之卒则废事卿大夫之卒无废事者故曰卒事若去乐与宣八年去僉不同仲遂之死在祀外因祭毕闻赴故祗于明日祭时稍去僉以示哀戚去僉者但去僉舞而干戚之舞未去也非去乐也叔弓之死在祀内方僉舞将入而泄事者死则并乐而尽去之不止去僉也以目睹其死而不忍乐也然且乐则去而礼事必终其重公祀而轻卿丧如此谷梁不知礼此曰去乐于仲遂之死亦曰去乐大夫死于庙可临祭告变即不死于庙亦可临祭告变则檀弓称柳庄之死卫灵公使其当祭必告夫惟当祭必不告故当祭必告也曾子问祭设簠簋而闻君与后夫人之丧如之何夫但云闻君后夫人丧则定无有闻卿大夫丧者是卿大夫丧在祭时必不敢闻告而况于去乐与

夏蔡朝吴出奔郑【朝公作昭无出字】

蔡朝吴在蔡楚大夫费无极疾之构蔡人使逐朝吴楚子怒诘之无极曰臣岂不爱吴然而臣早知其为人吴在蔡非楚之利也遂出奔经书此者徐仲山曰朝吴复蔡之人故不忍遗略如此

六月丁巳朔日有食之

秋晋荀吴帅师伐鲜虞

前十二年荀吴伐鲜虞灭肥而归今又伐鲜虞克鼓执鼓子?鞮而归

冬公如晋【谢释季孙也】

十有六年

春齐侯伐徐

齐侯伐徐至蒲隧徐人行成乃受赂而归

楚子诱戎蛮子杀之【蛮公作曼】

楚乘蛮乱诱其君杀之而立其子焉不名略之

夏公至自晋

晋止公不听归故夏始告至经不书止讳辱也嗟乎辱至此亦不足讳矣

秋八月己亥晋侯夷卒【礼例】

九月大雩

季孙意如如晋【送葬也】

冬十月葬晋昭公

十有七年

春小邾子来朝

夏六月甲戌日有食之

秋邾子来朝

时叔孙昭子与邾子论官仲尼年十二见而学之

八月晋荀吴帅师灭陆渾之戎【公作賁渾戎谷无之字】

冬有星孛于大辰

大辰房心尾也苍龙之宿心在中最明为时候主故称大辰孛者彗星也形似帚有除旧布新之象今除旧当心心为火宿而除在火伏之时则明年火出而火灾必布故梓慎裨竈辈皆以为明年宋卫陈郑同日火灾之兆以宋卫陈郑为房心尾三宿次舍地也若汉天文志云东宫苍龙房心心为明堂为天王其前星太子後一星庶子也而董仲舒刘向皆谓天王明堂孛加其中为後五年王室大乱天王与王子适庶争国之象至後汉纬家且谓彗孛与荧惑同为火体荧惑守心在周为景王崩在汉为高帝与成帝晏驾说俱有据特占验贵速汉儒所说验俱在五年之後自不若火伏而除火出而布见前历历之可徵也予最不喜道占验故于日食星陨概不引天文家一语或有称胡氏是传殊胜左氏而不知其为刘向之说因引诸儒语而断之如此

楚人及吴战于长岸【楚地】

楚令尹句司马子鱼帅师伐吴子鱼死之大败吴师于长岸获其乘舟余皇【舟名】既而吴公子光【即诸樊子阖庐】复追战楚师亦败夺余皇而去

春秋毛氏传卷三十

<经部,春秋类,春秋毛氏传>

卷三十一

钦定四库全书

春秋毛氏传卷三十一

翰林院检讨毛奇龄撰

十有八年

春王正月曹伯须卒

夏五月壬午宋卫陈郑灾

四国同日灾记异也

六月邾人入郕

郕小国名妘姓据传郕人藉稻以周六月为夏四月正种稻之时郕君履行观种稻而邾人袭之入其国尽俘以去郕子无所归随其家之被俘者于邾邾君乃反郕夫人而留其女焉

秋葬曹平公

冬许迁于白羽

许畏郑屡迁前既迁叶又迁夷矣楚灵又还迁于叶今楚平用左尹子胜之言谓叶为方城外蔽恐晋郑侵许将为楚患故又迁白羽经不书楚迁许而书许迁者以许自愿迁也此与齐师迁邢而经书邢迁于夷仪例同

十有九年

春宋公伐邾

前年邾入郕尽俘郕人郕夫人者宋向戌女也向寧【戍子】请师于宋公宋公乃伐邾围虫【邾邑】取之而尽归郕俘邾乃乞郕人徐人会宋公盟于虫而迁

夏五月戊辰许世子止弑其君买

据策书许悼公疟许世子自为治疟之药以进而杀之故曰饮太子止之药卒杜氏曰不由医者则直是造药以治疾而由误致死纵或无意然罪大矣故曰弑所云弑者直由此杀之也後儒不善读书误解谷梁许世子不知尝药累及许君一语遂谓许世子以不尝药书弑而胡氏又遵之夫公谷二家俱以世子为进药不是尝药故公羊直云止进药而药杀虽谷梁谓不知尝药累及许君然曰累及则直以药累矣若但不尝何足为累盖其所云不知尝药者非不尝也谓其不知尝药之义而自用以致累也曲礼有云君有疾饮药臣先尝之父有疾饮药子先尝之医不三世不服其药夫所以必如是其慎者以为君子谨疾况于君父故药物不识虽出自医者犹必口自尝试以防有误岂可漫不由医而直自用其药物故谷梁但以不知慎重为戒而夫子则直讨其自用药物以明弑盖不当药罪小用药物罪大尝药第察其有毒与否所防极浅而一经自用则药与疾忤虽百尝亦何所挽观传称君子多托夫子以为言而此述君子有曰尽心力以事君舍药物可也谓事君父何所不可用心力而必用药物此万当舍去者也戒之也

己卯地震

秋齐高发帅师伐莒

莒恃晋而不事齐故齐伐之时莒嫫有夫为莒所杀者嫫托身纪鄆纺纆为布而留其绳量城板高下而续以藏之至是莒子奔纪嫫乃投绳于城外齐师登遂入纪城

冬葬许悼公

二十年

春王正月

夏曹公孙会自鄆出奔宋【鄆谷作梦策书未详】

鄆曹邑此事策书失载不当妄解胡氏引刘敞言谓自者待放也古大夫有罪待放于其境三年君赐之环则还赐之玦则去此必赐之玦而後去者予按春秋止有放例如宣元年晋放其大夫胥甲父于卫哀三年蔡人放其大夫公孙猎于吴类并无待放例以待放则必书在初放时或前後两书不当于三年後临去始书简也且曹方易君前十八年曹平公卒而悼公立距此二十年裁两年耳待放须三年则此时已非三年前所放之君谁则赐玦而使之奔宋况经有书例此书例与二十二年华亥向寧华定自宋南里出奔楚正同故贾逵谓此必前此以鄆叛一如华亥之先据南里以叛而此時出奔故曰自此亦就经文书例而类推之岂有赵宋儒者可公然自造为事以注夫子之书如刘胡者嗟乎亦无忌惮矣

秋盗杀卫侯之兄縶【公谷作辄】

縶者卫侯同母兄也縶有足疾而卫侯以卜吉得立是为灵公【见七年】縶夺齐豹【齐恶之子】司寇与食邑而欲去北宫喜与褚师圃故三人皆欲杀縶会宋公子朝仕卫与卫侯嫡母宣姜通不安因藉之同作乱藏甲于齐氏杀縶于盖获门外卫侯奔死鸟【卫地】既而北宫喜反正伐齐氏灭之卫侯与喜盟彭水之上并盟国人而後入公子朝褚师圃奔晋其书盗者以贼杀公子不问其为何如人或士或大夫而概以盗名此与襄十年盗杀郑公子騂公子?例同释例谓士杀大夫始称盗原属不通胡氏谓盗指宗鲁不指齐豹褚师圃等按传齐豹曾荐宗鲁于縶为骖乘及将杀縶时豹先使鲁避去而鲁不肯曰闻难而逃是子荐我之言不信也子第行事而吾从公死遂并杀之琴张【孔子弟子】闻鲁死将吊之孔子曰齐豹之盗【使豹行事是盗党】孟縶之贼【知难不告是縶贼】何吊焉据此则是宗鲁与此事始末全不干系不过一死事之傍及者凡事有主从舍主而责从此犹栾盈入晋舍栾盈而责胥午郑伯奔蔡舍雍纠而责雍纠之妻非春秋也

冬十月宋华亥向寧华定出奔陈【宁公作甯】

宋元公恶华向二族华亥华定与向宁谋先发为乱亥以诈疾诱杀羣公子并刼公取公之子太子栾公子辰公子地三人为质【杜氏谓公子辰地皆平公子元公弟按定十年经书宋公之弟辰在景公时则元公子景公弟也传称母弟辰谓太子母弟杜误】公亦取华亥华定向宁子为质而盟于华氏当是时公子城【元公弟】与华氏战于鬼阎败而奔晋有华费遂者华族也为大司马公信之与谋去华氏乃杀华向之质子而攻之华向奔陈华亥之兄华恹归公所质三公子而费遂之子华登独党助华向奔吴

十有一月辛卯蔡侯庐卒【庐左作卢】

二十有一年

春王三月葬蔡平公

夏晋侯使士鞅来聘【晋顷公即位通嗣君也】

宋华亥向宁华定自陈入于宋南里以叛【公作畔】

司马华费遂生三子华魋华多僚华登也登于前年奔吴矣魋为少司马多僚为御士而谮魋于公曰魋将纳亡人公疑之曰司马以吾故亡其子【谓登】岂可以再亡之及又言公召司马之侍人使告司马司马叹曰必多僚也吾有谗子而弗能杀吾又不死抑君有命如何乃与公谋逐华魋将使田孟诸而遣之公与司马皆厚赐魋魋之臣张句知其情请杀多僚魋曰司马老矣登之为甚吾又重之不如亡也于是魋将见司马而行遇多僚御司马张句怒杀多僚遂刼司马而召诸亡人华向入居庐门以南里叛宋乃城旧鄆及桑林之门而守之【张南士曰宋元公不能独断与庸耄谋而司马优柔不决大坏国事大学所谓不能齐家而欲治国难矣此春秋所诛也】

秋七月壬午朔日有食之

六月乙亥叔辄卒【辄公作痤叔弓子】

冬蔡侯朱出奔楚【朱谷作东误】

蔡侯朱者蔡平侯庐之子也楚费无极取货于蔡东国【庐之弟朱之叔父】假楚子之意使蔡人去朱而立之朱愬于楚楚子将讨蔡人费无极曰平侯与楚有盟【前盟于邓】故封今其子有二心故废之且灵王杀隐太子与君同恶此犹是隐太子之子也且废置在君蔡何有焉据传则蔡之易君全由费无极一人而董仲舒于七月日食谓是蔡侯朱骄君臣不说之象故蔡侯出奔则寔是蔡人出君非费无极也汉初论春秋不同如此

公如晋至河乃复

晋顷公立公以朝新君如晋而晋又辞之

二十有二年

春齐侯伐莒

齐初使北郭启帅师伐莒莒子将战而莒大夫沮之谓大国不可怒也弗听败齐师于濇余【莒地】至是齐侯亲伐莒莒子行成司马竈如莒涖盟莒子如齐涖盟于是莒人恶其君

宋华亥向宁华定自宋南里出奔楚

华登以吴师救华氏会齐乌枝鸣【齐大夫名】戍宋宋厨人濮【厨邑大夫名濮】请伐之大败吴师于鸿口获吴二帅【一公于若雒一偃州员皆吴大夫】华登帅其余以迫宋师厨人濮曰扬徽者公徒也【徽识也谓以旗书官阀名氏而被于背以为识】皆扬徽齐乌枝鸣曰用少莫如齐致死【谓迸力】请皆用剑从之皆用剑华氏败既而公子城以晋师至【前年奔晋】曹翰胡【曹大夫】会晋荀吴齐苑何忌卫公子朝【即宋公子朝前年奔晋今又还卫】救宋与华氏战于赭丘公子城射张匄死大败华氏围诸南里华亥搏膺见华鞅曰吾为栾氏矣于是华登如楚乞师楚使鬬越告宋曰闻君有不令之臣为君忧无宁以为宗羞寡君请受而戮之宋初不许诸侯之戍谋曰彼亦何能为不如出之以楚功救宋而除其害又何求乃出之时华鞅华登等皆同叛同奔而经不书重始事也胡氏谓不书诸国救宋者所以罪诸国书自宋者所以罪宋书奔楚所以罪楚则此时诸国无罪羣贼在内强援在外固请予楚未为失算若宋楚得罪则在事理或有之而在书法并无有初书华向奔陈继书华向自陈入于宋书奔书自何止宋楚以此为罪则陈罪魁矣且天下未有书亦罪不书亦罪而可以云书法者此谬也

大蒐于昌间【公作奸】

夏四月乙丑天王崩

六月叔鞅如京师【叔鞅叔弓子】

葬景王王室乱

三月而葬以乱故也春秋记事未有无事而空书其义者王室乱者义也非事也以为告耶则定无有以乱之一字告者以为叔鞅之言耶【传谓叔鞅言王室之乱经所以书】则传闻之言无书策之例盖春秋鲁史而略于周事虽若置而不问者然共戴之主安则已矣即仅守府亦但听之而至于乱则不止卑弱而隣于丧亡故一闻其事即特变史例空书三字以示儆切正义所谓以宗国而忧王室义当如此

刘子单子以王猛居于皇

此王室乱之事也王猛者景王子也前十五年传称景王之太子壽卒立王子猛为後矣既而王子朝有宠复欲立之刘献公之子蚘【文公】新继献公为卿士与单穆公旗同辅子猛乘景王崩时见猛于丧次攻杀子朝之傅宾起而与羣王子盟于单氏及葬景王子朝因旧官合灵景之族作乱帅郊要饒之甲【三周邑出甲】以逐刘子并败巩简公甘平公之师其党羣王子欲取猛而杀单子单子乃逆悼王【即猛】于庄宫杀羣公子之迫已者以王如平時又如圍车次于皇将以告晋其称王者天子诸侯既葬皆称君景王既葬则自宜称王然不称天王且犹称名则以天子七月葬兹虽既葬而未及七月且以乱故未能行即位之礼故称名比之郑忽郑突子野子般之例以未成君之礼行之其後仍称王子不书崩而书卒皆以是也居者亦天子出奔之名与襄王出居郑敬王居于狄泉例同若昭公居郕居乾侯则又因逊而转称之不在此例

秋刘子单子以王猛入于王城

刘子如刘单子先使王子处【猛党】守王城盟百官于平宫【平王庙】鄆肸伐皇大败获鄆肸焚于王城之市既而司徒丑以王师败绩百工皆叛单子伐平之晋乃以籍谈荀跖帅九州之戎【即陆浑戎服晋者】及焦瑕温原之师【晋四邑周旧赐晋者】以纳王于王城是王之出入屡有胜败其得直入王城者多藉晋功而经不书者不予晋也晋为长伯当此王室不靖自宜释其位以勤王事帅先効职毋长乱灾即不然而撻伐习成亦当借共主之名大会列侯亲统诸师以从事其间况已经告急王人乞兵而祇以无名大夫徵周郊戎卒以应掌故此则无君之甚者然犹不没其善而于後围郊时仍书晋人以表其事谁谓春秋断烂也

按王城即郟鄏武王迁九鼎于此周公营以为都者其地在河南经又书天王入于成周即下都周公营以迁殷顽民者其地在洛阳自平王东迁历十二王而至景王皆居王城未尝居成

周也惟敬王以子朝之乱其徒党多踞王城因徙居成周经二十六年入成周是也其时以王城在成周之西而敬王子朝并立称王故苋弘以地震之故告刘文公谓西王受震东王必克盖亦就二王言之并无有以王城为西周成周为东周者至显王二年韩赵分周为二国名东西周于是始有东西二周之名故曰春秋以前称西周者丰镐也称东周者郑鄢也战国以後称西周者王城也称东周者成周也今公羊忽曰王城者西周也其言入何篡也详其意谓成周本京师地周东迁旧居也王猛欲以王城篡京师故经不书西周而书王城恐二京师也是既以平王东迁世居成周反以王城为篡居已属梦梦且此时从未有东西周之名即周桓居王城皆称河南桓公并无称西周公者其称西周自韩赵分国始而公羊及之则意公羊本战国後人习见赧王以前世居成周妄疑春秋诸王皆以成周为王居并不知东西二名实起于战国之末遂名王城曰西周【成周曰东周见後公羊传】且以王城为篡居之地此皆秦汉人所言得毋公羊谷梁正秦汉间人乎如是而欲与春秋策书争是非得乎

冬十月王子猛卒【乙酉在十一月经书十月误】

猛卒即以猛母弟子勾立是为敬王其称名称卒以不行即位礼未成君也说见前【传称悼王然不入庙与太子泄父同】

十有二月癸酉朔日有食之【长历此月为癸卯朔癸酉误】

二十有三年

春王正月叔孙舍如晋【晋召也】

癸丑叔鞅卒【叔弓子】

晋人执我行人叔孙舍

初邾人城翼【邾邑】道经武城【鲁邑】武城人以不假道故伐而取之获邾大夫三人邾子慆于晋晋人来讨故叔孙昭子如晋至是晋人执之且使与邾大夫坐讼曲直叔孙曰列国之卿当小国之君周制也有寡君之命介子服回在【使其介子服昭伯坐讼】乃不果坐韩宣子使邾人聚其衆将以叔孙与之叔孙闻之乃去衆与兵而立于朝示以必死宣子始勿与且令叔孙与子服各居一馆使士伯听其词并执叔孙子服以谢邾士伯乃御叔孙从者四人过邾馆以如吏先使邾子归令叔孙立以待命然後馆诸箕舍子服昭伯于他邑羈之一年晋之恶鲁之辱至是已极向非叔孙之刚果则其渫渫有不可道者时范鞅求货于叔孙假请冠焉叔孙佯不解其意以两冠与之曰尽矣申丰以货如晋祈免叔孙叔孙诱其货匿之不使出吏人与叔孙居于箕者请其吠狗弗与及将归杀而与食之叔孙之以礼自持而不诘于强御如此

晋人围郊

讨子朝也晋大夫无名故称人郊者子朝之邑

夏六月蔡侯东国卒于楚

楚费无极去蔡侯朱而立东国【在二十一年】今至楚而卒

秋七月莒子庚舆来奔

庚舆以十四年立虐而好杀人国人逐之齐人纳郊公【郊公十四年奔齐】庚舆来奔

戊辰吴败顿胡沈蔡陈许之师於鷄父胡子髡沈子逞灭获陈夏啮【父谷作甫逞公作榼谷作盈】

吴伐州来楚薳越帅师及诸侯之师救之吴人御诸鍾离会楚令尹子瑕卒楚师先燬【如火之熄】吴公子光乃以诈败诱之杀三国之君与大夫而诸师俱奔其不书楚者以楚师未陈也国君死曰灭大夫生死皆曰获如宣二年郑人获华元为生获哀十一年获齐国书为死获类鷄父楚地

天王居于狄泉尹氏立王子朝

天王景王子即王猛母弟敬王也居狄泉避子朝也时子朝入于尹尹圉【文公】诱杀刘佗【蚩族】败刘单之师即召伯奭南宫极皆以成周人戍尹遂立子朝于王城纳诸庄宫经祇书尹氏以其专也且不使子朝有同立名也尹氏旧称如诗太师尹氏类胡氏谓世卿擅权独称氏为後世戒则王国卿士刘单甘召谁非世卿祇取公羊误解尹氏卒一语以为金科乌知尹氏卒非尹氏也公羊讥世卿春秋不讥世卿也世禄者世卿之谓也【尚书世禄之家即世爵之家言世有采邑也宋人谓世禄不世官大误考封建之世从无世禄不世官之例见经问】

八月乙未地震

冬公如晋至河有疾乃复【公谷至河下有公字】

公以叔孙见执故如晋乃又不得入其书有疾者讳辱也然亦幸不及辱也自昭公立後公凡七如晋一见止五见拒公之臣亦六如晋而两见执我辱固有之然晋恶亦甚焉虽然王室构难天王蒙尘夫子特书乱以志忧患而以释位勤事之宗国尚奔走强大而较荣辱焉是亦不可已乎

二十有四年

春王二月丙戌仲孙貜卒【孟僖子也】

叔孙舍至自晋

晋士弥牟逆叔孙于箕叔孙使梁其蹇待于门内曰余左顾而欸则杀之【恐其来杀己也】右顾而笑乃止及见士伯辞有礼遂受礼而归按叔孙舍三传俱作媾独经俱作舍皆叔孙昭子名也胡氏谓执而致则名此独书姓氏岂误以舍为媾之字乎叔孙固贤然并未尝以姓氏褒之十四年晋人执季孙意如而归祇称意如而无季孙非贬意如成十六年晋人执季孙行父盟于扈而归称季孙行父不必褒行父况大夫执致则名并无此例文十四年齐人执单伯单伯者王国大夫也有姓有爵而偏无名于美刺何居

夏五月乙未朔日有食之

秋八月大雩

丁酉杞伯郁廙卒【郁公作郁】

冬吴灭巢【楚邑】

楚子为舟师以略吴疆吴踵其踪迹而窥其无备遂灭巢及鍾离而还沈尹戌曰前灭州来今又灭巢灭鍾离亡郢之始矣

葬杞平公

春秋毛氏传卷三十一

卷三十二

钦定四库全书

春秋毛氏传卷三十二

翰林院检讨毛奇龄撰

二十有五年

春叔孙舍如宋【策书未详】

夏叔诣会晋赵鞅宋乐大心卫北宫喜郑游吉曹人邾人滕人薛人小邾人于黄父

初郑伯如晋子太叔谓范鞅曰王室之不宁晋之耻也鞅惧与韩起谋于是为黄父之会谋王室也赵鞅令诸侯之大夫输王粟具戍人曰明年将纳王是役也得春秋盟会之正然美刺兼有而胡氏疑其无美词夫春秋书事何曾有美刺之字见于文间第书事而善恶自见此即例也如此经自美多刺少然善观者于此则晋侯与诸侯皆不亲会齐则并大夫亦不与会但有会而此後并无有诸侯之师此年夏会黄父而明年之冬然後天王入成周则其可刺处在经文多有之不必检传之徒具戍人明年纳王然後知诸侯之怠王事失効官也不善解者但求其字于文间而求之不得则又舍本文而别求他义乌知大义炳然要皆本文所固有乎

有鸛鹄来巢【鸛公作鸛】

此记异也鲁大夫师己云文成之世早有鸛之鹄之公出辱之鸛鹄之羽公在外野之谣今鸛鹄果来当为昭公出奔之兆盖失所处也考工记鸛鹄不踰济此鸟为鲁所无有者且其鸟穴处多藏岩谷与城障间或攘鹄巢以为居召南所云维鹄有巢维鹄居之是也则是来一异巢又一异盖一事而两记异者刘向云有蜚有一气之所生鸛鹄来巢气之所致气所生为眚气所致为祥此谓旅鸟变居皆逐君沴气所先致者祥者兆也胡氏谓公子宋有国之祥则弟受兄国有何异事而异物异处所兆如此此在汉晋儒者便无此言

秋七月上辛大雩季辛又雩

上辛下辛上下旬之辛也上辛正祭下辛呼旱之祭盖周之七月为夏五月旧制龙见而雩在建巳四月去五月不远故五月犹是正祭至又雩则旱耳说见桓五年传若公羊谓又雩非雩本借雩聚衆以逐季氏则衆非雩祭可得而聚且九月公逊其期尚早此时即逐季之谋尚未有绪而欲先事而扬兵误矣

九月己亥公孙于齐次于阳州【己谷作乙阳公作杨】

此昭公出奔也书法他国君被逐曰出奔鲁君被逐曰孙孙逊同避也虽昭公自奔不关被逐然君逐臣而不得而君反出国则君被逐矣此固昭公信谗轻举妄动然而季孙之逆仲叔二氏之党恶无君第书事而义俱见者徐仲山所谓强臣执国势极难挽养痍在胸腹则决去必败有国者所当戒也据传季公鸟【平子庶叔父】之妻有他行恶公若【即公亥公鸟弟】与公思展【季族】申夜【公鸟家臣】之相其室潜于季平子平子使公之【平子弟】拘展与夜姑杀之季郈之鷄鬪【郈昭伯与季家相近】季氏介其鸡【甲其首】郈氏以金为距平子怒侵郈氏地以益居且责之臧昭伯之从弟会为盗于臧氏而逃于季氏臧氏之老就季氏拘会而季氏反执之会将禘襄公【襄不宜专祭此以时祭重祢庙故言之】习万【舞】者不之公而之季氏【季有私祭】衆恶之公若乃献弓于昭公之公子务人且与之出射于外而谋去季氏公初难之既而告臧孙【昭伯】未许也郈孙力劝之以告子家羁【公孙归父之子即懿伯】子家羁曰不可公室失民数世矣失民则何以集事谗人以君徼幸事不克而君受之矣且政在未可图也公不听值叔孙昭子如阚【鲁邑】公居于长府伐季氏杀公之于门平子登台而请曰君不察臣之罪使有司讨臣以干戈臣请待于沂上以察罪弗许请囚于费弗许请以五乘亡弗许子家羁曰君许之政之所在衆用命焉日将暝而奸慝作事去矣郈孙曰必杀之公使郈孙逆孟懿子叔孙氏之司马驪戾言于衆曰季氏之有无于我孰利皆曰无季氏是无叔孙氏也曰然则救诸帅徒以往陷西北隅以入公徒释甲执冰而踞【冰箭箚盖可取饮者踞蹲坐也】遂逐之孟氏执郈昭伯杀之于南门之西遂伐公徒子家羁曰君止【不可自出】诸臣劫君而负罪以去【使诸臣出奔】君无与也意如不敢不改也公曰余不忍也【指诸臣】乃与臧孙如墓谋遂行次于阳州【齐鲁境上地】

齐侯唁公于野井

齐景公将唁公于平陰公乃就野井会之唁者吊问之名野井齐地时齐侯请自莒疆以西致公千社【二十五家为社即里也千社二万五千家】公喜子家子曰天若胙君以鲁足矣失鲁而以千社为齐臣则谁肯复从君者且齐未可信不如早之晋不听臧昭伯率从者以盟请处者皆有罪从者皆无罪毋通内外毋离散毋不繾綣以从公子家子曰如此则吾不可盟吾方欲与居守者同心迎公而以为皆有罪方欲负罪去公自相离散通内外以使公速入而以为守公不去毋通内外吾何敢盟

冬十月戊辰叔孙舍卒

叔孙昭子自阚归见平子平子稽顙曰子若我何昭子曰人谁不死子以逐君成名子孙不忘不亦伤乎将若子何平子曰苟使意如得改事君所谓生死而肉骨也昭子从公于齐与公言子家子命适公馆者执之【恐从者知叔孙谋】公与昭子言于幄内曰将安衆而纳公公徒将杀昭子【公入则从公伐季者惟恐得罪故欲杀昭子】伏诸道左师展【鲁大夫】告公公使昭子自铸归【从他道避伏兵】既而平子有异志【不欲纳公】昭子乃大患斋于其寝使祝宗祈死自十月辛酉至戊辰七日无疾卒杜氏云自杀焉左师展将以公乘马而归【

谋单骑不用车】公徒执之

春秋出君自郑昭公厉公外惟卫有四君一惠公朔一成公郑一献公衎一出公辄然皆得返国而昭公独否予尝谓返国有二一是诸侯纳之一是本国迎入之今晋伯既不足恃而齐卫二君又适当景公灵公之庸懦有虚礼而无实济且晋臣强横荀鞅赵鞅辈多党季氏又贪渎无厌动辄求货则诸侯之纳固无望矣若本国迎入则昭似较易于四君何则四君皆有新立之一君为之抵敌惠公有黔牟成公有叔武有公子瑕献公有卫侯剽出公有父蒯聩昭无有也无有则国无匹敌之君君出君入绰然余裕即居守从亡皆不得以两君顾忌有所藉口又且公逐季氏原非季氏逐公其在公之入不必饰辱而在季氏则原非其罪幡然迎入虽曰改节亦并无有前後两端待请愆谢过之重烦解说此其间即一本国大夫通之有余故子家羁闻不通内外之盟即毅然拒之闻叔孙昭子之归通意如即力为卫之至意如随荀躒迎公乾侯即劝公从之及叱意如退荀躒俱去犹乞公以匹马入鲁师而归之而无如从亡者与公徒之必不愿公归而公不觉也盖从亡者皆发难之人也公若昭伯辈与意如势不两立而公徒败事怠不用命然而入季氏之门者公徒也心不自安一日从公则公一日不得归是以长府之役子家欲公使诸臣出奔则公可不出即既出而诸人散去有如叔孙昭子者通乎其间则公可即归而公以不忍诸臣而不离意如以诸臣从公而必不敢逆诸臣则惟恐公归但借缙纆从公为名而必不肯去此公之所以薨于乾侯者非天意也实人为之也易曰不利有攸往小人长也言与衆小人居则无可往也又曰小人剥庐终不可用也言用小人则并所居亦丧也公何所往乎剥庐而已

十有一月己亥宋公佐卒于曲棘

宋元公谋纳公如晋至曲棘而卒曲棘宋地

十有二月齐侯取郛

取郛以居公也郛鲁邑

二十有六年

春王正月葬宋元公

三月公至自齐居于郛

齐侯为公取郛而公得居之是时公次阳州未尝至齐而曰自齐者见公之已去鲁也郛即鲁邑而不曰归鲁者见郛之不为鲁所取也至若告至曰至公未尝告庙而仍书曰至贾逵谓季为守臣当为公代祭如荀躒所云子姑归祭者恐意如无道未肯出此此必公在行所亦设主以告而史官则特以书之亦文例也况居郛则在所必书也【又范鞅亦云意如事君如在国如书公行告公至类要是党意如之言】

夏公围成

成者孟氏邑也齐侯将纳公命无受鲁货季氏使申丰女贾【二人家臣名】以币锦赂梁丘据【齐大夫】梁丘据谓齐侯曰羣臣不尽力于鲁君者非不能事君也宋元公为鲁君如晋卒于曲棘叔孙昭子求纳其君无疾而死不知天之弃鲁耶抑鲁君有罪于鬼神故及此也君盍卜焉可则师先济而君继之否则君何辱为齐侯乃使公子鉏帅师从公成大夫公孙朝者意如党也诈以成诱齐师曰成可取也既而季氏师已集复谢齐师曰取成非衆意请战及战则齐子渊捷苑何忌子囊带【三人齐大夫】与季氏野泄冉豎【二人季臣】遇第伤而不杀若无意克敌者故战于炊鼻【鲁地】而经不书不予齐以名也曰公围则齐无与也虽然公围之而鲁尚可以抗之也乎此其中有义焉

秋公会齐侯莒子邾子杞伯盟于鄆陵

谋纳公也然何益矣鄆陵地阨

公至自会居于郚

九月庚申楚子居卒

楚平王卒令尹子常以长庶子西贤欲立之子西不从乃立子壬为昭王

冬十月天王入于成周

尹氏召伯毛伯以王子朝奔楚

单子以子朝之立告晋刘子初攻王城师败之既而刘师亦败刘子以王出王宿于褚氏而进次于滑晋乃使知跖赵鞅帅师纳王召伯盈逐王子朝【始叛而今反正】朝乃同召氏之族毛伯得尹氏固奉周之典籍以奔楚召伯逆王及刘子单子盟遂入成周而盟于襄宫【襄王宫】晋师使成公般戍周而还不书晋师者尊王也且晋侯不在师也

二十有七年

春公如齐公至自齐居于郚

夏四月吴弑其君僚

据传吴子欲因楚丧而伐之使公子掩余公子烛庸帅师围潜楚使莠尹然工尹麇及左尹郤宛救之时季札聘上国未还也公子光乃伏甲于掘室而飡王王徒皆执铍夹道羞者不敢近光使勇士鱄设诸寘劔于鱼腹而进之抽劔刺王公子掩余奔徐烛庸奔鍾吾楚师曰彼乘丧

伐我我不可乘乱伐彼遂引还于是光自立是为阖庐按僚者夷昧子也吴子壽梦生四子长诸樊次余祭次夷昧次季札诸樊相约必兄弟传国以及季子夷昧死季子不受乃立夷昧子而光自以爲诸樊之子当立因弑之其不书吴光弑而书吴弑者非赏光也莒仆弑父晋荀偃栾书弑君未闻有可赏之罪而文十八年莒弑其君庶其成十八年晋弑其君州蒲史文详略如是矣盖既有策书则苟无首从皆可虚其名以按其实以中无彼此可推卸也胡氏谓诸樊之国递致不受则国宜之光而不宜予僚故称国以弑而不归狱于光则直赏光矣且授受大事于此不明则千秋篡案终古未决如宋宣让穆则穆之子冯反弑宣子诸樊让弟则诸樊之子又得弑僚似乎是非无一定者按礼运云大人世及以为礼世者传子及者传弟也盖三古授受祇有传子传弟二法而要之传弟之法终归传子舍传子而求他法则篡弑矣故夏周传子殷商传弟然传弟之窮即传子以继之如沃丁传弟太庚则太庚子小甲立小甲传弟雍己雍己传弟太戊则太戊子仲丁立其始于传弟而终于传子殷三十王一轍也【考世家惟太丁传弟外丙外丙传弟仲壬以仲壬无子立太丁之子太甲又沃甲祖丁则先立兄沃甲子後立弟祖丁子以祖丁子阳甲未能立也余二十八君皆立弟之子无异】盖父传子兄传弟顺也弟传兄之子则逆矣兄传弟父传子总一制也至叔父传侄则变制矣是以宋穆传目夷则变制后乱阖庐弑君僚则大逆不道有明景泰帝既正位号则自宜易储其不幸而复辟者偶然耳此礼不明遂有执吴光之说以惩忠肃者因举授受之大法以并正之【公羊谓光为夷昧子僚为夷昧庶兄则尤属杜撰无据】

楚杀其大夫郤宛

左尹郤宛直而和国人说之而为左师费无极右领鄢将师所恶值令尹子常贿而信谗无极告子常曰宛欲饮子酒告郤宛曰令尹欲就饮于子郤宛曰吾何足辱令尹令尹果来吾何以献之无极曰令尹好甲兵子出之吾择焉取五甲五兵令帷诸门及飧曰谓令尹曰吾几祸子子恶【郤宛氏】将为子不利甲在门矣且救潜之役乘吴乱可得志也子恶取赂焉曰乘乱不祥夫吴乘我丧我不可乘其乱乎令尹命鄢将师攻郤氏且蕪之宛自杀时国人弗肯蕪将师曰不蕪与郤氏同罪乃或取一编菅焉【一束草】或取一秉秆焉【一把禾】既而投之地终弗蕪将师遂假令尹命蕪之灭郤氏族及阳令终氏晋陈氏既而国人多谤言沈尹戌谓子常曰夫左尹【郤宛】与中廐尹【杨令终】莫知其罪而子杀之夫费无极楚之谗人也去朝吴【在十五年】出蔡侯朱【在二十一年】丧太子建杀连尹奢【见定四年传】平王之不聪迺无极也今杀三不辜以与大谤【郤氏阳氏晋陈氏】几及子矣遂杀费无极与鄢将师以说于国而谤乃止

秋晋士鞅宋乐祁犁卫北宫喜曹人邾人滕人会于扈会扈者令戌周且谋纳公也宋卫皆固请纳公独范鞅取货于季孙谓司城子梁【乐祁】与北宫贞子【北宫喜】曰季孙何罪而公伐之请囚请亡不许而君自出之公徒之怒实以启叔孙之心不然岂其伐人而脱甲执冰以游者【见前】今鲁君守齐三年无成而季氏甚得其民有备多矣然且有备而事君一如其在国此不可测也二子愿纳鲁君则鞅请从无成将死之衆惧而退是役也其令戌周则得矣而于纳鲁则未也此亦第书事而义自见者若大夫通序则书例如此并无他义

冬十月曹伯午卒

邾快来奔【快邾大夫名其事史阙】

公如齐公至自齐居于郚

公如齐齐侯请飧之子家子曰朝夕立于其朝又何飧焉其饮酒也及饮使宰夫主献兼请安【不亲献请安以大夫礼待公】子家子以公出时孟懿子阳虎伐郚将夺公归郚人请战子家子不可公乃遣子家子如晋公徒御之于且知【近郚地】败而退

二十有八年

春王三月葬曹悼公【六月而葬缓】

公虽去鲁而季孙犹遣使会葬范鞅所谓事君如在国者此其一也

公如晋次于乾侯【晋地】

公以齐敬衰始谋至晋然当待于境使之通之俟晋命来逆而然後入今遽次乾侯则倨矣子家谏不听晋乃辞曰天祸鲁国君淹恤在外君亦不使一个辱在寡人【谓不通一使】而即安于甥舅【齐异姓甥舅之国】其亦使逆君【亦使我来逆而後入】公乃复还境而後逆之【不能用子家故见辱】

夏四月丙戌郑伯宁卒【宁公作甯】

六月葬郑定公【三月而葬速】

秋七月癸巳滕子宁卒【宁公作甯】

冬葬滕悼公

二十有九年

春公至自乾侯居于郚齐侯使高张来唁公

公次乾侯不得见晋君仍返于郚而齐侯使人来唁夫唁者初失国而吊之之礼今公自晋归客寄如故而忽使来唁则诮公矣盖诮公之如晋而不纳同失国也然且来唁者称公主君则更以大夫比公矣故子家子曰齐卑我甚矣君母辱此故特书之以见齐之无礼者若其书公至则前公在齐鲁境上与齐侯遇返而居于郚尔时未尝至齐也经书自齐居于郚今直入晋

地不书自晋居于郛而书自乾侯以齐侯见公晋侯未见公也见则非齐而书齐不见则自晋而不书晋书唁恶齐书自又恶晋也至若国之辱则至此亦不能讳矣

公如晋次于乾侯

平子每岁买马具从者之衣屨而归之于乾侯公执归马者而卖其马遂不归马时卫侯献乘马名曰启服堕埴而死公将为之槨子家子曰从者病矣请以食之【欲使食马】始以帷裹而埋之

夏四月庚子叔诣卒【叔辄之子】

秋七月

冬十月郛溃

民逃其上曰溃郛人与公徒为二此必公徒虐郛人而致溃者公自此无居所矣

三十年

春王正月公在乾侯

史例国君出外则必书然但书出与至而并无出至之间又特书所在之例其或书所在必于元正以元正朝庙系国大事此礼未行则必书所在以示贬辱故诸公在晋非一次而经皆不书独于襄二十九年书公在楚盖书则责之不书则讳之也今忽书公在乾侯此固责公之不用谏不踈羣小以致戮没故连书三年以明戒而不知春秋者谓君凡所在必书所以存君则公自二十五年逊後历二十六七八九凡四年未尝一书所在也胡氏谓他年不书以郛犹在鲁封内无适而非其所也至是郛溃而寄乾侯非其所矣故必书则二十八年已去郛而亦不书何也盖春秋书在专为朝正阙而不书所以讳恶後儒不知春秋妄作书在以存君之说致有明靖难无赖造为建文出狩録每岁必记所在以为书法夫君死国亡何处朝正而诬妄如此此岂春秋乎

夏六月庚辰晋侯去疾卒

秋八月葬晋顷公【三月而葬速】

冬十有二月吴灭徐徐子章羽奔楚【羽公作禺】

吴子使徐人执掩余鍾吾人执烛庸【二父子皆王僚子二十七年奔其地者】二公子奔楚楚子大封土田而居之子西谏不听吴子乃执鍾吾子伐徐徐子章羽断其发攜其夫人以逆

吴师吴子唁而送之既而奔楚

三十有一年

春王正月公在乾侯

季孙意如会晋荀跖于适历【跖公谷作栌後同 适历晋地】

晋定公初立将以师伐意如而纳公范鞅曰若召季孙而不来则信不臣矣然後伐之如何晋侯召季孙范鞅私谓季孙曰子必来季孙乃会荀跖于适历经特书者善之也荀跖乃讯曰寡君使跖谓吾子何故出君有君不事周有常刑子其图之季孙练冠麻衣跣行伏而对曰事君臣之所不得也敢逃刑命君若以臣为有罪请囚于费以待君之察也唯君【此察而後死】若以先臣之故不絶季氏而赐之死若弗杀【或赐自尽而不杀】弗亡【不灭其族旧解误】君之惠也死且不朽【此死而不灭亡】若得从君而归则固臣之所愿也敢有异心【此竟不察不死而释之第迎之而归此是本意】

夏四月丁巳薛伯卒

晋侯使荀跖唁公于乾侯

晋侯初立未与公相见故先来唁公礼也季孙意如乃从知伯【即荀跖】如乾侯子家子曰君与之归【劝公许其归】一慙之不忍而终身慙乎【一慙谓慙与同归也终身慙不归也】公曰诺衆曰在一言矣君必逐之【从公不愿归者欲公逐季孙旧解误】荀跖以晋侯之命唁公且曰寡君使跖以君命讨于意如意如不敢逃死君其入也公曰君惠顾先君之好施及亡人将使归粪除宗祧以事君则不能见夫人已所能见夫人者有如河【夫人季孙也誓不相见正欲逐季孙之言也言不逐则不归也】荀跖掩耳而走曰寡君其罪之恐敢与知鲁国之难【言如此则纳公且有罪矣何敢再知逐季氏事】臣请复于寡君退而谓季孙君怒未怠子姑归祭【谓摄君祭事】子家子曰君以一乘入于鲁师季孙必与君归【既耻为晋纳晋使又去则借鲁师之迎而单骑自归此与左师展以乘马挟公与孟懿子阳虎伐郕刼公意同】公欲从之【则前誓非公意矣】衆从者胁公不得归【公之不归全在从者】予尝从经校公出始末齐景公为德不卒宋元公急于救公而无故路死卫灵泄泄晋顷君臣则凶恶之极昭公不幸而遭此不意晋定初立即怀救恤向使有臣左右之则乾侯之誓毅然为公逐叛臣有何难事而无如范鞅荀跖皆意如党也夫如是则就其迎纳慷慨而归亦所云一慙可忍者而羣小胁从终始不破公从此无归日矣经特书晋唁而不书纳公痛纳公之无成也若晋言则诚可嘉也

秋葬薛献公

冬黑肱以濫来奔【肱公作弓】

黑肱邾大夫不书邾史阙文也滥邾邑

十有二月辛亥朔日有食之

三十有二年

春王正月公在乾侯取阚

取阚事阙公羊曰阚者邾娄之邑也据定元年葬昭公季氏使役如阚则阚本鲁邑为羣公墓地所在公羊妄说也若杜氏谓公遣人诱阚而取之则亦无据且此时取阚何为乎

夏吴伐越【吴始用师于越也】

秋七月

冬仲孙何忌会晋韩不信齐高张宋仲几卫世叔申郑国参曹人莒人薛人杞人小邾人城成周【世叔谷作大叔莒人下公有邾娄人谷有邾人】

王使富辛与石张如晋城成周以子朝余党多在王城不敢归也晋魏舒韩不信如京师合诸侯之大夫于狄泉寻盟【不书者以公薨未告也】且令城成周于是计丈数揣高卑度厚薄仞沟洫物土方议远迩量事期计徒庸虑材用书餼□以令役于诸侯着为成命

十有二月己未公薨于乾侯

公疾徧赐大夫大夫皆不受子家子双琥一环一璧轻服受之大夫皆受至公薨子家子反赐于府人曰吾不敢逆君命也大夫皆反之

春秋毛氏传卷三十二

<经部,春秋类,春秋毛氏传>

卷三十三

钦定四库全书

春秋毛氏传卷三十三

翰林院检讨毛奇龄撰

定公【公名宋襄公子昭公弟也諡法安民大虑曰定】

元年

此时公未即位当书昭三十三年至六月即位始称元年此即书元年者要是即位後改称之以一年不可有二君也史例也

春王三月晋人执宋仲几于京师【左公谷皆以春王作一节三月以下又一节误矣今校经文本改正】

春王连三月为文此是旧例以正月二月无事至三月始有事而书之无有以春王二字为文三月又为文者三传本皆截春王二字以为定公不得正其始故无正月则自隐三年始凡春王二月春王三月有春王而无正月者皆宜截断二字另作节矣且其所云无正月者非谓春王下无正月二字谓全无春王正月四字也春秋十二公凡元年俱有正月以新君改元无事亦书故隐庄闵僖四公不书即位且无他事可书亦必空书春王正月四字而此独无有故曰无正月则定公此时尚未为君虽昭公之丧已至坏隤而公子宋未先入仍未知新君为谁而谓定公此时得空书正月乎当正始乎若谓定公为意如所立即不正始则宣公为东门襄仲所立独正始而书正月何也总之昭公死非其所定公立不以正在夫子直书其事而其义自在如必以此为狡狴则按之全经而无一验者与其不验而废其说何如按经而存其义之为得当也

前年冬晋士弥牟定城成周之令至是城之时士鞅新代魏舒蒞政已栽【版筑】矣宋仲几【宋大夫】不受功曰滕薛邠吾役也【属国为宋代役】薛宰曰宋为不道絶我小国于周而以我适楚故常从宋若复旧职我将承王官不暇而尚役于诸侯乎仲几曰三代非旧矣薛焉得有旧若云职则役宋其职也士弥牟曰晋之为政者新【言士鞅新代为政不知旧事】子姑受功俟吾归故府考之仲几曰子纵忘之山川鬼神忘之乎士弥牟怒谓韩简子曰薛徵于人宋徵于鬼宋罪大矣且已无辞而抑我以神诬我也乃执仲几以归既而归诸京师若其城役则三旬毕功而孟懿子亦与焉但据传晋先执仲几归晋而後归京师经不书归晋为晋讳也戍不受功则蒞政者得而执之胡氏谓当执以司寇不当自执则士弥牟定役令时但曰

授诸侯之帅未闻属司寇也祇不即归京师而先归晋则稍自专耳故讳之然讳之即予之矣

夏六月癸亥公之丧至自乾侯戊辰公即位

告于庙故书至即位者行即位礼也据传叔孙成子【昭子之子】迎公之丧于乾侯季孙感子家子从公之言欲以为卿使叔孙道已意子家子故不见叔孙且故误会哭之期易几而哭惟恐闻季孙语也叔孙乃使人传季孙命谓公衍公为【皆昭公子】实使羣臣不得事君【公子务人与公若谋去季氏即公为也】傥得公子宋【昭公弟】主社稷则羣臣之愿也若季氏之愿则愿与子从政立子家後【子家羈公孙归父之子也归父为季孙所逐子家羈绍之然未立为族故未有後子家归父之字】凡从公出而可以入者惟子是听对曰若立君则有卿士大夫与守龟在羈何敢知若从君者则貌而出者入可也【貌者礼也礼当从君出】寇而出者行可也【与季为寇者】若羈也则君知其出也而未知其入也羈将逃也【昭公不知入故当去】丧及坏隤公子宋先入从公者皆自坏隤反【出奔】子家子与焉然後公丧始告至而定公即位

按癸亥丧至越五日戊辰而後即位者王制天子十日而殡诸侯五日而殡自癸亥至戊辰刚五日当殡矣古凡即位必受命于殡行奠殡之礼如顾命三宿三咤授同拜命然後出而即位此诸侯殡礼与嗣君即位之礼俱如是者虽公丧自外来亦无异制祇嗣君遭丧即位原在死後奠殡之顷至踰年改元则于朝正後又再行即位之礼以示更始而今则丧既逾年元亦旋改则但以遭丧即位之礼兼改元即位之礼一如篡弑之後之不再行者此亦事势使然而并无义例于其间也考诸干支合诸礼制无容臆说矣乃公谷不知何据谓正棺两楹之间然後即位夫周制殡西阶无正棺两楹间者惟丧大记君薨之礼既小斂男女奉尸夷于堂将由大斂而迁之于西然此在未殡前之礼且小斂三日非五日于礼不合又杂记云诸侯行而死归至于庙门遂入适所殡夫谓适所殡者谓适西阶上旧所当殡之地也若两楹之间是殷人殡处非所殡矣及郑氏注礼依违公谷说谓外来之丧不忍其远不复以宾礼视之故变西阶为两楹此以调停议礼者然考之他书实未有此说也至胡氏谓周书顾命成王之崩在四月乙丑宰臣太保即于是日迎康王于南门之外入室宅忧为天下主今癸亥丧至戊辰即位意如所制不得以时定如此则公子宋先入在丧至坏隤之时此即四月乙丑迎康王以宅忧之先事也若康王即位则自乙丑至丁卯越三日作册自丁卯至癸酉越七日即位凡十日是天子十日而殡殡而即位诸侯五日而殡殡而即位其于礼未有过也今以迎入宅忧之日误认为新君即位之日书文干支历历可数犹谬戾至此况其他矣

秋七月癸巳葬我君昭公【在外归故八月乃葬】

季孙使役如阼【先公墓地】将沟焉【沟分之】荣驾鹜【鲁大夫】曰生不能事死又离之以自旌也【旌已不臣】乃止又问荣驾鹜曰吾欲为君諡使子孙知之对曰生弗能事死又恶之以自信也【申明已不臣】乃止遂葬公于墓道南孔子之为司寇也沟而合诸墓【沟合之】

九月大雩

立炀宫

炀公鲁先公伯禽之子考公之弟也其宫祧久矣今忽立者徐仲山日记云炀公继世兄弟相禅明立公子宋之为世法也若谓昭公出时季孙每祷于炀公故立之则先公多矣何取乎炀而祷之谬哉

冬十月陨霜杀菽

八月霜未降而杀物记异也

二年

春王正月

夏五月壬辰雉门及两观灾

雉门者公宫之南门两观者双阙也天子诸侯以台为门筑土为两台而架门其间谓之台门又谓之阙其又称观者以两阙悬象使人观之谓之观也灾者天火也胡氏袭公谷之说谓雉门为天子五门之一子家驹以设两观为僭天子礼制灾而复作春秋所以讥也按天子五门为臯库雉应路五名然诸侯亦有之故明堂位云库门天子之臯门雉门天子之应门言诸侯之库雉二门即是天子之臯应二门非谓此天子之门诸侯不宜有也诗太王迁岐立臯门应门家语卫庄公反国绎祭于库门之内史记鲁炀公筑茅阙门即雉门也檀弓鲁庄公之丧既葬而絰不入库门是以礼器云天子诸侯有台门此以高为贵者也郊特牲以台门为大夫僭诸侯未闻谓诸侯僭天子者公谷妄说也若子家驹说亦出自公羊一人之言他书并无见者子家驹即子家鞮亦公羊变文

秋楚人伐吴

吴人使舒鸠诱楚师而潜师于巢以伐之败楚囊瓦之师于豫章遂围巢克之获楚公子繁

冬十月新作雉门及两观

三年

春王正月公如晋至河乃复【公即位朝晋也】

二月辛卯邾子穿卒

夏四月

秋葬邾庄公

冬仲孙何忌及邾子盟于拔【公作枝 公即位修好也拔即邾鲁地】四年

春王二月癸巳陈侯吴卒

三月公会刘子晋侯宋公蔡侯卫侯陈子郑伯许男曹伯莒子邾子顿子胡子滕子薛伯杞伯小邾子齐国夏于召陵侵楚

晋人乘城成周之後假王命以伐楚故以刘子为之首刘子者传称刘文公王官伯也先是蔡侯有两裘一献于楚昭王唐成公有两肃爽马亦一献于昭王楚令尹囊瓦欲并得其一止两君于楚三年不使归必使并献而後归之故蔡侯如晋以其子元与大夫之子为质而请伐楚至是荀寅求货于蔡侯弗得乃辞蔡侯故合王人并十八国诸侯兴师而但书侵楚以其不终伐也

夏四月庚辰蔡公孙娃帅师灭沈以沈子嘉归杀之【娃公作归後同】

沈人不会召陵晋人于会後使蔡伐之遂灭沈而执杀其君其曰以归者归于会也杀之晋杀之也故下复书盟以终会之事

五月公及诸侯盟于臯鼬【公作浩油左与上文连作一节】

诸侯先会而後盟故前列诸国之目则後以诸侯二字总概之此书例也召陵之会诸侯谋伐楚而不终伐则但为盟以终之此诸侯二字即十八国也其不称刘子者以刘子有封爵虽王官实诸侯也胡氏不识例不读经兼不晓事于前蔡灭沈责蔡侯之杀沈子此盟诸侯责定公之为意如所立而求盟诸侯以固其位夫蔡侯能杀沈子定公能盟诸侯乎此不晓事也书例前不列诸国单书诸侯则为特会文十七年诸侯会于扈是也前既列诸国则後书诸侯即是前会僖五年公及列国会首止诸侯盟于首止是也今召陵有前会矣此不识例也经书公会刘子及列国侵楚既书灭沈又既书盟臯鼬然後书公至自会则此一书盟实并前会与後之至会而合书之而谓此会是公事是不读经也

?伯成卒于会【成公作戌】

六月葬陈惠公

许迁于容城【许每迁必书】

秋七月公至自会

刘卷卒

即刘文公【蚘】也以出会故书之

葬杞悼公

楚人围蔡【蔡灭沈故楚围之】

晋士鞅卫孔圉帅师伐鲜虞【圉公作圉】

葬刘文公

以同会故会葬书之

冬十有一月庚午蔡侯以吴子及楚人战于柏举楚师败绩楚囊瓦出奔郑【柏举公作柏莒楚地】

蔡侯以子元质晋而请伐楚召陵之会未及侵楚而楚师已围蔡矣然且晋第伐戎仍不救蔡蔡侯乃又出子乾并大夫之子为质于吴而请伐楚吴为之兴师蔡侯与唐侯从焉大败楚师于柏举囊瓦奔郑是此举蔡实为之故经特书蔡侯以之以者主在蔡也夫如是而召陵之会皐鼬之盟蔡之灭沈楚之围蔡通读之而吴晋楚蔡之是非可指掌矣故曰春秋非断烂也

庚辰吴入郢【公作楚左合上文为一节】

吴师从之五战而入郢先是郟敖之弑楚灵王杀太宰伯州犂而其孙鼫奔吴为吴太宰【事在昭元年楚子?卒左传以为昭二十七年郤宛党出奔误】及平王娶太子建妻少师费无极谮太子于王且言其傅伍奢共谋为叛王乃执伍奢且召其子尚并杀之而少子伍员奔吴与鼫同事阖庐谋伐楚至是楚子奔随吴伐随随不肯下申包胥者伍员友也当员奔时遇申包胥于途谓曰我必亡楚申包胥曰子亡之我必兴之至是奔秦依庭墙而哭七日秦哀公为之出师大败夫麇王【吴王弟】于沂又败于麇又败于公婿之谿楚子还郢

据传吴入郢时以班处宫谓以班次尊卑分处王与大夫之宫室盖言行所也故吴王子子山处令尹之宫夫麇王以王弟夺其宫居之是时楚鬬辛闻吴人之争宫也曰不让则不和不和则吴师必乱谓其争班次以夺宫室故其乱可乘也今公谷道听误以宫为室且误以室为妻谓吴不称子夷狄之也夷狄奈何君舍于君室大夫舍于大夫室盖妻楚王之母也而胡氏遂谓乘乱肆淫黜而不子夫楚王不知其有母与否然当其奔随时急取其妹季芊与畀我【二妹名】以出则在王之宫无不奔者未有舍其母而独取其妹者也若大夫之挈室以奔则传

有蓝尹亹涉其帑语国语亦云见蓝尹载其孥即有偶为俘虏如叶公子高之弟后臧从其母于吴及闻楚子复国即弃母而归叶公恶其不义见后臧未尝一正视之其严毖如此自公谷有妻楚王母挾平王墓之文而後之为小说家者扩其邪说依类增长无所不至此祸经之文不可不察也若夫前书吴子此又去子字者史文有详略并无义例此与成二年郑伐许昭十二年晋伐鲜虞例同公谷胡氏俱非也

五年

春王三月辛亥朔日有食之【三公作正】

夏归粟于蔡【策书未详】

蔡饥而我周之亦不可解杜氏曰蔡为楚所围故归之粟则围蔡在四年秋于此不合若公谷谓诸侯归之则此时蔡方从楚而诸侯肯归之乎且但书归而不书所归之国与人皆本国书例而此又妄言之故曰不晓事不识例此又其一也

於越入吴

於越越名也入吴者以吴在楚而乘间以入之也

六月丙申季孙意如卒

此无贬词贬不在此也

秋七月壬子叔孙不敢卒【舍之子成子也子州仇嗣为大夫是为武叔】冬晋士鞅帅师围鲜虞

六年

春王正月癸亥郑游速帅师灭许以许男斯归【速公作邈後同】许与郑为终始此乘楚败而灭之然灭其师仍不灭其国观哀元经书楚子陈侯随侯许男围蔡可见

二月公侵郑

此晋令也周儋翩【子朝党】因郑以作乱郑为之取胥靡故晋使鲁伐之是时取匡【郑邑】不书以归之晋也

公至自侵郑

夏季孙斯仲孙何忌如晋

据传季桓子如晋献郑俘并报晋君聘也礼凡君聘必夫人同之然祇遣一使报聘亦然今阳虎欲尊晋且欲诋辱三桓故特遣孟懿子报晋夫人之聘虽两使而实一礼故并书之当是时阳虎之执国政如此

秋晋人执宋行人乐祁犁

宋使乐祁犁如晋晋赵鞅逆而饮之酒于絰上范鞅恶其主赵氏也言于晋侯以不致使而私饮酒为罪遂执之然则晋卿之分国而争大如此

冬城中城【惧晋也中城见文九年】

季孙斯仲孙忌帅师围郛【何忌无何字阙文】

郛贰于齐季孟围之齐人乃归郛阳关阳虎居之

七年

春王正月

夏四月

秋齐侯郑伯盟于咸【卫地】

晋伯已衰诸侯始特盟于是齐侯贰晋与郑伯盟卫地而徵【召也】会于卫

齐人执卫行人北宫结以侵卫

卫侯闻齐召思欲叛晋诸大夫不可卫侯乃使北宫结如齐而私于齐侯曰阳执结以侵我使诸大夫知所畏遂执结侵卫

齐侯卫侯盟于沙【公作沙泽】

卫乃与齐盟而陰以结之

齐国夏帅师伐我西鄙

齐以叛晋故伐我阳虎御季桓子公歛处父御孟懿子【处父孟氏家臣】将宵入齐师齐设

伏以待之处父谓虎曰汝不知祸吾杀汝矣苦夷【季氏家臣】谓虎将陷二子【季孟】于难吾必杀虎虎惧御二子还得不败然则陪臣之互执国政各能相制又如此

九月大雩

冬十月

春秋毛氏传卷三十三

卷三十四

钦定四库全书

春秋毛氏传卷三十四

翰林院检讨毛奇龄撰

八年

春王正月公侵齐

公侵齐门于阳州报前年之伐也

公至自侵齐

二月公侵齐

前侵未得志故又侵之

三月公至自侵齐

曹伯露卒

夏齐国夏帅师伐我西鄙

齐伐我西鄙晋士鞅赵鞅荀寅救之未至境即还

公会晋师于瓦

公乃迎晋师会之其不言救我者以未尝救我也一若不知其会之者之何事也此文例也瓦卫地

公至自瓦

秋七月戊辰陈侯柳卒

晋士鞅帅师侵郑遂侵卫【士公作赵】

晋师自瓦还将欲就卫侯而盟于鄆泽赵鞅曰羣臣谁敢盟卫君者盖恶其叛晋而思辱之也涉佗成何【二晋大夫名】曰我能盟之礼凡诸侯盟必使小国执牛耳而大国涖之盖司割耳取血之事皆卑者职也今卫人请晋执牛耳以为君与大夫?当大夫执之成何不肯曰卫吾温原也焉得视诸侯及?涉佗援卫侯之手而血及于碗卫侯怒王孙贾曰盟以为礼也不以礼叛之已耳遂叛晋不盟晋人请改盟不许士鞅乃会成桓公谓郑曾伐周阙外当报之因邀之同侵郑虫牢而遂及于卫盖欲假王师以讨郑卫之贰于晋也经不书不予其假也

葬曹靖公

九月葬陈怀公

季孙斯仲孙何忌帅师侵卫

晋又令我伐卫

冬卫侯郑伯盟于曲濮【卫地】

重结之

从祀先公

从顺也先公闵公僖公也文二年文公跻僖公于闵公之上是为逆祀今定公刊前之失因而顺之据传季寤【桓子弟】公鉏极【季族】公山不狃【费宰】皆不得志于季氏与叔孙辄叔孙志五人同因阳虎欲去三桓将以季寤代季氏叔孙辄代叔孙氏阳虎代孟氏冬十月顺祀先公而祈焉遂于僖庙审谛昭穆之礼而改正之以明已之去三桓者欲强公室为顺非为逆也但叛臣变制不书所自此必假定公之命而为之者盖宗庙大典未有君大夫不知而一二叛臣可陰相移易者也特予考全经似有未尝移易者哀三年书桓宫僖宫灾夫祧庙昭穆与太庙同桓庄闵僖则必闵从桓而僖从庄此顺祀也若桓庄僖闵则将僖从桓而闵从庄便为逆祀今桓宫灾而即及僖宫则僖从桓矣此逆祀矣哀尚逆祀而谓定年已顺祀于理未通既而思之传书司铎宫火火踰公宫然後桓宫僖宫灾则火本踰越桓宫在昭踰而及僖宫之穆相对踰火事未可知胡氏据蜀人冯山之说谓昭公之主未得入庙至阳虎始入之如昭公葬阼在墓道南至孔子为司寇始沟合兆域一类盖欲暴季孙之恶而为之者其说未尝不可听特其所谓先公者指昭公乎指羣公乎昭公不得称先公如锡桓公命吉禘庄公作僖公主禘祀襄公凡後君之于前君经传有专称也且从祀者配飨之谓也国有大祭得祔主而配飨之谓之从祀如盘庚兹予大享于先王尔祖其从与享之岂有昭公而相从配食如大享之祭功臣者若先公为羣公则从祀为谁不明指何公从祀而徒言从祀谁则从之此不特春秋无是文即他书亦无是文也况定立已八年岂有太庙无祧庙者夫子为司寇但沟墓道未尝

无昭墓也经既书葬我君昭公则卒哭祔庙皆葬时一时之事春秋恒例但书葬而诸礼皆具是昭公入庙即在昭公书葬时已有明文冯山妄说也【张南士曰古人以顺而逆者曰从而逆故从作顺解】

盗窃宝玉大弓

盗者阳虎也宝玉夏后氏之璜大弓封父之繁弱成王分鲁公之物也经凡书盗皆不着名氏以为此盗焉耳但阳虎以家臣而谋弑季氏此国家大变经反不书祇详书此二物之失得以其事似失轻重惟徐仲山日记曰蒲圃之驾阳关之叛全无厚系万万不得同阳州之一逊独此世守重器有国兴丧皆视之诚所谓改玉改步得步得玉者故夫子三致意焉此真善于言春秋者盖亦以二物失得即叛臣成败一始终也据传阳虎以壬辰日将享季氏于蒲圃而杀之乃约都邑之车以癸巳日至成邑宰公斂处父告孟孙曰季氏戒都车何故孟孙曰吾弗闻处父曰然则乱也盍备之与孟孙以壬辰为期至期阳虎前驱林楚御桓子虞人以铍盾夹之阳越【虎从弟】殿将如蒲圃桓子乘间语林楚盖欲其脱已于难而林楚难之曰阳虎为政鲁国服焉徒死而已何益于主桓子曰能以我适孟氏乎楚许之时孟氏选圉人之壮者三百人驾言筑室于门外楚乃怒其马骋之入孟氏门阳越射楚不中筑者乃阖门而自门间射阳越杀之阳虎刼公与叔孙武叔以伐孟氏公斂处父帅成人自上东门入与阳氏战于南门之外弗胜又战于棘下阳氏败脱甲如公宫取宝玉大弓以出舍于五父之衢寝而为食公斂处父请追之孟孙弗许阳虎乃入讙阳关以叛

九年

春王正月

夏四月戊申郑伯蛰卒【蛰公作蛰】

得宝玉大弓

阳虎归宝玉大弓于鲁鲁伐阳关阳虎使焚莱门犯之而出奔齐请伐鲁齐侯将许之鲍文子不可去而奔晋适赵氏主赵简子焉

六月葬郑献公

秋齐侯卫侯次于五氏

齐伐晋夷仪次于五氏晋师千乘在中牟卫侯亦如五氏以助之其不书伐晋者以不终伐也五氏晋地

秦伯卒

不书名见前

冬葬秦哀公

十年

春王三月及齐平

齐伐我以晋故今诸侯皆叛晋可以平矣

夏公会齐侯于夹谷公至自夹谷

前既相平此复为会以固之但两国离会必有争上于其间且侵伐甫息怀猜不少故齐用犁弥之计使莱人以兵劫公一如庄十三年柯之盟鲁人用曹沫以劫齐桓者此亦春秋战国间习事也但其用莱人者莱为东夷禹贡所称莱夷以齐曾灭莱俘之故使之乘间行劫以出不意惟恐齐备兵则鲁亦得以备兵相抵持也乃孔子相定公赴会即先具兵士一见莱人遽奉公退避而使士以兵击之然後曰两君合好而使裔夷之俘得援兵以乱其间非所以令诸侯也夫夷不乱华俘不干盟兵不偪好於神为不祥於人为失礼君必不然齐侯闻而遽辟之及盟齐人加于载书曰齐师出境而不以甲车三百乘从我者有如此盟盖责我以小事大之礼也惟时齐晋迭霸定贡赋之制已久明知非王政而急难更易必此时一相激则重构怨矣孔子乃不使鲁公泄盟令大夫兹无还揖而对曰而不反我汶阳之田而以吾共命者亦如之以是时齐多侵鲁田且阳虎以郛讙奔献鲁地愈削故使反侵地量地之所出足以当三百乘之赋则亦如所盟盖其时中之圣因时酌宜但就事裁处而不折之以王制一如猎较之随俗然既不激而又不辱所云反经行权者如此故经但书会而不书盟一则公不亲盟一则谓盟非我意夫亦不得已而为之不告可也若齐欲飧公孔子又辞之者以盟飧非恒礼非劳则谢如襄王飧晋文于践土则为劳卑宋公飧晋侯于楚丘则为谢尊其余盟会後飧列国大夫皆是相劳之礼今齐具飧礼非劳非谢酬酢之间必多可议不如不飧以全好合故夫子曰夫飧以昭德也不昭不如其已也诚以尊卑之间必有甚难讨求者在也此又夫子之经也

晋赵鞅帅师围卫

围卫报五氏之役也然卫终不成因曰卫之叛晋由涉佗成何【见八年赵鞅侵卫传】於是执涉佗以求成于卫卫复不许晋乃杀涉佗而成何奔燕前卫侯次五氏以伐晋而经不书伐以不终伐也今乃执已大夫杀已大夫以求成而终不得成是尚为能终伐乎然公然书围卫者曰前不书伐为卫讳伐也曰亦惟卫不伐耳今之书围者不为晋讳围也曾有围人国而执已大夫杀已大夫以求成者乎此文例也

齐人来归郛讙龟陰田【谷田上有之子】

前六年鄆人叛而以地献齐季孙孟孙以围鄆而齐人归之至八年阳虎奔齐则鄆讙诸地皆齐有矣故夫子邀其反地而今又归之杜氏曰三邑皆在汶水北故又称汶阳田夹谷之会所云反我汶阳田以此

叔孙州仇仲孙何忌帅师围郕

是时鲁政下移陪臣执国命阳虎公山不狃之徒相继以起而郕宰侯犯即据郕以叛郕者叔孙氏邑也

秋叔孙州仇仲孙何忌帅师围郕

初围不克故又围之郕工师驷赤【工师官驷赤名】以计出侯犯而纳鲁师侯犯遂以郕奔齐齐人复致郕于鲁而修好焉

宋乐大心出奔曹

前六年宋使乐祁于晋而晋人执之归而死于路宋公使右师乐大心迎乐祁尸而大心僞疾不肯行乐祁之子濶告大心将作乱于是宋逐之而大心奔曹

宋公子地出奔陈【公地作池後同】

公子地者宋公之弟也有白马四公朱其尾鬣而予向魋【司马桓魋】地怒扶魋夺之魋惧将走公泣之目肿地母弟辰曰子为君礼不过出境君必止子地乃出奔而公不之止

冬齐侯卫侯郑游速会于安甫【公作鞶地阙】

叔孙州仇如齐

谢致郕也

宋公之弟辰暨仲佗石彊出奔陈【暨字下公谷有宋字】

宋公弟辰曰吾劝兄出奔而公不止是吾迂【欺也】兄也吾以国人出君谁与处遂亦奔陈仲佗仲几子石彊褚师段子皆宋卿其皆奔者左氏曰宠向魋故也

十有一年

春宋公之弟辰及仲佗石彊公子地自陈入于萧以叛【萧宋邑】

夏四月

秋乐大心自曹入于萧

大心奔曹在前年今入萧从叛也

冬及郑平叔还如郑洩盟【叔还叔诣子】

鲁始叛晋也

十有二年

春薛伯定卒

夏葬薛襄公

叔孙州仇帅师堕郕

传曰都城过百雉国之灾也私家之强皆恃大都以为险而其既也都邑大夫即得起而操私家之柄所谓政逮大夫陪臣执国者封建流弊势必致此故三家盛时皆有大都名城叔孙以郕季孙以费孟孙以成而既则侯犯以郕叛南蒯公山弗狃以费叛公歛处父据成而不肯下是以当时执政先堕三都以暂解尾大之患所云堕者谓毁其城坏其郭夷其阨塞使失所险阻而无可凭也比之治痼凿痼剔幕刳截外症以固我内卫然而元气从此亦稍伤矣

卫公孟彊帅师伐曹【策书不详】

季孙斯仲孙何忌帅师堕费

仲由为季氏宰谋堕三都【郕费成也】叔孙已堕郕矣季氏将堕费费宰公山不狃叔孙辄师费人袭鲁公乃入季氏宫登武子之台费人攻之弗克将及台下时孔子为司寇命大夫申句须乐颀下伐之费人走国人追之败诸姑蔑不狃与辄奔齐遂堕费

秋大雩

冬十月癸亥公会齐侯盟于黄【齐公作晋误】

结叛晋也

十有一月丙寅朔日有食之

公至自黄

十有二月公围成

至是公自堕成成宰公斂处父曰成者鲁鄙之保障也若堕成齐人必至北门矣且谓孟孙曰无成是无孟氏也我将守之因不克而返按三都惟郕费为大郕费既堕则堕成最易且公亲围之而反不克非不能克也郕费叛而成独不叛不必克也堕郕费所以强叔孙季孙堕成适以弱孟孙不当克也郕费于全鲁形势不甚相关而成在北门齐人窥我便及之故前此昭二十六年公出居郕齐侯假纳公之说师即围成经书公围成是也是为孟氏事小为鲁事大不可克也况既已堕二则一亦可以已矣胡氏谓孔子为司寇而不能堕成以未摄相也然则摄相又不堕何与

公至自围成

十有三年

春齐侯卫侯次于垂葭

谋伐晋也谋伐而不书伐则以其不终伐也然晋自此亦多事矣

夏筑蛇渊囿

大蒐于比蒲

卫公孟彊帅师伐曹【策书不详】

秋晋赵鞅入于晋阳以叛

齐卫之师前既次五氏今又次垂葭而赵鞅患之将迁卫贡五百家之在邯郸者而归之晋阳以绝卫亲【卫贡五百家是服晋时赂赵鞅者左氏谓是十年围卫时所贡按之并无此事】邯郸大夫赵午恶齐卫之睦谓卫惟恃齐不如先侵齐而然後迁民则邯郸之受迁有名鞅怒其违已杀午午之亲荀寅与士吉射伐赵氏之宫赵鞅奔晋阳晋人围之据传则赵鞅以避难奔晋阳而经直书叛何也夫晋阳者晋之邑也鞅据为己邑而欲迁民以实之既又视若敌国而直据而抗本国之师则是晋阳非晋有也晋阳非晋有叛也赵氏自此欲分晋矣

冬荀寅士吉射入于朝歌以叛【荀寅下公有及字】

韩魏党赵氏而恶范氏【即士氏】与中行氏【即荀寅氏】故韩简子【起之孙】魏襄子【舒之孙】使荀文子【荀跖即知氏】言于晋侯谓晋制始祸者死今范氏中行氏实始祸

而独逐鞅刑不均矣乃伐二氏不克而二子奔卫朝歌卫地不言奔而言入者以引兵而直入之也此韩魏赵与知范中行党灭之渐也

晋赵鞅归于晋

韩魏复以赵氏请乃归之盟于公宫夫晋阳即晋也而书归于晋一似晋阳为敌国者曰此以晋阳予赵也文例也

薛弑其君比【策书未详】

十有四年

春卫公叔戌来奔卫赵阳出奔宋【卫公谷作晋】

公叔戌者公叔文子之子也卫侯忌其富且为夫人南子所恶因来奔赵阳者戌之党也

二月辛巳楚公子结陈公孙佗人帅师灭顿以顿子牂归【二公作三孙公作子牂公作牂】

顿与胡楚属国也昭三年楚为申之会伐吴执齐庆封皆有顿子胡子至五年帅顿子伐吴二十三年吴败顿胡沈蔡陈许六国之师亦以顿子胡子为首是顿子胡子世属楚者至定四年晋定公纠十八国诸侯为召陵之会将以伐楚顿子胡子始与陈蔡滕许并归于晋乃楚未得伐而顿与胡则为所误矣今年灭顿十五年灭胡而晋阳之甲能集方城之下否春秋书顿灭又书胡灭益伤晋伯之流毒远也

夏卫北宫结来奔

公叔戌之党也

五月於越败吴于檣李吴子光卒【檣作醉左公谷皆以吴子光卒别作一节】吴伐越越子句践御之灵姑浮【越大夫】以戈击阖庐斩其将指【足大指】而取其屨师败而卒其子夫差使人立于庭苟出入必曰夫差而忘越王之杀而父乎曰不敢忘三年乃报越

公会齐侯卫侯于牵

谋救范中行氏也时晋人围朝歌故谋救之

公至自会

秋齐侯宋公会于洮【谋范氏也】

天子使石尚来归脤

石尚者石氏而尚名天子之士也例元士中士皆称名脤者祭肉盛以蜃器故名脤周礼大宗伯以脤膋之礼亲兄弟之国盖赐同姓诸侯者本定礼而间行故行必书之旧例谓恒礼不书书即于礼有可议故何休云鲁不助祭不当归脤此强以非礼释例例不若是也

卫世子蒯聩出奔宋

卫侯为夫人南子召宋朝【以南子宋女子朝宋公子故召会之然非礼矣】太子蒯聩献孟邑于齐过宋听宋人谄词而耻之谓戏阳速曰从我朝少君我顾乃杀之既而三顾速不进夫人见其色啼而走曰蒯聩杀我公执其手以登台太子奔宋

卫公孟彊出奔郑

蒯聩党也

宋公之弟辰自萧来奔

不知何故辰独来奔事见十年十一年

大蒐于比蒲

邾子来会公

杜氏曰来会者会公于比蒲也以不用朝礼故祇书会按庄二十三年公及齐侯遇于谷萧叔朝公彼亦就会见公者然彼行朝礼故曰朝与此不同

城莒父及霄

公以叛晋兼谋范氏故惧而城之此年无冬字阙文

十有五年

春王正月

邾子来朝

麋鼠食郊牛牛死改卜牛

二月辛丑楚子灭胡以胡子豹归

见前年灭顿传

夏五月辛亥郊

周五月为夏三月孟春祈谷之祭不得过分三月则过分矣故杜氏曰过也非礼也

壬申公薨于高寝

高寝宫名

郑罕達帅师伐宋【罕公作轩误策书未详】

据传郑罕達败宋师于老丘杜氏曰罕達子齧之子老丘宋地而其事则云宋公子地奔郑郑人为之伐宋欲取地以处之事见哀十三年按宋公子地事始于定十年经书宋公子地出奔陈然奔陈非奔郑也即其後公子辰仲佗石彊又奔陈而自陈入萧然亦入萧非入郑也且哀十二年宋向巢伐郑传祇云平元之族自萧奔郑向巢伐郑杀元公之孙则奔郑虽可据然而公子地公子辰皆元公之子景公之弟非元公孙且与平族无涉似乎两事不相合者但春秋策书详于晋楚而略于他国此必公子地入萧之後公子辰来奔之前别有奔郑文而传略之也又必公子地奔郑时或携其子并奔而向巢杀之故曰元公之孙策书又阙之也

齐侯卫侯次于渠蔭【公作蘧蔭】

齐卫救朝歌而次以待之策书误

邾子来奔丧

诸侯无奔丧者非礼也说见前

秋七月壬申妣氏卒

定妣是定公之妾而妣姓者其为哀母与否传无明文然即是哀母此时遭丧即位而先君未葬子不成君其母不当以夫人赴于列国因不行赴告无夫人小君之称礼也

八月庚辰朔日有食之

九月滕子来会葬

诸侯无会葬者非礼也说见前

丁巳葬我君定公雨不克葬戊午日下昃乃克葬此与宣八年葬敬嬴礼同

辛巳葬定姒【杜氏谓史失书月按辛巳是十月三日】

定姒卒距公薨六十日今姒葬辛巳距公葬丁巳裁二十五日夫人不必盈五月也若曾子问谓葬先轻後重则宜先姒葬矣此战国言礼与春秋刺谬处而胡氏翻引为证岂辛巳先于丁巳耶不可解

冬城漆

襄二十一年邾庶其以漆闾丘来奔今城之

春秋毛氏传卷三十四

<经部,春秋类,春秋毛氏传>

卷三十五

钦定四库全书

春秋毛氏传卷三十五

翰林院检讨毛奇龄撰

哀公【公名蒋定公子在位二十七年至十四年春而春秋终焉諡法恭仁短折曰哀】

元年

春王正月公即位

楚子陈侯随侯许男围蔡

定四年蔡侯请晋师伐楚盟于召陵既而以吴师入楚败于柏举楚怨深矣至是楚围蔡筑垒而屯之以示必拔蔡人出降楚人使迁国疆于江汝之间而还若随许皆楚属国僖二十年楚人伐随见于经柏举之役楚子奔随见于传许则定六年为郑所灭今见经以不絕其国也

麋鼠食郊牛改卜牛夏四月辛巳郊【谷郊牛下有角字】

祈谷之祭在春三月建寅之月传所云启蛰而郊是也若夏四月为建卯之月其在上辛犹可至中辛恐涉分气下辛则春分矣杜氏概以四月为过则焉知不在上旬之辛说固非是若谷梁竟以三月建寅之祭误作正月建子之祭则以祈谷为报本在春秋十二公二百四十年间并无此祭且又不晓卜日之法误以一句一卜作一月一卜谓上辛是正月之辛中辛是二月之辛下辛是三月之辛不特祈谷之祭不得过分世定无三月祭圜丘者此皆汉儒明堂位成王赐鲁重祭孔子鲁之郊禘非礼一叹沿误至今而谷梁以秦汉间人并造为法制以附会之宜乎周礼之无可考也

秋齐侯卫侯伐晋

齐卫之伐晋久矣初次五氏既次垂葭皆兴师侵地而不终伐及赵鞅杀邯郸午後午之子赵稷据邯郸以叛晋侯卫侯又为之助邯郸以围五鹿至是则以救范中行氏于朝歌重为兴师而鲁亦与焉齐侯乃与卫侯先会乾侯然後鲁师及齐师卫孔圉鲜虞人同时伐晋取棘蒲鲁师不书者杜氏曰非公命也

冬仲孙何忌帅师伐邾【策书未详】

定公之薨邾子来奔丧至改元而遽伐之何耶然且不惟伐之又从而取其田不惟取田更与之盟之而要其必得此何说也故曰春秋虽鲁史实晋楚史也鲁史至定哀之间尚多未备而晋楚未有阙也孟子曰晋之乘楚之檇机鲁之春秋一也然则三史并行在战国犹知之矣

二年

春王二月季孙斯叔孙州仇仲孙何忌帅师伐邾取漵东田及沂西田【策书未详】

襄十九年经书取邾田自漵水谓邾还所侵鲁地也则漵田原是鲁地但其地以漵为界今田在漵东则踰漵矣要是鲁新取邾地非旧漵田耳

癸巳叔孙州仇仲孙何忌及邾子盟于句绎【策书未详】三家同伐邾同取邾田而盟无季孙服?曰季先归也谷梁曰二家得田季不得田也胡氏曰昭公伐意如而叔孙救之阳虎囚桓子而孟孙氏又救之季德二家因以田归二家也譬之说梦梦尚未明而进说者缕缕焉岂非艾子耶

夏四月丙子卫侯元卒

滕子来朝

晋赵鞅帅师纳卫世子蒯聩于戚

定十四年卫蒯聩既奔宋矣然奔宋非奔晋也晋赵鞅怨卫灵之助范中行而救朝歌入棘蒲也未有以报之闻卫人立蒯聩之子辄而蒯聩在外思藉纳君为伐丧之举因用阳虎计构世子而强纳之乘初丧未葬宵夜兼行使太子袒纁八人衰絰诈为卫之迎太子者入戚而哭启其门而入遂据之是役也人第知世子大逆称兵犯丧而不知赵鞅实为之故经直书曰赵鞅帅师盖深恶夫赵鞅之帅师也

据公羊谓戚者卫之邑也何以不言入于卫父有子子不得有父也谓父得有子而废其子子不得有父之所有而据其地也则聩之入戚信有罪矣若谷梁纳者内弗受也何以弗受辄不受之父而受之王父若信父而辞王父则是不得尊王父也似乎尊王父而拒父辄可无罪而又不然者则以辄未尝受王父命也按蒯聩奔後灵公欲立公子郢而郢辞之及卒夫人又假以公命立郢郢又辞之乃曰有亡人之子辄在然後立辄则是公所命者郢也非辄也辄所受命者夫人也非公也非公则所云受之王父者有间矣谷梁非是也说见後三年围戚传

秋八月甲戌晋赵鞅帅师及郑罕達帅师战于铁郑师败绩

范氏在朝歌而齐人输粟郑罕達与驷弘帅师送之赵鞅以入戚之役遇于铁铁者戚城南邑也是时晋车少鞅欲退阳虎请以旆先郑师之车而陈之郑师从後见吾车不辨其寡多也而见吾貌必惧惧则败之必矣鞅卜战龟焦鞅乃祷于神而誓于衆卫太子初惧自投于车下既而祷于皇祖文王烈祖康叔文祖襄公昭考灵公【此四字出国语然按檀弓公叔文子之子告灵公曰将葬矣请易其名即左传楚共王谓将从先君于祔庙请諡灵若厉则以既葬始作主定諡以便祔庙今卫侯未葬不知何以得称灵公皆不可解】郑人击赵鞅中肩跽于车中获其纛旗卫太子救之以戈既而郑师败获齐粟千车以去

冬十月葬卫灵公【七月而葬缓以蒯聩乱故也】

十有一月蔡迁于州来蔡杀其大夫公子驷

蔡畏楚而请迁于吴公子驷不可至是吴以师迎之蔡侯乃告大夫杀公子驷哭而迁墓【传似迁其墓杜氏注似哭于墓而迁不同】

三年

春齐国夏卫石曼姑帅师围戚

前年齐输粟范氏为赵鞅入戚之师所败故此又同卫围戚以报之总是藉他国之争以释己私怨故赵鞅帅师与国夏帅师同一书法亦同一义例无低昂也特在春秋战国间多有是国夏而非赵鞅者蒯聩之争国其在于父为不孝其在于子为不慈不孝不慈赵鞅实主之其罪固不待言矣若国夏之师则公羊曰伯讨也伯讨奈何辄者蒯聩之子也然则曷为不立蒯聩而立辄蒯聩为无道灵公逐蒯聩而立辄矣辄可立则蒯聩可拒以王父命辞父命不以父命辞王父命是父之得行乎子也【王父亦父之父也】以王事辞家事【立君是家事】不以家事辞王事【让父是家事】是上之得行乎下也父命行于子君命行于下夫然後方伯之讨得行于世当是时卫人执是以立说而人多信之即圣门高贤如子贡子路辈亦以辄为是而或仕之或依之且有以夫子为卫君为问者以为夫子必与辄也殊不知事求其实虽名也而实主之必王父有命而可辞父命乃夷考当日灵公两命郢南子一命郢皆非辄也辄之得立出于子郢之一言而成于南子遭丧之一刻故夫子欲正名正欲核其受命不受命之实以正其辞王父与辞父之名此一审辨而了然者若晋江熙谓灵公不废蒯聩若废则不当称世子矣则灵公明曰余无子未尝仍以为世子也且不废而何以命郢特立辄之命灵公无有则围戚拒父其师出之名所当正耳详见予论语稽求篇

夏四月甲午地震

五月辛卯桓宫僖宫灾

桓宫僖宫者桓公僖公之宫也桓僖已祧而尚有宫者迁庙也迁庙而称宫以周公称太庙鲁

公称世室羣公则称宫也杜氏不知庙制谓桓僖亲尽而庙未毁而服?遂云季氏出桓公又为僖公所立故不毁其庙夫桓僖亲未尽时其庙即五庙之庙也亲尽则但祧其主而并不毁庙盖七庙五庙并无毁之之例乃公羊则云毁而复立其云毁固不通若云复立则春秋立庙必书如立武宫立炀宫类未有新立一庙而经不书者且从祀先公有闵公矣祇立桓僖庙则安得有闵且未闻季氏又为闵所立也盖古有迁庙在五庙七庙之外曾子问古者行师与巡狩必载迁庙之主以行以七庙不可使主虚也则七庙祀亲主迁庙祀祧主七庙不可虚主迁庙可虚主明见礼文其又名公宫以一庙而合羣公之宫故策书曰司铎宫火火踰公宫桓僖灾司铎火者公所居之宫火也火踰公宫者踰于羣公之宫也惟踰羣公之宫故桓僖两宫受灾则受灾者祇桓僖而羣公皆有宫桓僖仅羣宫之二耳故文王世子云庶子以公族之无事者守公宫正指此羣公之宫也即策书所云公宫也适子守太庙是祖庙诸父守贵宫贵室是世室诸子守下宫下室是亲庙截然不同若胡氏谓五七庙外不当问功德有无以立庙则又指世室不祧之庙为言岂桓僖又在不祧庙乎且功德立庙自古有之殷之三宗周之文武未尝非庙制也祇是时孔子在陈闻火曰其桓僖乎何以必知桓僖此必以桓僖独有庙为非礼之故则徐仲山日记云鲁兄弟入庙在春秋惟桓僖二公是时定公之主尚未禘祀入庙也乃以炀公为考公之弟先立炀宫以为弟继兄之证炀者火也火当及二弟庙矣故夫子知之此则善解春秋者必如是不惟两宫灾可验即立炀宫亦愈可验耳【炀宫弟庙桓僖宫亦弟庙炀宫之立专为定公故定将祔庙而灾已见之此超于京房刘向诸公所言】

是时南宫敬叔命周人掌周典籍者出周书子服景伯命宰人出礼书百官官备府库慎守蒙茸公屋【以濡物冒覆之】自太庙始季桓子御公立于象魏之外

季孙斯叔孙州仇帅师城启阳【启公作开备晋也】

宋乐髡帅师伐曹【策书未详】

秋七月丙子季孙斯卒

季桓子卒立子肥为季康子

蔡人放其大夫公孙猎于吴【策书未详】

猎为公子驷之子驷前年以蔡迁吴时见杀今又放其子放者罪遣之名

冬十月癸卯秦伯卒

叔孙州仇仲孙何忌帅师围邾【策书未详】

四年

春王二月庚戌盜杀蔡侯申【二公作三杀公谷作弑】

蔡昭侯将如吴诸大夫恐其又迁也公孙翩在後射之避入于道傍之家而卒翩遂以两矢守门蔡大夫文之锴後至衆如墙而进锴遂杀翩逐其党公孙辰而杀公孙姓公孙霍凡死非其所与见杀而不能啗指其所杀之人则槩书曰盜此死非其所而大夫党衆翩与辰霍又不审果死谁手则盜而已至若书名书爵书国杀则皆无义例说见前

蔡公孙辰出奔吴

葬秦惠公

宋人执小邾子【策书未详】

夏蔡杀其大夫公孙姓公孙霍

晋人执戎蛮子赤归于楚【蛮公作曼】

楚单浮余围蛮氏蛮氏潰蛮子赤奔晋之陰地楚司马畎起丰析二邑之卒并狄戎以临上雒且谓陰地之大夫士蔑曰晋楚有盟好恶同之今保戎蛮是废盟也请大开武关道以听师命赵鞅惧乃集九州之戎驾言将分田以予戎蛮而诱致之遂执蛮子赤与其五大夫以畀楚师于三户【楚地】晋之卑于事楚且不憚委曲行诈以求说于楚乃如此

城西郛【备晋也】

六月辛丑亳社灾【亳公作蒲 亳社有屋故能灾】

秋八月甲寅滕子结卒

冬十有二月葬蔡昭公

葬滕顷公

五年

春城毗【公作比又作茈】

夏齐侯伐宋【策书未详】

晋赵鞅帅师伐卫

晋范中行氏由朝歌奔邯郸而赵鞅围之齐陈乞弦施卫甯跪救邯郸不得荀寅奔鲜虞赵稷奔临齐国夏乃伐晋取邢任栾鄆逆時陰人孟壺口八邑而纳荀寅于柏人至是鞅又围柏人荀寅士吉射奔齐鞅乃舍之而伐卫遂围中牟

秋九月癸酉齐侯杵臼卒【杵公作处】

齐景公娶燕姬生适子早卒诸子皆未立独嬖鬻婁之子荼而未有命也及疾使国惠子【夏】高昭子【张】立荼而寘羣公子于莱至是公卒公子嘉公子驹公子黔奔卫公子鉏公子阳生来奔

冬叔孙还如齐【会葬也】

闰月葬齐景公【葬速】

礼丧月数闰【如闰月卒则从闰月数起】葬月不数闰【当除闰数月】今既闰月葬则必除闰数之已滿五月而後可以葬按公卒在九月而是冬即葬母论闰在何月即十二月闰而除闰计之亦止得四月况是年长历闰在十一月则三月矣三月而葬不其速乎若公羊谓闰不书此何以书丧以闰数也丧曷为以闰数丧数略也夫丧不数闰而此独曰数闰已不可解至推其说则曰丧服数闰夫丧服亦不数闰又推之则曰丧服期三年不数闰而大功以下数闰为数略也于是汉晋诸儒皆定为期三年不数闰功總数闰之说以为律令夫功總计月期三年计年然其为时日则一也以年计者不使阙时日而谓计月者可独阙之固已不通且丧数未尝略杀少也服数既少而又从而略其数则为数何几故先王制礼但略多而不略少如三年之丧期而练再期而祥二十七月而禫而期之丧则十一月而练十三月而祥十五月而禫夫三年之禫内数七月而期之禫反外数两月何也不略少也故古有税服谓闻丧之迟服数将滿而追服之也然而大功以下追服倍严惟恐月少易尽而略於阙日故檀弓曰總小功不税则兄弟远处终于无服是远处追数犹不敢略而略于正数公羊不知春秋并不知礼而汉後儒者遵为金科不惟春秋亡并礼亦亡真可惜也

六年

春城邾瑕【公作葭鲁地之近邾者 备晋也】

晋赵鞅帅师伐鲜虞

吴伐陈

哀元年陈侯与楚子围蔡报吴蔡入郢之役故吴又报之时楚救陈师城父经不书见後楚子卒传

夏齐国夏及高张来奔

齐陈乞阳事高国而陰忌之恐其立荼之必得君宠也因与鲍牧及诸大夫谋去二氏以甲入于公宫高张闻之与国夏乘而如公战于庄败国人追之国夏乃与高张来奔

叔还会吴于柤【策书未详或曰吴召会也】

秋七月庚寅楚子轸卒

楚昭王亲救陈次于城父卜战不吉曰战死耳陈爲我受伐而我弃之而逃讎不如死因命立诸弟为後而赴战焉及战疾作卒于城父公子闾曰君王舍其子而让羣臣从命顺也立君之子亦顺也乃与子西谋潜师闕丧立昭王之子于国而後班师

齐阳生入于齐齐陈乞弑其君荼【公作舍】

陈僖子【乞】之逐高国二氏为废立地也至是召公子阳生于鲁【前年来奔者】而二氏所奔亦适在鲁阳生乃陰见公子鉏【与阳生同来奔者】于南郭驾言重献马季孙而与之试之遂并载出莱门密告以故逮夜急行僖子舍于家因馈者而入之公宫将立之盟诸大夫鲍牧醉而往其臣鲍点曰此谁之命也陈子曰受命于鲍子遂诬鲍子曰子之命也【乘其醉诬之】鲍子曰女忘君之为孺子牛而折其齿乎而背之也【孺子荼也景公尝御绳为牛使荼牵之荼顿地故折其齿】悼公【阳生】稽首曰吾子奉义而行者也若我可必不亡一大夫【言已立必不怨鲍子】若我不可不必亡一公子【言已不立不必杀已】义则进否则退敢不惟子是从鲍子曰谁非君之子乃受盟陈子遂去荼母鬻姒而杀荼之党然未及荼也悼公使朱毛告陈子曰器可两君不可两也陈子不对既而泣曰君王长矣尚疑臣之不从君乎盖教以自为也朱毛复命曰君图之可也乃使毛迁荼于骀未至杀之野幕之下经书陈乞弑其君实弑之也

冬仲孙何忌帅师伐邾【策书未详】

元年伐邾二年取邾田三年又伐之今又伐之

宋向巢帅师伐曹【策书未详】

三年宋乐髡伐曹今又伐之

七年

春宋皇瑗帅师侵郑【策书未详】

定十五年郑罕達帅师伐宋故宋报之然不详其事左氏于罕達之师误以宋公子地当之前既已辨之详矣今又曰宋师侵郑叛晋故也夫郑叛晋已久此时非讨叛之际且宋自定六年晋人执乐祁犁之後晋宋之好亦已断絶何缘又承命而为其讨叛况彼此侵伐事虽未详然经文所书则实是郑先伐而宋报之其後宋郑之师连岁不已至十年宋公伐郑赵鞅且欲救郑而伐宋岂有宋为晋伐郑而晋反助郑而恶宋者左氏妄说也

晋魏曼多帅师侵卫

五年晋伐卫今又侵之

夏公会吴于鄆【谷作繒】

吴来徵会前叔还已会之于柤矣至是公又会于鄆时吴命公以百牢飧之子服景伯曰先王未之有也吴人曰宋飧我百牢矣且闻晋大夫过鲁鲁飧之过十夫晋大夫飧过十则吴王百不亦可乎景伯曰吴将亡矣不与必弃疾于我乃与之

秋公伐邾八月己酉入邾以邾子益来

前年冬仲孙何忌伐邾矣公又亲伐之季康子飧诸大夫而询其可否子服景伯力言其不可孟孙赞景伯诸大夫皆不悦罢飧而出遂伐邾入之处其公宫衆师昼夜掠以邾隐公归献于亳社囚诸负瑕邾大夫茅夷鸿以束帛乘韦自请救于吴谓夏盟鄆衍【即前会鄆也】秋而背盟违君命矣且鲁赋八百乘【晋所定贡赋】君之貳【敌国】也邾赋六百乘君之私【属国】也以私奉貳【以属国所赋而奉之敌国】唯君图之吴从之

宋人围曹

宋自三年伐曹六年又伐曹今又围之明年遂灭之虽不详其事要之利其地也

冬郑驷弘帅师救曹

宋郑方恶郑闻宋之屡伐曹也曰宋之有曹郑之患也因救之

春秋毛氏传卷三十五

卷三十六

钦定四库全书

春秋毛氏传卷三十六

翰林院检讨毛奇龄撰

八年

春王正月宋公入曹以曹伯阳归

前冬围曹筑五邑于其郊曰黍丘曰揖丘曰大城曰鍾曰邗盖先为邑名焉示必灭也至春遂灭之左氏谓宋师将还曹人止诟之因反兵灭曹似乎以诟致灭者非实录也若史记又云曹倍宋又倍晋故宋伐曹晋不救遂灭曹而有之此亦袭左氏倍晋奸宋故晋不救诸语然并无实事可据至经书入不书灭则入原有据地不据地两义入而不据地入之已耳卫师入郕是也入而据其地即是灭秦人入都是也此书例也胡氏以为有义例则不然

吴伐我

吴人听茅夷鸿之言【前年】遂伐我时叔孙辄公山不狃在吴【定十一年自齐奔吴】吴以问辄辄曰鲁有名而无实伐之必得志焉退而告不狃不狃曰非礼也君子奔不适讎国若未臣所适之国而有伐吾本国者虽还而死之可也且夫人之行也不以私恶弃其乡今子以小恶而欲覆宗国不亦难乎若使子为率【向导】子必辞及问子泄【不狃字】对曰鲁虽无与立必有与毙【言效死】且诸侯将救之矣未可以逞乃使子泄为率子泄故道险从武城入【由险道入者使鲁可备】初武城人有侨田吴界与鄆人之沕营者争水而拘鄆人鄆人怨之至是教吴向武城谓吴人王犯尝为之宰与澹台子羽之父善可为内应【此王犯当是子游论语子游为武城宰得澹台灭明即子羽也史记子游吴人名言偃言与王字音之转偃犯同义传狐偃即狐犯是也之父姜文当时策书多散轶故有沿误不然岂有一时有两吴人为武城宰且适与澹台子羽相善者此其误无疑也】向之必克国人惧既而终不克【刘炫谓己克误见正义】乃克东阳而进舍于五梧又舍于蚕室战于夷获鲁一车而同车三人皆被获【一公宾庚一公甲叔子一析朱鉏君战死曰灭大夫战死曰获】献于吴子吴子曰同车而共毙国有死士未可望也【与不狃言合】及次泗上鲁大夫微虎欲夜攻吴子乃设格选壮士属徒七百人使三踊于幕前中选者三百有若与焉【孔子弟子】吴子闻之一夕而三迁乃求行成景伯不许曰楚人围宋易子而食析骸而啖犹无城下之盟我未及亏而盟于城下是弃国也诸大夫不从景伯乃负载书造于莱门且愿以子服何【即景伯】质于吴吴许之既而曰愿以吴王之子姑曹为鲁质吴乃请罢质而盟经不书不成盟也

夏齐人取讙及阐【公作僇後同】

齐悼公之来奔也【在五年】季康子以其妹妻之及即位来迎则女有佚行未敢与也齐侯怒使鲍牧帅师伐我取二邑焉

归邾子益于邾

鲁自吴伐後悔其事乃归邾子而吴反恶之使太宰嚭讨邾囚邾子于楼台而围之以棘且使邾大夫奉太子革为政後所称邾桓公者是也第吴之怒邾子亦必有故而传又失之

秋七月

冬十有二月癸亥杞伯过卒

齐人归讙及阐

前齐取二邑去至是平之臧宾如如齐涖盟齐闻丘明来涖盟乃逆季姬归而嬖之归二邑焉

九年

春王二月葬杞僖公

宋皇瑗帅师取郑师于雍丘【策书未详】

据传郑罕達之嬖臣许瑕求邑因无邑可与使之取邑于他国故围宋雍丘而宋救之反围郑师郑师哭罕達往救大败此又不晓事之言世无已国无邑而可漫取之他国者且许瑕何人家不藏甲岂有家之嬖臣能公然兴师取人国邑此在情理所必无者且前七经书宋皇瑗帅师侵郑与此经前後相应则必罕達因皇瑗侵郑而伐宋雍丘以报之不虞为瑗所败也传于前皇瑗侵郑则曰郑叛晋也于此传则曰许瑕求邑也皆造事非实録春秋定哀之间书宋郑构兵事甚悉必有一大事彼此牵构一十余年而传皆不晓故自定十五年郑罕達帅师伐宋哀七年宋皇瑗帅师侵郑九年宋皇瑗帅师取郑师于雍丘是年秋宋公伐郑十年宋人伐郑十二年宋向巢帅师伐郑诸传皆前後周章无一是者善读春秋者当于此六经通读之而合观诸传以考辨可也

夏楚人伐陈

楚昭王以救陈而死然死则不能救矣陈因就吴而楚遂伐之虽楚惠王不继志顾晋伯余原是如此

秋宋公伐郑【策书未详】

传于伐郑本事全不晓乃又旁造一救郑之事谓晋赵鞅欲救郑卜龟不吉乃使阳虎筮之又
不吉乃止按郑之叛晋已久而于赵鞅则尤致深怨者前二年鞅帅师围戚值范氏在朝歌而
郑罕達与驷弘亲帅师输粟以与郑战经书晋赵鞅帅师及郑罕達帅师战于铁郑师败绩嗣
後未尝有修好之举也即或修好而经此构战或不坐视则已耳有何亲爱而撻冠被发以誓
以蔡此皆策书无文而传故造说以演其事者善读者所当察也

冬十月

十年

春王二月邾子益来奔

前吴伐邾囚邾子今脱而来奔避吴也但吴以救邾伐我而今又使邾来奔邾以我执之故致
我为吴所伐而今又奔我构兵眩乱慢好瀆恶其尚有人理存其间乎此春秋之所以入战国
与

公会吴伐齐三月戊戌齐侯阳生卒

此吴令也吴欲会齐而齐辞之吴乃城?沟通江及淮先召我傲师而我从之乃伐齐南鄙师于
郕齐人弑悼公以悦吴赴至吴师吴子三日哭于军门之外而还悼公不书弑以未详弑者人
也其书例与襄七年郑伯髡顽卒于鄆同

夏宋人伐郑【策书未详】

晋赵鞅帅师侵齐

齐卫屡救范氏与赵鞅为难故乘丧以侵之

五月公至自伐齐

葬齐悼公

卫公孟彊自齐归于卫

定十四年公孟彊以蒯聩党奔郑又奔齐今自齐归卫或曰齐纳之

薛伯夷卒

秋葬薛惠公

冬楚公子结帅师伐陈

吴救陈【见夏楚伐陈传】

十有一年

春齐国书帅师伐我

前年鄆之役齐以我从吴师故憾之至是特遣国书高?帅师伐我及清【齐地】季孙谓其宰冉求曰齐师在清必鲁故也如何冉求谓以一子守而二子帅师可矣二子不可冉求曰若不可则君无出【谓鲁公】一子帅师【季氏】背城而战不属者非鲁人也季孙使冉有从于朝俟于党氏之沟武叔呼而问战焉对曰君子有远虑小人何知武叔曰是谓我不成丈夫也退而蒐乘于是孟孺子泄【武伯】帅右师冉求帅左师樊迟为右季孙曰须【樊迟名】也弱冉有曰能用命焉季氏之甲七千冉有以武城人三百为己徒卒次于雩门之外越五日而右师始至遂及齐师战于郊时师未踰沟樊迟请左师伸约信三刻而踰之衆从之师入齐军既而右师奔齐人追右师齐大夫陈瓘陈庄涉泗孟之侧【即子反】後入以为殿抽矢策其马曰马不进也独左师获齐甲首八十齐人不能师宵谍曰齐人遁冉有请追之三季孙不许传曰冉有用矛于齐师故能入其军孔子曰义也经不书齐败以右师奔也然不书我败以左师实胜也其曰伐我者书例也不曰某鄙以战于郊也胡氏谓不书四鄙但书伐我为鲁罪夫战于郊矣而犹鄙乎且鲁凡被兵必书伐我春秋无两书矣傥非伐我当是伐谁传春秋至哀十一年而犹然梦梦不可解也

夏陈轅颇出奔郑【轅公作袁】

陈轅颇为司徒赋封内之田以嫁公女有余以为己大器国人逐之

五月公会吴伐齐甲戌齐国书帅师及吴战于艾陵齐师败绩获齐国书【艾陵齐地】

报郊之战公乃会吴子伐齐克博至于嬴吴子亲将中军胥门巢将上军王子姑曹将下军齐国书将中军高无?将上军宗楼将下军战于艾陵初吴展如败齐上军齐国子亦败吴上军既而吴子出大败齐师获国书公孙夏闾丘明陈书东郭书革车八百乘甲首三千以献于公当战之时吴子呼武叔曰而事何也曰从司马吴子赐之甲劔铍曰奉尔君事敬无废命武叔未能对卫赐进【赐子贡也卫人】曰州仇【武叔名】奉甲从君而拜至是公使太史固归国子之元【以首还齐】寘之新篋荐之以玄纁加组带焉

秋七月辛酉滕子虞母卒

冬十有一月葬滕隐公

卫世叔齐出奔宋

世叔齐即太叔疾也疾初娶宋朝女而嬖其娣及朝出奔【二年】孔文子【圉】使疾出其妻而妻之疾不忍其娣仍置之他室如二妻焉文子怒欲攻之仲尼止之遂夺其妻疾出奔卫人立其弟遗且使室疾妻焉後以奔宋臣向魑魑出奔卫人并攻疾疾归卫而死

十有二年

春用田赋

季康子欲以田赋使冉有访于仲尼仲尼不对退而私谓冉有曰君子之行也度于礼礼则以丘亦足矣若欲苟而行又何访焉乃卒用田赋用者以也用田赋者谓不以丘为赋而以田为赋也古者丘赋之法每家百亩收其田所出之财以为赋合一百二十八家得田一万二千八百亩为一丘共赋马一匹牛三头谓之丘赋不谓之田赋以田税什一自有赋也今欲分丘赋与田赋为二于丘赋外又征马一匹牛三头谓之田赋虽其赋均出自田中且亦均在此一丘之中然既立田赋名即非丘赋之旧法不以丘而以田矣公谷不知田赋为何赋妄云公田什一今田赋多取过于什一为非正夫公田多取此在宣公初税亩时已逾什一故哀公曰二吾犹不足以什二之征在前时不在此时也且此是田税不是田赋故前汉志畿方千里有税有赋税以足食赋以足兵宣公初税亩此是加税哀公用田赋此是加赋何则以所加者为马一匹牛三头也若贾逵谓田者井也以田为赋欲令一井之间出一丘之赋则一丘十六井将出赋十六倍无是理矣且季孙云以田夫子云以丘并无有云以井者使谓井即是田则丘何尝不是田丘不可名田则田必不可名井又断可知也若胡氏谓籍田以力赋里以入农商不同若但赋田而不赋里是弛末削本失先王重农之意则籍田以力而砥其远迩赋里以入而量其有无本国语夫子议田赋文彼正谓田税里赋力役军旅均有限制不得增加今反云末可加而本不可加则意有畸重己非夫子立说之本意矣况周制九赋凡山泽关市斥币力役皆在邦郊甸稍县都诸赋之内春秋悉索敝赋正索此等岂有诸赋皆未加而独加田赋者祇以诸赋无常如里赋一条必计其利之出入多寡而度其财业有无以为差等如所云赋里以入而量其有无时增时减不比田赋之可勒为定数故略而不书且亦见重本折末之意书所重不书所轻而胡氏全未之解也

夏五月甲辰孟子卒

孟子者昭公之夫人也昭公娶于吴为同姓故讳其名不曰孟姬而曰孟子一似出之于宋者此是鲁人常称论语所云君娶于吴为同姓谓之吴孟子是也但坊记云鲁春秋去夫人之姓曰吴其死曰孟子卒则必夫人生时去姬称吴一如论语所称吴孟子者及其死而并去之以吴即姬姓称姓不可称国亦不可也若不称夫人并不称薨者旧以为孟子之称难于赴告因不赴告遂不称夫人称薨则小君祔葬虽外不赴告而本国礼文必不可阙乃经亦并不一及

此必季氏重抑昭公使不得成小君之丧故鲁史不书而夫子因之此正所以着季氏之恶非讳之也据传孔子与吊适季氏季氏不綯放絰而拜杜氏谓孔子致仕但服旧君母妻之丧故可与吊而季氏竟不服小君之服不着丧冠故夫子即去絰而拜亦不用吊时弁絰之服盖从主节制也按綯为初丧去冠之服及成服而再冠即不綯矣是不綯非不冠也亦惟不去初丧所服之冠故曰不綯今解綯作冠固已非是若弁絰而吊则以爵素为弁澡麻为絰功总通用正旧君母妻之服虽不吊亦何必去絰且吊无拜法历有明文况此时吊季氏上无殡宫即臣子亦并无拜礼惟受吊主人则不问所吊何人而来吊即拜此必季氏不肯服小君之丧故不綯亦不絰而颓然下拜此正策文记季氏不臣之节与经文书卒不书葬正相表里而杜氏误解之也向疑放字是散字字形之讹礼凡初丧服綯必服环絰以环股之绳束之而其末不绞又谓之散絰或季氏不服綯而但服散絰亦未可知而既而思之祇从放字作去字解而不綯不絰尤为明快若谓季既不綯故子亦不絰则天下无执君亲之丧而依违绕指以大礼当酬酢者曰从主节制此何节制也

公会吴于橐皋【吴地】

公会吴橐皋赴吴召也时吴子使大宰嚭请寻盟【寻八年莱门之盟】公不欲使子贡辞之经但书会不书盟以此

秋公会卫侯宋皇瑗于郕【公作运】

吴召会也吴人以卫侯来瑗将执之景伯告子贡子贡请束锦以见宰嚭语及卫君宰嚭曰寡君以其来瑗也惧之故将止之子贡曰卫君之来必谋于其衆其衆或欲或否是以瑗来夫劝其来者子党也劝其不来者子之讎也今一来而果执之则讎者之言验矣嚭曰善乃舍卫侯

宋向巢帅师伐郑

宋郑构兵已久其彼此侵伐历见经文必有以一事为终始者而策书不详前既已屡辨之矣至是传又云宋郑之间有隙地焉曰弥作顷丘玉畅岩戈锡凡六邑子产与宋为成曰勿有是【言俱弃之】及宋平元之族自萧奔郑郑人为之城岩戈锡以居之至是宋伐郑杀元公之孙遂围岩郑罕达救岩又围宋师据此则宋郑争邑别是一事与前彼此侵伐传皆不相合独元平之族居郑一节连及前事而又多可疑考之定十年宋公子地公子辰前後奔陈十一年自陈入萧十四年又自萧来奔此皆见经者若自萧奔郑则经与传两无明文且公子地辰皆景公之弟元公之子经累书宋公之弟其所云宋公者皆是景公以宋入春秋自定十年至十四年皆景公年也景为元公子则其弟为元族与平族无涉且未有兄为元公子而弟为元公孙者今日平元之族又曰元公之孙则非其人矣此其中又必有误而影响以傅会者此皆所当阙也

冬十有二月螽

螽者蝗也蝗至冬而终故曰螽今周十二月为夏十月虽不能为灾然冬尚有此则以异故书之杜氏推长历谓是年应置闰或者十月是九月其候尚温故未蛰则是以常候释春秋非记异意矣

十有三年

春郑罕达帅师取宋师于岩

前冬郑罕达救岩已围宋师至是向魋又帅师来郑人狗曰得桓魋者有赏魋逃归遂取宋师并取他邑去而前所争之六邑又各弃勿有焉

夏许男成卒

公会晋侯及吴子于黄池

吴夫差兴师北征穿深沟于商鲁之间北属之沂西属之济将会晋侯于黄池【卫地】我公与焉及盟吴晋争先吴人曰於周室我为长【泰伯後也】晋人曰於姬姓我为伯【诸侯长也】争先不决据传则晋赵鞅呼司马寅将以死战遂先晋人据国语则吴人服兵擐甲建旌提鼓三军皆譟其声动天地晋师大骇乃请吴称吴伯不称吴王为诸侯长遂先吴人其说不同然当从传不从国语者以经先晋侯不令以吴为盟主则晋先可知若谓经每书吴并不称子至此独称子者亦以其自去僭号夫子嘉之如国语所云则夫子是经但据策书并不据国语国语称公称伯未尝称子且经书吴子不一蔡侯以吴子战于柏举於越败吴于檇李吴子光卒此与书楚子邾子胡子沈子一例而旧以为从降称谬矣时诸侯不至独公与会吴人将以公见晋侯子服景伯曰王合诸侯则伯帅侯牧以见王伯合诸侯则侯帅子男以见伯今诸侯相会而君帅寡君以见晋君则晋成伯矣敝邑将改职贡鲁赋于吴八百乘【七年传鲁赋于晋八百乘邾六百乘此是晋定贡赋之制】将半邾以属于吴【三百乘】而如邾以事晋【六百乘】是执事以伯召诸侯而以侯终之何利焉乃止

楚公子申帅师伐陈【策书阙】

於越入吴

吴自定十四年檇李之败阖庐为越所杀後吴子夫差败越于夫椒报檇李也时越子以甲楯五千败保会稽使大夫种行成于吴吴子许之伍员极谏不从既而吴伐齐员又谏乃杀员而沈之江方是时越子苦身焦思置胆于坐卧即仰胆至是伐吴先以畴无余讴阳【二大夫】自南方及郊吴太子友王子地王孙弥庸壽於姚御之弥庸见姑蔑之旗曰吾父之旗也【时弥庸父先为越姑蔑人所获因见其旗在姑蔑军中】不可以见讎而弗杀也遂战获畴无余讴阳既而越子至乃命范蠡舌庸截吴归路败太子友于姑熊夷【吴地】获王孙弥庸及壽於姚而自帅中军以袭吴入其郛焚其姑苏徙其大舟吴人告败于吴子吴子方会黄池恐

其闻也而杀之及归乃使人以厚礼请成于越吴及越平【越灭吴在传之哀二十二年】

秋公至自会

晋魏曼多帅师侵卫【曼下公无多字 策书阙】

葬许元公

九月螽

冬十有一月有星孛于东方

盗杀陈夏区夫【策书阙】

十有二月螽

十有四年

春西狩获麟

狩者冬猎之名春而名狩以周之春即夏之冬也西鲁西也麟兽名不恒见者书狩礼例书所获则文例也据传西狩于大野叔孙氏之车子鉏商获麟【车子官名鉏商人名家语作车士子鉏商则于车下增士字而以子为姓非是】以为不祥而赐之虞人仲尼曰麟也然後取之按麟为灵兽王者之瑞礼运圣王顺德则麒麟凤凰皆在郊赧孝经援神契德至八极则麒麟臻故公羊亦云麟者仁兽有王者则至无王者则不至此时周德既衰明王不作夫子以圣人乘时间出而不得在位则此王者之瑞将以谁应况麟之为物游必择方翔必择所今出而被获则是圣人而厄于在下之明验也此与论语凤鸟不至河不出图之叹正相表里故夫子作春秋而终于获麟之一时虽春秋纪年当有始终此不惟不终哀公之二十七年且不终哀公十四年之夏秋冬自伤道衰陡然絶笔理固有之若公羊谓西狩获麟应夫子受命之符故夫子见麟而作春秋则刘向尹更始等皆以为瑞灾不并徵吉凶不两立既伤灾见不得复庆为瑞至况终于获麟亦仅见公羊之说而汉儒遵之若始于获麟则虽汉儒亦不遵贾逵服虔等皆以孔子自卫反鲁始作春秋在哀十一年凡三年而文始成有获麟之应虽其言亦皆臆见彼此无所凭然其不遵公羊说则显然也若汉儒谓周在西故夫子欲兴西周又谓立言之位在西方麟为西方兽属金兑为金为言为口则幸而所狩之地偶在鲁西耳万一在鲁东夫子将不作春秋乎至说公羊者云此是周亡之灾汉兴之瑞刘为金刀而汉中在西夫子豫知而伤之此真妖妄之言东汉符命家所为前儒早辟之不足道也

若胡氏谓河出图洛出书而八卦画箫韶作春秋作而凤麟至事应虽殊其理一也又曰文成而麟至又曰鲁史成经麟出于野则以获麟为春秋既成之瑞应事或有之但其曰文成曰成

经曰制作文成岂其作经至哀十三年盗杀陈夏区夫十有二月螽已告成书而麟忽来至然後綴西狩获麟一句乎抑亦连西狩获麟一句统谓之经乎夫必经成而麟至则西狩获麟一句不可谓之经也若必合获麟为经则是麟至时经未成也从来儒者解经定有着落断无言之似是而按之实非者既已信之真言之凿文成成经再三伸说则必使後之人明知书成何时经成何所而乃为此鹘突之语且曰周南关雎王者之风麟趾为关雎之应驺虞为鵲巢之应取小序应字以证已瑞应之说一似关雎诗成麒麟来至者而朱元晦注麟趾竟曰王者之瑞有非人所得而致则全袭胡氏说直以麟趾诗作获麟解矣其可笑如此

春秋终于是年春亦公羊谷梁说谓孔子作春秋终于获麟之一句而汉时公谷早出故遂遵其说以为夫子圣经实止于此若左氏春秋则止于哀十六年夏四月己丑孔丘卒而後策书未尽循年记事附载经後者尚余十有一年安见获麟一句即为絶笔之铁案无如夫子自为书必不能自记其生卒之年故夫子之生见于公羊之传文夫子之卒见于左氏之经文其絶笔之年则姑从公谷为说自汉迄今未有改也若司马迁云夫子厄陈蔡而作春秋则在哀六年与诸说又不同要之说经贵有据能据经据传据策书然後据汉儒之说经者而以义而裁断之庶于是经不大谬耳

春秋毛氏传卷三十六